

The Ohio State University



3 2435 05414809 3

THE OHIO STATE UNIVERSITY BOOK DEPOSITORY



D	AISLE	SECT	SHLF	SIDE	POS	ITEM	C
8	02	29	13	8	12	001	5

OHIO STATE
UNIVERSITY
LIBRARIES



HARVARD
COLLEGE
LIBRARY

عشاقی زادہ : عالم ضیا

5351

7

کنارہ قالمیہ

مرحقی محفوظدر

ناشری
اقبال کتب خانہ سی صاحبی
حسین

استانبول
اور خانہ مطبعہ سی
۱۹۲۴ - ۱۳۴۲

Uşaklıgil


PL248
U78K4
1924

HARVARD
UNIVERSITY
LIBRARY

Kenarda Kalmış

~~OL 32679.38~~

//



Nden

کنارده قالمش

کنارده قالمش

بو کتابی تشکیل ایدن مقاله لرك آراسنده هیچ بر رابطه و علاقه موجود دکلدر، اکر اونلری مطلقاً بر آرایه جمع ایدن بر سبب لازم کلیرسه، عین جریانك کذرکاھنده یووارلانوب کیدرکن نصلسه برکناره ایلدیشهرك قالمش اولمه لرندن عبارت بر وجه مشابهت بولنه بیلیر.

مختلف اسباب ایله اوزون اوزون فاصله لره اوغرایان بر حیات تحریرك متنوع زمینلره اوغرادقجه غیر منتظم بر اسراف قلمله زمانك امواج سیلنه ترك اولنمش اوراقنی کاملاً نسیان حفره سینه دوغری یووارلانمق اوزره کندی حاللرینه ترك ایتمك و بویله کنارده قالمش اولانلری یکیدن دست التفاته آلاماق بلکه دهها مناسب اولوردی، اکر، نه دینیرسه دینسین، هر صاحب صنعتده موجودیتی

ممکن اوله بیلان اعظمی بر حس محویته رغماً ، بر ازده محصوللرینی
نسبهٔ محدود بر حیاته نامزد کورمک املی اولماسهیدی...
قرق سنه یه قریب بر حیات تحریرک یوزلرجه متفرق مقاله لرندن
آریلان بونلره دیکر لرندن فضله بر قیمت عطف ایتمکده بالذات
مسبب بر حق کورمه یورم؛ حتی آرا لرنده موجود موضوع فرق لری
کوستررکه انتخاب خصوصنده بر معیار مخصوصده رعایت اولما -
مشدر . بعضاً بر فکرک دوغریلغنه فریفته اوله رق ، بعضاًده بر
یازینک سوسنه قاپیله رق بو کنارده قالمش شیلری هر قاعده دن زیاده
تصادفه تبعاً طویلادم . یالکیز بالاخره واقف اولدم که کومه نک
ایچنده بکا الوانی اک زیاده کوزلری آلداته بیله جک اولانلره دوغری
الرمی اوزاتمشم . شرقک ادبیاتده ذوقی آزچوق تجملات و تزینات
ایله محمول اولان یازیلره تمایل اولدیغندن ، غالباً بنده عین تمایل
عرقی بی رهبر اتخاذا ایله مش اولدیغمه حکم ویریورم : انسان بوش
یره بر ولد شرق دکلدور . بوکا مائی سمانک ، پارلاق کونشک ،
هر شیئه رغماً متوکل بر روحک و نیکیین بر حیاتک نتیجهٔ تأثیری
دیمه لیدر .



خیال کریان

خیال کریان

— حسین جاہد بک —

« ... خسته بر مخيله نك بيجاره مرده زادلردى ... » هپسى ده وجوده
كلمه مه لر ينك انتقامنى قلبمه ياقيجى بر تحس بر اقله آلديلر. » ح.ج.

اون آلتى ياشنده ايدم . او بلكه اون اوچنده واردى ،
تا كوچكلكدن قالمش بر اعتياد ايله قومشو چو جقلريله برابر بزم
أوك باغچه سنه دولارلر؛ بن نجره مده بر مجموعه اشعاره ، يا خود
باغچه نك بر كنارنده بر حكايه خوليا پروره دالاركن اونلر آغاجلرك
آراسنه صاليو يرلمش بر الای رنكارنك چياغين قوشلر كې كورولتيلريله
بم اون آلتى ياشمك رؤيالرينه طربكير اولورلردى .

هپسك كوزليدى؛ براز كوچكجه ، براز يومو قجه كوزلرينك
ايچنده سياه بر آتش وار ايدى كه بوتون سيا سنه ، بر ر ضيای نشوه
منبعى كې ، موجا موج ، خندا خندا لتاعلر سر پردى . قيصه ،

طونبول پارماقلىرىنىڭ آراسىنىڭ بىر مەسكەن بوسە كېي كولو مەسەين
 چوققورلى اللەيە دىزلىرىنىڭ بىر قارىش آشاغىسەنە قدر آنجىق اينى
 قىسە اثوابنى قالدېرەرق ، آغزىنىڭ ايچىنىڭ يىكپارە بىر قوس صدف
 كې پارلايان دىشلىرىنى كوستەردەك كىندىسىنى قوغلايان چوققۇلاردىن
 كرى كرى بىر قاچىشى ؛ سىيە كرىن چورابلىرىنىڭ يارىسەنە قدر
 يوكىلىن اوزون قونجىلى مېنى مېنى پوتىنلىرى اوزۇرئەنە اويلەھوادار
 بىر اوچىشى ؛ بەئزى بوتون بوكرۇھك اوكنە دوشەرك آرقەسەندە
 اثوابنىڭ قىورقۇللىرىنى صاللايە صاللايە ، اوموزلىرىنى كىرە كىرە بىر
 يورۇشى ؛ سوكرە بىر رقىبەيى دوشورمكە موفىق اولىنچە ، ياخود
 قاچىلە مایە جىق بىر بىر زخىدن قورتىلىنچە اويلە موسىقىپەرداز ، بلور
 آھنك بىر كولىشى وارايدى كەاونى بوتون باغچە مەزە مداوم اولانلارك
 فوقنە قوردى .

بىن ، كوزللكىلە ، شوخلىغىلە ھېسەنە تفوق ايدىن بو قىزە حسد
 ايدىيور ؛ اونى بو درجە فوق العادە بولمىقەن ، فائىقىتىنى وجدانانا انكار
 ايدەمە مەكەن متولد غىرىب برازاى درون ايلە اوندىن نفرت ايدىيوردم .
 اوت ، اون آلتى ياشمىك بوتون كىشائش سودا مىللىلە سوەجك
 ىردە بولطيف مخلوقە درىن بىر خصومتلە دشمن ايدم .

اونك بالعكس بىكا ابتلاسى واردى ، سولە دىكىنى حس ايدىن
 قىزلەرە مخصوص بىر مەجلوبىتە ، مطلقا غالب چىقمىق ايسەين نىسوى
 برھوس تەكملە بىن مغلوب ايتىمكە چالدىشیر ، بىكا صوقولوردى ؛

فقط حس ایدیوردم که بوقنادلرینی یوزمه سورن کبوتر سودایه
آلی اوزاته جق اولور سهم بکابر کوچک تونی بیله براققسزین فرار
ایده جکدی.

آه! بوخیالک سودای محال اولدیغنه بر حس مهمله قناعت
ایدن وجدانم اوکا نه بویوک کین طاشیوردی!..

ایستردم که اویونلرده دایما مغلوب اولسون ، بالعکس دایما
اونک بلورین قهقهه غالبیتله اوزولوردم... ایستردم که بریسنک
دوشدیکنی ایشیتدیکم زمان باشمی قالدیره رق اونی توزلره بولانمش،
بر طرفی اینجمنش، کوزللیکنه خلل کلمش کورهیم ؛ بالعکس اونی
دایما یره قاپانمش بر رقیبه نک قارشیسنده سه که رک اعلان ظفر
ایدیور کورردم... ایستردم که اونی بر کون توقاتلا سینلر، اوالتماغندن
بر عذاب تحملفرسا دویدیغم کوزلری آغلاسون. بالعکس اودایما پر
نشوه، بوتون بومینی مینی خلقک اوکنه دوشر، صاغ قولنی بر
قایقچی کی هوالره قالدیره رق - آرش!.. - هپنی اتکلرینه طاقه رق
چکر کوتورردی.

هر دفعه موفقیتنده بکا بر باقیشی، یاخود نفس آلمق ایچون
یانمه کلوب اوطوره رق کویا کتابلله کوزلرمک آراسنه کیرمک
ایسترجه-سنه قیورجیق صاچلی باشنی بر اوزاتشی وار ایدی که :
« بنی سومه یورسکیز، اوپله می؟ ایچون باقهیم، سوه جکسکیز بختیاری
شو بنم اتکلر مه یاپیشه رک قوشوشانلردنمی انتخاب ایده جکسکیز؟ »

دیمك ایستردی، صوکره بومعناى استهزایی براوموز سیدکنتیسیاه
تقویه ایدەرك ینه اوچار کیدردی.

بوقیزه غلبه چالمق ایچون نه بویوک حرصم واردی ! آرتق
بونالیوردیم ؛ برشی یایمق ، اونى تحقیر ایدەرك مغلوب ایتك ایسته-
یوردیم ؛ اوندهده بنمله شو مدید محاربه سا کتهده دائما تأخر ایدن
غالبیتدن متولد بر حدتک یاواش یاواش فورانی حس ایدیلیوردی.
نهایت بر کون...

بر کون ... او کون پک نشودسی واردی ؛ او کون هر وقتدن
زیاده کولیوردی ، او کون کوزلری دها بلیغ بر معنی ایله : « بنی
سومه یورسکیز ، اویلدی ؟ ... » دییوردی ؛ و او کون بن هر کوندن
زیاده صیقیلیوردیم . نهایت نا کهان قوشارکن کوچک چوجقلردن
بری بر آغاجه چارپدی ، بر دقیقه ایچنده اوستی باشی قانه بویاندی ،
چوجفک برونی قانایوردی . بومنظره هپسنى قور قوتدی . بر دقیقه
اول قایناشان چیلغین آلابی شیمدی دهشتدن دوکش ایدی .
اوده ، او بنی مغلوب ایتك ایسته ینده شیمدی بندن مدد بکله یەرك
دورییوردی . بن یرمەدن فیرلادم ؛ اوح ! آرتق غالب چیقمغه
عزم ایتمش ایدم . چوجغه قوشه جق یرده اوکا ، اوت دوغری اوکا
کیتدم ؛ اوزرندن نا کهان بر رعشه هراس اوچان چهره سینه
صوقولەرق : « نچون چوجنی چارپدک ؟ » دیدم ؛ فقط سسم بنی

اور کوتدی ؛ آمان یاربی ! بو حقسنز یالانله باغیران سس ، بو وحشی ،
 بو چرکین سس بنم سسمنی ایدی ؟ ..
 بر آدیم کری چکیله رک اولا آلرینی قاووشدی دی ؛ صو کره
 بردن او پارلاق کوزلرینی اورتن برر ایری قطره یاش ایله ، یاناقلرندن
 فیشقیران آتش ایله بکا باقدی ؛ حدتندن بو غوق برسسله « بنمی ؟ »
 دیدی ، غیر منتظر بردانه مهلاکله سینه سی دلینمش مجروح بر قوش
 نگاه سرزنشیه بکا : « بنی سومه یورسکیز ، او یله می ؟ ... » معناسنی
 بردها ، صوک بردفعه دهافاده ایتد کدن صو کره کوز یاشلری
 بوسبوتون بوشاندی ؛ دها صو کره اوتانه رق و آرتق بنی کورمک
 ایسته مه یه رک قاچدی .

هیئات ! بودفعه ینه بن مغلوب اولمش ایدم والی الابد ...
 او وقتدن بری سنه لر زهر آلود یارالر آچهرق کچدی . شیمدی
 بعضاً اوزرندن مخرب باد شتا کچمش بر بستان پریشانک پثر مرده
 بقایای اوراقی شکلنده حزین اصفرار سیما سیله بکا بوشه چیقمش
 عشقاردن ، تهی قالمش امللردن ، هپ نتیجه حسرتله بیتمش
 خولیا لردن ، بوتون بی بخت کچمش بر شبابک ماتم انکی زشعرلرندن
 بحث ایدن اسکی کاغد پارچه لرینک قارشیدسنده آراصره دوشونوب
 آغلامق ایسته دجه ، یانی باشمده حجره تنهامک سکون رؤیا پروری
 ایچنده ، او اون آلتی یاشمده سومه دیکم ایچون نفرت ایتدیکم
 لطیف مخلوقک خیال کریانی قیویرجق صاحبلریله باشنی یوزمه

سوره رك اوزاتیر وپر سرزنش بر صدای مهترله : « بنی سومه -
 یورسکیز ، اوילה می ؟ نیچون باقهیم ، بوکاغد پارچه لرینی می سومك
 ایسته دیکیز ؟ » دیر...
 ۱۳۱۳



تابوت محتشم

تابوت محشم

بو کون ، مملکتک نزیه ومبجل ، بلند ومنور نهی وارسه
آرقه سنه طاقه رق هر وقتدن دها یو کسک کورینن خیال سیاسی فوقنده
طیران ایده ایده ، اونک تابوت محشمی تعقیب ایدر کن هم کریان
ومتأثر ، هم مطمئن ومتسلی ایدم . استاد ، وصف اساسیسی
بومو کب اغترابنده الک بارز شکلیه کوستریوردی: محترمیت... اوزون
بر حیات الامک اونی بابا صفتیه ، وطنپرور صفتیه ، صاحب
ظهور فکر صفتیه تخریب ایچون بی فاصله ضرباتی حواله ایدن
مصائب سلسله سنک ایچندن روحنک صاف وعلوی موجاتنه برذره
شائیه ، ناصیه سنک پاک ودرخشان کونشنه بر کوچک سایه ابر ،
خطواتنک متین ومستقیم توجهنه بر اوفاق لرزش تزلزل کلمه دن
چیقوب یوروین موجودیتی کبی ایشته بو کونده اطرافنه ، پیش

وېسنه اولاد و احفاد يني آله رق، باشنك اوستنده سو كيلى سيرانلرينك
 سو كيلى كونشيله، وقار اديبانه سنك ايچنده يو كسله يو كسله يوروين
 تابوتي، بلليدي كه اديتك قايسىنى عين حجت محترميته چاله جقدى.
 بوكون آرتق كندى كنديمه يالكىز قالمق احتياجيله اودامه
 قاپاندقن صوكره، ويالكىز قالنججه اونكه مشغول اولمق احتياجيله
 شو سطرلري يازمغه باشلار كن كوزلرمك او كنده، نه قدر زمانلردن
 برى مسعود تبسملرله آشنائيسى غائب ايدن سيماسنده شيمدى بختيار
 بر خنده انبساطك لمعاتى كوريورم؛ اويله ياشامغه موفق اولدقن
 صوكره بويله اولمكدن ممنون اولان بر حس سعادتك شعشعه
 اطمئنانى. مزدحم خاطر اتمك آره سندن استاد اكرمى، او كابو عنوانى
 اودرجه ياقيشديران حاليله، نظرينك نهپ كنديسندن صوكره
 كله جكلره قوت وتسليت ويرن، حمايت وصحابت وعد ايدن معنای
 گرميله كوريورم. اونك كوزى كنيج نسللرى چاپراشيق بوللرده،
 قارا كلك واديلرده قضالرى دفع ايتكم ايسته يهرك تنويره چالیشان
 بر ييلديز ايدى كه دائما تشجيع ايدن ضياعى كولومسر، فتور
 زمانلرنده آرانوب بولنه رق دها امين بر قلبه يورونمك ايچون
 شوق ابتسامندن تازه بر قوت آليئيردى.

او ييلديزى، بن، اك مفتور بر زمانمده، آرتق بر دها
 قالمق اوزره مهاي سقو ط اولان عزيم سعيمك بر هنگامه
 شورشده بولمش ايدم.

اوتوز سنه اولدی . حیات تحریره هنوز انتساب ایتشدم .
 ازمیرده اوچ بش کنج ایدک ، حکومتک وسائط تضییقه سنه
 اوزمان اوقدر معروض اولمایان بو محیطده بر جریده تأسیس
 ایتدک که هم سیاسی هم ادبی ایدی .
 زده اکثریت اوزره یأس آورصفحات اراؤه ایدن بر دوره
 مجاهدهیه کیرمش ایدک . اوموزلرمن ضعیف ، قلیلرمن نارین ،
 عزم و قرارک قوتنه رغماً اطراف ایله تماس خشین ایدی . بردن
 هر شیئی نومیدی سیاهلقلرینه بوغان سمامزک ایچنده او ییلدیزدن
 بزه بر خنده تشجیع کلدی ؛ و بردن دامارلرمرده کنج قائمزک
 آرتق بردها سونمهیه جک بر شوق انشعال ایله طوتشدیغنی کوردک .
 اوزمان نثر تکاملات تجدیدیه سنده بر بشقه اینز آرایوردی .
 رکاکت آلود تجربه لری آراسندن دهامیال وسیال برلسان بولمغه
 هوسکاردی . « خدمت » بو طرزده تجربه لریک طفلانه برشکلنی
 اراؤه ایدن « منشور شعر » لردن نشر ایدیور ، ینه تفرقه ستوننده
 « سفیله » اسمنده اوزون بر حکایه ملیه بولندیریوردی . استادک
 نظر مروقی بو تجاربک بوتون صافدرونانه مساعیسی آراسنده
 مستعد انبساط بر تازه تخم کشف ایتدی ، و روا کورمه دی که
 اطرافک غیظ و هجومی ایچنده بو استعداد بوغولوب کیتمسون .
 اوزمان استاد ایله بو پریشان شیلرک محرر رکیکی آراسنده بر
 مکاتبه باشلادی ، سنه لرحه منتظماً دوام ایدن بو مکاتبه کوچکک

بویو کنه دائماً محتاج بر حس التجاسی، بویو کک کو چکنه اوشنمه یین،
یورولمایان بر تقید کریمانه سنک امداد وارشادی اساسنه مبتنی ایدی.
ظریف، پیرتمایان، یالکمز خفیف بر تماس ایله چیزن و چیزکن
محقق بر تخم صحت آشیلایان بر استهزاسی واردی که هر مکتوبی
کلدجه بکا بر دسته دیکن، فقط در حال نظر نواز چیچکلرله
ترین ایده جک دیکنلردن مرکب بر دسته کتیرردی.

اونی از بر ایدیلن اثرلرندن، جزؤ داندۀ طاشینوب کزدیریلن
مکتوبلرندن صوکره بالذات طانیق ممکن اولونجه ینه هرشیدن اول
بو اینجه و ظریف استهزاسنه شاهد اولدم، و دینه ییلیر که بو کندیسنی
اک زیاده سودیرن شیردن بریدی.

استهزاسنک یانده او یله بر مفید اولوق، تصحیح و تعمیر ایتک،
دوشونشیلری دوزلتمک، قیریق شیلری اصلاح ایله مک آرزوسی
واردی که اونک تمنای حس ایدرکن صاچلیری طارایان، فسنی
دوزلتن بابا پارمقلرینک آلتندۀ بر چوجق لذتی دویاردیکز.
وبیلیردیکز که بوتون او اگریاری کورن، بوزوقلری دویار
استهزایه حاکم بر ذوق نفیس و مستثنا وارد.

اثرلرینک هر سطرندن ادا و مشوارینه، حال و قاله قدر بر
اصالت ذوقک نقاست کبارانه سی حکم سوردردی؛ آغزیدن چیقان
کله لک بر کل یا پراغنی ا که جک قدر ثقلتی یوقدی، چامورلرک
ایچندن یورورکن کورولوردی که آیاقلرینک اوجی بیله کیرلنمه یه جک.

اونك ايجوندر كه اك چاموردن بر دور آراسندن كچمش ايكن
استنه بر كوچاك لكة بيله صيچرامامش و اوتوز سنه مملكتك
انسال فكر و عرفانه معلمك ايتمش ايكن هيچ كيمسه نك خاطره سنه
آغير چكه جك بر طاش براقامش ایدی .

او ، انسال فكر و عرفانه بوتون قوه حياتی ، بوتون جمله
موجودیتنی ویرردی .

دور حمیدینك اك محتاج تعقيب و تفتيش سیمالرندن بری ايكن
ينه او دورك اك اندیشه بخش محافل افكارندن بری اولان
« ثروت فنون » حرکت ادبیه سنه كافه حرارت روحنی كتیروب
ویرمشدی . هفته كچمزدی كه النده باستونيله ، یا بكسندیکی بر
صحیفه ايجون تقدیراتی كتیروب هدیه ایتك ، یا حذر ایديله جاك
بر تهلكه ايجون تجربه لرینك حكمتندن بر فائده براقمق اوزره
مطبعه نك مردیونلرینی چیقماسین . اوزمان اطرافنی آلیردق ،
قارشیدنده بولونمقدن ، اونی ديكله مكدن تقویتاب اولوردق .
اونك محاضره سی هیمزه معنوی تزلزللرك آراسنده بر معبدك
روحانیت شفا بخشنده آرانان تسلیت و قوتی ویرردی .

لسان و فکری ، ادب و صنعتی کاله سوق ایدن هرغایه تجددك
بر حنی طبیعیتی ، بر شفیع ازایسی ایدی که ، كچمش عدایدیلن
بر نسلك عنعنات سلطنتنه مقید براقه بيله جك افكار مکتسبه نك
فوقه چیقهرق اصل وظیفه سلطنتك انسال جدیدیه قارشى حقوق

ابوت در عهده ایتمکده اولدیغنه وقوف ایله کندیسندن صوکره کلنلره دائماً کرم ونوازشکار بر محبت وصمیمیت کتیرردی .
 استاد یالکز اوزمانک « ثروت فنون » حرکت ادبیه سنه دکل صوک دورکینه « ثروت فنون » حرکت ادبیه سنه عین مربوطیت روحیه بی کوستردی .

غالباً اوچ سنه اولدی ، شیشیلیدن تقسیمه دوغری یاواش یاواش یوریوردق ؛ صوک سنه لرك ضروریات حیاتیه اوزون فاصله لره اوغرایان تصادفلرده یکدیگر مزه سویله نه جک بریکمش شیلر اولوردی . ممالکتدن ، احوال دن بحث ایدر ، صوکره هرا یکیمزده ده اذا تولید ایدن زمینلردن قاجوب دهامونس بر افقه چیقماق احتیاجی اجرای تاثیر ایدرک ادبیاتک صوک تظاهراتندن بحث ایدیوردق . بکا دیدی که :- صوک نسلک بزم وسزک نسللر مزه قارشى پک چوق اسباب رجحانی وار . لسانه ، صنعت هه حالده بزدن وسزدن دهه زیاده صاحب ، دهه زیاده حاکم اولدقلری کورولیور . سرمایه معلومات خصوصنده دهه هم دهه ایرکن داورانمشلر ، هم دهه زنکین اولمشلر . بونسلله ادبیاتک آتیسندن امین اوله بیلیرز . بونی سویلارکن چو جوقلرینک کندیسند دهه قوی اولدیغنه افتخار ایدن بر بابا حظیه مسعود کورونیوردی .

استاد طینتنده برانسان ، واونک رفعتنده بر امیر ادب ایچون بوخس پک طبعیدی . حیات صنعت ولسانده اکرم اوله یوکسک

بر شاهقه یی تتویج ایدن ، منابع موجاتی اک صاف نزیه مناطقدن
آلان بر بحیره درکه بوتون انسال ادب هپ اوندن انشعاب ایدره رک
هربری بر طرفدن گذرگاه مقدرینی تعقیب ایله یی ارماقلردن
عبارتدر .

لسان اونک ید اعجازنده اوپله بر استحالہ تصفیہ کچیرمش ،
نژده ، نظمده صنعت اونک میزابہ سحرندن اوپله بر نزاہت واکملیت
اکتساب ایدره رک چیقمشدرکه تاریخ ادبیاتده بوقدر بلند بر افقه
اعتلا ایدن باش کندیسندن صوکره کلن چوجقلرینه بی پروا بر
عظمتله ، واو عظمتک ایچنده بی پایان بر مباحات ایله باقه بیلیر .
اولاد فکر و عرفانده کندیسنه او قدر اسیاب سعادت و مفخرت
بولان بو استاد اصل حیات عائله سنده نه بدبخت بر پدردی .

گویا کندیسنه قوجه بر ذریت ملتی اولاد اوله رق بخش ایدن
قدر اوکاتک ارچندی بر اقه رق بوتون چوجقلرینی ، اک فجیع
شرائط ایچنده صره سیله آلمش ایدی .

نهایت نژاد حیاتنده آرتق بردها تعمیر قبول ایتمه یه جک اساساتی
قیران مدھش بر ضربه اولدی . او مصیبتدن صوکره عمرینک
یکانه قیمتی هر دقیقه سنک کندیسنی اونک مزارینه برازدها تقریب
ایتمه سندن عبارتدی . دینه بیلیرکه او ماتمندن صوکره اک بختیار ساعتی
ایشته او دم وصلتی خبر ویرن ساعت اولمشدر . مصیبتک وقوعندن
ایچه زمان صوکره ایدی ، توفیق فکرتله بی آدایه ایسته مشدی .

یزه نژاده دائر خاطره لرینی ، مرثیه لرینی اوقومق ایسته یوردی .
 اوکون کندیسینی کورونجه روحزده برعقدۀ بکا دوکوملندی ،
 اوپله خراب و شکسته ، پریشان و مضمحل برحالی واردی که اوزرندن
 اوزون سنه لرك سیلابۀ بلایاسی کچمش ظن اولنوردی .

دسته دسته اوراقنی چنقاردی ، نژادک خاطره لرینی ، یادکارلرینی
 پیغدی . و اوقومغه باشلادی . اوقورکن ، آکلاتیرکن ، اوغلنه
 فریاد ایدن بر شکایتیله ، بر یادکارک حکایه سیله کویا اوکا بر غریب
 حیات ویریورمشجه سنه سیماسنک معنای مآمی دکیشیور ، سببی
 بر هیجان ملاقاتک اهترازلربله جانلانیوردی .

اوقونان پارچه لر اوپله علوی و مهیج ، اوپاندیریلان خاطره لر
 اوپله محرق و مؤلم ، صوکره بو ماتمنک ایچنه کیروب یاشادجه
 اولن ، اولدجه مسعود اولان بابانک فجیعه سی اوپله مؤثر و مخرب
 ایدی که ، بز ایکیمز ، اضطرابدن قیورانیور ، طاشماق ایچون
 کوکسمزی کویا بر منکنه ایچنده صیقیوردق . نهایت مدهش بر
 طغیان بکا اولدی . اک اول کیم باشلادی ، بیلنه مزدی ؛ فقط بر
 دقیقه اولدی که او برر برر اوقونان کاغدلر ، او بیجا ه شکایتلر
 پیغامش ماصه سنک اوستنه قاپاندی ، بز ، آرتق اوطوره مایه رق ،
 ایاقده ، صارصیله صارصیله ، حایقیره حایقیره آغلایوردق .

بو کوچک اودا عظیم و اوپلا لرله دولان بر ماتمنکده اولدی .

بوفوراندن صو کره اونک سیماسی اوزرندن مدهش بر روز کارله
صاغناقلر صاورولمش بر سما کیمیدی ..

آرتق نه زمان استاده تصادف ایدرسهم اونک بویله صاغناقلرله
بیقانان ، هر دفعه سنده خطوطی دها درین ماتم ایزلریله قازیلان
چهره سوز ، کورر ، و ، هیهات ، بو آجینک نه دیمک اولدیغنه پک
واقف بر قلبله صیزلایه رق قارشیسنده دائماً او کونی تخطر ایدردم .
فقط ، بو کون ، وقور بر ادا ، مستریح بر مشوار ایله ،
او تابوت محتشمک آرتق مسعود بر حیاته متنفس ایمشجه سینه آسوده
معنی ایله ایلریله یشنه باقارکن ، اونک فوقنده آرتق نالان و پریشان
دکل ، کوچک صویه ، او آرامگاه نوشینده او پرستیده روحک
یانه کیتمکدن ممنون ومنبسط ، خیال خنداننک پروازینی کوردم .





مسینا ایچون

مسينا ايچون

مسينايي ، يكرمي سنه اول زيارت ايديلن او كوچك ظريف
شهرى ، بوكون ، شودقيقه ده ، خاطر اتمك اراسنده ارار كن اجنحه
خيالملك نالان وماتمكير برخلجان مضطربانه سى وار . مدهش
براختلاج حيا تشكندن صوكره اعضاى تارماريني ، عظام خردوخاشنى
سره رك رماد خرابيتى ايچنده سونوب اريين اوبلده مصيبتزده نك
ايچنده ايليش ، جك برسقف متبسم ، كنارينه قونه جق بردريجه
نشاط بوله ميان طائر خيال ، كويا پروبالندن قطرات سرشك الم
دو كهرك ، براهتزاز تاثرله ، برار تعاش مخافته دولاشيور . يكرمي
سنه اول كوريلوب سويلن مسينايه بدل شيمدى بركتله دهاشه
انقاض ، او غلغله شطارت حيايه بدل شيمدى جانشكاف برانين
ووايلا بولمقد لال ومبهوت ، بولوحه مصيبتك اوزرنده بطى

بر پرواز ايله كنش دائره لرله دونه دونه خاطراتك ايچنده مسينايي،
هنوز دونه عائد زنده و پرنشوه مسينايي آرايور و صره ايله
كورييور: بحر سفيد حوضه سنك الكامين ليمانلرندن بري عدايديلن
كنش مرساسني، نپتون نامنه ياپيلمش صنعتكارانه چشمه سيله
اوزون ريختمني، وقتيله بر عرب جامي اولان سانتا آنونچياته لالا
كليساسني، لاماتريچه دير كيرينك مختلف الالوان مرمعلرله مرسسم
جبهه سني، اطرافي دولو مباني قيمتدار ايله مملو قورسوقاوور
جاده سني، الشمس بيك جلدي متجاوز بر ثروت عرفاني محتوي
كتبخانه سيله اون آلتنجي عصر اواسطندن بري پايدار اولان
دارالفنوتني برر برر يكرمي سنه لك برنسيانك طبقات رمادي
آلتندن چيقارييور؛ فقط هيات ! بونلري، بوتون بومكلف
ومطنطن آثار عمران و عرفاني، شيمدي بر ضربه دهاشه مات
ايله اوزرينه يقيلان كتلات انقاص آلتنده جان چكيشيور كورييور.
وبوخاطراتي دولاشيركن، بونلري تكرر احيايه چالشيركن،
خيال، شهرك ديكر بر نقطه سنه، بوتقطه عائد بر خاطر سنه
كيدوب، اوراده، يكيدين تازدله تن بر تاثرله دورسيور. شهرك
جنوب غربى ياماچنى بر حقيقه دلنشين شكلنده قاپلايان مزارستاندن،
او ظريف شكل دلنوازيه حيات مضطربه بشريه بر مأواي كزين
سعادت وعد ايدسيور ظن ايديلن قامپوسانتودن بحث ايدسيورم.
بوتقطه ده، يكرمي سنه اول ينه بويله درين برالمه دوكمش،

تارو حك ايچنده صيزلايان برياره ايله پریشان قالمش ايدم .
 حزيرانك نصف اخيرنده ایدی . پیره ايله سچیلیا آراسنده کی
 مسافه یی اولو فقط درونی برهواي عصيان ايله شیشکین دكزك
 کیزی چالقانتیلری ایچنده ، خیرپالامایان فقط بونالتوب یوران
 بریولجیلقله کچمش دم . بکا پک مدید کلن برزمانی افقده قاره دن
 هیچ برنشانه کورمه یه رك ، کنیش و کویا دارغین ایمشجه سینه
 بولانیق بردكزك یکنسقی کلال آوری آراسنده مزعج وزه دن
 نشأت ایتدیکنه حیرت ایدیلن برصالینتینک اوصانجلری ایچنده
 اویوشه رق کچیردکن صوکره قالا برا داغلرینک کورونمه سینه
 ناشکیبانه منتظر دم . صباحلین ، هنوز اطراف قارا کلقدی ، کوکرتیه
 چیقدم و اطرافه باقدم . تا قارشیده کیجه نك هنوز تماميله سیلنمه مش
 بقایای ظلامی ایچنده اولامبهم برضیا کوردم که بکا مخمور کوزلرینی
 قیریه رق :- ایشته ساحل ! .. دیوردی . ودقیقه دن دقیقه یه ، صباحك
 سیسلری صیریلوب قالدقجه ، ساحل ده اوضوح ايله ارتسام
 ایدیور ، انحنات واسدادی آراسنده قویوشیل بر زمین اوزرنده
 بیاض قابارتمه لره بکزه یین کویلر سچیلیمکه باشلا یوردی . نهایت
 قالا برا یاما جلری کول رنکهنده ستره لرندن یاواش یاواش چیقوب
 فوقنده کونشك پنبه ضیالریله بریغین مائی بلوط شکلنده پارلادی .
 آن مواصلتی تقریب ایتک ایسته یین برهیجانله ساعتلی
 چکیوردم . آرتق بوغازه کیرلمشدی . سچیلیا ساحلی ، لطیف

اعوجا جاتنده نار ، زقوم ، اينجیر قوروجقلری صاقلایه رق مبدول
 برکونشك شعثاتی آلتنده کولومسه یوردی . بوشطارت منظره
 آلتنده هیچ تخمین ایدیله مزدی که نیجه نیجه مصائب تاریخیه نك
 خونین الواحی ، دهاش علل مستولییه نك تخریبات ماتی ، مکرر
 آفات طبیعیه نك انقاص صدماتی اویویور . بوشیل ، متبسم ، مشعشع
 جزیره ، هیچ فرض ایدیله مزدی که ، برچوق خاطرات الیه نك
 مدفن کریه داریدر ، هیچ دینه مزدی که اونك بودرجه شن کورونن
 روحنك اعماق ماضیسنده جکرسوز ، خرد فرسا صحائف سیاهك
 غریو نالشکاری طنین آوردر . هله نصل تخمین اولنه بیلیردی که
 یکر می سینه صو کره برصرصر مصیبت بوجزیره بی قاووروب
 کچه جك ، برصدمه دهاشه عناصر بوساحه خندنا کی صارصوب
 بوکه جك ، غضوب وقهار برهجومك حرص عقوری ایچنده برید
 بی انصاف بحر سفیدك مائی صولرند بر نیلوفر شبابیله کولومسه ی
 سچیلیای آلوب بوکه جك ، ازه جك ، قویاروب سوکه جك ،
 صو کره مدھش بر خنده اطمینان غیظ ایله ، فرسوده و پزمرده ،
 سیدکوب اته جق !

نهایت مسینانك براوراق ییچقیدنه بکزه یں وبوک ایچون
 اسکیدن چانقلا نامیله یاد ایدلمه سینه سبیت ویرن لیمانه کیردک .
 کوچك ، فقط خوش ، ظریف بر شهر . کویا مزعج یوجلیقلاردن
 صو کره انسانه یشیل کوزلریله کولومسه یں بردوشیزه مسافر پرور ،

بحر سفید چولنك سكون وارانمش وعد ایدن برواحه سی ...
 المده رهبر مسینا ایچون اوچ ساعتك برزیارتك کفایتی
 خبر ویریوردی ، حال بوکه بورادن تا اوزون یاز کوننك آقشامی
 حرکت ایده جك ایدك . بو کوزل شهره تخصیص اولنه جق قوجه
 برکون واردی .

ایتالیانك بوتون جنوب شهرلرنده واکزیاده سیچیلیا قصبه لرنده
 نظر دقته ، برشرقلینك نظر دقتنه چارپه جق غریبه ، بوراده
 ایتالیا نجه نك انسانه عربجه تأثیرینی ویرمه سیدر . واپورك اطرافنی
 آلان قایقچیلرك ولوله سی کلماتك وضوحنی صاقلایه رق سامعه کزه
 قدر برشماقت مشوشه ایچنده کلیر کن تحف برتشابه تصوت وتلفظه ،
 برقرابت آهنگ وترنمه سزده سوریه سواحلندن برلیمانده بولونمق
 واهمه سنی اویندیرر . بوغریبه نی عربلرك سیچیلیاده مدت مدیده
 اقامتندن قالمش بریادکار اولمق اوزره تلقی ایتك بلكه یا کلش دکلدر .
 شهرده بویوك برتماشا یایدم . درلو اختلاجات تاریخیه وطبیعیه
 ایچنده ، استیلالردن اختلالره ، جنک لردن قتل عاملره ، وبالردن
 زلزله لره یووارلانه یووارلانه تخریبات اعصاردن الكزیاده خیرپالان
 بوبلده ده قدیم یونانیلردن یاخود عربلردن ، نورمانلردن یاخود
 اسپانیوللردن بك آرز یادکار واردی ؛ مبانی عتیقه نامنه بودرجه
 فقیر اولان برشهرده کوريله جك معابد ، زیارت اولنه جق دارالفنون ،
 کچيله جك اسواق ومیادین براوزون کونی دولدیرمغه کافی دکلدی .

شهری هیئت عمومیه سیله، بوغازی و داغلری وسیع برداثره رؤیت
ایچنده کورمک ایچون آراهه ایله، هرایکسی ده اون آلتنجی عصره
عائد اولان قاستیللاچیو وقونزاغ قلعه لرینک مبنی بولندقلری تپه لره
قدر کیتدم. اک صوک مرحله توقف، حیاته ده ده اک صوک مرحله یی
تشکیل ایدن، مزارستان اولدی. فقط بو مزارستان دکل،
رتبه نك کنیش برصیرتی سوسله یین برباغزار فرحفزا ایدی.
طاتلی میلرله تپه یه طیرمانان صاری قومارله مفروش کنیش
جاده لر آغاجلرک، جابجا طرح اولمش چنزارلرک، شوراده بوراده
یشیل کومه لرک آراسنده صاقلانمش ظریف ومصنع هیاکل مقابرک
آراسندن، انسانی یورلما یه رق، خطوه بخطوه چیقلاچقه اطراف،
ایلریده دکرک سطح لاجوردینی ده کنیش ساحه لرله آچهرق
تایوقاریده مزارستانک اصل خجیره وصندوقه لره مخصوص بنای
ساده سنه ایصال ایدیوردی. بناساده فقط اورتبه نفیس ومهیب
ایدی. ساده لکنک خطوط نجیانه سی، علویت افاده سی فکر
ووجدانی بوراده برمراقبه حکیمانه یه دعوت ایدیوردی. جسم
مرمر کتله لر یه اویه قیلندن اوینایان صنعتکارانک ایدی مهارتندن
چیقمش صندوقه لرک، پرده لرک، هیکللرک آراسنده، بعض
کتابه لرده توقف ایدرک، بعض الواح حزینه نك تماشا سنه داله رق،
گاه و بیگاه ساده دلاه برلسانک بیان معصومانه سنه یاخود صافدرون
برمنتاشک جهد طفلانه سنه ایلیشن فکر برخنده حالنده ترسمه

وقت بولمەدن تکرار بروسيله تأثره معروض قاله قاله ، بوبنانك
 سکوئی ایچنده آياق-مك كورولتیلرندن هم خشيته هم حجابه بکزه ين
 برحسله اوزولهرك كچدم . تکرار باغچه چيقدیم ، و آرتق ساعت
 حرکتك تقریبی بی استعجاله سوق ایدیوردی . براز سرعتله ،
 تکرار اوصاری قوملرله مفروش جاده لردن برینی ، دولانه ،
 دولانه اینیوردم ؛ بریوقوشك مقدمه سنده ، برکوچك قوروحالنده
 ایلریله ين برکوشه یی دونمك اوزره ایکن ، اوراده ، صاغ طرفده ،
 یشیللرکلك آراسنده ، بردن نظرمی جذب و تسخیر ایدن برشيله
 دوردم .

بوهنوز سکیز اون یاشلرنده ، شوخ ، شن ، ظریف ، برآیغنی
 دیگر آياغنك اوستنه آتمش ، النده قامچیسيله ، حیاته نشوهدار
 کوزلرله باقان ، بوکوشه یی دونملری علی الغفله چاقین برنگاه
 متبسمله سلاملایان برچوجقدی : مرمر برچوجق ...

مینى مینی عمرینك کیم بیلیر نصل بر بختیار ساعتنده شطارتی
 پدرینك منقوش خاطره سی قاله رق بوراده اوحاليله الی الابد تثبیت
 ایدلمك ایسته نن بوچوجنك جسم نازنینی اوراده ، شو مرمر
 قاعده نك زیر ترانده طوپراقلره رجعت ایدرکن سیما ی خدا
 خندی ، مؤبد بر دقیقه سرور وشاديله روحنك ابتسامات شادیسینی
 اثار ایدیوردی . و اوچوروین جسم نازنین ايله بوکولن سیما ی
 نشوهدارک اویله فجیع و دلخراش بر تضادی روحی اویله آتشین

و مؤذی بریچه ایچنده صیقیوردی که بوراده بردقیقهلق آرام غشی
 ایچنده چوجنی اوپمک و اوپرکن آغلامق احتیاجیله چیرپندم .
 هنوز یکرمی ایکی یاشنده ایدم، هنوز حیات اردواجه یکی کیرمشم؛
 واستقبالک بکا مدهش چوجق آجیلری حاضر لادیغندن شهه دار
 دکلم ؛ فقط بودقیقهده برما تمزده پدر المنی دویدم . یکرمی سنه
 ایچنده اوخیال مؤثر خاطره مدن سیلنمه دی ، خاطرات سیاحتمه
 متعلق برسیران فکری یابدقچه هپاونی، اوشوخ، شن، ظریف،
 برآاغنی دیگر آاغنت اوستنه آتمش، النده قامچیسيله، او کوچک
 مرمر چوجنی کوریرم . بودفعه سیچیلیا مصیبتی اوزرینه ،
 مسینایی ، و مسینا مزارستاننده او کوچک سیمایی ینه کوردم .
 عجبا ینه اوراده ، یشیل آغاجلرک آراسنده کیزلنمش گوشه
 سنده حالا دوریورمی ؟ یوقسه اوده دوشوب ییقلدی ، قیریلوب
 یارچه لاندیمی ؟ نهایت بومدهش ماته آرتق اونک دوداقلری
 کوله مه یه رک ، اوتبسم شادی و شطارتی کوزلرندن برر قطره کریه
 الماه قوبوب دولدیمی ؟

*
 * *

یچاره چوجق ! اکر بر حیات اولسایدک بو کون اوتوز یاشلرنده
 اوله جقدک ، واحتمال بو کون اوبلدۀ مردۀ نک انقازی آلتنه
 بولنه جقدک . یکرمی سنه فرق ایله عین نتیجه ! فقط بویکرمی سنه
 ایچنده حیاتک کیم بیلیر نه مجادلانندن ، نه کشمکش اذواق

واضطراباتندن ، نەدل آزار و وجدانسوز احتراصات و هيجاناتندن
 كچمىش بولنە جقكدك ! قامچيكتك ادای قهرمانانەسنە باقىلىرسە بلكە
 برەسكەر ، برەكزىدە ضابط اولە جقكدك ؛ ياخود ، كوزلريكتك ابتسام
 شوخنە دقت ايدىلىرسە بلكە برصنعتكار ، برشاعر ، بررسام
 اولە جقكدك ؛ ياخود ، وضع لا قيد وبى فتور كە اعتماد اولنورسە
 بلكە برايراد خوار تلذذيله ذوقلردە ، سياحتلردە ، اكلنجەلردە
 ياشايە جقكدك ؛ فقط نە اولورسەك اول ، برانسان اولە جقكدك ،
 وبوصفتلە تبسملر كدن زيادە كريەلرك ، نشاطلردن زيادە كدرلرك ،
 ياشامقندن زيادە اولوملرك اولە جققدى . احتمال حريص جاد و اقبال ،
 آرزو كىش ثروت و احتشام اولە جقكدك ؛ امللر ، انديشەلر سنى
 تلاطملىرىنە آلوب سوروكلەيە جكدى ؛ افكار فلسفيەك ، نظريات
 اجتماعيەك ، نفسكە ، عائلەكە ، مملكتكە ، ملتكە ، صوكرە حياتە ،
 انسانيتە عائدتخيلات كونا كونا ايله برنجبە اميد و امنيةك اولە جققدى ؛
 بو مختلف مؤترات ايچندە اوغراشە جقكدك ، چيرپينە جقكدك ...

فقط هيات ! بوتون بو شيلردن دها يوكسك ، دها قوى ،
 دها معظم بريد اقتدار وار كە حدود و مسافاتى تعينە خيال بشر
 كفايت ابدە مەين سطوت و شوكتى بىچارە مقدرات بشريەنى بر بازىچە
 هيچا هيچ مرتبەسنە ايندىرييور ؛ يالكز بر كوچك فيسكەسى
 براوفاق تماس قهر و غضبي دكزلرى كوپورتىكە ، داغلرى دويرمكە ،
 سهارلى ييقمغە ، وعناصر ك دهاش برهرج و مرجى ايچندە طاقم

طاقم ، آوچ آوچ انسان جمعيتلرني هوالره صاوورمغه ،
اوچوروملره يووارلامغه كفايت ايدييور .

طبيعت ، بوقوه محتشمه ؛ بوقوه محتشمه وقهاره ... تا مبادي اعصار
موجوديتندن باشلايه رق ، ييقوب دويرن روز كارلريه ، كوكره يوب
طاشان دكزلريه ، صارصيلوب ييقيلان داغلريه ، رعد و برقيه ،
بركانلريه ، زلزله لريه ، قاصير غلريه ، دوكديران قيشلرينك ،
ياقان يازلرينك اشكنجه لريه ، بشريتي بي انصاف برتعقيب و تجزيه
ايله خيرپالايوب ازن اوقوتك تجليات خشم و غضبي مواجهه سنده
يچاره حيات سفيله ، نه عاجز ، نه مسكين ... واوزمان بوتون
صدای احتراصات بشر ، مبهوت ، سكوت ايدر ؛ او محتشم ولوله
طبيعت قارشيسنده نه حيات مدنيه نك آمال و هوساتي ، نه منافع
اجتماعيه نك مصادمات و مجادلاتي ، نه زكارنك سياسياتك احتراصات
واحتراشاتي ، هيچ ، هيچ برسس ايشيدلمز .

بركون نا كهان اونك صيحه حدت و غضبي ، سامعه خراش
برمهات طراقه دار ايله ، تاسينه آتشفشانندن كوكره يه كوكره يه
جيقرار ؛ قوشلر برهوا اولور ، پریشان دونمكه باشلارلر ؛ كوپكلر
آفاقه قارشى بوقورقونج آفته اولورلر ؛ قويونلر ، اينكلر طاتلي
كوزلرينك ايچنده اولوم قورقوسيله تترولر ، و بردن ، ارض ،
مدهش برحمانك صارصينتيلري ايچنده چيربنمغه ، سرايلر ، معبدلر ،
اولر برر خزانزده ياپراق اضمحلاليه قوپوب صاوورلمغه باشلار ،

شرحہ شرحہ یاریلان طوپراقلر استیلا ایتک ایستہین برجهنمک
 دود و غبارینی فیشقیرکن بریاندن یوتہ جق انقاض ، دیشلرینک
 آراسندہ قیروب کمرہ جک اجساد آراد، وسما بوہائلہ یی کورمہ مک
 ایچون سیاه دومانلرلہ اورتونور ...

بردقیقہ ، یالکز بردقیقہ ، اوندن صوکرہ درین برسکوت ،
 وبوسکوتک ایچندہ بشریت مقہورہ نک ایچین ایچین ، یاواش یاواش ،
 تاصمیم روحندہ نالشزن بریأس ماتملہ انین بکاسی ... ایشتہ یالکز
 اوقدر ؛ بشقہ ہیچ برشی یوق ! ..

۱۳۲۴



12-1-1334

الحمد لله رب العالمين
والصلاة والسلام على
سيدنا محمد وآله الطيبين
الطاهرين

حکمت مزاح

حکمت مزاح

کو کلمجه پک جاذب و روح انیس بر شیدن ، قلم مجموعه
نقیسه سندن و مؤسسارندن بحث ایده جکم . پک یاقین بر زمانه قدر
حیاته دارغین ، وقوعات کون و زمانه بیکانه کییدم ، خامه تسلیمتساز
درون سنه لردن بری مترو کیت نسیان ایچنده پاصلا نمشدی ، مرکب
حقه نك دیننده بر قشر متصلاب تشکیل ایده رک درلو آمال مدفونه نك
اوستنه سیاه بر دیوار اوریوردی . بر کتابه آل سبورمکه قوت
بوله مایه رق ، بر جریده نك صحائف صامته سنه کوز کزد بر مکده لذت
تصور ایده مهیه رک بو عمر تهی نی براویه شقلق ایچنده کچیریوردم ؛
وقتا که مملکتک اوزرندن ، بو حیات غنوده نك فوق ملالندن
بر هوای تازه کچدی ، و هر کسله برابر بنده ده بشقه بر لرزش حیات
تهزیز ایتدی .

ساعات وایام دیکشدی ؛ حیاته برتقید مخصوص ، شئون
ووقوعاته بر مراق و تجسس باشلادی ؛ کویا یکیدن دنیا ایله ،
بوتجلیکاه حیات و وجود ایله تأسیس مناسبات ایله دم . هر صباح ،
کونشی براردها اول کورمک ایچون قالمقده بر استعجال مخصوصم ،
بکا اوراق حوادی کتیره جک قطارک دودوکنی ناشکیانه بکله ن
صباح دقتمده بر فضله تقید انتظار وار . هر یکی دوغان کون بکا
بر حادثه مهمه کتیرن ، هر صباح یوکسه ان کونش امیدلر مه
بریشه فروتاب ویرن برشی اولدی . وبویله بی صبرانه بکله ن کونلرک
حیات مملکت و ملت کتیردیکی حمله تبشیرات ایله پارلاق کونش لری
اراسنده پنجشنبه صباحنک کونشی دها متبسم ، شوخ و شاطر
برنشوه ایله ، ظریف و نکته پرداز پر خنده ایله ، شیرین و دلنشین
بررونق تازه ایله دها خوش بولیورم ، واونی دها بشقه درلو بر
انتظار تلذذه سلاملا یورم .

قلم ! ایشته پنجشنبه صباحلرینک بو تحفه قیمتداری ... و بن
بوصحیفه لرده یالکز درین و کزیده بر صنعت مزاحک ؛ اوقشا -
یهرق ، نرم و نارک تماسلرله ، اینجتمه دن ، ییرتوب قاناتمه دن ،
تاعطیف ایده رک اهترزازیدن ادیب و خلوق برخامه انتقادک ؛ کوچک
فقط دلپزیز ، خفیف فقط روحپرور بر تبسم خلق و ایجاد ایتدکن
صوکره قناعت ایدن ، غیجیقلا یهرق دکل ، کویا برتوی تماسیله ، هوایی
برنوازش لمس ایله اک حساس نقاط روح و فکری بوله رق اعصابده

دکل کویا الیاف نکات و مضامینده اهتزاز ایلهین فکر هزلک
 تجلیاتی بولمام ؛ او تجلیاتک پرده صنعتی خفیفجه آچهرق بکا
 کولومسه بن مؤسسلری ، اوایکی برادر فکر و وجدانی ده بولورم ؛
 و بن ده صنعتلرینه کولومسر کن آریجه اولرک کندیلرینه ده کولو-
 مسه بهرک : - اوت دیرم ، نه کوزل ، نه کورل ، تبریک ایدهرم ،
 اوت ، بو کوزل لکلر ، بونفیس شیلر ایچون تبریک وتشکر ایدهرم .
 ادبیات و صنعتده مزاح و هزل برچوق انواع و درجانه تفریق
 اولنه بیلیر . بن ، کندی ذوق و حسابمه کوره ، آلتنده بهتان و افتراء ،
 چرک غیظ و حسد کورمه دجه ؛ کولیور ظن ایدیلن دوداقلر
 اراسنده بغض و خصومتک ، خیانت و عداوتک غیجیردایان دیشلرینی
 حس ایتمدجه مزاح و هزلک اک مفتونلر ندیم ؛ و بو صنعت نفیسه
 و کزیده به ذهنآ پک یوکسک بر موقع حرمت تعیین ایدهرم .
 قره کوزک ، متعاقباً بوش بوغازک انتشارینی کورنجه کندمه
 اذواق لذت و وعد ایددرک سویندم . فوآد بکی ذاتاً بیلیر ، طانیردم ،
 اولک مملکتک برچوق ادوارینی احاطه ایدن حیاتی ، نافذ و حقایقین
 نکاه تدقیقی ، هرشیدن اول هرزمین و طرزده مفید اولمق لازم
 کله جکنی کندیسنه تلقین ایله به جکندمه ش بهه اولمایان خلوص نیت
 و وجدانی بنجه معلوم و مجربدی . بوش بوغازده حسین رحمی بکلک
 کفالت ادبیه سنده رفع لسان ایده جکدی . بونامی کتبخانه ملی به
 اتحاف ایله دیکی اوحکایات مدققانه سیله ، اسلوب نریه و مستثناسیله ،

تصویر اخلاق و عاداته بی منند موفقیاتیله دائماً تجیل و تکریم
ایدر دم ! و مادام که شطحیات و هزلیات ، حتی سزی ایصیرانلره ،
طیرمالایانلره بیله کوجنمک حقنی و برمه یه جک بر زمین ملاحظه در ،
بر زمین که اورایه بلکه براز آجی تخملر اکیلیر ، اوندن حبه جوی
استفاده اولمقده اولما مقده مختار سکنز ، یالکیز بوزمینی بعضاً بویله
آجی تخملرک سرپیلمه سنه ساحه تشکیل ایله دیکی ایچون اهرام
ایده مزسکنز ؛ اوت ، مادام که بو بویله در ، شکایت ایتمز سکنز .
بزده سر بستی مطبوعاتک هر کسه تعیین ایله دیکی وظائفده ،
بو وظائفک صورت تلقیسنده بعض سقطاتدن ، عدم اعتیاد نتیجه سیله
بعض سؤ انقهاماتدن ، بیلمم ، بو وسیله ایله بحث ایتمک آرزو سنه
مغلوب اولمالیمی ؟ فقط بو آرزو بی دها شدید بر آرزودن ، قلم
مجموعه سندن بحث ایتمک آرزو سندن تأخیر ایده جک .
قلم ، هیچ شبهه یوق که ، بزده شطحیات و هزلیات وادیسنده
ادبیات و صنعتیه نه قدر یو کساملک ممکنسه او قدر یو کساملش ، بو طرزک
ایلاک نمونه نفیسیدر ؛ و ، طباعته عائد بعض اقسام ماده سندن قطع
نظر ای دیلیر سه غربک بو یولده انتشار ایدن مجامع کزیده سیله
رقابت ایده بیله جک قابلیات تکمیلیه نیک امید پرور بر صحیفه
تجلیسیدر . بو نقطه نظر دن و کندیسنه بو وادیده تعیین ابتدکی
موقعده قلم نوعنک تک بر مثالی اولوب ایشته بواعتبار ایله در که راهمیت
خصر صیه بی جائزدر ؛ دینه بیلیر که مطبوعاتک بر رکن شاذو مخصوصیدر .

هله مزاح وهزل ، يالکمز صنعت وادبیاته منحصر قالمازده
حکمت و سیاسته تماس ایدر سه قلمک ایفا ایدر جکی وظیفه یک زیاده
رقت و اهمیت اکتساب ایدر .

مزاح وهزل بر چمت کوزدر که جهان کون ووجوده ، ساحه
شون ووقوعاته ، ماضی و استقباله ، یاقه لانه جق بر چهره ، قید
ایدیله جک بر حادثه ، کشف اولنه جق بر احتمال ، اشتشام ایدیله جک
بر معنی بولق ایچون ، دوربین جستجوکاری آراسندن نکراندر ؛
صوکره النده حادثات و وقایعی ، ارسام و اشکالی تغییر ایدن ،
فقط تغییر ایدر کی اصل معنیدار خطوطی تفریط و تأیید
ایده رک شایان اهمال نقطه لری منکسف بر اقوب تدقیق و ضبط
ایدیله جک جهاتی فضله بر شیشه وضوح ایله پارلاتان نقابلری
واردر ؛ بونلری شونک بونک ، اوته کینک بر یکینک یوزینه کچیرر ؛
و در حال طوفان حوادث آراسنده کورلمکه وقت بولنه مایان
بر وقعه ، یا خود بر نقطه حساسه و مهمه سی فضله بر دقته محتاج ایکن
نصلسه اهمال ایدلش بر معنی ، هر کون کوریلن بر چهره ده شایان
ضبط بر افاده بلیغه ، مزاح و هزلک بو نقابیلله بغته اکتساب
صراحت ایدر .

کوروب کوسترمکده بر منتقد بی انصاف ر . بر عصرلق ، بر
سنه لک ، بر هفته لق و قوعات ایچندن برینی آلیر ، اونی اکلادیغی
معناسیله ، بوتون شمول و احاطه سیله ، کافه دلائل و اشاراتیله

تلخیص و اجمال ایدن بر نقاب حاضر لار، او ووقعه نك سیاسته کچیرر،
و بوسیا در حال اولانجه وضوح افاده سیله سزه اصل کنه روحی
تقریر ایلر. کافه معنای حکمت و سیاست اونك فورچه سنك بر
رنکیله، منقاشنك بر ضرب سیله طو توشمش، جانلانش، حرکت،
لسانه کلمشدر. بعضاً بر سیما، کدرگاه حیاته دقت ایدلمه یهرك
کچایویرن، یا خود هر کون کوریلوب طانیلوب ده اصل روح بیانی
آ کلاشیله مایان بر چهره بی یاقه لار، اونك تفسیر افاده سی، مضمون
وجدانی، زبده معنوی نره سنده ایسه اوراسنی بولور، سزه کوسترر؛
ونه زماندن بری اهل ایتدی ککز یا خود وجودنی حس ایدوب ده
کندی کندیکزه ترجمه ایدمه دیککز معناسنی بردن کوره رك:-
اوت، اوت، دیرسکز؛ ایشته بویله، بنده بویله کوریوردن،
فقط ضبط ایدمه یوردن...

و محققدر که انسانلر دوغریدن درغری یه سویله نن حقایقندن
زیاده لسان مزاح و هزلدن چیقان حقایقندن متنبه اولورلر، اونلره
دها زیاده حساس و متقیددرلر. ادبیاتده هجو و هزل، افسانه
و مضحکه؛ صنعتده شطح و مزاح و استهزال، هر درس حکمتدن
دها مؤثر، دها نافذدر.

اونك ایچوندر که هر عصرده، هر ملتده حیات اجتماعی نك
بولسان ایله متکلم بر زبان انشادی وارددر؛ مثلاً بزده قره کوز،

ایتالیانلرده پولیشینهل، انگلیزلرده قلاون بر ناطقه نقاده در که هر شیدن
بلیغ، هر شیدن فصیحدر .

ایشته قلم مجموعه سنک بو کونه قدر منتشر نسخه لری، بوتون
صوک ایامک نه فصیح و بلیغ بر خلاصه روحی، نه مؤثر بر درس
انتباهی، ونه قدر نفیس، نه قدر کزیده بر لسان بیانی ... دینه
بیلیر که قلم بوتون مطبوعات جدیدنک یاننده بر خامه تشریحدر،
یا خود، بر تبسمدر که جدیات مطبوعاتی اینجه، ظریف معناسیله
اتمام واکمال ایامک ایچون پنچشنبه دن پنچشنبه یه بر اجمال احوال
یازهرق هفته نك تاریخنی قاپار .

۱۳۲۴



یلمه دیکم قادینه



بیلمه دیکم قادینه

— جناب شهاب الدین بکه —

.....

ای باد معطر که بنمادن کتیر رسک
هر زهره یه بر نامه خوشبو ،
بر بوسه دلجو

.....

ج . ش .

اونلر ، کنج قادینلره مخصوص بر شوخی محبت ايله ، شو
مسامره خصوصیه نك بدایتندن بری قهقهه لرینی گاه مندیلملرینك
ایچنه حبس ایدهرک ، گاه یکدیگرینك صاحیلری آراسنه کیزله یه رک
بعضاً سکون مشجره یه کوچک بر اهتزاز محترزویرن قوش جیویلتیلری
کی مبهم و مشوش ، بعضاً بر طراقة قهقهه ایچنده نا کهان اوچیو-

یرمش هوائی برفشنگ صفیر پرانیله تیز فقط او آنده زوالرسیده
کله لرله کوروشیورلردی. بن، اوزاقدده، آینه دن طاشوب کوزلرمی
یوران التماعاتک قارشیسندن اونلری برطل نسبی ایچنده کورده رک،
بر قالدین کفتکوی سرسریسنگ زمزمه موجاتیله اویویه رق،
ایشتمه دیکم و آ کلامادیغم بو محاوره نك بی معنی نوازش موسیقیسندن
مست اوله رق او طور ییوردم. صو کره، بیلمم نه ایچون، قارشیمده
چهره می بر فروزان افق سیما ب ایچنده ساح کوسترن آینه دن
یوروله رق یرمی تبدیل ایدرکن شو جمله یی، یالکز شو جمله یی
ایشیتدم :

— بیلمم، دقت ایتدیمی؟ هله او قوللار، صولغون فیلزتول
ایچنده کوموشدن دو گلش کبی دوران او قوللار...
آشاغیسنی ایشیتمه دم؛ یالکز او قدر، یالکز او قوللار،
اوت، صولغون فیلزتول ایچنده کوموشدن دو گلش کبی، بو خفیف
قاشک رقصات السجه می آراسنده بعضاً سایه دار برنگ سیمین
ایله دونوق بیاض دوران، بعضاً برکلیکون انجلای ابضیت ایله
پارلایان بو قوللار بتم ایچون کافی ایدی. ده ها زیاده ایشیتمک
ایسته مه دم. کیمدن بحث اولونیوردی؟ بیلمه یورم، صوره مازدم
و صور مق ایسته مه دم...

اودقیقه ده یرمی تبدیل ایتمکدن واز کچدم، بو صولغون
فیلزتول ایچنده قوللری او درخشان افق سیما بک صفحه خیالنه

قویه رق دوشونمك ايسته دم. ينه اورايه او طور دم؛ آرتق اوموجات
شعله دار ايچنده يوزن چهره مي دكل ، او قوللري ، يالکز اونلري
کور ییوردم . ايسته بودقيقه دن اعتباراً اوبيلمه دیکم ، کورمه دیکم
قادينك قوللريني ، يالکز او کوموشدن دوکلمش ظن اولنان قوللريني
جدی ، مسکر ، مغشی بر عشق ايله سوييورم ...



شيمدی هيچ برشي دوشونمه دیکم زمانلر اونلري دوشونيورم؛
کوزلرمك او کنده اوزرينه طيار بر آتش بياض دوکلمش بر افق
نوار، اونك صفحه انجلاسنده خفيف بر رنگ زمرد ايچنده تيره ين
بر چفت قول کورونيور، صوکره بونك رؤيت خيالنندن بروجود،
بر چهره چيقار مق ايسته يورم؛ فقط بونلر سيال و کريزان ، دائماً
تبخر ايدە رک ، يالکز او قوللر ، کاه سایه دار بر رنگ سيمين ايله
دونوق بياض دوران ، کاه کلکون برانجلاي ابيضيت ايله پارلايان
بو قوللر قاليور وبونلر نيم ايچون کفايت ايدييور ...



عجا ، بعضاً ، کيجه لرک پري خوليا پروري ، سماواني منور
بر رنگ رؤيايه بويایه رق نکاه زرین نجومك آلتنه ، سينه سمنفام
آفاقه ، ساعات بياض سودا سرپديکي زمانلر؛ پنجره سنک کنارينه

دایانه رق الحان سا کته لیا لی دیکله یین او بیلمه دیکم وجود، قوللرینک
اوزرنده، صاف و پا کیزه براقق بکر و معصوم آغوشنده هنوز
پیدا اولمش شوخ بر طفل هوائیه تودیع ایتدیکم زمین و مسخون،
مهتر و محترز بوسه لرك تماس لرزه دارینی حس ایدرمی؟...

۱۳۱۳



تورك مىسى



تورک سسی

ادای وحشتنه ، غمرايت الحانه رغماً بوسه در حال آشنا
چيقدم . هويت عرقه مک تامنبغه قدر حيقان براستيناس ايله ،
اعصار و انسالك بي نهايه ساسله سندن يوكسله رك تاريخك درين
افقلىرينه اوجان بر حس معارفه ايله همان ايلك اهترازندن آ كلادم كه
بوسه توركله كلك آراسنده ، مجروح و متالم توركله كلك آراسنده
براخوت وار ؛ بودقيقه ده آغلایان نوركله بوسك ، فرياد شكایتنده ،
عصر لرجه اوله عائد بر برابر دو غمق ، عینی قادن كلك ، عینی
كوكسده بويومك ، و بی حدود فضالرده يكديكرینی غائب ایتد كدن
صوكره بوساعت مصیبتده بولوشمش اولمق ارتباطی واردی .
در حال روحك سبزلايان اينلریله اولك ظلمتلره فريادلرینی كوندردن
غلایانلری قوجا قلاشدیلر ، ساریلوب اوپوشدیلر ، برابر اوچدیلر .

*

* *

هزیمتله ، الواح دلخراشیلله ، قاندن اولومدن ، کریه ونالهدن
 متشکل مخوف آلاینی سور وکله یه رک توالی ایتمش ، وبوتون تورکک ،
 طالع مشئومنک بلا و آفت یاغدی ران سهای مظلمندن دوشن صاعقه
 آلتنده یوکسک ناصیه سنی ایکمه یه رک ، صبور کوزلرینی قیر پمایه رق ،
 پولاد روحی تیترمه یه رک ، نجیب برسکوت ایچنده انقراض آمانه ،
 افلاس خیالنه شاهد اولمش ایدی .

أومک آرقه سنده ، خطک اوزرندن ، برامیده قوشان عسکر
 قطارلرینی متعاقب ، بر تجلی بی رحمک قاصیرغه لرندن قیریلانلر ،
 یوواسنی ، طوپراغنی ، اجدادینک مزارینی ، موجودیتک اوجاغنی ،
 بوتون ماضی واستقبالنی مدهش بر کابوسک قعرینه آتهرق حقیقته
 عریان بر کوالکه شکلنده چیقان مهاجرلر ؛ کوزلرنده یاشلردو کمش
 آنالرله بوغازلرینه بر درلو قویه مایان بر عقد طیقلمش بابالر ، صاری
 بکزلرنده بردها سیلنه مه یه جک قدر درین دالغه لر یله وحشی بر حیرتک
 نقابنی طاشیان چوجقلر ، نهایت یاره لیلر ، خسته لر ، ودها صوکره
 اولولر ، طاقم طاقم ، آلا ی آلا ی دونمشلردی . بی نهایت قطارلر ،
 کیدنلرله کاندردن ، قوجه بر مملکتک بو کنارده چیرپیدان مد
 و جذرندن ، امید و خیال امواجنی سرمک ایسته دجه بی انصاف قدرک
 اوکنندن یأس و حرمانله دونن بر دریانک تلاطم جدالندن مرکب
 بر منظره دواره شکلنده ، خطک اوزرندن آقوب کچمشلردی . وبو
 یوز بیکلرجه انسان ، انسانیته مقدر اوله بیلن اک مدهش دقیقه بی

كچرن بومهب كته بشر كويا مخوف بر آفتك رؤياسنه عائد ظلال
 مبهوته ایدی كه اك وحشی بر ماتی بر كله شكایت رفع ایتكسزین ،
 بر نوحه نظام چیقار مقسزین وقور و علوی بر سكوت ایچنده یشایوردی .
 آلام و مصائبه ، بلایا و آفات ایله نخر تورك روحی توكل و تحملندن ،
 اولوملك بيله فوقنده یوزن مكنت كبارانه سندن برنبذه غائب
 ایتیهرك فراغت ، صبر و انتظاره منتهی فلسفه سيله دیشاری كیلدلمش ،
 دوداقلری باصیلمش ، ساكت دوریوردی .

بر كون قطارلره بروقفه كلدی ، و بووقفه دوام ایتدی . كویا مملكتك
 موجودیتی ، حیات ایله ممات آراسنده بر نقطه معلقیته آصیلدی ،
 دها صوكره كوی آقین آقین انقاض حرب ایله دولاركن خطك
 اوزرینه هلاللریله بر دیزی آرابه كتیر دیلر . اومله ایكنجی خط
 آراسنده قانه بویانمش آی پارچه لریله حربك كنه حكمتنی تقریر
 ایدن بر دیوار یوكسلمش اولدی .

*
* *

هلال احمرك بو آرابه لرینی بكه بن نفرلر ایچنده بالخاصه بری
 واردی كه نظر دقتمی جلب ایتمش ایدی . كویك قیرلرینی ، تهی
 اولرینی دوكن قیش روز كارلرینك آلتنده اونی سر سریانه سیرانلرده
 كورردم . كوزلرنده دائما دوشونن بر خولیا ، كنیش آلنیه دولغون
 یاناقلرنده کیجه لری پارلدامق لازم كلن بر لمعه واردی . بر كون

اوکا اللری آرقه سنده ، دوداقلرینک آراسندن بر کوچک شمشیر
دالی صاللانهرق، کوزلری ثابت برنظرله ایلری دیکلیمش، تصادف
ایتدم .

بو ، بر شاعر میدی ؟

بلکه... فقط هرشیدن اول برتورک چوجغیدی. اویله وقور
بروضع وطوری واردی که نفر البسه سنک آلتنده اونی برهوای
سردارانہ ایله احاطه ایدر کییدی . بلاییدی که بو تورک چوجغنک
قانی ، کوینک ایکی قیا آراسندن آقان صاف و براق صوینه
بکزریدی ، اوکا برچامور قطره سی قاریشماشدی .

آلدامادیغنه امین اولان بر حسله حکم ایتدم که کیجه نک
آراسندن کلوب بی بولان ، ماتمی آلوب برابر اوزاق بر افقه
اوچوران سس اونک سسیدر .

بوکون ، ینه بر خبر آلمله بیتمش ایدی ؛ ینه کویک بوش
أولرینک ، جابجا بیاض صیرتارینی روز کارلره قارشى شیشیرن
چادرلرک ، بطاق چامورلریله یاییلان قیرلرینک ، عریان و جیلین
قوللارینی قالدیران آغاجلرینک اوزرینه ییلدیزمنز برکیجه نک قویو
کولکسی یارین ایچون عظیم برسؤال اندیشه ناکک چنکال قسوتی
طاقش ایدی .

اودامک جام قاپیسی آچش ، شهنشینه چیقمش ایدم ؛
شقاقلرمک ، وکسمک ، کوزلرمک ، بوتون سوندیریلمه یین بر

آتشله يانان شيلرك صوغوق بر هوا تماسنه احتياجي واردى. اطرافده
 كيجه نك هر شيئي سيلن ، اورتن ، بوغان سياهلقلرينك ايچنده
 كوزلرمك دلوب كچمك ايستهين ، بو ظلمتلرى ياروب آشمغه
 چالیشان بر جهد نوميدانه سى ، روحك بوليله اضطرابك نفسى
 ديكلهين ، اونك اسرار وخفاياسنى قوقلايان برانديشه سى واردى.
 كوى ، اولمش بر هوانك منجمد سكونى ايچنده سينمش ،
 كومولمش كيدى ، يالكز فنارك كاه ويكاه ايصلاح طوپراقلىرى ،
 اولرك جبهه و ديوارلرني يالايوب قاچان ، و تا ايلريده ، دكرك
 اوزاقلقلرنده غائب اولوب سوندكن صوكره تكرار آچيلان
 كوزى واردى .

برن بره ، سس ، بو سكوتى بر خنچر ضربه سيله ييرتدى .
 سراپا تيره دم . او قدر وحشى و او قدر مونسدى كه ، كويا مدهش
 بر صرعه رعشه سى ايچنده بىلكمك اعماقندن بر بشقه بىلكمك
 چيقديغنى دويدم . اونك نه نغماتى ، نه ترنماتى واردى ؛ بو ، دوز ،
 كويا صفحه صفحه چليك حالنده چيقان و اويله جه قيوريله دن ،
 اكريله دن ياييلان برشيدى . نه سويله يوربدى ، بونى فرق ايتمك ممكن
 دكلدى ؛ بر كله سنى بيله آ كلا مايوردم ، فقط ادا و مشوارنده اولجه
 اوزون اوزون كزىلوب كورلمش ، ياشانوب سهولمش عالملك تا
 اوتار موجوديتمده ارتعاشاتى تكرار ايدن سرود و مزاميرنى
 ديكله يوردم . و آنى بر طى مكان وزمان ايچنده ، بى انحا بر منشور

خیال آراسنده تورک ایللرینی، کیتدجه آچیلان و کیتدجه اوکنیش و کوزل یوردی باغرینه باصه باصه قوجاقلایان خیالمک قوللرندە یوکسک باشلری مغموم داغلری، متروک یشیل قیرلری، اوکسوز کویلری کورییور و بوتون تاریخک الواح سفالت و ضجرتی حس ایدیوردیم. تغمیسینک دوزلکنه، نه بر شاقر قلغک، نه بر قیور اقلغک انخالری کلهین بوسسده اویله بر کنیشلک واردی که اوندە عصر لرجه کشور کشالقله، جهانکیرلکه، حکمدارقله مألوف بر عرقک هیچ بر مصیبتله، هیچ بر صاعقه ایله بیقیله مایان، نه قدر دوشرسه سقوطندن او قدر اصالتله یوکسله ن بر عظمتی دیویلیوردی. بو سس اوسسلردن بری ایدی که جماعتلره، داغلره، افقلره سویله مک ایچون یارادلمشدی. و، بو کیجه کویا ظلمتلری آحق ایستهین بر قوتله، هر دالغهمی یووارلاندجه بر ظلمت طبقه سنی دیره توب اویناته رق جماعتلره آغلایان، داغلری سلاملایان، افقلره عتاب ایدن صیحاتی صالیویزیوردی.

بونشیده بی نره دن کتیرمشدی؟ هر درلو قواعدک فوقه چیقان، بوتون موسیقیلری استحقار ایدن، فقط علوی بروحشته هر لختنده بر غرابتک روحی صار صیجی، اعصابی خیر پالایجی بر تاثیر بلاغتی حایقیران بوفریادهانکی بر تورک کونینک نصل بر تور کیسیدی؟ بونی تعین ایدهم. فقط دوزلکنک، جابجا برانین ایچنده بوغوق نقراتنه رفاقت ایدن یکنسقیسینک ایچنده، اوزون اوزون فاصله لرله

هر موجه سی او چد قجه درین بر نفس الم آله آله یو وار لایوب کیدر کن
 اویله ثروتدار افکار ، اویله رنک رنک حسیات اولیوردی که هر
 کلمه سنده ، اوفر ق ایدلمه یین کلمه لرینک هر برنده بر بشقه معنای ماتم
 ای کله یین بر قصیده ملامت حکمنی آلیوردی .

اونی خیالاً کورییوردم . اوده ، کونک مسمم تاثراتندن
 صوکره اویویه مامش اوله جقدی ، و آرابه سنک قاپیسی صوغوق
 هوالر آچهرق باشی کناره دایانمش ، با جقلری صاللانهرق کوزلری
 قارا کلغک ایچنده ، قلبی ، بیچاره صاف و ساده قلبی پک تحلیل
 اولنه مامش ، پک اهمیت و وخامتی آ کلاشیله مامش بر جریحه ایله
 صیزلایهرق ، اطرافندن ملول و شکسته ، افسرده و بیتاب ، خسته
 و معلول کچن قرداشلری ، صوکره ، دها اوته ده ، یانمش کویلری ،
 ییقیلیمش اولری ، چیکتنمش تارلالری دوشونهرک ، ونهایت
 خیالک برطیران غیر اختیار یسیله چوجقلرینی ، دوشونن دوللریله
 نشانلیرینی کوره رک طاشمش ایدی .

بسیط و ساده تشکیسنک ایچنده بونلرک هپسنه آیری آیری
 افاده لرله مرثیه لر سویله یین ، کریه لر سرین ، سلاملر یوللایان غیر
 قابل تعین بر بلاغت واردی که بویک طرز ویک ادا نشیده نک یالکز
 روحندن چیقان بر تنوعله وقت وقت بر لسان محتشم اولیوردی .
 بعضاً اوزون بر ناله کیدی که کیجه نک انفاس شامتی اوزرینه
 آغیر بر ستره ماتمک دامانی شکلنده بطی بر امتداد ایله صریلوب

کریلیوردی ؛ بعضاً تیز و جانشکاف بر فریاد کسیله رک اطرافنی
 یرتیور ، کویا طوتونه جق بر ذروء امید ، بو سیاھلقلرک آره سنده
 سینہ جک بر گوشه سبزین آرایور مشجه سنه کچیوردی ؛ قاچان بر
 شعله املک ، سیلین برب ایتسامک اطرافنده چیرپنیر خلجیانلری
 واردی ؛ بر ثانیه بوغولش بر نوحه الم شکلنده ، همان ال اوزاتیلیرسه
 طوتیلیویره جگمش و همنی ویررکن براوچشله ایرکیله رک شوراجقده
 معلق دویور ، صوکره نا کهان خچقره خچقره قاچیور و تا ایلریده
 ظل سیاھی دیکیلن مناره بی طواف ایدرک دو کومله نیوردی .

الحان بی کفته سنک آراسنده بوقصیده شکوی ، کیجه نک ظلام
 بی انصافندن ، آفاقک لاقیدی ابعادندن ، بوتون ییلدیزلرینی
 سوندیررک اطرافه یالکنز سیس و بلوط ییغان بوسمانک سکوت
 سیاھندن ، بعضاً پر عتاب و سرزنش ، بعضاً مشتکی و نالشکاره
 سؤالرله چارپیوردی ؛ و بوسؤاللرینه بیچاره روح هجرانزده سنک
 آجیلرینی ، صیزیلرینی قویور ؛ دقیقه دن دقیقه یه تهورلرله اطرافنی
 قامچیلایان عصیانلری ، صوکره بردن مفتور و مأیوس سوروکلەنن ،
 مسترحمانه ایکتیلرینک بوغولشلیله سونن کسلانلری اولیوردی .
 موجودیت حساسه می مص ایدن بر تأثرک بهتیه دوکش
 کیدم . بوسس بوتون تورک کلکک سسیدی ؛ تورکلکک ، تاریخن ،
 طالعدن ، اعصار و شئونک ظلم بی فاصله سندن ، بی انصاف بر تعقیب
 مخربله حیاتی کمرن مقدرات سقالت و مصیبتدن ، کیجه لره ،

افقلره ، سهاره حایقیره حایقیره هجران و خسران اوقویان ، اوزون
 برفهرس مؤاخذاتنک فغانلرنی خنچره در شقهقه لرله پوسکوروب
 توکورن تورکلکک صدای شکایت و عتابیدی . و هر لحن المی
 بیتدکجه نقراتنک کویا تسلیتیاب اولمش ، علوی برفراغنک سکوتی
 ایچنده فورانلری توقف ایتمش ظن ایدیلن آسوده قراری ، کیم
 بیلیر ، بوتون ترنم ایتدیکی الواح مخوفه نک اوته سنده هنوز امیده
 بکزمین بر کوشه بوله رق ؛ اورایه قاصیرغه سز ، فورطنه سز بر
 مرسیاه صوقولورجه سنه ، یواش یواش ، ملایمت ونوازشله ،
 اویویانلری اویاندیرمامق ایسته یین برسیلان ایله صوقولیوردی .

او کوشه یی بنده کورییوردم ؛ تورک ایلینک اوزاق بریوردنده
 اوبابا ایله آنایی ، او کنج کلینی بنده کورییوردم ؛ فقط شودقیقه ده
 اونلرده اویومايور وبلکه بوسسی اونلرده قلیلرنده ، قلیلرینک
 اهتزاز اوتارنده ایشیدیورلردی .

بردن صوصدی . آغلایورمیدی ؟ .. اوته کیلرده ، او اوزاق
 یوردده بکله یلرده بودقیقه ده آغلایورلرمیدی ؟ ...

باشمی ایکی اللرمک ایچنه آلام ، وش و آنده حیاتمک اک
 دریندن کلن یاشلریله اوزون اوزون ، قانه قانه ، دویه دویه آغلادم .



ممارسة أخلاقه

ممارسه اخلاقيه

بر ملتك حياتده قابليات مجادله ومقاومتى نصل تربيه جسمانيه
وذكائيه سنه عائد محصولات ومكتسباتنه مستند اولمق لازم كليرسه
احوال اخلاقيه سنكده شرائط اجتماعيه سنه اويله دخل وتأثيرى
اوله جغنده شبهه يوقدر . بوكون ممالك مترقيه ده نشر علوم وفنونه
ويريلان اهميت قدر ملتك اسباب صحت جسمانيه سنده عطف نظر
دقت ايديله رك مؤسسات معارفك هپسنده چوجقارك جولان ذكاسنه
تخصيص اولنان ساعتلك ياننده ادمان عضلاتنه خادم درسلى اويونلر
ترتيب ايدلمكده در . بوممارسات بدنيه اساساً زنده وتوانا وجودلره
فصله بر قوه فعاليت ومقاومت ويرمكه برابر بر ياندن ده حيات
مدنيه نك تعمير تخريباتنه ويا سقطات انتساليه نك تعديل اسقامنه
خدمت صورتيه جمعيتى قواى ذكائيه سى ثروت معارفله آراسته

اولدیغی قدر بازوسی جدال و وغایه استعدادله تقویتاب اولمش
افراد ایله تحکیم ایتمکده در. بوایکی درلو طرز تربیه مملکتک تأمین
احتیاجنه، یعنی بدنأ و فکرأ وطنلرینک اعتلای ترقیاتنه خادم اولاد
یتشدیرمک مقصدینه کافی عد ایدلمه یه رک آیریجه چوجقلرک تربیه
اخلاقیه سنه متعلق وسائط واسبابه ده مراجعت اولنور. مکتبلر ده
چوجقلر حسن سلوک و سیرت صاحبی معلملرله محاطدر، اللرینه
ویریلن کتابلر ده هر وسیله ایله اخلاقه عائد تلقیناتده بولینلیر،
تلقینات اخلاقیه ایچون چوجقلرک عائله او جاغنده، آینکاه مذهبیده
اقربا و تعلقاتندن یا خود واعظین دینیهدن ایشیده جکلری حقایقه
ا کتفا ایدلمز، همان هر محله نك مراقبه اخلاقیه ایله مشغول بر هیئت
وارددر، مؤتمرلر ترتیب اولنور، عمومی اجتماعلر تشکیل ایدیلیر،
اویونلر یاپیلیر که اساس مقصدی تحکیم اخلاقه خدمتدر، حکایه لر
نشر اولنور که تهذیب افکاره خدمت ایتسین، و، بویله لکله مثلاً
پارس قدر سربستی اخلاق زمیننده، هر نوع مبالا تسزلقلرله،
اخلاق سزلقلرله سوقاقلره قدر بر طوفان لوئیات دو کولن بوشهر
ولوله دارده بیله بوتون او ظواهر سقیمه آلتنده بوزولمامش،
لکه لنمه مش بر حیات عائله محافظه اولنه بيلمشدر.

بز مکتبلرک محتاج اص صلاح اولدیغنده متفقز. معرفه نه قدر
دون مرتبه ده اولدیغمزی کورمک ده ده ایلری یه کیتمک لزومنی
حسن ایتدیره حک بر معرفتدر. ممارسات بدنییه نه قدر احتیاج ایچنده،

اولديغىمىزى بىلكە او درجه وضوح ايله كورمه يورز ، بودها آجى
بر حقيقتدر كه اونى كورمه مك ايچون غالبا التزاعى بر جهلك خواب
مغفلى ايچنده آوونمق آرزوسيله كوزلرمى قاپايورز.

مملكتمزده اخلاقه عائد احتياجات خصوصنده ايسه نه راده ده
بولنديغنه حكم ويرمك پك متعسردر . هر حالده ، تسليم اولنه جق
بر نقطه وارد در كه اوده تربيه ذكائيه وجسمانيه دن زياده بزده اهمال
ايدىلن تربيه اخلاقيه در . بوندن بشقه مملكتك عطالت حياتى ،
هر درلو آثار فعاليتدن محروميت صرفه سى بواهمالك نتاييجنى دها
زياده تشديد ايتمكده در .

اخلاق عموميه ي الك زياده رخنه دار ايدن ، كرك حيات فرديه سنده
كرك حيات اجتماعيه سنده انسانك معنوياتنى الك زياده تسميم ايله ين
هيىچ شبهه ايديله مزكه عطالتدر . عطالت الك فنا ناصحلك وظيفه سنى
ايفا ايدن بر مؤثر اولوب بر فرد اوزرنده نه قدر تخريبات معنويه
اجرا ايدرسه هيات اجتماعيه ده ده فعاليت حياتدن الك آاز حائز نصاب
اولانلرده الك زياده مساوى اخلاقيه ك انكشاف ايتديكنه دقت
اولنور . مذمت ، غيبت ، حسد ، كين ، قيل وقال ، فتنه و فساد
قييلندن شيلرك انسانلرى آاز چوق اشغال ايدم بيلمه سى حيات
فعالهنك آاز چوق زمان براقه سنه محتاج اولوب بونك ايچوندر كه
بويولده امراض معنويه الك زياده سا كن كويلرده ، كوچك قصبه لرده ،
او جرا محله لرده اجراى حكم ايدر . اورالرده انسانك وقتنى مص

ايدە جك، زمانى دولديرە جق وسيله لر، قوتى استهلاك ايله يە جك ايشلر
بالنسبه قليل اولديغندن همان هر كس آز چوق تمايلات فطريە سنه
وبلكەدە اكثریت اوزره اعتيادات محليه توفيقاً قرينيله، دوستيله،
قومشوسيله اوغراشمغه، اونی ذم وقدحه، اونى خصوصيات
حياتى تنقيد ومؤاخذه، كينشنه، ياشايشنه اعتراضه وقت بولور.
احتياجات حياتك اك زياده غليان وفوراننه زمين اولان هيئات
اجتماعيه ده، مثلاً لوندرەنك هر دقيقه يه بر بشقه حصه وظيفه تعلق
ايدن حياتنده، بويولده امراض معنويه نك انكشافنه ماده زمان
قولايقله بولنه ماز؛ واكثریت اوزره انسانلغك ماهيت اصلیه سنه
عائد اولان بر طاقم حسيات حسيه، كويا اتله جلد آراسنده قاله رق
تظاهره سربستانه فرصتياب اولماز.

ارباب تدقيق طبيعت بشريه يه عائد اسقام اخلاقيه نك اك مهم
منبعلرندن برينى حسد اولمق اوزره كوسترمكده در. حتى انسانلرى،
طريق ترقى وتكاملده، سائر بر طاقم حيواناندهده مشهود بر حادثه
معنويه اوله رق، حسد حسنك اسيرى اولمق اوزره كوره رك،
تقايد، تعلم، مسابقه آرزولرنده هپ سوق حسدله حركت ايدر
دين حكما بيله موجود اولوب شو حالده بو حسى بعض تظاهراتنده
انسانلغك اساس تنموى اولمق اوزره قبول ايتمك لازم كليرسهده بر
حسنك منفعت ومضررتى اكثریت اوزره ماهيتندن زياده كميت
ونسبتنه تابع اولديغندن مثلاً اخلاقيات اسلاميهده غبطه ايله حسد

لفظارينك آراسنده موجود مسافات و درجاتي اولچهره ك و يريله جك
حكيمده اوکا كوره داورانمق ايجاب ايدر .

انسان ايچون اك بويوك فضيلت حادثات روحيه سني بر نوع
مراقبه درونيه آلتنده بولندي ره رق كندی تحسسات واحتراساتي
تحليل و تنقيد ايد بيلمكدن، ونصل بر وسيله ايله اولورسه اولسون
نفسنده بر ذممه نك قابليت انكشافني كورنجه اونى اسكات وامحايه
قوت بولمقدن عبارت اولوب بويولده هر كس نفسنده بر ممارسه
اخلاقيه اجرا سييله مكلفدر . فقط مع التأسف بويولده ممارسات
اخلاقيه ايله نفسلريني بو نوع مراقبه معنويه اتباع كلفته تحمل
ايدنلر ا قدر آزدر كه انسان مكتهلردن باشلايه رق تاحيات سكون
واستراحت چكيلنجه يه قدر كنديسي هر دوره عمرنده ارباب حسد
ايله محاط كورور و هر كسك كندينه كوره حسوداني واردر :
مكتبده، بر زنكين چوجقه البسه سني، ذكي چوجقه موفقياتي،
كوزل و ناز كسه حسن و ظرافتنى قيصقانلر؛ حياتده مأمور ايسه
مأموريتنى، معاشنى، ترقيسنى قيصقانلر واردر؛ تاجر سه، متفنسه،
صنعتكار سه اونك ايچون هيچ بر وسيله شهرت و موفقيت ظهور
ايتمز كه پيش و پسنده ارباب حسدك غيظ و كيني دولاشماسون .
بو، وتون انسانلغه عائد بر نقيصه اخلاقيه در كه شدتي متخالفدر .
بودر جاتك معياري ده، ظن ايدهرم، هر زمين و محيطك فعاليت
حياتيه سنه تابعدر .

بر هیئات اجتماعیه ده وسائل سعی و غیرت، قوای فعاله ایچون اسباب صرف و استهلاک نه قدر آزا یسه تظاهرات حسدك او قدر چوق اولمه سنده ضرورت وار کیدر. اونك ایچوندر که قابلیات ذکائییه سنك صورت مفیده ده استعمالنه فرصتیاب اوله مایان ممالاك شرقیه اهاالیسندده حسد فعالیت مثمریه صرف قوت ایتمك آماندن زیاده مستعد انكشافدر. اکر حسد یالکمز موفق اولانلر حقنده غیظ و خصومتدن، اونلره قارشى اعلان بغض و عداوتدن، فرصت بولنورسه یوللرینی کسمك، قوللرینی بوکمك، اغزلرینی طیقماق، آیاقلرینی چلمك ایچون هجوم و تسلطدن عبارت اولماسه ده موفق اولانلر قدر چالیشوب شو عربده گاه حیاتده هر کسك کندى حسابنه تأمین ظفر آرزوسنه منحصر قالسه بو حس شرق ایچون بویوک بر مؤثر ترقی اولوردی.

ایشته مراقبه معنویه بو نقطه ده لازمدر، و، انسانك، تا وجدانك ایچنده اویویان انصاف و منطق حسنه مراجعت ایدرک، اونی اویاندر مق، اونك صدای تنبیه وارشادینه قولاق ویرمك زحمتنه قاتلانسه ده بشقه نك بر موفقیتی ایچون قلبنده اذا دوید قجه صورسه:-
بو اذا حسده بکیزه یور، بنی اوکا تجاوز ایچون تشویق ایدن، اویقومك آراسنه کیره رک حضور و آرامی سلب ایله یین، اوکا ایراث ضرره موفق اولما دقجه بنی راحت بر اقایه جق اولان بو حس، حسد دکلیدر؟» دیسه واوندن آله جق جواب اوزرینه، انفعال و حدتندن،

فرض و کیندن دوداقلرینی ، بیقلرینی ییه رک شو حیاتده مطمئن
اولق ایچون موفق اولانلرک نکبت و مصیبتنه مسکینانه منتظر
اوله جفته، کندی کنديسنى تداوی ایدن بر مريض حکمتيله، امراض
معنویه دن روحنی تنزیه و تصفيه ایده جک بر ممارسه اخلاقيه ايله ،
سیلکینه رک : — اوموفق اولدیسه بنده کندی حسابمه چالیشیم
واکتساب موفقیتیه بر صلاحیت مشروعه قازانهیم !... قرارینی
ویره رک عرفان و بازوسنه اعتماد ایتسه، طریق حیاتده نصل مسعودانه
یورور. و بو طریق حیات او قدر کنیشدرکه اوراده هر کس ایچون
بر یول واردر.

۱۳۲۴



اناث سلطانی

انات سلطانی [*]

بنات محترمه ملتی ، یا خود ، اونلرک شخصیت نو دمیده سنده
تمثل ایدن والدۀ استقبال وطنی تبریک ایدرز. دوره نجات مملکت
اونلره عائد وظائف مقدسه مجله سنک ایلک صحیفه سنی یازمق

[*] مشروطیتک ایلک دوره مستیسنه عائد بوتون آمال بالا پروازانه
قیلندن انات سلطانی تصویری ده مملکتک خاور مضایقنه صیفه مایه جق قدر
یوکسک بر منطقه خیالده ارتسام ایتشدی . بو مقاله یی بوکون تکرار
اوقورکن قلبده بر عقده الیمک صیرلادیغنه دقت ایتدم واوزون اوزون
ماتمدار بر اویوشقلق ایچنده اون بش سنه لک خاطراتی یکیدن یاشادم ،
و مقاله یی بورایه نقل ایدرکن اونک آنجق بویله احیای تحسینات نقطه
نظرندن بر قیمت اراهه ایده جکنه ذاهب اولدم . ینه بوکون بوغازایچندن
کچن بر نظر عبرت بیک صیرت زینی قاپلایان معظم و محتشم مبانی معرفتک
قارشیسنده قندیللینک وضع مکتبنه باقهرق بر قطره کریه تلطفک ارتعاشیه
اورتلکه حزین بر مجبوریت دویقمده در .

اوزره در. انات سلطانی مؤسسه عرفانك وجوده کله سنه متوقف
اسباب و وسائل احضار و تذکر ایدلمکده در .

قندیلی اوزرنده کائن مرحومه عادله سلطان سراینك مجلس
مبعوثان ریسی احمد رضا بك افندی طرفندن وقوع بولان مراجعت
واسترحام اوزرینه طرف حضرت پادشاهیدن بر انات مکتبی اولق
اوزره اعطا و حسان بیورلدیغنه دائر اولان بو خبر ایجه بر
زماندر شایع اولمش و اخیراً بوکا متعلق اراده سنیه نك ده صادر
اوله رق طرق رسمیه ایله باب عالی یه و دوائر عائده سنه تبلیغ ایدلدیکی
استخبار اولمش ایدی . لطف هایون یالکیز بو نقطه یه منحصر
قالمایه رق سرایك ممتاز بر مؤسسه تدریسیه حاله افراغی ایچون
لازم کلن تهیئات و تفریحات مصارفی دخی قبول بیورلمش اولمغه
مملکتك احوال خصوصیه حاضره سنه و معارف نظارتی مخصوصاتك
الحالة هذه عدم مساعده سنه نظراً بو مؤسسه عالیه نك اداره سنجه
تحدثی ممکن اولان مشکلات مالیه نك رفی نوعما بر کفالت معنویه
ایله در عهده ایدلمش دیمکدر .

بو تبشیر اوزرینه ، تحقیقی بر افق بعیده معلق بر تصور
مواجهه سنده دکل بر حقیقت مادیه قارشیسنده بولنلدیغنه قناعتله
بر زمره اختصاصکارانك همان سرایه عزیمتله ایجاب ایدن استکشافات
ابتدائییه اجرا ایله مه سنه قرار ویرلمشدر .
شو حاله بو کوندن اعتباراً ، اطرافنی محاط اولان یشیل

قورولریله سقف بلند جاذبه‌داری ، بیاض جبهه‌لرینک ایتسام
دلفریبیه شکل سیمین شطارتپروری بوغازک مائی صولرینه انعکاس
ایدن بوبنای محشمه‌اسکی بر سرای یکی بر مکتب نظریله باقه بیلیر سکزر .
ودینه بیلیر که دورهٔ اخیرۀ انقلاب ایله بنات ملت و وعد اولنان دسته
ازهار آمالک ، بوکاشانه سفید ، اک کزیده بر شکوفه سنی ، ظریف
و صربلند بر بیاض زنبقنی تشکیل ایله یه جکدر .

بیلنه من بو اسکی صرایه بر یکی مکتب دینه بیلیر می ؟ بوغازک
اونقطهٔ عدنیه سنده بر خورشید امنیهٔ استقبالک انفلاقنه غمخورانه
کوزلرینی دیکمش منتظر دوریورظن ایدیلن بوسرایک کنه روحنده
ذاتاً بر مؤسسهٔ عرفانک خولایای خوابیده می واردی ، دینه بیلیر .
هپ اونک دامن ششمه دارینه سورینه رک کچرکن جهت
مقابله یه باقار ، ینه او یله بر ذروهٔ معلانک اوزرنده صر ابتهاج
ومباهاتی یوکسلتن دیکر بر مؤسسهٔ عرفانه ، بر بشقه سلطنتگاه
عظمتک کاشانهٔ محشمه لحاظهٔ خسرانی عطف ایده رک کوکس
کچیرردک ؛ ودوداقلرک اوستنده تیره یین بر نشیدهٔ امنیه ، هیج بر
زمان رسیدهٔ تحقق اولمایه جق اوزون بر قصیدهٔ املک سرسری
بر زمزمه می طرزنده ، کیدوب اونک جوار سایه سنی تقیل
وطواف ایدردی .

بوراده بر مکتب ، هم غالباً موقعک نراحت وصفوتندن ،
سرائیک ابیضیت و عصمتندن متولد بر حسله ، بوراده برانات مکتبی

تصوری اوقدر جانشین وجدان اولمش بر خولیا ایدی که بوکون
اونی ، حقیقته تبدل ایتمش کورنجه، ذاتاً مکرر رؤیالره استحاره
ایدلمش بر حادته قیلندن تاقی ایدیورز .

.....

۳۷۴



چو جقرمك مكتبي

چو جقلر مك مکتبی

بوكون اودن برنجی دفعه اوله رق مکتبه کیتمک اوزره
چیقدیگز . و داد ، سن ، راز دها اوزونجه و براز دها جدی ،
بلند ، سن ، راز دها کوچک و براز دها ضعیف ، فقط بوفرقلره
رغماً تمامیه هم آهنگ ، اویله جاذبه دار ، اویله دلنواز برچفت
ایدیکیز که باغچه نك قاپیسندن باشلایه رق تا قارشیده سوقاغك
کوشه سندن صوکره غائب اولنجه یه قدر سزی کوزلرمله تعقیب
ایتم . آرقه کزده چانطه لر کز - حیاتک بوايلاک حموله متاعی -
باشلر کزده کتن شمس سپرلر کزک اوموزلر کزده اوچوشان
قنادلری ، بری صیرتکیزه مقدراتک ایلک نشانه حکمی باصه رق ،
دیگری سزی هنوز اینجینمه مش نشوه کزک جناح رقصانیله
یلپازله یه رک ، بیله هم نصل اوینامغه ، اوچغه بکزه یین یورویشکزله

هوالاته هوالاته ایلرله دیکز ؛ تام گوشه یی دونرکی ، تام کوزمک
اوکندن سیلینرکن بلا اختیار ، هرایککز عین حمله و جدانه عین
ثانیه ده تبعیت ایدهرک دوندیکز ، و بی اوراده سزه باقیور حس
ایدن کوزلر کزله بکا باقدیکز . بکا نه دیمک ایسته دیکز ؟ غالباً
کولدیکز . بو بر تبسم و داعمیدی ؟ آرامزه ایلک مسافه یی قویان ،
هیات ! کیتدکجه دها کنیش ، کیتدکجه دها درین براوچورومک
ایلک خیال جوفنی ترسیم ایدن برشیمیدی که بنده در حال آغلامغه
بکزر بر آجیلوق اویاندیردی ؟

گوشه یی دوندیکز ، اورایه قدر سزه رفاقت ایدن کوزلرمدن
صوکره اورادن اعتباراً خیالمله رفاقت ایتدم . قوللرمله پارمقلغک
کنارینه دایاندم ، واوزاق برافقک ظلام ابهامی یارمق ایسته یین
کوزلرمله هوالرده احتمالات آرایه رق اوزون اوزون دوشوندم .
مکتب ، حیاتک بوایلک نمونه محشری ، نهایت قوللری
اوزاتمش و سزی اودن ، اؤک صیجاق و مشفق قوللرندن ،
سنه لرکزی دوامی محال بر جنت سعادتک نینیلرله صالایان
قوللردن ، سوکوب آلمشدی . بوراده سزه بوتون اوده باشلانان
شیلره دوام ایتک لزومی سویله یه جکلردی ؛ حیاتک سسی ، مهیب
وحاکم ، بونی سزه امر ایده جکدی . بوتون اوایونه بکزه یین
شیلر بردن قارشیکزه سزه چین جیین آمریتنی کوسترن ، سزی
تهدید و اخافه ایدن ، اوافق بر میل استقلالکزی ، کوچک بر حمله

حریتکزی در حال مساعده سز ، اھالسر برتھالکھ قیران برر
وظیفه اوله جقدی . کوزلر کزک اوکنده اونلر یولی قاپایان برر
اولو اغاج شکلنده یوکسله جکدی ، وسنه لرجه ضعیف قوللر کزله
اونلرک چتین کوکده لرینه بالطه کزی حواله ایدهرک اوغراشه .
جقدیکز . برر برر دویره رک ، بو اورمانلغک ایچندن چاراشیق
برایز آچه بیلیمک ایچون اونلردن قاچ دانه سنک دینده ترله یوب
بونالهرق ، یورولوب ایکلهرک ، نهایت سزه برکوشه سما آجان
برمر حله ده دوره جقدیکز . اوزمان ناصیه کزدن آقان ایری تر
دامله لری چیبلاق قوللر کزک اوزرینه دوکوله رک ، ایکی آلکز
بالطه کزه دایانمش ، خیال نظر کز بوتون اوصرپ اورمانک
یقیلان آغاجلرینی تخطر ایدهرک ، قلیلر کزده حیاتکزک اک
مسعود اولمق لازم کلن بر دوره سنک قیرلمش زنبهرکیله ، سزه
آچیلان بودار وکولکهلرله دولو سما کوشه سنه باقه جقدیکز .

دها زیاده ایلریله مک ایچون خیالیه مساعده ایتهدم . بوکون
مکتبه اوچه اوچه ، قابکزده اوه ، اوده کیلره قارشى اوفاق
برخیانک مقدمه حسیله سوینه سوینه کیدن چوجقلفکزی دها
زیاده بویوتمک ، سزی حیات ایله اوغنیف مواجه ده دها زیاده
طوتمق ایسته مه دم .

فقط مکتب ، بوذاتاً حیات دکلی ؟ اوراده بوتون انسانلغی ،
انسانلغک بوتون چرکینلکینی ، اوسفیل ومستکرمه مرضلریله ،

مخوف و متقیح ذلتلریله بوتون عریانلغنی کورمه یه جکمیسکیز ؟
 بوراده آ کلایه جقسکیز که حیات بر مجادله در ، بر مجادله که
 انسانلر اوکا موجودیتلرنده بوله بیلدکلری اک سمناک ، اک مهلك
 سلاحلری بیله یه رك اشتراك ایدرلر ؛ آ کلایه جقسکیز که حیات
 یکدیگرینی اضرار قاعده سنه مبتیدر ، وانسانلر کندی کندیلرینه ،
 آیری آیری شیشه لرنده ساکن دوران اواجزای کیمیویه به بکزر که
 بر آرایه کلنجه بری برینی افساد و اشغال ایدرک طوتوشورلر ،
 پاتلارلر ، کندیلرینی ده برابر یاقوب قاووران ، آله و دوماته تبدیل
 ایدن بر آفت اولورلر . کوره جکسکیز که انسانلرده ائی نه وارسه
 هپ برر برر حیاته عدم صالحیتی آ کلاشیله رق اوده ، اوکزک
 اک حریم بوجاغنده دیواره آصیله جق ، و کوتو نه وارسه ، سوقاغه
 جیقارکن اونلر طاقیلوب قوشانیله جق .

وهپ بومبادله یی یاپه بیلیمک ایچون وجدانکیزله پنجه له شیرکن
 بندککیزده طیرمالانوب قانایان نقطه لر ، صیزلایوب قوپان دامارلر ،
 قیریلوب سوکوان وترلر اوله جق ؛ وبویله تماسلر کزدن هرکون
 یادرله چیقدجه کندی کندیکزدن برازدها یبانیلاشدیغکیزی ،
 فقط حیاته برازدها بکزه دیککیزی کوره جکسکیز .

مکتب ، ایشته اوعینیله حیاتدر ، اوده حیات کی آیری آیری
 بلکه تمامیه ای عضولردن متشکل بر مجموعه در ؛ اودایه هرکلن
 اک کزیده نظریات و محاسندن مرکب بر سرمایه کتیرمشدر ، فقط

بو سرمایه اولیه بر نقد زریندر که بوبازار داد و ستدده تداول ایتدکجه،
پارمقلمك حریص تهالکمرندن کچدکجه آشینوب سیلنیر، پاصلانوب
قارادیر.

اورایه اعتماد وامنیت کوتوررسکزر، اونلری قارا کلقدده
سینمش بکلهین کذب وریادر؛ دیشلرینی غچیرداتیرکن کوزلرینک
کولن برنکاهی، دوشونجهسنی یوتارکن دوداقلرینک اویوشدیران
برانکشافی واردرد؛ اونظرک آلتندن کچرکن حس ایدرسکزر که
رنکننده خفی بر آتشی افشا ایدن برقرمزریق واردرد، یاقار؛
اوتبسمك لطف نوشینی طامق ایسترکن دویارسکزر که نفسنده
بر حرارت سم وار، صولدیرد.

محبت و تسلیمیتله ایلر یلرسکزر، قارشیکزده اوزون طیرناقلریله
کوکسکزره دایانه رق سزی ایتن کین وحسدك پنجهلرینی بولورسکزر.
سز، متحیر، بودشمن غیر منتظری قازانمق ایچون بر سببیت
ویرمه دیککزره قائل، بکلرسکزر؛ ایسترسکزر که قلبکزرک احتیاج
نوازشی نرمین تماسلرله اونک طیرناقلرینی چکدیرسین؛ بکلرسکزر که
بو پنجه نهایت روحکزرک رقیق و مشفق انبساطلرینه مقاومت
ایده مهیه رک صولات جکر شکافی کوشتسین؛ دوست و رفیق اوله رق،
اوزانان آلرکزک آراسنه دوشسون؛ فقط بیهوده تأنیس ایدلمك
ایسته نن عقور بر جانوار وحشتیه او، دقیقه دن دقیقه یه اُتکزره
کچن طیرناقلریله سزی رد ایدرد، ودها زیاده یارالامق، دها زیاده

دشمك ايستر. نه ايجون؟ بيلمز سكز، فقط نهايت صزده آلر كز دن
برر پنجه چيقارر و بوغوشور سكز.

وفا و صداقتله عملوسكز در، اطرافكزي هپ عين حسلرله
قوشاتان بردوست حلقه سيله محاط كورمك ايستر سكز؛ آل اله،
برابر يورويه رك، برابر يورومك دن سعادت بوله رق، قوت آلهرق
ايلرلر سكز؛ بردن، برسيران نشوهدارك اك سكر آور بردقيقه سنده
بری بريله طوتوشان آلر چوزولور. اهانت و خيانتك غفلت آني
بكله ين ضربه سي بوزنجيري قيرمشدر، و كورر سكز كه بيلمكسزين،
آ كلامقسزين، براوچورومك كنارينه كوتورولمشكز. اوزمان
حياتده طوتونه جق آلري، داiane جق اوموزلري آرتق انكارايدن
اليم برشبه ايله ايركيلير سكز.

ظن ايدرسكز كه عفت و نزاهت برحمت سلامتدر، امين
خطولرله حياتده صزه مقدر كذرگاهي تعقيب ايدرسكز؛ آسوده،
مستريح برسياحت ياييق و هميله اطرافكزي دوشونمز سكز؛ فقط
بوتون اطراف جابجا ذم و افترانك، عزو واسنادك ايشله ديكي
آغلرله، قورديني طوزاقلرله دولودر. قولاقلركزه يولكزك
ايكي جهتندن فيصيلتيلر كلير كه تيره تير؛ يولكزي سوسله ين
آغاجلرك آراسندن ياواش ياواش، سورويه سورونه، قيوريله
قيوريله آقوب آياقلركزه صارملق ايسته ين ييلانلر حس ايدرسكز.
وبويله جه، هر كون، سزه بريكي وسيله مجادله كتيره رك

کچر؛ هر کون، سزدن بر پارچه ای برشی قوپارر واونك یرینه
 صیزلایان بریامه قور. نه قدر کورمه مک وقرار ویرمه مک ایچون
 عناد ایدرسه کز ایدیکز، کندی کندیکزدن صاقلامق ممکن
 اولماز که نفی وانکاره منتهی بر طریق تجارب اوزرنده سکز.
 هر تجربه مرحله سنی آشارکن، بعضاً برکوشه ده مختفی برخاثن
 هجومی دفع ایتک، بعضاً مظلم بر نقطه ده کرلمش بردسیسه چوقوری
 آتلامق، بو کون آیانگیزه صاریلان برییلان باشنی ازمک،
 یارین بیله ککزی قاورایان برالی قیرمق ایچون اوغراشیرکن
 او کرده نیر سکز که چو جقلقدن چیقماق وانسان اولمق ایشته بودیمکدر.
 اوزمان انسان اولدیغکیزه آجی برندامت وچو جقلغکیز
 ایچون درین بر تحسرله، تام قارشی سوقاغک کوشه سنی دوزرکن
 اوکزی بردفعه ده کورمک اوزره بلا اختیار کریه چوریلن
 کوزلرکز، تکرار کری دوزر، و، اوی، اوك شهشینندن
 سزی تعقیب ایدن نظری آرار.

کیم بیایر او اودن نه قدر اوزاقلاشمش سکزدرد! ایستهرم که
 مز مسافه لری یا کلش حساب ایده رک ساحله عودت ایده مه یه جک
 درجه ده تباعد ایتش بی احتیاط شناورلره بکیزمه یه سکز. ساحله
 دونمک، آرتق دالغه لرله دو کوشمکدن یورولدقچه امنیت وسلامت
 وعد ایدن قوملرک اوزرنده کلوب اویومق ایچون آشیله جق فاصله،
 ایستهرم که، پک آز اولسون، حتی او او آرتق اوراده، اونظر

آرتق اوشهنشینده اولماسه بيله ... ایستهرم که حیاتدن ، حیاتك
 متاعب و مجادلاتندن یورولدقجه، انسان اولدیغکزه ندامت ایدوبده
 تکرار چوجق اولق احتیاجنی دویدقجه، ایستهرم که هیچ اولمازسه
 نظر خیالکزر کری دونسون و او اوی سزه محبتدن، شفقتدن،
 دوغری وایی شیلردن مرکب بر سرمایه ویرن اویو وایی، صوکره
 سزی دائما نمناک بردعا ایله تعقیب ایدن اونظری طواف ایتسین ،
 وطواف ایتدجه دیکلنسین ، یکیدن قوت ، یکیدن مقاومت
 بولسون ...

۱۳۲۹



کوی کیجہ سی



کوی کیجه سی

ینه ساعتلرجه اویانیق قالمقدن قورقه رق کوزلرمی صیقه صیقه
یومدم ؛ اونزده برار اویقو بقیه سی قالمشسه اونی صاقلایه بیلمک ،
سنه لردن بری همان هر کیجه بنی تهدید ایدن تهلکه یه بو کیجه
غلبه چالمق ایسته دم . کندی کندی می اویاندرمقدن احترازاً
قیلدانمایور ، دومه یوردم ؛ کویا خارجده بر طاقم تماشا کارلری
آلدامق ایستدیور مشجه سنه منتظم ، مستریح نفسلر آلیوردم .
دیشاریدن کوچک ساعتک شوخ و کنج سسی ، زمانک اوستندن
بر آن اول آتلامق ایستدن بر شتاب عجول ایله ، همان بری برینی
متعاقب چالیدی . ذهنأ تکرار ایتدم : بر ، ایکی ، اوچ ...
— نه قدر ایرکن ، دیدم ؛ اویانمق زمانه تام درت ساعت

وار .

آشاغیدن بویوک ساعتک ، طاوانلری دله رک کلیرکن دها
 اختیارلاشان، دها ییپرانان خیرلتیلی، او کسوروکلی سسی، نه قدر
 سنه لرک ساعت حیاتی چاله چاله آرتق یورغون، بزکین، نهایت
 بر کون زنبرکنده تداویسی اھمال ایدیلہ جک سقطہ منتظر برمعنای
 فراغتله، هر ضربہ دن صو کرہ دوشونمکه وقت براقق ایستہ یں
 اوزون فاصلہ لر آچہ رق جواب ویردی: بر، ایکی، اوچ...

فرق ایتدم که دوداقلرمک اوفاق برقیپرتیسیله رفاقت ایدیورم
 و درحال صیقی صیقی یومولمش کوزلرمک آلتدن دوشوندم که
 آرتق اویومق ممکن دکل ..

کوزلرمی آچدم. پانجورلرک آراسندن قایان بر ضیا تول
 پرده دن آلدن کدن صو کرہ قارشیده آینه نک ایچنه صاری بر دومان
 شکلنده داغیلیور، دالغہ لانیوردی.

شهنشینمی دوشونہ رک: — کیم بیلیر، شیمدی اوراده مهتاب
 نه کوزلدر! دیدم و قالقدم.

بوشهنشینمدن کویمک قاچ کیجه لر نه مختلف زمانلرده، نه
 مختلف شکللرده، نفسلرینی دیکله مش، اویقولرینی سیر ایتمش،
 خلیجانلرینی یاشامشدم. اونی قیش قاصیرغلرندہ، قار فورطنہ -
 لرندہ، یاز جهنملرندہ، قارا کلقلردہ، مهتابلردہ قاچ کرہ بورادن
 ساعتارجه دوام ایدن بر استغراق ایچنده تماشا ایتمش، روحنک
 اوتار کونا کونندن چیقان زمزمات شعر ایله اهتزازہ کلشام.

بو کیجه هر شیئی آچیق صاری به بویایان مذهب، و، هر شیئی
منجمد بر رکودتک اعماق سکوننه ایندیرن ساکت بر کیجه یدی.
بر طرفی ازلش یووارلاق صاری بر کاغد فنار شککنده،
آی، تا قارشیمده یوقاریده ایدی، و اوندن اشباح و اشکاله کویا
خفا انکیز بر رتک ابهام، بوتون کوریلن شیلری بر خیالک
سیدلری کبی همان سیلنوب اوچغه مهیا بر حالدۀ طوتان بر هوای
رعشه یاغیوردی.

عظیم بر صحنه برده سنه خیالپرست بر رسام طرفدن مبذول
رنککله، کنیش ضربدلرله فیرچه لاندقدن صوکره هپسنک اوستنه
شفاف بر آلتون تول کچیرلمش ظن ایدیلن بولوحه ده کوشکلر
ایشیلدايان جاملریله، صالالانیور و همی ویرن دیوارلریله، سوزولوب
اوزانه اوزانه یوکسه لیور قیاس ایدیلن باجالریله، بریده بیاض
ستره سنک ایچنه صارینه رق سیوریلن مناره هر وقتدن دها اوزون
و دها ایجه قامتیه؛ آغاجلر حرکتسز، خیشیلتیسز، جابجا،
بعضاً صره صره، بعضاً شوراده بوراده کومه کومه قالقان قویو
یشیل باشلریله، هر شی، عجیب بر حیات ایله صولوق آلیور،
یاواش یاواش اعماق وجودندن قاباران بر هوای اتساع ایله شیشیور
کیمیدی، و بردن بوتون بولوحه هیئت مجموعۀ سیله صالالانه حق،
یردن اوینایه رق هوایه دوغری چکیله جک ظن ایدیالیوردی.
اوتده بریده کوزلرینی سوزن سونوک ضیالر واردی، اوزاقدۀ

بر أولك پنجره سندن قرمزی بر قندیلک تیتزه یشلری حس ایدیلیور،
تا بریده فنار بیاض بر ستون اوزرینه میخلانمش عظیم مرصع
بر نشان شعشعه سیله پارلدا یوردی . قارشیمده ایکی بنا کومه سنک
آراسندن کشاده قالان بر خطک منتها سنده دکزدن بر پارچه ،
یالکز آیک آلتنه تصادف ایدن محدود بر قسم واردی که کوموش
التماعرله پارلایوردی .

و بوتون بو لوحه نك فوقنده درین بر مستی خیالک استغراق
بهشتیسی یاشایان محتمش بر سکوت ایله بو سکوتی دقیقه دن دقیقه یه
دله رك اورادن اورایه ، بعضاً جسور و عنمکار طیرانلرله ،
بعضاً محجوب و نادم تردد لرله اوچوشان سسلر ، کویک کیجه
سسلری واردی .

بو کیجه ، بو منظره نك حیات خیالیه سنده ، بو سکوتک
بر دها حرکت کلمه مک اوزره کریش ظن ایدیلن جناح کرانی
آلتنده بو سسلرک عجیب بر افاده سی ، اعصاب اوزرندن کوچک
لرزشلرله صوغوق بر سیلان تولید ایدن غریب بر تأثیری واردی .
تا اوزاقده کاه و بیکاه غائب اولوب اویانان بر کورولتی وار
کیمیدی ؛ بو اودرجه مههم ، مسافه نك اوزونلغیله او قدر صاقلانمش
بر شیدیی که بعضاً تحت حسکزدن شبهه ایدردیکز . بونک ،
ایشتدیککیزی فرط دقتدن متولد بر وهمه عطف ایتدیره جک
فاصله لری واردی ؛ صوکره ، بردن بره ترده امکان بر اقایه جق

بر وضوح کسب ایدردی ، ویا پراقلری بیله تیتره تمهین سکون هوا
 مانع اولماسه اونی لدوس دالغهلرینه حمل ایدردیکز ؛ بلکه یوک
 آرابه لرینک بری برینه قاریشان و بوغوله رق کلن سسلریدی ...
 اوتهدن سزی دها زیاده وقف دقتدن منع ایتک ایسته یور -
 مشجه سنه بر سس ، تیز ، اینجه ، دوز برسس ، معدنی بردودوک
 سسنه بکزه یین بر سس کلیر ، و کویا بر بورغو ایله قولاغیکزی
 دلر ؛ عین زمانده دیکر بر سس ، بو سسک اشی ، فقط دها
 آغیرجه ، دها بوغوجقه ، کویک دیکر جهتندن اوچهرق جواب
 ویرر ؛ و مطرد بر مناوبه ایله شرقدن بری ایشیدلجکه دیکری
 غربدن مقابله ایدهرک دوام ایدرلر . بیلیرسکز که کوی شرقندن
 غربنه قدر برلشدرن ، مسافهلرک اوزونلغیله استخفاف ایدهرک
 هوایی تیتره تن بو سس بر دیکیش یوکسوککنک ایچنده حبس
 ایدیله جک قدر کوچک بر بوجک سسیدر ؛ و یورولماز ، توکنمز
 بر عناد ایله شرقدن غربه ، غربدن شرقه کویک انجماد سکوتی
 شیشلر .

کویا بو ایکی بوجک بکا کیجه نک بر سر حیاتی سویله یه جکلر -
 مشجه سنه کوزلرمک دالغین بر جریانی اوزاقده اودکز پارچه سنک
 تشعشع سیمیننه کیدرکن سامعه مک بر مفرطیت دقتیله بو سسلرک
 بر تنوع افاده سنه منتظر دم ؛ فقط اونلر نه یوکسهلوب نه اینهرک ،
 نه قیوریلوب نه بوکوله رک ، یالکز بری کسکین ، دیکری بوغوق

هپ عین اطراد یکنسقله جوابلاشیورلردی .

بردن بر کوپک باغیردی . آیک تیترهین بر دالغه سنه ، بر
آغاجک صاللانان کولکه سنه باغیریوردی . جواب بکله دی ،
مقابله کورمهین وسوسه سنه مطلقا جلب دقت ایتک ایسته یهرک
تکرار باغیردی ؛ او زمان هپ اطرافک کوپکلری اویاندی .

حس ایدلدی که یارمقلقلرندن اوزانان توپلی باشلر ، قاپیلرک
آرالغندن سوقاقلری قوقلایان اندیشه ناک پنبه رونلر ، ایکی طرفنی
یاواشجه قامچیلا دقدن صوکره تکرار لاقیدانه قیوریلان قویروقلر
بر کوچک زمان ایچون مستریح اویقولرینی ترک ایتدیلر ؛ مختلف
جهتلردن ، کویک داغنیق کوشکلرندن اینجه ، قابا ، کنج ، اختیار
سس لر کلدی . بونلرک ایچنده ایلک سس ورن رفیقک وهمنه
اشتراک ایدنلر ، اونی بیهوده اخلال سکوت ایتمکله اتهام ایله ینلر
واردی ؛ بویله اوزاقدن اوزاغه متنوع معنالر کوتورن بو سسلر
قارشیلایشیرکن تا کویک ایچندن ایری بر سس خشمناک بر عتاب
ایله هپسنه بردن خطاب ایدیور : - صوصکزر ، کیجه یی اویاندیره -
جقبسکزر ! دیور .

بردن بو کورولتیدن اویانیور مشجه سنه قومشو اولردن برینک
دکرمی پروانه سنک اوافق بردورانیه کوتله دی ، قارشیده بر باجانک
کلاهی غجیردادی ، سوقاقدن آغاجلرک تپه سندن بر نفس غیر محسوس
بر تماس ایله اوچدی . باشمی قالدیردم ، آیک آلتنده اینجه بیاض

بر بلوط پارچه سی واردی . بلوطمی خفیفجه ایلریله یوردی ،
آیمی یاواش یاواش صالانیوردی؛ بوتون لوحه شیمدی پرحرکت
کیددی .

غالبا صباح اولدی ظنیه کنج وعجول بر خروست دودوکی
اوتدی ، اوتهدن او ایکی بوجک هپ او مطرد ندالریله یکدیگریله
قارشیلایمقدن کیم بیلیر نصل بر ذوق آلیرکن اوزاقدن لدوس
دالغه لریمی یوقسه سرت طوپراقلری دوکن یوک آرابه لریمی ،
حکم ایدیله مهین بوغوق کورولتی آراسنده ، برر برر ، نوبتلرینی
شاشیرمایه رق ، هرکس صره سنی کوزه تهرک ، کندیسنی ایشیتدیرمک
قدر اطرافنی دیکله مکندن ده ذوق آلان بر انصاف ایله ، قومشو
خروسلر ، هپ اوتدیلر .

خیالاً ، مهتابک ، پنجره لرندن صوقولان ضیالریله بی وقت بر
صبح تلاشنه دوشن کومسلری ، تونکلمده تمامیه ازاله ایدیله مهین
ترددلرله و تماماً اویانمقدن متوقی احترازلرله قیصه مباحثه لری ،
باجاقلرینک اوستنده کرینه رک قنادلرینی چیرپان خروسلری
کوریوردیم . برر برر ، اینجه و شاقراق نغمه لره آغیر وجدی
سسلر جواب ویره رک ، تا کویک منتهای دیکرینه قدر اوزانان
بر مسافه ده ، بعضاً اوزون و شطارت انکیز بر ارتداد ایله ، بعضاً
قیصه بر نغمه بی متعاقب درونی بر خرخره شکلمده دوام ایدن
بر بوغوقلقله ؛ بری نظر خیالکزده شیق ، ظریف ، حوپپا

برکنج تصویر ایدرکن دیکری متعظم ، وقور ، فاسفه یله محمول
بر اختیار سیاسی احیا ایدن فرقلرله ، هپ موقعلرنده حاضر
اولدقلرینی خبر ویردیلر .

وبوتون بوسسلر کیجه نك منجمد سـكوتنك اوستندن اونی
اخلال ایتمکسزین ، کویا مجلا بر سطحی چیزمه دن یووارلانوب
کیدن مدور جسملر تماسیله ، قایوب آقیور ؛ و آلتندن کوی
بوسحر آمیز کیجه سنك سکون محتشمیله ، سگته دن ، نقیصه دن
عاری رکودت مطلقه سیله چیقیوردی .

اویله ظن ایتدم که بو کیجه ایله بوتون بو مناظر آراسنده ،
بوتون بواطرافدن یوکسه لن سسلر آراسنده برارتباطك ، برمناسبت
صمیمیه نك روح سیال معارفه سی وار . یوقاریده هپ بیاض اینجه
بلوطنك اوستنده ایلری یه صاللانیه ، صاللانیه کیدن ایله اونی سلاملایان
خروسلرك ، کوپکلرك ، بوجکلرك ، غیجیردایان باجالرله دکرمنلرك ،
ضبط ایدیلهمه یین برنفسله تیره یین یپراقلرك ، بوتون بوأو جبهه لريله
دیوار سطحلرنده دالغهلانان کولکه لرك ، بو بر افاده مخصوصه یه
غیرمالك ظن ایدیلن شیلرك یکدیگرینه تودیعی اسرارایدرد ، یالکیز
بکا خفی برلسان مشترکده غرائبله مملو برداستان خیال اوقور
برحیات عجیبه سی وار کیدی .

بردقیقه کندیمی حیاتدن ، حیاتك حقایقندن آیری دوشمش ،
بشقه بر عالمك منطقه رؤیاسنه چیقمش ظن ایتدم . بودقیقه ده

اطرافده هر کس اویویوردی، بندن بشقه بومنظره نك برشاهدی
یوقدی؛ یالکز بن، بو کیجه ایله قارشى قارشى یه یالکز بن
واردم و حس ایدیوردم که بوراده هپ یکدیگرینک انیس و همدی،
حریم و همبزمی اولان بوشیلرک آراسنده بن، یالکز بن برغریم.
او وقت تایوقاریده آیک صیریتقان چهره سنده بکاعاؤد بر معنای
اشمئزاز، بنی بو حرمکاه اسراره بیهنکام صوقولمش بر معجز
وضعیتنه دوشورن بر خنده تزییف کوردم؛ و محرم بر آیینک درگاه
خفایاسنه بيلمکسزین کیریورمش کبی بر زائربیکانه خجالتی دویدم.
کوپکالر، خروسالر، اواکی بوجک، اوزاقدن کلن اومجهول
بوغوق کورولتی، دکرمنلر، باجالر، کویک بوتون بوسس ویرن
شیلری هپ بردن صوصمشدی؛ آی شیمدی آرتق صاللانمايور،
راکد، یالکز اطرافه مبذول ضیالرینک صاری امواجنی یایه رق
دوریوردی. هپسی بنی بکله یورلر، بندن بر حرکت ظریفانه یه
انتظار ایدیورلر کیدی. یاواشجه، کویا بيلمکسزین آچیلمش
بو معبدک قاپسنى، سس چیقارما مقایسته یین بر احتیاط ایله قاپادم.
و، بو آیین اسرار انگیزی دها زیاده تشویش ایتک ایسته مه یه رک
چکیلدم...



جاسوس محترم

جاسوس محترم

اوراق حوادندە کوچك برفقرە انتشار ايتدى كە پك بويوك
برماھیتی حائز ايكن شوایام اخیره نك وقوعات مهمەسى آراسندە
انظار دقتى جلب ایدە مەيەرك غائب اولوب كیتدی . بوفقرە ، از
چوق فرق ایله ، همان بوتون جرائد شەرى دولاشدی . دینیور كە :
بحر سفیدە كلە جك و تور كیە لیمانلرینی زیارت ایدە جك اولان
آمریقا دوئماسنی تشکیل ایدن سفاٹك بهرینه بحریه نظارتندن
ایكیشر ضابط كوندریلەرك بونر دوئمانك بوتون دورە سفيرندە
مسافر صفتیاه كشت و كذار ایتدیریلە جكدرد . دوئما اون الی
كیدن متشكل الە جفندن . صورتە اوتوز ایکی تورك ضابطی بر
مدت مدیدە ایچون آمریقادوئماسنك مسافری ایدلمش اولە جقدر .
جماھیر متفقە حكومتك تورك اداره مشروطەسنە قارشى پك پارلاق

براحتسّاس مجبانه جلوه سی دیمک اولان بوقرارک بحریه نظارتجه
یاپلمش بر مراجعت اوزرینه می یوقسه آمریقا حکومتک بر تقد
مخالصتکارانه سی نتیجه سیله وقوعه کلمش بر تکلیفی اوزرینه می اتخاذ
ایدلیدیکی مصرح اولماقوله برابر علی کلا التقدیرین بولک قیمت معنویه سی
انقلاب اخیره عائد تجلیات شرفک اک محتشم لرندن عد ایدیله جک
درجه ده یوکسکدر .

مبدأ انقلابدن بری عزت نفس ملیمزه ، اطمئنان شرف
موجودیت مزه عائد مظهریات مطمئنه ایله لبریز وجد واستغراق اولان
روح و فکر ، هله مجلس ملینک وسیله کشادیله بوتون جهان
حریت و انسانیتک اقطار و اقطابندن یوکسله رک فرق ابتهاج ملتده
بر طاق بلند تمنیات و تهنیت قوران صیحات تبریک و تسعید ایله صباخ
وجدان حال اشباعه کلمش اولوب بوندن صوکره انقلابک نتایج
معنویه سندن زیاده قیمت مادیه و فعلیه سیله اشتغال دوره سنه کیرلمش
اولد یغندن قرار مبحوثک نتایج تطبیقیه سنه دائر سرد مطالعات ده
موافق احتیاج عد ایدلمک لازم کلیر .

روسیه و ژاپونیا محاربه اخیره سنده اقضای شرقک او قدیم
فقط جهان مدینتک اوپک یکی قومی طرفندن کوستریان خوارق
ترقینک الاشعشه دار معرض تجلیسی مکنت بحریه سیدی . اوزمان
بوحیرت افزا تکامل خارقه نمالک تحری اسبابی احتیاجی افکار
تدقیق و تجسسی استحصال معلومات و سائلنی تدارک سوق ایدردی .

بو وسائلی مطبوعات جهان مع زیاده تدارك و احضار ایله دی ،
 و هر کس متخصصین بحریه طرفدن یازیلان متعدد مقالات مختلفه
 ایله او کړندی که ، ژاپونلر او کونک شعشعه اقبالی هیچ اولمازسه
 بر ربیع عصرلق بر سعی متمادی ، بر جهد آهینه مدیوندرلر . بر
 طرفدن مراکز مهمه بحریه یه فرقه فرقه طلبه کوندره رک دیگر
 طرفدن کندی مملکتلرنده اعصار قبل التاریخیه دن انتقال ایدوب
 کلن مراعات و عادات بحریه یی احتیاجات حاضره یه توفیقاً تعدیل
 و تجدید ایده رک ، بر یاندن آوروپا و آمریکا دستکاهلرینه سفائن
 حربیه سپارشلری ویررکن دیگر یاندن کندی مملکتلرنده او
 دستکاهلره رقابت ایده جک دارالصناعه لر وجوده کتیره بیلیمک
 ایچون طاقم مهندسین و عمله یتیشدیره رک تام بر ربیع عصر
 ایچنده عظمت مقصدلرینی حوصله ایام و سینه صیغدیره بیلیمک
 ایچون دقیقه لرک تنکنای ساحه سنی بی پایان بر غیرت و فعالیتک نفح
 سحر آمیز یله توسیعه چالیشه رق ، اوغراشمشله ، دیدنمشلردی .
 بو عزم موانع بر اندازک نتیجه سنی کوردک . اقصای شرق تاریخ
 حربی او یله بر دقیقه حساسه یه منجر اولمش ایدی که بوتون ژاپون
 قومنک استقبال موجودیتی یالکز توغونک زه دن ونه صورتله
 حقیقه جغه ، و حقیقجه تابالطق دکنزدن کلن دونما ایله عالم غیبیدن
 ظهور ایده جک مشجه سنه خفا کاه تحصنی سحائب مجهولیت اراسنده
 کشف اولنه مایان سحر آمیز دونما آراسنده کی مصادمه نک نه نتیجه

ویره جگنه معلق دوریوردی. بومعمای مدهشی ایشته او بر ربع
عصرلق عزم ورزmk ثمره سی حل ایتدی .

احبا ورفقامدن برذات واردرکه ایتالیاندر و ایتالیا مکتب
بحریسنده اکال تحصیل ایدرک بر تعلیم سفینه سیله برچوق ابحار
بعیده ده وازجمله هند صولرنده مدید بر سیاحت اجرا ایله مشدر ،
حق سرگذشت حیات بحریه سنده بر قضانك صفحات هیجان
آوری بیله واردر . اقصای شرق محاربه سی ائناسنده اکثریت
اوزره کنديسیله تعاطی افکار و مطالعات ایلردك، و بوتون استفاده سی
بکا راجع اولان مدید مصاحبه لرده رفیقكمك وقوف بحریسنك
تحت ضماننده بولنان ایضاحات و تشریحات جریان ایدردی. بومیانده
اك زیاده نظر دقتمه چارپان شیلردن بری عین مکتب بحریده
مجمله برابر تعقیب واکال تحصیل ایدرک عین سفری اجرا ایله مش
اولان ژاپون طلبه سینه دائر ویریلن معلومات ایدی . بو طلبه ك
خاصه متمایزه سی حصول مقصدی تأمین ایدرکك وسائطك ایچنده
حبس نفس ایدرکك ، کویا ، کنديلرینه دائما تلقین وظائف ایله
احکام و مجلات ایله مستور دیوارلرک آراسنده کوموله رك، نه ذوق
وسفاهته، نه رخاوت و عطالته مساعدنه اینه یین برورزش تعب باپذیر
ایله چالیشمقدی . خشین وعبوس کورونمكمك ایچون خنده لری،
وحشی و مرد مکریز اولماق ایچون انسیتلری ، بی حس و ذوق
طالماق ایچون کنجکلری اولوردی که ، کویا اطرافه بر درین

تلف قیلندن اوده نن بو تظاہرات جمیلہ کارانہ بی متعاقب ، همان
 جبر مافاتہ چالیشان بر فضلہ غلیان سیمی ایلہ تلافی اولنوردی .
 واونلرک آ کلایور ظن ایدیلن سیای آسوده وسکیننده ایشیلدار
 کوزلری سریع وجوال حرکتلریلہ ، ثانیہ دن نانیہ یه ضبط و قید
 ایدن حساس و برق اسا بر صفحہ تصاویر نویس قیلندن بوتون
 کوردکلرینی حفظ ایدر ، نتیجہ دہ ، اونلرک هر کسدن ای حاضر-
 لاندقلری ، هر کسدن ای آ کلادقلری ثابت اولوردی . اونلرده
 دیگر بر خاصہ ممتازہ هیچ بروقعہ و حادثہ ده عجول و متلاشی اولما مقدی ،
 هر شیئی براعتدال محض دملہ ، برسکینت مطلقہ اعصاب ایلہ تلقی
 ایدرلردی . اونلرده عجلہ نک اک منطق ترجمہ سی یاسیلہ جق شیئی
 زمانہ حسن توزیع و تقسیم اساسنہ مبتییدی . عجلہ اونلرده احوال
 معتادہ ایچون آنجق لزومی قدر صرف ایدیلہ رک فضلہ سی تقدیرات
 استثنائیہ ایچون جمع وادخار ایدیلہ جک بر سرمایہ فعالیت قیلندندی ،
 و بر سرمایہ یه مراجعت زمانی کلنجہ اوزمان اونلرک سکون معتادیسندہ
 نصل اولوب بولندیغنه حیرت ایتمه مک ممکن اولمایان ، برفوراندہ از
 زمان ایچندہ چوقایش کورمک ، تعبیر آخرلہ ، اک قیصہ طریقارلہ
 اک اوزون مسافہ لری قطع ایتمک خارقه سی مشاہدہ اولنوردی .
 اوزمان محبمدن آلنان تفصیلاتدہ اک زیادہ نظر دقتہ چارپان
 دیگر بر نقطہ طلبہ نک باشندہ سالدیدہ ، وقور و محتشم ، سرتاپا
 مکانت وجدیتلہ مملو بر معلمک بولنمہ سیدی . آ کلاشیلان ژاپونیا

حکومتنک قواعد متخذه سندن بری ده ممالك اجنبیه به سوق واعزام
ایدیلن هر فرقه طلبه به بویه بر ناظر ومفتش ، یا خود ، بر معلم
ومربی ترفیق ایدله سیدر . ژاپونیا به عائد خصائص وفضائل ملیه نك
برنكه بان ومحافظی ، عین زمانده طلبه دن حکومتجه منتظر اولان
غایه نك مؤمن وحارسی وبر اجنبی مملکتنده برکنج چوجق ایچون
تهلکه تشکیل ایده بیله جك انحرافات واعوجاجاتك مصحح ومعدلی
وظائف مهمه سنی جامع اولان بو معلم ساحورده کوزلکلرینک
آلتنده هیچ بر زمان اویومایان نکهاده تدقیق و تفحصنی یدامانته
تودیع ایدیلن طلبه دن آیرماز ، بیلیرکه یدامانته تودیع ایدیلن
یالکز طلبه دکل ، مقصد حکومتدر ، اومقصد حکومت که مایه سی
اعتلای ملت ، فیض وطن ، حیات واستقبال اندیشه لریله مخمردر .
بیلیرکه بو طلبه نك اسراف ایده جکلری زمان ملتک حیاتندن چالمنش
دیمکدر ، وبوسرقت اهانتکارانه به امکان بر اقامق وظیفه سی اونکدر .
کویا طلبه نك هیئت مجموعه سی ، ایچندن وطن ایچون بر ثمره حقیقه جق
بر مزرعه در ، اومزرعه نك باغبانی ده کندیسیدر . چوروک فیلیرلر
وارسه قوپارمق ، فنا تخمیر وارسه آیقلامق اوکا عائددر . اونک
کوزلری طلبه نك خفایای روح و ذکاسی آراسنده دولاشیر ،
قولاقلری ایچنده بولنیلان محیط عرفاندن کلن سسلرله هرشا کردک
رباب روح و وجداننده حاصل اولان اهتزازاتی دیکلر ، ایجاب
ایدرسه حکومتنه خبر ویرر ، والحاصل تک بر کله ایله ، بو بر

جاسوس سدر، اوت او طلبه نك بر جاسوس سدر، فقط بر جاسوس محترم میدر. آه! کاشکی هر مملکت بویله جاسوس لرله مملو اولسهیدی، و مملکت لرندن اوزاقلره کوندریلن طلبه هپ ویله، اویولده اوزاقلره کوندریلن طلبه اولسهیدی ...

ایشته آمریقادونئاسنه مسافر ایدیله جك ضابطاره دأثر فقره بی اوقوینجه اقصای شرق محاربه سی ائناسنده محبمله وقوعه کلن مصاحبأتمدن بو خاطره بی دوشوندم. بو، سائر دوائر حکومتجه وقوعه کللکده بولنان ویاخود کله جك اولان تشبثات قیلندن بحریه نظارتجه ده اتخازینه لزوم کوریه جك تدابیرك بر کوچك مقدمه سیدر. اصل تدبیردن منتظر مقصدك حصولی ده او تدبیری اتخاذايله دکل نتایجنك اسباب تحقیقی تأمین ایله اولور. اقصای شرقك اوقوم گزینی بزه نه قیمتدار امثال ارائه ایدر لر. بالخاصه بوصوك قید و اشارت اولنان مثال نه قدر مهمدر. العارف یکفی بالاشاره !



کنجلیکه دائر

کنجکە دائر

پارس : مارت ۱۳۲۹

نهایت بنی کیجه یاریسندن صو کره یه قدر ضبط ایدن دولغون بر کونی
بیتیره رک اودامه کیرنجه ، ظر ایتشدم که ، بوتون او کورلمش شیلردن ،
ایشیدلمش سوزلردن ، سویلنمش نطقلردن مرکب باشمک اوستنده
باطلایان کله رنکارنک قندیللرینی یاغدی ررکن ، بن کوزلرمی
قاپارسم او یویه بیله جکم . کندی آلداتمق ایسته یوردم : بو ممکن
دکلدی . آ کلامقده کجیکمکه دم که بودرجه اهتزازه کلش اعصاب
ایله او یومق نصیب اولمایه جق .

یازی ماصه سنک یانه اوطوردم ، نه یاپه جفنده متحیر الارله
کاغلر مه دوقونیوردم . بردن اوزون بر مکتوبک اورایه سرلمش
صحیفه لرینی کوردم . بو ، او کون تورک کنجکلرندن برندن آلمش ،
و ، آجی بر تأثرله اوقوندقن صو کره ، ینه عودت ایدمک اوزره ،

اورایه براقلمش ایدی . بر تانیه ایچنده بوتون او کونک مختلف
تأثراتی ، بوتون اوباشک اوستندن بر سقوط بی فاصله ایله ، بی حد
وحساب رنکلیله سوزوله رک اینن قندیللر بومکتوبک سیاهلقلری
ایچنه کلوب دوشدی ، اونده بوغولوب سوندی .

مکتوبی تکرار اوقودم . هر کله سنده نزیه واصل ، فقط
المدیده و هجرانزده ، صانکه حیاته مشتاق و لائق ایکن بر قضا ایله
اولیور مکدن متوحش خلجانلرله چیرپینان بر قلب واردی . بو ،
وطنک آلام و مصائبه ، بد بخت عرقنک مقدرات سفالته ، بحر انلرک
ایچنده خونین بر حال ایله مظلوم بر استقبالك آغوش ادا سنده قیورانان
یچاره بر کنجلیکک حرمانه آغلایان بر سسیدی . افاده ایتدیکی
حسیاتک صمیمیت و حرارتیه یو کسه لن کوزل لساننده ادیبانه ،
اصیلانه بر نوای شکوی واردی که بو کیجه بنده طوپلانان بوتون
متفرق ، یکدیگریله مصادمه ایدن مختلف افکاره بر مجری ، ایچنه
کیروب یاییله یاییله ، کنیشله یه کنیشله یه آققدن حظ دویولان
بر مجری تشکیل ایتدی ؛ و بونی بر عمارانه کوتوردی .

کنج قرداشلرمله لوکسنبورغ باغچه سنده بولوشمشدق ؛
اونلر و بن یکدیگرینه ملاقی اولونجه او یله طوتوشیورده جک ایکی
روح کیدک که آرامزده سویله نه جک بر کله نک بر آاز فضله تصوتیه
بوتون تللی قوپاران بر شهقه پاتلایه جق ظن اولنوردی . بن
سویلرکن اونلر اطرافده ، بوتون معنویتلرینک بکا کلوب تسلیم

اولمقدن ذوق دویان حمله صفوتیه پرارتماش ، دیکله یورلردی .
 دالغین کوزلرینک اوزاق بر افقه اوچیور ظن ایدیلن نظرنده ،
 دوداقلرنده کولکه لری دولاشان درین معنای المده بندن کله جک
 لمعه امیدی ، قطره دواپی بکله بر اشتیاق واردی .

اوامید و دواپی تماماً ویرمک ممکنمیدی ! اوزون بر سنین
 اضطراب سلسله سندن صوکره بوچو جقلره : « ایشه ، دینمشدی ؛
 وطن بر دوره ره یه کیردی ، اونی بودوره یه صوقان بز ، فقط
 کوتوره جک اولان سزسکیز ؛ بزه عاٹ بطندن سزک نسلکیز
 نصل چیقدیسه سزی صالایوب بویوته جک اولان بشیک ده یوتیجی ،
 باتیریجی دالغیدن اوپله چیقدی . اوندن بر سفینه یامق ، اونی
 فورطنه لرك اوزرنده توجیه واداره ایتک سزه عاٹ بر وظیفه .
 مالکیزه تصرف ایچون حاضر اولکیز . »

واونلر بورایه ایشه حاضر اولق ایچون کلشلردی . صوکره
 بز ، آفاق قاپلایان تهدیدکار بلوطاری کورمه یه رک اونلرک بشیکارینی
 آلمش ؛ هربری بر طرفه چکن ، چوروک تحته لرینی هربری آیری
 بر ادعای تصرفله قوپارمغه جالیشان اللرمزی اوزاتمیش اونلره
 سنه لرجه بو جدال خیانتک منظره سفیله سنی کوسترمش ایدک .
 نهایت فورطنه لرك طوفان عقوری بوشاتمیش ایدی ؛ نهایت
 او عاجز تکنه ایشه یرقان دریاسنک اوزرنده بوجالایوردی ، و بو
 کناره دوششمش بر کومه چوجق ، بو کوک بوینلریله ، صولوق

دوداقلریله بوراده بکله یوردی .

اونلرک قارشیدسنده حیاتمک اک درین بر دقیقه سنی یشادم ؛
 اویوب دهان ، یاقه رق پیرتان ، فقط یاروب ایشله دیکجه آجی بر حظ
 دویان ایچنده موجودیتی اریتن بر قلم روحمک اک حریم بر طبقه سینه
 اویله بر لوحه احتساس نقش ایدیوردی که بوالی الابد پایدار
 اوله جقدی . بودقیقه ده وطن وعرقک بوتون ماضی واستقباله
 عائد سرگذشت سیاهک منقبه فجایعنی اوقودم ؛ اونلره امید ودوا
 ویرمکه مشغول ایکن روحده بر مرثیه نک سوز و کدازی واردی .
 کوزلرمک اوکنده دوران بو مکتوب اوملاقاتک بر عکس
 صداسی ، کافه شمول ودالاتنی اجمال ایدن بر خلاصه احتساسی
 ایدی . وتا دریندن کلن ، بوتون کنجلیکک عمق روحندن چیقان
 برانین شکوی کبی اونده بر ادای ستمکار ، بر شیوه سرزنش
 واردی .

دیورکه :

.

« اخلاقدن ، توحید مساعیدن ، وحدت حقیقیه وخارجیه دن ،
 حاصلی ، وحدت ملیه دن بحث ایتدیگز هانکه سزک لسانکیزله
 بزم قلبمز سویله یوردی . اوسوزلری سویله مکه - دگلی ؟ - سزده
 احتیاج کوریوردیکز . بتون فرقه منازعاتی ، ملیت غوغالری ،
 سیاسی کشمکشلر آرمهنده مملکتک چارپیشان فکرلرینی ،

جریانلری بالطبع سزده کوریورسکیز ... بو کون - سزکده دیدیککیز کی - هر زمانکندن زیاده اتحاده ، توحید مساعییه محتاج اولدیغمز بر دوره فترتده یز مملکتک سلامتینی کنجلاک فکر فعالیتده کورنلری و وطن ایچون بر بعث ممکن ایسه آنجق شبانک افکار منوره سی و زور بازوی آهینی ایله اوله جغنه قانع اولانلری آغلامقدن منع ایده جک برامید ، بر تسلیت قالدی می ؟ ...

بیلیم نصل بر انصباب ایله کوزلرمک سیر آواره سی سطرلرک اوزرندن دولاشدقجه تفکراتمک کلوب بوسؤاله ایلیدشدیکنه دقت ایدیورم ؛ و اوسؤاله جواب ویرمک ایسته ین ، « اوت ، برامید و تسلیت قالدی » دین بر احتیاج دویوردم .

امید و تسلیت ! ایشته اوسزده ، سزک بزدن درس آلان ، و آلان درس لر دن صو کره کیندن ، غیظدن ، حرصدن آزاده قالغه عهدومیشاق ایتمک لزومی حس ایده جک اولان کنجلاک سزده دکلی ؟

دوشونه بیلیمه کیز ممکن اولسه که بزی ایشته سنه لرجه بر مخصوصه یانغیننک آلورینه صاران بعض و عداوت ، نفرت و منافست حسلری اوزون بر دوره مرضک متراکم زهرلرندن عبارتدی ؛ بو برقرحه آکله ایدی که قوجه بر بطنی ییه ییه نهایت پاطلادی . قانکیزی اوزهرلردن صاقلامق ، بو چرکین منظره نک درس مده شنندن

صوکره سالم قالمغه چالیشمق سزه عائد بروظیفه. بووظیفهده موفق
اوله بیلیرسه کز؛ قوتک اتحاد ایله، اتحادک محبت ایله ممکن اوله جفنه
ایمان ایدرک تأمین موفقیتیه عزم کوستریرسه کز، ایشته امنیت
وتسلیت اوندهدر.

محبت !

بو کلمه نك انسانی کندی انسانلغنده، حیات عائله سنده،
موجودیت ملیه سنده تنویر ایده جک، ایصیتوب یاشاته حق یکانه کونش
اولدیغنه اینانیکز؛ اینانیکز که بنا ککزه آنی حک ایده بیلیرسه کز
سز یوکسک برآدمسکز، اوکزه او قندیلی آصارسه کز ای بر
باباسکز، مملکتکزه او مشعاه یی کتیررسه کز مبارک بروطنرور -
سکز. او سزی حیات خصوصیه کزده کوچکلرک حامیسی،
ضعیفترک محبی، فنالرک عتاب و جزایه رفق و مرحتی تردیف ایدن
برحاکم شفیی یاپار؛ حیات عائله کزده پدرلککزدن برطیب
مداوی چیقاریر. سقطلری دوزاتن، یاره لری باغلایان، آغریلری
اویوشدیران، کوز یاشلرینی سیلن، جزؤداننک ایچنده دائماً عفو
وصفح، فقط، تعمیر و تصحیح علاجلری طاشیان برطیب...
حیات اجتماعی کزده عین بنای مفکوره یی تحکیم واعلا ایده جک
الراه طوتوشمق، بازولرله برلشمک، عین روابطله صیقیشوب
باغلانهرق اوانک اطرافنده قوی برسد تشکیل ایده جک کوکده لرله
طوپلانمق ایچون چالیشیر بر یا ییچیسکز. وبوتون سزکله برابر

اوغراشانلری ، بوتون اوبناك طاشنی طوپراغنی ، قومنی کیره جفی
 طاشیانلری سورسکیز . دوشنلر اولورسه قالدیررسکیز ، صارصیلان
 اولورسه طوتارسکیز ؛ یا کاش برخرج ، چوروك برطاش کتیرن
 اولورسه ایقناظ ایدرسکیز ؛ وایقناظ ایدرکن محبت سزه اوپله بر
 صدای رأفت وشفقت ویررکه مطلق قناعت تولید ایدر . بیلیر -
 سکیزکه بو بنانك انشاسنده قیرپله جق برأل ، قوپه جق بر بازو ،
 یقیپله جق بر کوکده اونك محکیتندن چالمنش بر صرمایه در .

سزك وصول ایچون استعجال ایدن امللر کز ، مسافه لری
 یوتمق ایسته ین حرصلر کز ، برآن اول یتیشیله جك غایه لر کز
 واردر ؛ حیاتکیزده عرصه فعالیت تشکیل ایده جك سطح بر زمین
 مجادله و مسابقه در ، فقط قلبکیزده حتی رقیبلر کز حقنده بر محبت
 وارسه ، سز قماره حس ناموس ایله او طوران براویونجیسکیز .
 غالب ایتسه کزده ، کار ایتسه کزده سزده قاله جق اولان ناموسکار
 اولق اطمئنانیدر .

نه قدر ایستردم که کنجملر ، سز ، بزم کوچکلر مز ، سز بزه
 بکزه مه یه سکیز . آرا کزده نه قدر فرقر ، نه قدر اختلافلر ، نه قدر
 مسافه لر اولورسه اولسون ؛ عرق و مذهب ، اصل و نسل ، لسان
 و فکر ، احساس و اجتهاد اعتباریله نه قدر متنوع رنگلرده
 اولورسه کز اولکیز ؛ دائماً دماغ و وجدانکیزده بر نقطه مضیئه
 کبی سزی سیسارك آراسندن جلب ایدن بر حقیقت اولسون

واو خبر ویرسین که بونلرک هپسنگ فوقنده برشی وارددر، وهرشی اونک ایچنده محتویدر .

اونک اطرافنده طویلاقمق لازم کنججه فروق واختلافاتی؛ پیچملری، چشیدلری متنوع عادی برلباس کبی آتهرق هپکز یکنسق خدمت البسه سنی کیوب سنجاق آلتنده بریکه جک عسکر- لرسکزر . وسزی اوراده جمع ایدجک، بر وجود یاپهرق عین حمله وجدان ایله مقصده آتہ جق اولان بوزو سسی محبتک آوازہ تشجیعیدر .

سزی، بوتون کنجملری، اوکون باغچہده اطرافمی قوشاتان سویملی، فیضلی حلقه حالنده؛ مختلف دوشونجه لرله، مختلف املرله، فقط بورنک فرقنه رغماً خطالری عفو ایله، انحرافلری انصاف ایله تلقی ایدن بر محبتک تا جلدک آلتنده کمیکلری بری برینه باغلار رابطہ لرله باغلانمش کورمک ایستردم . ومهرکه حیاتده عین مکتبک طوب اوینایان ایکی فرقہ سی کبی نظریات ایله، اجتهادات ایله اوینار، اوینارکن دوشر، بوغوشور، ایتیشیردیکز؛ فقط او یون بیتنجه، غالبلر ومغلوبلر، قول قوله، آلله، حتی بوغوغا او یونندن صوکره دها سویشهرک، بری بریکزه دها صوقوله رق مکتبه کیدر، وآلنه جق درسک سزی برلشیرن روحنده صاریلوب اوپوشوردیکز .

کنج محبتک آجی سؤالنه ذهنأ بو جوابی ویررکن کویا

انشر احي بخش بر هوانك منوم تماسلری اعصابی اويوشدیر یور
 کیدی؛ و اودامك گوشه سنده یاتاغمك بیاض سینه سی بنی مستریح
 براویقویه، نوشین بر رؤیایه دعوت ایده رك کولومسه یوردی .



بر مسئلہ معوجہ



بر مسئلهٔ معوجه

پارس : مارت ۱۳۲۱

بنجه حل ایديله مش بر مسئله نك بوراده، دوغریدن دوغری یه
مواجهه سنده ایم، و بوکا دائر بش سنه دن بری ذهنمه او یانوب
قطعی جوابلرله اسکات ایديله مه مش اولان سؤاللره شیمدی بوراده
کلوب بنی کورن کنجیلر طرفدن معروض قالیورم .

اونلرک بعضاً بکا حل ایديله مه یه جملکری نی بيله بيله معنیدار بر
تبسّمک نازک اینجه لکرنده کیزله نن استهزایه بکیزر بر معنی ايله
سؤاللری وارکه، بنم: « رجا ایدهرم، پک صیتی بر منطق الکنندن
کچیرمه کوزوم کورمکسزین، محاکمه کزک دیشلرینه دوقونه بيله جک
قوم دانه لرینه دقت ایتکسزین بویه جه قبول ایدیگز » تمنی مضمهرینی
تماماً اخفا ایدمه یین سسمک ساخته قناعتیه ویرلمش جوابلرده بر
کفایت معقوله بولمق لطفنی کوستریورلر .

اونلرله، قارشى قارشى يه، دوا ناپذير دردلرينى سويله مکه گلش
خسته لرله اغفال کار فقط تسليتساز بر طيب وضعيتنده يز؛ بعض
قواعد احتياط و ظرافتله مقيد صنعت کارلر زکه بر مضحکه ني تمثيل
ايدیورز.

بر مضحکه می، بر فاجعه می؟

بوسؤالی حل ایتمکدن محترزم؛ یالک زبو کون بوزمین اوزر رنده
احتیساسلرمی، بوراده تورک کنجلیله وقوعه کلن تماسلرمی،
ملاقاتلرمی، و بونلرک روحده قالان بقیه ترسباتی تحلیل ایدنجه
وجدانمک بر حس بکا ایله دو کومانندیکنه دقت ایدیورم؛ و کوز-
لرمی قاپانجه- نظریه نك لهنه و یا علیهنه خدمت ایده بیله جک تفرعات
فرقلرنده توقف ایتیه رک - تورک چوجغنک سر گذشت مقدرینی
خیالاً شویله یاشایورم:

زیرک یوقوشنک آرقه سوقاقلرندن برنده قومشو اولره دایانمقله
تأمین موازنت ایده بیلن بر او، که کونش اوکا کچرکن اوغرایه رق
صولوق تحتلرینی بر بوسه تسلیت رقتیله او قشار؛ بر سوقاق که
سکوتنک ساعتی صباحلری تخبجینک، آقشاملری یوغورتجینک
سسلرندن عبارتدر. هفته نك، اسملرینی خبر ویرمهدن کچن یکدنس
کونلری چوجغنک پنجشنبه تعطیلیله زنجیرینی قیرار، موسملرک
معیاری قویونک یاننده کی اریک آغاجنک بعضاً میودلرله، بعضاً سیاه
وایصلاق کونلری خبر ویرن چیپلاقلغیله کلوب اوك آرقه پنجره سنه

اوران دالیدر. سنه لر اؤك یشیل یوصونلرله اور تولمش کره میدلرندن
 قارلینی، یا غمورلرینی، کونشلری کتیره ب، یکطرز ویک آهنگ،
 کچدکجه یالکز چوجغک مکتب اسملرینی دکیشدیره رک یکی بر
 وقع کتیرر و بویله هر یکی وقعده تخطر ایدیلیر که چوجق
 بویویو. او زمان حیرت ایدیلیر، دهادون تمیز و کوزل خرقه سیاه
 محله مکتبه کیدن، آقشاملری قوشه قوشه، کیفندن النده جزء
 کیسه سنی صاووره صاووره اوه ون خیالی کوزلردن سیاینمه مشدر؛
 بو کون او آرقه سنده ظریف جا کتیهله، قولتغنگ آلتنده بر
 جریده یه صارلمش کتابلریله وفا اعدادیسنه کیدوب کلن، دها
 شیمدین وقور وجدی، یارین تحقق ایده جان قام افندیسی حیثیتی
 طاشیمغه باشلایان بر ادا ایله مکاف بر کنجدر. اوده آرتق بو کاینانیلیر،
 ودائرہ حیاتنگ دها کنیش بر خطله چیزلمه سنه مساعده اولنور.
 اونک رفیقلریله قوربنه لی دره یه، چرچر صوینه سیرانلری، رمضان
 کیجه لری شهراده باشی تماشا کاهلرینه دواملری واردر؛ حتی صوک
 صنف امتحانلرینه چالیشیرکن بر بازار کونی تقسیم باغچه سنه قدر
 کیتمه سنده بر بؤس کورولمه مشدر.

بومساعده ویریلرکن چوجغک دوداغنی اورتمکه باشلایان
 خط سیاهه باقیلمش و کوشه ده کی پنبه اؤك قیزی دوشونیه رک بر
 خیال سعادت ایچون کولومسنم مشدر.

او بر آقشام اوه بر آرز خسته، کوزلری کوریلن سیالردن

بولانمش، سیکیرلری او غلغلہ حیاتدن فضلہ اهترزازتله خیرپالانمش
کلمشدی؛ بواویله بر عالمدی که اونک سکون ایله الفت ایدن حسا-
سیتنده حظدن زیاده تعبہ بکزهین، حتی قلبنده ماهیتی مبهم بر
اذا براقان تأثراته سبب اولمشدی. بورایه تکرار عودت ایده جک
اولورسه بو بر تجدید لذائد آرزوسندن زیاده بر فکر تجسسندن
تولد ایده جکدی.

او کندی عالمندن، کندی محله سنک سرولرله تربهلرله قلبه
اخروی بر سکونک آرامش حسیاتی بخش ایدن تنهاییسندن سوزولوب
کلن نئیلرله اویومغه آیشیقدی. بوتون چوجقلنی، بوتون کنجلاکک
ایلك حاضرلقلری هپ بویله آسوده بر اویقو ایچنده کچمشدی.
اونک رؤیاسز، هیجانسز، تحسرسز کیجه لرینه نه باشقه عالملرک وهم
وجودی، نه بشقه نועدن بر حیانک خیال ولوله سی اوغرامامشدی.
بوسیران اونک معنویت شبابنده بر شورش طوتوشدیرمش و اویقو-
سنک ایچنه یکی کشف ایدیلن بر سر فلسفه سنک حماسنی آتمش ایدی.
دها صوکره، زیرکن دارالفنونه قدر، اولایان سوقاقلردن
قفسلرک آرقه سنده آغلایان چوجق سسلریله قاپالی بر قاپینک اشیکنده
سورونه رک میااولایان بر کدی شکاتی آره سنده تنهالقلری یاران بر
کولکه کی کچرکن، جاده ده، دیرکلر آراسنده، اوتوسنی آرقه سنندن
اوفلهین قوله جینک یانندن، یاخود، وزنه جیلرده کلهین مشتریلرینه
انتظاراً دکاننده عود مشق ایدهرک رافلرینک توزلرینه بر پارچه

نشوه ویرمه چالیشان ترزینک اوکندن یورورکن هپ قلبنده
مقدمه سی او ایلک سیرانده باشلامش شورشک اذاسنی طاشیر، هپ
بشقه بر عالمک، بشقه بر حیاتک اندیشه موجودیتیه ارپردی.
فقط بواندیشه یه رغماً بوتون بومحله لردن، بوسوقاقلردن اونک
ایچون او یله مونس برسویملیک ترشح ایدردی که ینه عین منظره لرك
تکرر وتوالی ایدن مرحله لرینی آشه رق دار سوقاغک کوچک
اوندی، کوچک اودا سنده یالکیز قالنجی قلبنده اونی حیاتندن،
عالمندن، مقدراتندن ممنون براقان بر اطمئنان ایل، کوزلرنده
استقباله مستریح باقان بر نظر امنیتله کتابلرینی آچار؛ ماضی و حالنه
طبیعی بر حلقه ایلر ربط ایدیلر جک زنجیر استقبالنی چکمه باشلاردی.
بردن اوکا دیدیلر که:

«بوتنها سوقاقلری کوریورمیسکز؟ بز اونلری بر ولوله
حیات ایلر دولدیره جغز، بودار ودولاشیق شیلرک یرینه ایچندن
بر غلیان فعالیتک سیلرلی آقان کنیش مجرالر آچه جغز. او یله بر
جریان او یاندیره جغز که بوتون مملکت تازیه بر قانک فیاض جولانلریله
عصر دیده اویقوسسندن سیلکینه رک اویانه جق. کوپریر، یوللر،
اورمانلر، معدنلر، ریختیملر، لیمانلر... کوزلرکی قاپانجه
کوریورمیسک؟ او کوزل شیلر منور بر رؤیانک شمشعه دار لوحه لری
شکلنده کوزلرینک اوکندن کچیورمی؟ فقط سکا محتاجز، تورک
چو جینی! بز سندن بر معمار، بر مهندس، بر عالم، حتی میدانلر منزه

هیکلر دیکه جک ، نمونه کاهلر مزه رسملر آسه جق ، اعیاد مزه
 نشیده لر یاه جق بر صنعتکار یاه جقز . سنک دماغه ، وجدانکه ،
 قولکه ، والحاصل بوتون موجودیتکه تصرف ایده جکز و تصرف
 ایتک ایچون اونی تصرف ایدلمکه نمایان بر حاله کتیره بکزه .
 جینه آیده اوچ یوز فرانقلاب بر حیاتک سند تأمیناتی قویه رق
 اذن و یردیلر : - شیمدی آوروپایه ، مثلاً پارسه ... دیدیلر .

لکن پارس زیرکک او سسبز ، ایصسز سوقاغی دکلدی . تورک
 چوجغنه ترتب ایدن وظیفه ، بو محشرک ایچنده تعقیب اولنه جق یولی
 بولمق ، ایکی طرفنه باقمه دن ، سنده له مه دن ، دوشمه دن کوزلری دائماً
 وطنه کوتوریله جک سرمایه قوتک نجم امیدینه دیکیلمش ، اطرافدن
 کلن سسلرک خیانت جواذبنه آلدانمایه رق ایلریله مک ، و ، نهایت
 یولنک صوک نقطه سنده او نجم امید یبولوب قوپاردقن صوکره
 بردها آرقه سنه باقمه دن ، آرتق عودت ایدلمه مک اوزره براقیلان
 شیلر ایچون بر تحسیر دویمه دن عودت ایتک وظیفه سیدی .

مزن ومغفل کله لرک انسانی بک نادر آلداتمایان التاعلریله
 کوزلر مزک قاماشمه سنه مساعدده ایتیه رک مسئله یه بر مسئله بشریه
 شکلنده باقق لازم کلیرسه ، بیامم ، تورک چوجفی ایچون تیره مه مک ،
 و بو پر وعد استقبالک محتملات مهلکه سنی دوشوتجه اوکا آجیامق
 ممکنمیدر ؟

تورک چوجغندن ، هرشیدن اول ، یوللر مزی آچه جق بر مهندس ،

اورمانلری ایشلهته جك بر متخصص ، خسته خانه لر مزی یاپه جق بر
معمار ، طوپراق لر مزی دیر یلته جك بر زراعت معلمی ، تجارت
مملکتک افلاسی رهایه سوق ایدیه جك بر مقتصد می چیقار مق یوقسه
اونی بر رسام ، بر هیكلتراش ، بر موسیقیدشناس می یایمق ، قیصه تعبیرله
اولا حیاتی می ، زینتی می دوشونمك لازم کله جکنه بشقه لری قرار
ویر سینلر ، بن تورك چوجغنك پارس حیاتی ، صوکره اونك مملکته
عودت حیاتی دوشونیورم ، واونك ماضیسیله استقبالنك آره سنه
قونان بوحلقه نك صاعلام اوله بیلمك ایچون پك مستشنا بر معدندن
دو کولش اوله سنه لزوم کوریورم

نیکیین اولمغه چالیشان بر حس احتیاج ایله اینانیورم که کوریلن
نمونه لرك کافه می استئنالردن متر کبدر . نمى ایدیورم که سن ، تورك
چوجغی ، پارس حیاتنك پر جوش و خروش عماننده سلامت
کنار لری آرایان بیچاره تحته پارچه سی ، سن دائما موافق روز کارلره
تصادف ایدیه سك . بویوک بولوار لرك های وهوی صفا سندن ، مونمار ترك
طراقه دار شاقراق لقلرندن ، قارتیه نك متفسخ فلسفه لرندن کچر کن
هپ زیر کدن دارالفنونه قدر کیدوب کان روحکی صاقلایه بیله سك .
قضاء بر فکر تجسس سنی مولهن روزه ، فولی بر ژهره ، تابارده نه ،
اویپایه سوق ایتمش بولنورسه ایرتسی کون وهنسه ن اورماننده
براغاجك آلتنه اوزاندرق ، یاخود ، تویله ریده بر قنایه یه یاصلانه رق
کیجه تحسسانی تحلیل ایدر کن قلبکده تکرار باشلاممغه عهد

ایدن بر حس استکراه بولونسون، و او کیجهنک یورغونلقلرندن
دیكلندیرمک ایچون آیاقلرک سنی یا تاریخ طبیعی نمونه کاهنه، یا حرف
و صنایع تشهیر کاهنه کوتورسون. کندی کندیکه تکرار ایدسک که
مملکتکه کوتوره جکک سرمایه او حیات عیش و ذوقک حسرتی
دکل، اونی وجوده کتیروب بسله یه بیلان، حتی مباح عدایتدیرن
معرفت و ثروت سرمایه سیدر.

خیالک شفیق و رحیم اللری سکا هپ او موافق روزکارلری
سوقه چالیش-هرق سنی کتبخانه لره، مشهرلره، خطابه کاهلره
کوتوریور. سن بر ملتک اساساً صحیح البنیه اولورسه خفته
طاشیه بیله جکی علل و اسقام تظاهر اتنک یانندن، کوره رک، فقط
بولاشمایه رق کچیورسک، در حال اونک صحتنی، قوتی تشکیل ایدن
شیاره رجوع ایدیورسک. کوریورسک که ملوث صحنه لرک یاننده
بر ته آتر فرانسه، بر پورت سن مارتن، بر اوده ئون، بر اوپرا
واردر؛ متقیح بر صنعت و ادبیاتک یاننده کریم و سخی بر صنعت
و ادبیاتک بی پایان منابعندن هر خسته لغه غلبه چاله جق بر فیض شفا
فیشقیریور. فحش و ذلت چامورلی اتکلریله تروتوارلری سوپوره رک
کچر کن بیلورسک کهینه بوراده متین اساسلره قورولمش پاک و عقیف
عائله حیاتی واردر، و حکم ایدیورسک که ملتک مبنای حیات و قوتی
او عائله او جاغیدر. بریکیلر، جمعیتک بویوک چرخ دیور کن قیریلوب
نجره لردن سوقاق چامورلرینه دوشمش بدبخت انقاضدر. وسیلابه

مزخرقات ایچنده زمان اونی سوپوروب کوتوره جکدر ، پایداری
اولان ینه تمللردر.

کیم بیلیر، بو عثمان ایچنده یووارلانیرکن، سافدل تحتہ پارچه سی،
دالغہ لر آره سندہ سلامتہ ایصال ایدہ جک یوللر آرارکن بلکہ کیجہ نک
قارا کلقلرینی یارہ رق سکا تبسم ایدن، سنی دعوت ایدہ رک چاغیران
برشعلہ نظرده افقکی یالیزلایہ جقدر . کوکلم ایستہ یورکە، اوفاق
وقیصہ انجذاب ضعفلرندن صوکرہ ، هپ میل قلباک مسافہ لری
آشہ رق زیرکە، زیرکک ساکن سوقاغندہ پنبہ اوه عودت ایتسین،
واورادہ اندیشہ ایله اویویان بر جفت صاف کوزک رؤیاسنہ برر
قطرہ کریہ آویلما سین .

نهایت ، ایشته اک مسعود ، اک موافق شرائط دائرہ سندہ
منہای سیاحتکە کلک ، تورک چوجنی ؛ جیبکده حجت موفقیئتک،
یارین استانبولہ کیدیورسک .

امینسک کہ اورادہ سکا منتظر بر محیط ، عودتکە مشتاق بر خلق،
عرفانکە مفتقر برایش ، بازوکلک قوتنہ محتاج برمشکل وار .
کوزلریکی قاپاہہ رق وطنکک بوتون او عصر دیدہ صرصرلر، قارزولمش
سینہ سنی صوک یاغینلردن ، صوک قان طوفانلردن صوکرہ
هر وقتکنندن زیادہ مریض ، هر وقتکنندن زیادہ سنی باصوب
صیقمغہ محتاج کوریورسک . کیدوب اونک اوستنہ قاپانہ جق ،
اولا اولانجہ حسرت واشتیاقکک ، اوزاقدن طوتولمش ماتملریکک

آجیسیله اولویه اولویه ، حایقیره حایقیره آغلایه جقسک؛ صوکره،
 اوت ، دهاصوکره کوزلربیکی سیلارک بوتون ضررلری ، خرابیتلری
 تعمیر ایچون بلسککک مجموعی ویرمک ایستهین کنج عنمکه آیاغه
 قاقه جقسک ، « شیمدی ایش باشنه !.. آرتق یکی حیاته، کندی
 حیاته ، کندی نسلمک حیانه باشلايه جغم ... » دییه جقسک .
 بوراده دوریورم . قلممده خیال یامقدن استنکاف ایدن
 برتعب وار ، و تا اوزاقد حقیقت مبهم وغریب برتبسمک اوشوتن
 معنایله بکا صیربتیور .



خاتمه حكاية

خاتمه حکایه

استانبولده ، پارس تحصیللرینی ا کمال ایدهرک عودت ایتمش
کنجاردن بر چوغنه ملاقی اولدم ؛ بونلرله آرتق ، یکدیگرینه
قارشى کتمنده فائده تصور اولنان حقایقه تماسدن متحاشی مخاطبلره
مخصوص قید ، قالمامشدى . اونلر آیری آیری سرگذشتلرینی
آ کلاتدیلر ، پارسده تحصیل حکایه سنک خاتمه فجیعہ سنی تصویر
ایتدیلر ، بن اورتهده آغلانه جق بر حقیقت وارکن اونى ستر
واخفایه چالیشمق قیلندن کولونج بر اویونی بالطبع اوینایه مادم .
بوتون دیکله دکلرمک خلاصه روحنی یالکز بر آغزده توحید
ایدهرک شویله ضبط ایتمک ممکندر :

— عودت ایتدکن صوکره آ کلا دق که بو کون آوروپاده
تحصیل عالی بی ا کمال ایله کلمش بر کنج عینیه مکتبدن چیققدن

صکریه ایش بولمق اوزره دوائر دولت قاپیلرینی چالان مثلاً بر دارالفنون حتی، بر سلطانی مأذونی وضعیت الیه سنده در . بر کره ثابت اولان بر حقیقت وار که مملکتده تحصیلات بر درجه سینه قدر نقصان سرمایه، فقط بر درجه سندن صوکره فضله محصول وار. او یله که حیات اجتماعی نیک بو شعبه سنده ذوالطرفین بر اغتشاش توازن تهلکه سندن چیقیلما یور . اصل یاپیله جق کوچک ایشلر، تملک عائد اساس وظیفه لر ایچون لازم کلن قوللر درجه کافیه ده یتیشدیر یله مه یورده بوکا مقابل مفروض بر کاشانه املک سقف وطاقنه، دیوار وایوانه اویهلر، نقشلر یاپه جق صنعتکاران ایجادینه قالدیشیا یور . هر ایکی طرفه بردن، عین زمانده، آدم یتشدیره بیلیمک، برنده نقصان دیکرنده فضله بر اقلما یه جق صورتده محصول ایله احتیاجی بر نسبت مطرده یه اتباع ایتیمک، والحاصل یاپه جق ایش بوله مایان آدم لرله چالیشه جق آدم بوله مایان ایشلرک مسافه سنی حد اقله ایندیریمک او یله عملی بر فکر حسابیه متوقف که بز بونی شرقه عائد شهر پرستلکمزله، املپرورلکمزله تطبیقندن تماماً اظهار عجز ایدیورز. وبونک نتیجه سیله ایشته استانبول سوقاقلرینک چامورلرینه بر ییغین ایشه یارامایه جق شهادتنامه دوکولیور . رسم، نقر، موسیقی تحصیل ایچون سوق ایدیلن کنجیلردن بحث فضله در . بیلنه من نصل بر سوس جنتیه فدا ایدیله جک سرمایه بولندقدن صوکره بوده بلکه مباح عد ایدیله بیلیر. اصل موضوع بحث بز.

الکتریکده اختصاص کسب ایتد کدن صو کره آناطولی تیموریولی قومپانیه سنک محاسبه دائرہ سنه ، تربیة اطفالده اکال تحصیلدن صو کره نافعہ نظارتی ترجمہ قلمنه ، علوم سیاسیہ دن مأذون رؤسیله مؤسسات مالیہ دن برینک اوراق قلمنه قایریلان بزلرز .

«سزی نه یاپسینلر ؟ سزه نه ویرسینلر ؟» سؤالنه بز کندیمزده جواب بوله مایورز . بو سؤالک جوابی ویره جک بز دکلز ، حتی اونک جوابی ویره جک اولان مسئولی ده بوله مایورز ، اطرافزده باقیورز ، کوستره جک برایش بوله مایورز که اونی کندیسندن ایسته مک ممکن اولان مقام تعیین ایدیله بیلسین . اصل مسئول اولان احتیاج تحقق ایتمکسزین آلت ایجادینه قالدیشان فکر خولیا کاردرد . بوسوزلردن کندمزى مملکتک فوقنده بولدیغمزده ، محق اولمایان بر داعیه کارقله متکبرانہ بر اعتماد نفس طاشیدیغمزده ذاهب اولمق کولونج بر استنتاجک آرقه سنه کیزلنہ رک مسئله نک وخامتندن قاحق اولور . بز مملکته تفوقدن دکل مملکتک احتیاجات حاضرہ سنه خدمات موجودہ سنه عدم تطابقدن ، محیطله غیر مؤتلف بر صنف اولمقندن متشکی یز . بزہ ویریلہ جک ایش وجودہ کله دن اول بز ایجاد ایدیلہ ملیدک . کندى حقمرزده او قدر منصفانه دوشونیورز که حتی یالکیز ایجاد ایدلمش اولمقندن دکل ، اکر بزہ ایش بولنسه بیله ، لزومی درجه ده احضار ایدلمه مش اولمقندن ده شکایت ایدہ جکیز .

الرمزده شهادتنامه اولسه اولسه بزہ اختصاص ایدیلن شعبه عرفان

ایچون بر امتیاز علم و یریه بیلیر، فقط حیات تطبیقیه به تماماً بیکانه یز؛
 هله بزه زمین فعالیت اوله جق محیطك اصل صحنه حیاتی ظلمت
 ایچنده در، بوکا دائر بزده قطعاً بر تجربه یوق. نه مملکتتمزی،
 نه خالقتمزی، نه رسمیاتتمزی، نه اجتماعیاتتمزی بیلمه یورز؛ شو حالده
 بزده نه علممزك جهات عملیه سنه وقوف، نه ایشمزك اصرار
 تطبیقیه سنه اطلاع وار؛ خلاصه ایتك لازم کلیرسه دینه بیلیر که بز
 یا او قونمایه رق توزلی بر رافده اونوتیله جق، یا خود یصدیق یاپیلوب
 اوزرینه یاتیه جق بهوده بر کتابدن عبارتتر.

بوتون خولیا لردن، امللردن رجعت زمانی کلنجه هر شیتك
 اوستنده اهمالی ممکن اولمایان بر لزومك شكل مخوفی یوزیور
 وسزی هر فراغنگزه، هر فتور کزه رغماً کندیسیله اشغال
 ایدیور: یاشامق لزومی. ایشه بو نقطه ده استانبولك هر هانکی
 بر مکتبندن چیقمش یکر می یاشنده بر کنجك وضعیتنه کلیورز،
 واونکله آرتق تماماً برلشمش اولیورز. صرف ایدیلن سلسله
 مساعی، کچیریلن درجات تحصیل، آشیلان مراحل مشکلات
 فرقارینك مجهول بر آتیده لهمزه شهادت و خدمتی خولیا پرور
 اولانلر مزك ذهنندن سیلینمه مکله برابر بو دقیقه ده کوریورز که
 اوده بزمه برابر عین نقطه دن باشلامق اوزره عین ابواب مراجعتی
 چالیور، عین دهلیزلرک مبهم وعد کولکه لرینی قوغالیور، عین انتظار

اودالرینک فرسوده اسکمله لرنده عین ساعات امید و کسلک
تعاقبی صایور .

ایشته اصل بوراده مسئله یی بر مسئله بشریه شکلنده تصور
ایتمک لازمدر . مقصد مملکته مفید و خادم بر عنصر یتیشدیر مکسه
اونک یالکز دماغی عرفان ایله تفریش و زین کفایت ایتمز .
عین زمانده جسمانیاتی امراض و سقطاتدن ، معنویاتی علل و اسقامدن
وقایه اسبابی ده احضار ایتمه لی . اکر اونک یورومکه باشلامه دن اول
دیزلرینک باغی گوشه یوب چوزولور ، ایشنی قوجا قلامه دن اول
روحنک حرارتی طاوسایوب سونرسه سزک آلکزه مملکتک دردینه
شفا ویره جک بر مداوی دکل بالعکس کندیسنه باقیله جق بر خسته
کلش اولور .

دوشونکیز بر کره : بز پارسده درت سنه یاشادق . آیده
منتظماً اوچ یوز فرائق آلیردق ، وبونی آلمق ایچون یکانه زحمت
معین بر کونده متروپولیته نك برده لیکنندن کیروب دیگر ده لیکنندن
حقیقمقدی . بو پاره بزه یالکز مرفه دکل حتی مزین بر حیات
ایچون مع زیاده کفایت ایدردی . ظریف ، منور ، ساده فقط
کزیده بر ذوق ایله مفروش بر اودامز واردی . ایچنه کیرنجه
بزی مردیونلردن قورتاران آسانسورمز ، دوکمه سنه باصینجه
اودامزک کیجه سنی کوندوزیاپان الکتریکمز ، آناختارینی چوپرنجه
قیشمزی یازه تبدیل ایدن قالور یفریمز واردی . کیجه لر مزله

کوندوزلر منک درسلره عائد زمانلرندن صوکره سربست ساعتلر منک، هر کسک ذوق و مزاجنه کوره بر طرز استعمالی اولوردی. اجتماعلر من، سیرانلر من، اکلنجهلر من موجوددی؛ حیاتی اویله بر صورتلر تشکیل ایتیش ایدک که کوزلر منک اوکنده کونلر هر قولنه بر بشقه اونک لئانذ معلق بر چرخ دوار شکلنده غجیر دامه دن، صار صیلمه دن دوزردی. واطرافمزده حیات شهر، بوتون عظمت احتشامیه، بوتون غلیان نفائسیله، بوتون رنکارنک الواحیه یووارلار انوب کیدرکن بزده اونک جریان لطیفنه کندمزی صالیویرمکدن حظ دویار، واونک اویوتوب اویالایان بشیکنک ایچنده طاتلی رؤیالزه صاریلهرق کیدردک.

رجا ایدهرم، بوراده بر آرز توقف ایدیگز، وکوزلریکزی قاپایه رق بر مدت، یالکیز خطوط عمومیه سی چیزلش شو مختصر لوحه یی، سویلنمه سنه لزوم کورلمه یین کافه تفرعاتیه، خیالاً اکال ایدیگز. مسئله بشریت نقطه نظرندن لایقیله وضوح کسب ایدیه بیلیمک ایچون بو کلفت تخیله لزوم وار.

پاره قیدندن آزاده، کنجلیککندن آلمش بر لاقیدیله اندیشه آتیدن مجرد، حرکت و سکنا تنده بر قوش کبی سربست بوکنجی صباحلین یاتاغندن چیقوب کیجه یاریسندن صوکره تکرار یا باغنه کیره جک دقیقه یه قدر هراحتمالی دوشونه رایشاتیکیز؛ینه اوکنجی

استانبوله عودتی متعاقب دونمکه باشلايه حق اولان چلیک دیشلرله
مجهز چرخك ایچنه آتیکیز .

آرتق او کنجك نه مؤمن بر معاشی ، نه متشکل بر حیاتی
واردر . اوراده ایکن آلمش تخصیصاتنك صوك بقیه سی بیتنجه
اوندن بوش قاله حق اولان یری دولدیره حق آنجق لطف تصادفدر .
اوزرنده اسکیمکه باشلامش البسه ، آیاقلرنده دها زیاده خدمتدن
استنکاف ایدن قوندره هنوز نه یولده حل ایدلمه سته قرار ویریه مه مش
معمالردر . ترك ایدیلن حیاتك بر خاطره بعیده سی بولمق ایچون
کوپری نی کچمك املی اویانیر اویانماز همان اسکات اولمق مجبوری
واردر؛ یعنی ، بر جمله ایله ، اوراده ایکن حیاتك الك مهم مرحله سی
کچمش اولمقله ، معیشتك ایلک احتیاجنی دوشونه جك دوره دن
آتلامقله مطمئن ایکن بردن اونك حیاتنك درت سنه سی درت
سنه سنك مادی اولان قسمی بر سونکرله سیلنمش ، طیرمانیلان
دیر کدن قاییه رق ، درت سنه صعوده مقابل بر دقیقه لق سقوط ایله
دینه ، طوپراغك اوستنه دوشمشدر .

بوکا شهرك شرائط حیاتی ، بوراده کوندوزلرله کیجه لرك نصل
روابط قسوت والمه التحاقنی علاوه ایتک لازمدر . بز مزین
کله لره ، مطمئن جمله لره محرومیتلری ، مصیبتلری تشفییه امکان
بولق اعتقادنده یز . البته بر کنجك قلبندن هر آجییه تحمل ایده جك ،
هر هجرانه غلبه چاله حق سرمایه قوت وحمیتی بکله مک بر حق

مشروعدر ، فقط اونك قلبندن بونلرایسته نیر کن بر کنجك نهایت بر انسان اولدیغنه، و، بر انسانك ده وسعتدن زیاده سنی ویره مه یه جکنه سوق محاکمه ایتك بر وظیفه در . بر وظیفه در که خلافتنه حرکت وخیم ضررله خاتمه بولور. نته کیم بولایورده! بو کون آوروپا تحصیلندن عودت ایدن کنجکلر یالکز بوراده قالان کنجکلرله برابر عین نقطه ابتداء بولونمش اولمایورلر ، حالت روحیه نقطه نظرندن آرارلنده اوته کیلرک ضررینه بر فرقده وار . اونلرک قلبنده قیرلمش بر تل، اوراده کوریلوب یاشانمش بر حیاتك بوراده کوریله مه یه جکنه ، یاشانه مایه جغنه قرار ویرن بر نوحه ایله صیرلایور .

بوتون بو سلسله شکایاتدن تورک کنجك اكمال تحصیل ایچون غرب منافع عرفانندن بعید طوطلسنه تمایل بر فکر استخراجی البته خطادر . غربه احتیاج نه قدر مسلم بر حقیقتسه او احتیاجك اسباب ازاله سنی ده کیدوب غربدن آرامق او قدر مثبت ، او قدر مبرهن بر حقیقتدر . یالکز حد ذاتنده دوغری اولان بر نتیجه مادام که یا کلش بر شکلده ظاهر اولیور ، او حالده خطایی نتیجه نك کندنده دکل ، شکننده، اوشکله سببیت ویرن طرز استحصالنده آرامق لازمدر . بو کون محققدر که اله ایدیلن نتایج، مقاصدك اساسی اعتباریله کرک عمومه تعلقی نقطه نظرندن حکومت ایچون، کرک غربه سوق ایدیلن کنجکلرک شخصیتلرینه کوره کندیلری ایچون مفید اولمقدن زیاده مضر اولمغه مشابیه بر ماهیتده در .

شو حالده اول امرده نتایجك وسائط استحصالیه سنی سالم بر اساسه
ربط ایتمك ، صوكره نتایجك زمان ادراکی حلول ایدنجه اونی
طرفین ، یعنی حکومت و طلبه ایچون مفید اولمقدن باشقه بر احتماله
غیر مساعد بر طرزہ افراغ ایله مك لازم کلیر .

بونك چاره سی البته واردر ، فقط آرام و بولق وظیفه سی
بزه عائد دکل . بز او خسته لرز که یالکز درد لریمزی تشریح
ایده رر ، اسباب تداوی بی تعیین حق اطبانکدر .

*

**

ایشته استانبوله عودت ایتمش کنجلردن دیکه دکلرمی تفرعاندہ
غائب اولمقسزین ، کوچك تفصیلاته بوغولمقسزین شو صورته
اجمال ایدہ بیلدم . و ، هپ دقت ایتدم که اونلرک بکا بو درد لرینی
تقریر ایدن دوداقلرنده کنج بیقلرینك آلتنده هیچ یاقیشمایان
درین بر کوسکونلکک خاتم المی وار .





طلبہ و شاہسی

طلبه مسئلہ سی

مخبرلرمك ايچنده بنجه آزجوق بيكانه اولمايان مباحث حقنده
بنى بيان مطالعه يه دعوت ايدنلرده وار. بوجمله دن اوله رق اوروپايه
طلبه اعزامى مسئلہ سنى ذ كر ايدہ بيليرم. كنجلردن - بوميانده برده
خانم قيز وار - بر قاچى دوغريدن دوغري يه بندن استفسار رآى
ايله يورلر. كوستردكلرى اثر اعتماده تشكر ايدہ رك مملكته حيات
عرفانه شدت تعلق اولان بومبيحه دائر مطالعاتى تشریح ايتمك ايچون
مخبرلرمدن كوچك براقندى بي مخاطب اولمق اوزره انتخاب ايدہ - بكم.
كوچك مخبرمك كوزل بريازيسى ، مونس بر افاده سى وار؛
هنوز اون درت ياشنده اولايغندن، مكته ده ا برقاچ سنه مدت
تحصيلى بولونديغندن ، تا نهايتہ قدر بكمه مكدنسه بوسنه ختامنده
اسويچرديه كيتمك عزمنده ايكن مطبوعاتده طلبه نك اوروپاده

مقدراتنه دائر نشریات جسارتی کسر ایتدیکنندن بحث ایدیور .
 كوچك مخبرمه جواب ویرمکده استعجال ایده‌رم که اوروپایه
 طلبه اعزامی مسئله‌سی ارباب تدریسی هپ اشغال ایدن مباحثدن
 بری اولق اعتباریله بنی‌ده خلیججه دوشوندرمشدر ، بوزمینده
 یالکیز مطالعه‌دن دکل مشاهداتک انضمامیله تأید ایتمش قناعتدن
 مرکب افکار مخصوصه صاحبی‌یم . اکر بونلره بر قیمت عطف
 ایده‌بیلیرسه کز ممکن مرتبه طویلججه بر مقاله‌یه صیغدیرمق اوزره
 اونلری تثبیت ایده‌جکم، تعقیب ایدرسکیز . هر حالده هان، یالکیز
 سزه تعلق ایدن نقطه حقنده، قیسه بر جواب ویره‌یم: هنوز اون
 درت یاشنده‌سکیز ، هنوز تحصیل سلطانی‌کزی اکال ایتهدیکیز ،
 دکلی؟ او حالده، چوجغم، هرشیدن اول بوراده بوقسم تحصیلکزی
 اکال ایدک . امین اولاک که یاشکیز ایچون سزک مکتبکیز ، سزک
 مملکتکیز ، سزک اویکیز اک مسعود ، اک امین، اک مفید یرلردر .
 بونی بویله مختصر شکلیله قبول ایدرسه کز تا مکتبکزی
 بترنجیه قدر بکلرسکیز ، بترنجیه اون یدیسنده، بلکه اون سکیز
 یاخود اون طقوز یاشنده اوله جقسکیز؛ او زمان دوشونورسکیز،
 حتی‌ینه بندن - اکر بنی حالا کندیسنه خطاب اولونه بیله‌جک بر
 موقعده بولورسه کز - اوت، ینه بندن صورارسکیز .

ا کر بوتوصیه یالکیز بویله مجرد بر حکم اوله‌رق سزه کفایت
 ایته‌یورسه او زمان بالخاصه سزدن کلش بر اثر تشویقله یازیلان

بومقاله‌ی دقتله ، انصاف ايله ، خصوصيله اوروپاده کشت و کذار
هوسندن تجرید نفس ايله اوقورسکیز .

*
* *

حکومه ترتیب ایدن ایلک وظیفه :

آوروپایه طلبه اعزامی قیلندن حیات مملکته جداً خدمت
ایده‌جک بر تشبثدن شیمدی‌یه قدر اقتطاف ایدیلن ثمراتک اختیار
ایدیلن مصرفلره ، کلفتلره تقابل ایده‌بیله‌جک درجه‌ده اطمینان بخش
اوله‌مایدشنه ، بوتششدن بکله‌ن فوائد و محسنات یرینه بر نسبت
عظیمه‌ده نتایج مؤسسه و منفیه تحقق ایله‌یشنه سبب مدید بر سلسله
تجاریه رغماً هنوز مطرد و معقول ، احتیاجات ايله متناسب بردستور
حرکت اتخاذ ایدیله‌مه مسیدر .

بواویله بر حقیقتدرکه بونی بر طاقم دائره‌لره ، شخیصیتلره
قارشی تعدیلات جمیله کارانه ايله تخفیف ایده‌رک کتم ایتمک یا خود
مقیاس اهمیتنی کوجاتمک اولاد مملکته و وطنک اونلردن منتظری
اولان مقصده خیانت ایتمک دیمکدر .

در حال اشارت ایتمک لازمدرکه آوروپایه اعزام اولنان طلبه‌دن
بحق استفاده ایدنلر و کندیلرندن استفاده اولنانلر مفقود دکل ،
حتی نادرده دکلدر ؛ بونلردن وجودلری بحق مملکتک شهاب
معرفتنه مدار افتخار اولانلری پک چوقدر ؛ لکن استحصال اولنان
نتایج استحصالی ممکن ایکن محضی نقصان تدبیر سائقه‌سیله االدن

قاچیریلان فوائدہ نسبتہً آشبی حقیقہً مضمراولش دیدیرته بیلہ جک
 رادہ ده دکلدرد. هله صوک سنه لړک بحرانی اثناسنده، برچوق شیلر ده
 مشهود اولان جنت آلود اجرا آت آراسنده، طلبه مسئله سنده ده
 مصروف مساعی یا لکیز عقامته دکل ا کثریته فجاعته رسیدہ
 اولمشدر. صوک اعزام اولونان قوافل شبان آراسنده کندیلرینه
 نافع برحیات تحصیل تأمین اید بیلنلر مملکتہ کتیره جکلری ثروت
 عرفانی آنجق کندی شخصلرنده بوله بیلدکلری سرمایہ عزم ایله
 قصادن قورتاره بیلدکلری حسن نیت و نزاهت حس ایله استحصال
 ایتشلردرد. شایان تشکدر که بزه بویله مدار تسلیت عد اولنه جق
 شکله عودت ایدنلر و عودت ایدہ بیلہ جک اولانلر وار؛ بونتیجه یی
 کندیلرینی احاطه ایدن تدابیر و شرائطدن زیاده ینه کندیلرینه
 مدیونز. لکن صورت معکوسه ده کلنلرله کله جک اولانلر کندی
 ارادتلرنده ضعفدن، فطرتلرنده سقطدن زیاده حقارنده تطبیق
 اولنان سوء تدبیرک قربانی اولمشلردرد.

بو حکمی، بویله جه، جف القلم ویررکن هیئت تفتیشیه بر
 حصہ مؤاخذہ چیقارمق فکرنده دکل. هیئت تفتیشیه کندیسنه
 بخش اولنان وسائلی نه قدر ممکنسه حسن استعماله صرف مقدرت
 ایتمشدر. بونی تقدیر ایدہ بیلہ جک وسائله شاهد اولدم. لکن اصل
 سقط اولان حکومتجه و حکومت دواڑی نزدنده بوزمین اجرا آتی
 منحصر آ نفسلرینه عائد بردارہ صلاحیت عد ایدہ رک رؤیتلرینک

تصحیح غلطنه هیچ بر فرد ایچون امکان بر اقایان ذواتک فکر نه
اتخاذ ایدیلن اصولده ایدی. دینه بیلیر که هیئت تفتیشیه چور وک بر
کمینک اداره سنه مأمور ایدلش و بویچاره تکنه اولاد مملکتی
یوکلنه رک مجهول دکرلره سوق اولمش ایدی. کمینک داغیلمه سندن،
بر چوق کنجک دالغه لره یو وارلانمه سندن مسئول اولان اودکلدر؛
مسئولیت، اصل کمینک چور وک اولدیغنه دقت اتمک ایسته مه یه رک
هرچه باد آباد مطلقا چو جقلری یوله چیقارمق ایسته ینده در.

حکومه ترتب ایدن ایلک وظیفه طلبه اعزامی مسئله‌سی
مختلف دوائرده، مختلف جمعیاتده تفرقه امکان بر اقایه رق یالکیز
حائز صلاحیت بر نقطه ده طویلامق و بوتون تشبثک بحق اثمارینه
خادم اوله جق تدابیر و شرائطی او مرکزک دائره مـذا کره
و مراقبه سنه بر اقق ایدی. اوروپایه طلبه اعزامی وسیله تفاخر
عد ایدن، هر متصور اصلاحات و تشبثات آراسنه برده ارباب اختصاص
یتیشدیر مک املنی صوقان، بر جریده مخابرینه یا خود مجلس مبعوثانده
ایراد اولنه جق بر نطقده ممالک اجنبیه یه شوقدر کنج کوندردلر یکنندن
بحث ایده بیلیمک فرصتنی قاچیرمق ایسته مه ین هر دائره، هر جمعیت
سنه نک میعاد مخصوصنده دفتر کشادینه، اعلان نشرینه، امتحان
اجراسنه باشلاردی؛ حتی خصوصی بر طاقم دوائر و جمعیات آراسنده
عادتاً بر مسابقه آچیلاردی. معارف نظارتی ذکر اتمه دم، اکر
دارالایتام شاگرداننک فحیعه‌سی اولماسه ییدی طلبه اعزامنده الک

زیاده حائز صلاحیت موقع اوراسی ایکن مسابقه‌ده اکر قالمش اولان بونظارت اوله جقدی.

نهایت نتیجه‌ده بوتون اوروپا ممالکنه ، بالخاصه المانیاه سوق ایدلمش بیکلرجه طلبه میدان کلدی و بونلر قضا و قدرک هر درلو احتمالاتنه ترک ایدلدی.

بونلر نه او کر نمکه کیدیورلردی ، نصل او کر نه جکلر دی ، او کر نه جکلرینی او کر نه رک عودت ایتدکلری حالد نه اوله جکلر دی ، مملکتک احتیاجات حقیقیه‌سی نه ایدی ، هر شعبه اختصاصه نه قدر کنج افراز اولونه بیلیردی ، مقصد تأمین ایدیه بیلیمک ایچون کوندریله جک طلبه‌نک درجه سن و تحصیلی نه یولده اساساته ابتناء تعیین اولونمالیدی؟. والحاصل ممالک اجنبیه‌یه طلبه اعز می سرلوحه سنک آلتنده یوزلرجه سؤال واردی که دیکنلرینی قانارته رق کوزلره باتیوردی ، فقط کوزلرک بودیکنلره ایلیشوب توقف ایده جک زمانی یوقدی. زمان ، زمان استعجال ایدی ؛ لازم اولان یالکز طلبه کوندرمکدی ، گویا همان مدافعه اولنه جق بر حدود نقطه‌سنه دوشیرمه طریقیه ، ترتیب و تسلیح ایتهدن علی‌العجله افراد کوندریلیوردی. بوصورتله کوندریلنلردن نه قدر قور تاریه بیلیردی؟ حتی بوتون دوشه جک اولانلرک قانندن هیچ اولمازسه مقصود موفقیتک تحتی مکافاتی چیقه بیله جکمیدی ؛ اختیار زحمت ایدوب بونی صوران یوقدی. حال بوکه هرشیدن اول یاپیله حق اولان

ایش، مملکتک احتیاجات عمومیه سنی نظر دقتہ آلهرق یک آھنک
بر تشبث وجودہ کتیر مکدی۔ بودہ آجق تشبثک شورادہ بورادہ
داغنیق بر حال اکتساب ایتہ سنہ مانع اولہرق ہر دائرہ یہ ایفای
وکالت ایدہ جک اولان بر نقطہ دہ جمعندن عبارتدی۔

اعتقاد مجہ اساس سقط بورادہ در، محاذیر سائرہ ہپ بو نقطہ
ابتدادن باشلار۔

حائر صلاحیت ہیئتک صورت تشکلی :

مملکتک حیات عرفانہ بو درجہ حائر تعلق بر مسئلہ نک البتہ
محل رؤیت و تذکری معارف نظارتیدر و تشکیلات اجتماعیہ نک
اک زیادہ ثابت و مستمر سیاستلرندن بری اولان استقبالیہ حاضر لائق
تدابیرینک، مجلس مبعوثانہ اسہ جک محتمل روز کارلرلہ عین
صندالیہ دوشہ جک متنوع آمل و خیالاتہ تابع دائماً تبدلہ میال
بر باریجہ اولمہ سنہ امکان بر اقامق ایچون، نظارتدہ بو ایشک
قوانین ثابتہ و افکار معینہ دن مترکب بر دستور ایلہ حرکت ایدن
بر ہیئت معرفتیلہ ادارہ سی الزمدر۔ بلا شبہہ بو ہیئت ہر ناظرک
تصوراتی تلقی ایدر؛ اونی اشلائمش ایشلرلہ، وضع ایدلمش
قاعدہ لرلہ، الدہ موجود و متأسس رسائطلہ قابل تألیف و تجنیس
کوررسہ تزویج ایدر؛ بو، بلہوسانہ تشبثانہ مقاومت ایدہ جک
یکانہ چارہ تحفظدر۔ اونک ایچون ہیئت مثلاً مستشارلغہ مربوط
اولور، و ہر نہ نوعدن اولورسہ اولسون مملکتدہ علمہ تماس

ايدن مباحثك ديوان تميز طبيعى دارالفنون اولديغندن هيئتك
اعضاي طبيعى سى مستشار نظارتك رياستى آلتده دارالفنون
مدارسندن ابعاث اولونه جق وبو زمين اشتغالى كنديلرينه بر شعبة
اختصاص ايدينه جك اولان مرخصلردن تركب ايدر. بالطبع
هيئت لى الايجاب اختصاص مكاتب عاليه سنك، مكاتب سلطانيه نك،
نظارتلرده، دائره لرده معلوماتنه مراجعت مناسب اولان شعباتك،
اجله كندى حسابنه طلبه اعزامى طلب ايدن مؤسسه نك صاحب
صلاحيت اركانى على طريق الاستشاره استماع ايدر، و بونلرك
وساطتيله تنوير اجتهاده سى ايلر.

بو صورتله تشكىل ايدنه جك اولان هيئتك كنديسنه رهبر
حركات اوله جق بر خزينه تتبعاتى اولمق لازم كليز: مثلاً هيئت
ممالك اجنبيه دن زره لره طلبه اعزامى ممكن ومناسب اوله جقنى،
هر برنده نه نועدن مسالك وشعباتده تأمين احتياجه صالح نه يولده
مؤسسات تعليميه بولونديغنى، بونلرك هر برينه عائد تفرعات وتفصيلاتى،
شرائط معيشتى بيلير؛ كنديسنه لى الحاجه لازم اوله جق بوتون
مدارس ومكاتبك اصول وقواعدينه، طرز تدريساتنه واقفدر؛
حتى بونلردن پيداي علاقه ايديلنلرله منتظماً مخابره ايدر؛ طلبه نك
تحصيلنه علاقه نسبتنده حياتنه، معيشتنه، اخلاقنه ده علاقه شديده
موجود اولديغندن مختلف شهرلرده معلوم و مجرب، حقنده يا
بالتجربه يا خود بالتحقيق معلومات كافيه ايدينلمش عائله لرك فهرسى

بیله وارد. اور وپاده، هله شمال مملکتلرنده علی الا کثر مؤسسات تحصیل طلبه‌نک اباته و اعاشه‌سنه مساعد اولمادیغندن مکتب دوشو- نیلیرکن عین زمانده اونک قدر بلدکه اوندن فضله حائر اهمیت اولان مسکن مسئله‌سی ده دوشونمک لازمدر .

تفرعاتی، تعمیق بحث ایدیلهرک مداوله افکار اولوندقجه ممکن- تعیین اولان شو خطوط اساسیه دائره‌سنده خارجه مناسباتی بر زمین متینه وضع ایده‌جک اولان هیئتک بوندن دهامهم بروظیفه‌سی وارد: احتیاجات داخلیه‌ی، و سرمایه اعتباریله بو احتیاجاتک امکان تأمیننی تعیین ایتک .

ممالک اجنبیه‌یه طلبه اعزامی مسئله‌سی اودرجه ذو کثیرا ضلاع بر معمار و بونک بر صورت سالمه‌ده حل و فصلی او قدر متنوع معلوماته، عادتاً مملکتک کافه احتیاجاتی دراغوش ایده‌جک تبعاته متوقفدرکه بونی بر اجتهاد ذاتی ایله تثبیت داعیه‌سنده بولنیله‌ماز . هله ممکن مرتبه مختصر و ملخص اولمه‌سنه دقت لازم کلن بر مقاله ایله بوتون تعلقات و تفرعات احاطه‌یه امکان یوقدر . بناءً علیه یالکز نقطه حرکت و اساس فعالیت اتخاذه مناسبت کورینن خطوطنک اراءه‌سیله اکتفا ضروریدر .

مملکتک احتیاجاتی تعیین ایده‌جک اولان یر هر بر توعدن احتیاجک محل تعلقیدر: نافعہ نظارتی شو قدر مهندس، زراعت نظارتی شو قدر متخصصه، خارجه نظارتی شو قدر شهیندر

نامزدینه لزوم کورر و مسبب بر مراجعت ایله بونی معارف نظارتندن
ایستر تعبیر عجیب کور و نرسه ، تصورات مستقبله سنک مواد
ابتدائیة سنی فلان و فلان سنه ایچون سپارش ایدر. بوعادتا کله جک
سنه ایچون مالیه نظارتندن ممکن مرتبه فضله تخصیصات آلفه سعی
ایدن دوائر مختلفه سنک مسابقه سنه مشابه بر تشبث اولور. هر دائره
دولتک بو فضله نه قدر سرمایه وضع ایدیه یله جکندن زیاده کنندی
آمال و تصوراتنه ، حتی علی الا کثر خیالاتنه تابع اوله رق نه قدر
ممکنه او قدر فضله طلبه اعزام ایتدیر دیلمک مجاهده سننده
بولنور. فقط حقیقت حالد بر موازنه مسئله سنی ده دیمک اولان
بو تشبثه وضع ایدیه جک سرمایه نک، دولتک احتیاجات سائر سیاه
بر نسبت معقوله و متوازن ده بولونمه سنه لزوم شدید واردر. هیئت
بو خصوصده صاحب صلاحیت اولما قله برابر مختلف د اُردن
کلر مطالبات مفرطه نی بر آرایه طوپلامق، هر کسه حصه مشروع سنی
ویرمک ، مسالک مختلفه ایچون اعزام اولنه جق طلبه آراسنده بر
نسبت منطقیه تأسیس ایدهرک مثلاً بیکلر جه مهندسه محتاج بر مملکت
ایچون آنجق بش مهندس نامزدینه مقابل یالکیز اون کنجک
احضاریله تأمین ممکن اولان مثلاً سیاسیات شعبه سنه یوز طلبه
سوق ایتمک ، والحاصل دوائرک مطالبنی مملکتک احتیاجات
حقیقیه یله متناسب بر مقیاس متوازنه قویمق ، و ، نهایت واصل
اولنه جق نتیجه نی مالیه نظارتندن تخصیص ایدیه یله جک سرمایه

مقدارینه قریب بر حد معده افراغ ایتک بوهیئتک وظیفه سیدر.
 اک بازک نقاطدن بری اولان بو مهمه یه رعایت ایدیلهمه -
 دیکندندرکه هر نظارت نه قدر مهارت کوسترمشه او قدر
 تخصیصات آلمش وایش عادتاً بر مسابقه شکل و ماهیتنی اکتساب
 ایدهرک نتیجه ده مملکتک پک شدته احتیاجی اولان شعبه لرد پک
 آز طلبه اعزام ایدیلهرک بالعکس تأخیری ممکن اولان مقاصده
 لزومندن فضله کنبج تخصیص اولونمشدر. بونک بشقه درلو اولمه سنه ده
 امکان یوقدی. حصول آهنگ آنجق وحدت حرکتله ممکن ایکن
 تماماً ترسنه حرکت اولمش و مملکتک منفعت عمومیه سی کوزه -
 تیله مه یهرک فلان ویا فلان دائرنک تغلب رأی و املنه امکان
 براقلمشدر.

هیئت ممالک اجنبیه یه طلبه اعزامیله مشغول اولمقله برابر دائره
 بصیرتنی برآزدها توسیع رؤیته مانع اوله جق بر دیوارله تحدیدده
 ایتهمش اوله جغندن مختلف دوائر طرفندن کوندردل سینه لزوم
 کوریلان طلبه یی حقیقه کوندرمک ایجاب ایدرمی، یوقسه بونلری
 مملکتده موجود مؤسسات ایله یتیشدیرمک امکانی وارمی، یاخود
 قسماً خارجه اعزام قسماً ده داخلده احضار صورتیله تأمین مقصد
 قابل اولورمی، بو جهتلری ده تدقیق ایدهرک صورتده مجهزدر.
 سرمایه دن بحث اولنورکن سرمایهنک یالکز جهت مالیه سنی
 دوشونمک کفایت ایتمز، دیکر بر سرمایهی دوشونمک مجبوری

وارد در که او ده‌ها مهم ، بلکه پاره ایشندن زیاده آمال و خیالاتک محدودیتنی مستلزمدر : سرمایۀ شباب .

مملکتک مکتب حیاته واقف اولان ، خصوصیه معارف نظارتنده بو ایشارله مشغول بولنان ذوات شو مطالعاتی تعقیب لطفنده بولونیورلرسه ، الیم بر تبسم ایله تجدید تأثر ایده جک‌لرندن شبه‌دار دکلیم .

مسئله پک اطرافه حائر تعلق اولدیغندن ممالک اجنبیه‌یه نه نسبتده طلبه کوندریله بیله جک‌نه دائر سرد مطالعه ایدیایر کن مکتبلرک نه نسبتده طلبه یتیشدیرمکده اولدیغنه سوق فکر ایتمه‌ک ممکن اولماز . بو مسئله‌دن مکتب مسئله‌سنه بالضروره بر خط وصل چیزلش اولور . لکن بو خط وصلک او قدر دولاشیق انخما آتی وارد در که اورایه صایم‌قسزین یالکیز نتیجه‌یی آله‌لم :

عمومی بر تقسیم ایله بزده درجات تحصیل درتدر : ابتدائی ، رشدی ، سلطانی ، عالی . ابتدائی ورشدی درجه‌لرندن ممالک اجنبیه‌یه طلبه اعزامی بالآخره تدقیق ایدلمک اوزره شیمدیلک تعلیق اولنه بیایر . اولاً سلطانی تحصیلمانی اکمال ایدنلری موضوع بحث ایده‌لم : سرمایۀ شبابک بومب‌حشده بزجه اک شایان اعتنا اولان قسمی بودر . مکاتب سلطانیه دینسین ، مکاتب اعدادیه دینسین ، بزده آز چوق فنون و علومده مجاز دینه بیله جک درجه‌ده طلبه احضار ایدن مؤسسات دولتک قدرت مالیه‌سنه نسبتاً آز اولماقله برابر بونلرک

صنوف عالی‌سنده مو-بود طلبه‌نک مقداری، هله شهادتنامه آلا نلرک عددی انکسار خیاله دکل قطع امیده سببیت ویره جک درجه ده در. هیچ اغفال نفسه لزوم یوق: حربک آتش مخربی بوصوک سنه لرده مکاتب سلطانیه واعدادیه صرملرینی بیله یاقوب کول ایتدی، بو اوپله بر فحیه درکه اوکا دائما آغلایه جغز. بوش قالان یرلری دولدیر مق ایچون ده پک چوق زمان لازمدر. مع مافیله زمان بوتون بوشلقلری دولدیرر، بوده دوله جقدر، البته. بناء علیه -رب سنین مستثاسنی دکل اوندن اوله عائد اولان سنه لری آلیرسه قینه کوریرزکه بزده بو درجه تحصیلیه قدر ارتقا ایدیه بیلنلرک عددی؛ دکل فضلہ سنی ممالک اجنبیه یه کوندرمکه، حتی داخلده موجود تحصیل عالی مؤسساتندن اک محتاج اولانلره بیله حد اقل طلبه یی ویره بیله جک راده ده دکلدر.

بوتون ارباب وقوف بیلیرکه بو بویله در؛ قاج کره بو ارباب وقوف آراسندن رفقا واحبای محترمه مله برابر تأثر زمینلرنده نومیدانه دولاشدق.

مکاتب سلطانیه واعدادیه طلبه سنی بلع ایدن مختلف شعبات حیات وار. بو درجه تحصیل اوپله بر مرحله درکه اوراده هر کنج: «حیاتده نه یاپه جغم؟» سؤالی هر وقتدن زیاده برجدیت واهمیتله کندیسنه ایراد ایدر، و آرتق ترددلرک آراسنده بوجالامغه وقت بوله مایه رق اتخاذا قرار ایلر.

بر بویوک قسمی تحصیلیه نهایت ویرمک مجبوریتند در . آلهه حق
بر مأموریت ، طویله حق بر تجارت ، سلوک ایدیله جک بر صنعت
اوکا آغوش قبولی آچار . او تماماً بر علم آدمی ، برفن متخصصی
اولمایه جقسه ، آرتق کتابلرینی موقه ، نادر وهوسه تابع فرصتدرده
مراجعت اولنق اوزرد ، رافه قور ، قوللرینی صیغار ، مبارزه
حیاته کیریشیر . بوقسم اکثریتی تشکیل ایتک لازم کلیر ، شیمدی یه
قدر بویله اولمادیسه بیله آرتق مملکتده حیاتی مهما امکن ومستعجل
قازانق احتیاجی بونی بویله یاپه جقدر .

تعقیب تحصیل ایتک ایسته یئرک عددی یوزه زور واریر ، ظن
ایدیورم . پک تمنی ایدهرم که بو عدد حقیقت حالک دوننده اولسون .
صاحب صلاحیت بر داتک بی تکذیب ایله مهسنه کمال آرزو ایله
منتظر م .

بو یوز عدد ساطانی واعدادی مأذونی که تعقیب تحصیل ایتک
عزمنددر ، اوکنده ایکی طریقک کشاده بولندیغنه شاهد اوله جقدر .
بو طریقلردن بری اونی ممالک اجنبیه یه سوق ایده جکدر که ، بالطبع
اک جاذیدر ، دیکری مختلف یوللره انقسام ایدهرک مملکتک
متنوع مؤسسات عالیه سنه کوتوره جکدر : مهندس مکتبی ، تجارت
مکتب عالیسی ، مکاتب عسکریه نک صنوف عالیه سی قییلندن . هپ
بو یوز کینج آراسنده طلایه بولمق ایسته یین یرلری برمدت اونوته لم ؛
یالکز دارالفنونی اله آله لم ، حتی دارالفنونک فن وادبیات مدرسه .

لرخی ده اهمال ایدم. بونلری نسیان واهمال ایله مکه نه غائب ایدلدیکنه
قیسه بر مکث آراسندن بر هیات کوندردکن صو کره یالکز
حقوق وطب مدرسه لرینی کورم. یوز کنجک کافه سنی بو ایکی
مدرسه یه ویرسه ک وفرض ایتسه ک که بونلردن هیچ بری عارضه یه
ا غرامه دن تحصیل لرینی ا کمال ایدم جکلم، ونهایت ینه یوز حقوق شناس
وطیب اوله رق حیات مملکتته کیره جکلم، بو، احتیاج حقیقینک
دکل، علی قدر الامکان یورویه بیلمک ایچون لازم اولان عددک به
قدر دوننده در.

عدلیه نظارتیه صحیه اداره سندن صورمق ایجاب ایدر، عجبا
آز چوق امین خطوه لرله یورومک ایچون نه قدر مأذونه محتاج درلر؟
ایشته هیئتک مواجهه اندیشه سنه دیکیله جک اولان بو مدهش
رقمده سرمایه شبابی ارئه ایدم جکدر. اه تک چیویسنه ایلدشوب
قورتلدقن صو کرده معمانک آشیله حق صفحات آتیه سی کلیر.

*

**

حلی اقتضا ایدن بر نقطه مهمه :

آوروپایی کوروب طانیش و آوروپاده اوزون مدت اقامتدن
بر کنج دماغی اوزرنده حاصل اوله جق انطباعاتی تدقیق ایتش
ذوات شو دستوره واصل اولورلر : کنجلری ممالک اجنبیه یه ممکن
مرتبه کچ کوندرمک .

بو دستوری اونلره تلقین ایدن شودر : اسباب تحفظه محاط

اولمیان برکنج ایچون اساس اعتباریله کندی یوردندن اوزاقده،
 خصوصیه بو اوزاق یر آوروپا بلاد جسیمه‌سی ایسه، یاشامق
 منافعدن زیاده مهالك ارئه ایدر. جهان مدنیته منافعدن
 زیاده مهالك واردر، دینه‌یور؛ فقط منافع او نودندرکه
 اونلری آرامق، بولمق و آرایوب بولدقدن صوکرده اونلردن فائده
 مطلوبه‌بی استخراج ایله مك لازمدر و بو هنر، مستثنا فطرتلردن قطع
 نظر، آنجق درجه سنك و تربیه اصلیه‌نك تحت ضامننده در.

بو نقطه‌ده توقف ایدر کن مکاتب ابتدائیه ورشديه‌شا گردانندن،
 یعنی اودن بقاله قدر کوندرر کن درلو وصایای ایقاضیه ایله تجهیزه
 لزوم کوریلن کوچك چوجقلردن بحث ایتیه‌یورز؛ اونلردن ممالك
 اجنبیه‌یه اعزام ایتك لازمیدر دکلیدر مسئله‌سی دهها معضلدرکه
 بوکا بالاخره عودت ایتك و او صروده اخلاق و سجایا زمیننده
 تقیده مجبوریت قطعیه اولان مسئله‌بی موضوع بحث ایله مك
 آرزوسنده‌یز. بوراده محتاج حل اولان جهت ممالك اجنبیه‌یه
 اعزام اولنه‌جق طلبه‌نك مکاتب سلطانیه یا خود مکاتب عالیه تحصیلاتی
 اکمال ایدنلردن انتخاب ایدلمه‌سنده در.

کنجلی ممکن مرتبه مملکتلردن کچ چیقارمق دستورینه
 تطبیقاً بومسئله‌بی حل ایتك ممکن اولسه‌یدی در حال اولاد مملکتك
 اولا کندی وطنارنده تحصیل عالی‌بی اکمال ایدرک بالاخره
 اختصاص کسب‌ایده‌جکلی شعبات علوم و فنونده توسیع معلومات

ایتمک اوزره بر ، ایکی ، بلکه ایجاب ایدرسه اوچ سنه ایچون مختلف مراکز عرفانده بر دوره تجربه و تکمیل کچیرمه لرینه قرار ویریلیدی ؛ مع التأسف بودستوره تماماً توفیق حرکت ایده بیلیمکه ماده امکان یوق. تحصیل سلطانیسی ا کمال ایدن هرکنجه هر نوعدن اختصاص زمینلرنده تحصیل عالی دوره‌سی ، اضاعه وقته مجبور اولمق سزین اصرار ایده بیلیمک اسبابی مستحضر دکلدر .

بزده دارالفنون تشکیلات و تجهیزاتی ، و اوکا مضاف طبیعی اولان مدارس عالیله اورتبه مکملیه واصل اولما مشدرکه اون سکزله یکریمی آراسنده مکاتب سلطانیه دن چیمقه بیلن کنجلیری اوچ درت سنه دهها بوراده صاقلایه رق ، مکتبله حیات آراسنده کوپرو دیمک اولان بو دوره دهده اونلری تجربه ایتدکن واوندن تماماً امین اولدقن صوکره یوله چیقارلم .

بناءً علیه بوبابده راهبر حرکت اوله حق دستور کنجلیرک سوق ایدیله جکلیری شعبات اختصاصیه و بونلره عائد بزده آزچوق موجود مدارسک تأمین مقصده درجه صالحیته کوره متحول اولمه سنه لزوم واردر . بزده تحصیل عالی دوره‌سی ا کمال ایچون یالکز کافی دکل حتی لازم اولان مدارس واردرکه عیج بر طرفدن اعتراض احتماله انتظار ایتمک سزین مثال اوله رق حقوق و طب مدرسه لرینی ایراد ایده جکم .

عکسنه مثال اولمق اوزرده علی العموم فنون تطبیقیه پی ،

ادبیات ، لسانیات ، سیاسیات ، احصائیات ، اقتصادیات ، علوم
اداریه ، صنایع نفیسه مدارس اختصاصیه سی ذکر اولمالیدر .
بونلردن بعضی لرینه متعلق آله موجود اولانلرله اکتفا ایتک ،
ووصولی مطلوب مقصدک بورالرده ده امکان تأمیننه قانع اولمق پک
زیاده مهملدیند اولمغه متوقفدر .

بوراده کنیدیلکندن بر سؤال وارد خاطر اوله بیلیر: هر سنه
بو شعبات اختصاص ایچون بر چوق طلبة تفریق ایدمک بونلرک
یتیشدیرلمه سنه مهم مقدار پاره صرف ایدیله جکنه بر دفعه ایچون ،
یاخود تدریجاً اختیار کلفتله علی العموم مدارس عالییه یی ، آوروپادن
استغنا کتیره جک درجه یه دکل ، لکن هیچ اولمازسه حقوق و طب
مدرسه لری درجه سنه کتیرمک و بوضو رتله علی العموم طلبة یی تحصیل
عالی دوره سندن صو کره کوندرمک ممکن دکلیدر ؟

بو سؤال وارد اولمقله برابر بوکون ایچون حلنه احتیاج
عاجل یوقدر . بز هر شیئه دائماً ممکن نظریله باقه رق محدود اسباب
امکان آله کچدکجه در حال مقصدک حصولنه ایمان ایتک فطرتنده
یارادلمش اولدیغمزدن ، هله هوسکارا به ، علی الا کثر طفرانه تشبثات
ایله وسیله تفاخر ایجاد ایدمک : « بزده ده اولدی ایشه !.. » دییه
بیلمکله اختیارانه غفلت ایچنده او یودیغمزدن همان ارسؤاله بر جواب
مثبت ویرمکدن قورقالیدر .

بوکون ایچون هر شیدن اول اعتراف ایله باشلامالیدر که بز

هیچ بر زمان غربك انوار معرفتیه تنور احتیاجندن وارسته
اوله مایزه. بناءً علیه تحصیل سلطانیدن صوکره اولسون فضل و کمال
عالمنده دها ایلری به سوق ایدلمه لرینه لزوم اولان کنجاری او مرکز
عرفانه کوندرمک مجبوریتنده یز. تحصیل عالی دوره سی ایچون ده
بو کون یالکز طب و حقوق استثناییده بیلیر. تصحیح حده استعجال
ایده یم، ایدیله بیلیر دکل ایدلمه لیدر بیله.

بونک ایچون او چ نوعدن سبب وار: سن، تحصیل، پاره.
سن ایچون ذاتاً مقررکه بر کنج اکر بر فطرت مستثنایه
مالك دکلسه ممالك اجنبیه به تعبیر مخصوصیله نه قدر پیشکین کیدرسه
امراض و مهالکه قارشی کندیسنده اودرجه کسب قوت ایتمش بر
معافیت واردر. کندی کندیمزه همان حل ایدیویرمکده تهالك
ایتدی کمزبو نقطه ده برچوق خلاف کیرانه مصادف اولمق شبهه سزدر.
بز حتی او یله غرابت افکار اصحابنه تصادف ایتدک که کنجاری
بالعکس بحث اولنن امراض و مهالکه آتمقله دها زیاده پیشیره جکلرینه
قانع ایدیلر؛ فقط نه چاره که اطلاعات و مشهودات وادیسنده سبق
ایدن تجارب بوصورتله دها زیاده پیشیرملک ایسته نلرک ا کثریت
اورره یاوب فاوورولمه شکننده نهایت بولدیغنه دلالت ایتدکده در.
حتی پک ایی تخطر ایدرزکه کوچک یاشده چوجقلرک کیتدکلری
یرلرده، دکل سجایا و اخلاق ملیه قییلندن کچیریلن استحالاته
اتحاجاتک بیله زورلعه دقت ایده بیله جکلری زمینلرده فقط کندی

لسانلرنده بيله رسوخ و ملکه یی غائب ایتد کارندن بحث اولونور کن،
 بونوره استانبولدن جرائد و رسائل کوندر مک صورتیله مملکته،
 دینه، لسانه علاقه لرینک ادامه اولنه بيله چکندن دم اوره رق مقابله
 ایله ینلره راست کلدک. برده محتاج اشارتدر که امراض و مهالکدن
 بحث اولونور کن بونی محدود بر معناده آلامق لازمدر. امراض
 و مهالکدار مفهومیله هر یرده وارد، هله سنین اخیره نک الواح
 سفیله سی بو زمینده شرقک غرب ایله مسابقه ایده بيله چکنه برهان
 فعلی تشکیل ایدر. بونی اک کنیش معناسیله آله رق کنج لکک
 بوتون معنویاتی، علی الخصوص مملکتله حائر علاقه اولان و محفوظیتی
 تحت امنیت بولونمق ایجاب ایدن معنویاتی احاطه ایده چک برداثرده
 تصور ایتمه لیدر.

طب مدرسه سی جائزدر که صوک ایام مصیبتده ماضیسنه عائد
 شعله و مکملیتدن بر خیلی زیان ایتش اولسون؛ فقط حائر
 صلاحیت اولماقوله برابر مملکتک اساتذہ طی آراسنده بوکا دائر
 بنمله مداوله افکار لطفنده بولنش اولان رفقای محترمه مکده
 اجتهادینی بومر کزده بوله رق ادا ایده حکم که بزده ده طب هر هانکی
 بر مملکت متمدنه ده نعلسه او یله جه تحصیل ایدل مکده در، یا خود
 ایدل مشدر، و البته ینه ایدیله چکدر. بونک ایچون لازم اولان
 جهازک، مادی و معنوی کافه سنه مالکزر. نعلسه درلو خسرانلرک،
 حرمانلرک آراسنده میسر اولان بو نعمتی تحدیث ایتک و اوندن

متنعم اولق بر بورجدر . ساخته بر یورد مداحلغنه قایلمایه رق
بوزمینده اعلان وافتخار اولونه بیلیر . ذاتاً پک تعمیق کیفیته حاجت
کورمه یه رک طی بوراده تحصیل ایدنلرله خارجه تحصیل ایدرک
عودت ایدنلرک آراسنده بر مقایسه یایمق کفایت ایدر . بومقایسه
برنجیلرک اکثریتله لهنه و نادراً علیهنه چیقار . بالطبع بوراده
تحصیل دوره سندن صوکره ممالک اجنبیه ده بر دوره تجربه و تکمیل
کچیرمک آیریجه بر مسئله در .

حقوق مدرسه‌سی اصابت دعوایه ده ا جلی بر برهان تشکیل
ایدر . حقوق مدرسه‌سی احتیاجات محلیه یی ، قوانین مخصوصه یی
والحاصل بو مملکتده ایفای وظیفه ایدرک بر حقوقشناس نه یه
مفتقر ایسه اونی محیط و مؤمن اولان بر مدرسه در و هیئت
عمومیه سیله البته مملکتک خصوصی نقطه نظرندن هرهانکی بر
مملکت دیکرک حقوق مدرسه سینه مرجحدر . فلان وفلان
درس ایچون مقایسه یاپیلنجه مراکز مدنیه ده بولنان امثالندن
اکثریتله مقایسه یه متحمل اولمایان بومؤسسه خطوط عمومیه سیله
آلتیجه بزه کوره کافه سندن زیاده مقصدی مؤمندر ؛ حتی اوقدرکه
تحصیل سلطانیدن صوکره ممالک اجنبیه یه کیدرک حقوق تحصیل
ایتمش اولانلرک هیچ بری ، اکر آیریجه کلوب بوراده نقصان
قالان جهتلری مملکته کوره اکمال ایتک مشقته قاتلانما مشلرسه ،
بلکه برر حقوق عالمیدرلر . فقط بزده نه بر محکمه ده حاکم ، نه بر

دعواده و کیل اوله ییلیرلر . شو حالده اولا ممالک اجنبیه ده حقوق تحصیل ایدهرک بورایه عودتده اکال نقصان ایله مک ، یاخود ، اولا بوراده حقوق تحصیل ایتدکدن سوکره فلان وفلان شعبه لرده توسیع معلومات و تنویر افکار ایچون ، برمدت مشاهیر اساتذہ بی تعقیب ایتک جهتلریدن هانکیکنک مرجح اوله جغنده جای تردد یوقدر .

طب و حقوق تحصیلی ایچون ، سرد اولنان بو مطالعاته برده لسان مسئله‌سی علاوه ایدملیدر . تورکجه‌نک غریب بر مظهرتی وارددر : یا چو جقلقدن اعتباراً بر حمله ده دوام ایله اکال اولنه بیایر؛ یاخود بر عارضه یه اوغراسه ، بالاخره نه قدر جبر مافات ایدلسه ، ینه آز چوق سقط قالیر . بونک لدنیاتی تحرییه لزوم کورمکسزین امثله‌سنی اطرافده وینه کندیلرینک اعترافنده بولیورم . او حالده مسلك تحصیلنی دوشونورکن عین زمانده لسان تحصیلنی ده برلک دوشونمک ایجاب ایدر .

نهایت پاره مسئله‌سی کلیور :

بونک ده اهمیت مخصوصه‌سی وارددر ، البته . بزحیات تدریسده او یله ارباب اماله تصادف ایتدک که هر شیئی ایسترلر ، بوتون جهان مدنیت معرفتی دفعه " ممالکته نقل ایله مک خیالی تعقیب ایدرلردی . بو ممدوح بر خصالت اولمقله برابر مع التأسف پاره یه ده توقف ایتدیکندن نه زمان کندیلرینه : - اوت ، لیکن موازنه مالیه

بوکا مساعدمیدر؟ سؤالی ایراد ایدلسه: - علم آدملرینک پاره
ایشلرینی دوشونمکه مجبوری یوقدر؛ جوابی آلنیردی.
جواب آلنیردی اما بالطبع ایشک نتیجه‌سی آلنه‌مازدی،
بناءً علیه علم آدملرینک بر ازده پاره مسئله‌سی دوشونمه‌لرینه
احتیاج واردر:

پاره خصوصنده فرق غایت بارزدر: بر کنجی حقوق تحصیل
ایچون اوچ سنه، اجازت احضاری و بر دوره تجربه و تکمیل
امراری ایچون بر یاخود ایکی سنه که جمعاً درت بش سنه ممالک
اجنبیه‌ده اداره ایتمکه بونک ایلک قسمی بوراده کچرته‌رک یالکز
صوک دوره‌سی اورایه براقده عظیم بر فرقی واردر. اکر آله
صرف ایدیله‌جک ودها بشقه بر یره صرفی مناسب اولمایه‌جق بر
سرمایه وارسه - که بونی برازاستبعاد ایدیورم - ممالک اجنبیه‌یه بر
دکل، ایکی اوچ کنج کوندرمک صورتیله دها بوبوک بر منفعت
استحصال ایدلمش اولور.

نهایت شو نتیجه‌یه واصل اولیورم که طب و حقوق ایچون
بوراده تحصیل عالی اکمال ایدل کدن صوکره یالکز بر دوره تجربه
و تکمیل ایچون، دیگر شعبات اختصاصیه‌ده تحصیل سلطانی‌نک
اکالی متعاقب طلبه اعزامی بر قاعده نابت‌اولق اوزره لازم‌القبولدر.
تحصیل سلطانی‌دن اول درج‌اتده چو جقلرک اعزامی مسئله‌سی
بلا شبهه هپسندن مهم بر مسئله‌درکه آریجه محتاج تدقیقدر.

کوچک باشد چو جقارک اعزامنده محذور :

شیمدی به قدر ، هله صوگ سنه لرده حما آلود طلبه اعزامی
هنکامه سنده ، الکزیاده فجایع وسقطاته سببیت و یرن ، کوچک
باشد چو جقارک درجه سن و تحصیلی نه اولورسه اولسون ، حتی
علی الا کثر قابلیات و تمایلاتی نظر دفته آلمایه رق ، هرچه باد آباد
مملکتدن چیقاریله رق مختلف احتمالاته صالیویرلمش اولمه سیدر .
بونلردن بر قسمی بالآخره تحصیل عالی به سوق ایدمک اوزره
اول امرده رشدی واعدادی درجات تحصیل کچیرمک اوزره
چیقارلدیلر . دیگر بر قسمی - که نسبة اکثریت عظیمه بی تشکیل
ایدر - دوغریدن دوغری به تحصیل عملی به سوق اولوندیلر .
الکزیاده نتیجه منفیه به محکوم اولان بوایکنجی نوعدی . الکزیاده
دارالایتامک بیچاره چو جقاری آراسندن آتوب قافله قافله سوق
ایدیلن بوکوچکلردن بکله نن شیلردن هیچ بری مملکتک
استحضارات موجوده سیله متناسب دکلدی . بونلردن معدن
اوجاقلرینه ، چفتلکله ، بویوک صناعتکاهلره سوق ایدیلنلر
اولدی ؛ وکویا بزده ایشله تیلن معدنلر ، چفتلکله ، طاقم طاقم
صنایع جسیمه اعمالکاهلری وارمشده ایش یالکیز اصول اخیره به
واقف متخصص عمله یتشدیرمکه منحصر قالمشجه سنه بویوزلرجه
اولاد مملکت اطرافه داغیتیلیرکن یالکیز خیالخانهده موجود
تصورانه بر سرمایه وجوده کتیرمک ایسته نیوردی .

اوروپاده بویوک زراعت ایشلرنده ، معدن اوجاقلرنده ، صنایع عالمینده تدقیقات و مشاهداتده بولنان ارباب فنه خفی دکلدرکه بورالرده یتشدیریله جک تورک چوجقلری اول امرده یتشجیه قدر ازلک تهلکه سننده در ، یتشد کدن صوکره وطنه عودت وعودتن صوکره اوراده اقامت خصوصنده پک خواهشکر اولمایه جقلردر ، بومحذورلر برطرف اولسه بیله مملکته ایش بوله مایه جقلردر . بوارباب دقتدن بعضیسی مقدرات مملکته صاحب اولانلره امع ایتک ایسته دیلرکه فلان چفتلک ، فلان معدن یاخود فلان اعمالگاه دوشونیله رک بورالره بش سنه ، اون سنه صوکره وقوف واختصاصندن استفاده ایتک امیدیه چوجقلر کوندریله جکنه بوبابده اختیار اولنه جق مصرفک جزئی برقسمیه اوروپادن ایش باشیلری جلب ایدهرک چوجقلری بوراده احضار ایتک دهها موافقدر . بوصورتله هم کنج یاشده اولاد وطنی خطرناک برزمینه سوق ایتهمش اولوردق ، همده آتیانه اوله جقلرینه شیمیدن حکم ویریله مهین بش ، اون ، الی چوجغه بدل بوراده برایش باشنک اطرافنه دهها کنیش بردائره استفاده چیزمش اولوردق .

اک ملخص شکلنده تکشیف اولنان بومطالعہ بی تأییداً سرد ایدیلن ادله وبراہینک بوقوۂ اقناعیه سی اولمادی ، زیرا اوروپادن ایش باشیلری جلب ایتک ، بزدن اورویایه استقباله ایش باشی

اوله بيله جك چو جقلر كوندرمك قدر جاذبه دار ، خيالپرور ،
نظر فريب دكلدی .

اجتهاد مچه اوروپايه چراقلق ، عملهك ، چفتجيك ايچون
چو جق كوندرمكه قالقيشقم جف القلم رد اولنه جق عقيم ، سقط
برتشبندر ؛ عكس نه اقناع ايديلنجه يه قدر بواجتهاده مربوط قاله جنم .
بوصنفدن چو جق اعزامنده عدم اصابته قرار ويريلنجه صيرا
بالا خرد تحصيل عالي يه سوق ايدلك اوزره مكاتب اعداديه ورشديه يه
كوندريئلره كلير :

اعزام اولنان طلبه دن بك چوقلري بوتقديرده در . چو جقلرينه
ايكنجی ، اوچنجی درجه ده تحصيللرينی اوروپاده ياديرمق ايچون
اجتهادات ذاتيه يه ، اسباب خصوصيه بناء قرار ويرمش اوليای
اطفال بك چوقدر . اونلرده عامل اوله بيلن مؤثرات او درجه
متوعدر كه بونلري تدقيقه امكان يوقدر ، حاجت ده يوقدر . يالكز
اکثریت اوزره بوبابده سماعاً حاصل اولمش براجتهاده ، يا خود ،
نصاحه تبعیت آرزو اولنان برکوره نكه استناد ايدلايكنندن اوليای
اطفالک دهاواضح ، دها مثبت افکار آله بيلمك سهولتی اولسه ،
مثلا طرف حکومتدن اعزام ايديله جك طلبه ايله مشغول هيئت
رسميه عين زمانده بالره ، وليلره نصيحت ويرمك ، ارائه طريق
ايله مك وظائفي ده درعهده ايتسه زره يه مراجعت ايدجکلرنده ،
نه قرار آله جقلرنده متحیر قالدقلري ايچون اك فنا يوللره صابقم

مجبوریتده بولنان بر چوق ذوات قورتارلمش اولوردی .
 بزده موجود هرائب اعتیاددن بری بوراده محتاج ذکر در :
 بکنیلمه یه جک شیلرک مدافعه سنده التزام شدت و تعصب ایده رزده
 بکنیله جک نادر شیلر مزه قارشى بی ناصاف داورانیرز . بوجمله دن
 اولمق اوزره مکاتب اعدادیه و سلطانیه علیهنده دائماً بر فکر نقیصه
 جوايله مسلحز . بزده بو صنفدن اولان مکاتب البته کمالک نقطه
 قصواسنی ارائه ایتمزلر ، فقط بونلردن پک چوقلری ، مثال اوله رق
 غلطه سرای سلطانیسنی تخطر ایتمک کافیدر ، احتیاجه بالغامابلغ تقابل
 ایده جک حاله در . فرانسه نك لوئی لوگران ، آنری قاتر قیلاندن
 مؤسسایله ، آلمانیا نك بر چوق کیمناز یوملریله ، اوبه دره آل
 شوله لر یله ، ویانه نك مثلاً تره زیانومیله مقایسه ایدیلنجه بعضاً ارائه
 نقصان ایدن مکاتب اعدادیه و سلطانیه اونلردن هیچ برنده
 موجود اولمایان بر مزیته مالکدرلر که بوتون نقصانلرینی تلافی ایدر :
 لسان ، ولسانک اطرافنده طوپلانان شیلر که هیچ شایان استحقار
 اولمایان بر یگون تشکیل ایدر .

بوکا مقابل نظر دقتدن دور طوطمایه جق بر نقصان واردر که
 اوده السنه غربیه دن هیچ اولمازسه برینک لا ثقیله تأمین تصرفیدر .
 بو ، صنوف عالیده ، حیات تطبیقیه ایچون آز چوق ممکن انتقیح
 اولان درس لره بدل ، اوچ بویوک غرب لسانلرندن برینه ده
 کنیش بر ساحه براقق صورتیله پک سهل الاستحصا لدر .

حکومتجه اختیار مصرف ایدیلهرک بیکلرجه طلبه اعزامندنسه
اعزام اولنه‌جق طلبه‌نک عددینی حق معروف و معقولیته ایندی‌ردرک
مکاتب اعدادیه و سلطانیه‌یه ارباب اهلیتدن معلم جلی صورتیه
بونلرک اکمال نواقصنه چالیشلسه بوتون اولاد مملکته شامل
اوله‌جق ده‌ها خیرآور بر خدمتده بولنلمش اولوردی . دمین
نمونه اوله‌رق تخطر اولنان غلطه سرای سلطانیسی ایشته
بزده ممکن الوصول اولان بر نقطه‌یی اراهه ایتکده‌در . مادام‌که
اللی سنه‌دن‌بری بوممکن اولمشدر ، اوراده ممکن اولان بر نعمتی
دیگرلرنده محال عد ایلهمه‌مک لازم کلیر .

بورایه‌قدر سرد اولنان مطالعات تحصیل عالی‌یه سوق ایدیله‌جک
طلبه‌نک بوندن اوله‌عائد اولان درجات تحصیلی مملکتده کچیرمه‌لری
قراریله انتاج اولنق ضروریدر . بویالکمز بر تقدیرده بویله‌دکلدر ،
وبوتقدیر پک زیاده حائر اهمیتدر :

حیات حاضره اوپله بر شکل و جریان آلمشدرکه چوجق‌لری
تحصیل عمرینک مختلف نقطه‌لرنده آلوب‌کندی تلاطمنه قاریشدیرمق
ایستر ، دینه‌بیلیرکه اونک‌الی قطع اولنان یولک شوراسنده بوراسنده
بغته اوزانه‌رق اونلری کندینه‌چکر ، و : - بکا کل ، سن بکا
لازمسک !... دیر .

اونک ایچوندورکه طریق تحصیلده برا کثرت عظیمه حاضر
بولونق ایچون استعجال مجبوریتنده‌در . تحصیل ابتدائیسنی متعاقب

باباسنك تارلاسنه ، دستكاهنه ، دكانه ، والحاصل اكمك قازانجنه
 قوشمق لزومنی حس ایدنلرك عددی دیگرلرینه قات قات فائقدر .
 اونلری براقالیدر که کیدوب اولرینه بر آزد هار فاهیت وسعادت ویرمك
 ایچون بر عامل مفید اولسونلر ؛ فقط تحصیلده دوام ایتمك
 ایسته یئلرده وارددر که شو ویا بوفن ومسلكده اختصاص کب
 ایله مك املنده درلر . اوفن ومسلكده دانشمند دینه جك بر راده ده
 دكل ، دهاز یاده عملی ، تطبیقی بر صورتده بر الکتریق مهندسی ،
 بریول مهندسی ، برانشآت اوسته سی ، والحاصل درجه متوسطه ده
 برفن آدمی اولمق احتیاجنده درلر ؛ وبونی ممکن مرتبه عجله ، زمان
 غائب ایتمه یه رك ، اك قیصه طریقدن یایمق ایچون چاره آرامقده درلر .
 بوملكتكده اك زیاده بویله درجه متوسطه ده اجازت آلمش ارباب
 اختصاصه احتیاجی وار ؛ اصل بونلردن یتشدیرمك ، نه قدر
 یتشدیرمك ممکنسه او قدر ، آلا ی آلا ی یتشدیرمك شدتله
 لازمدر که نهایت بویچاره خرابه ، انقاضنك آراسندن براماره
 حیات ایله دیر یله بیلسین .

مراکز مدنیه ده بواحتیاج پك مصیب بر تدبیر ایله تأمین
 اولنمشدر . بوصورتله یتشه جك اولان چوجغه دنیلمش که :
 « سنك تحصیل اعدادیده صنوف عالییه یی کچیرمکه ، یعنی سلطانی
 مأذونی اولمغه احتیاجك یوقدر ، مادام که تحصیل عالییه نامزد
 دكلسك ، تحصیل اعدادینك صنوف عالییه سنی براقه بیلیرسك ، سنی

در حال آغوش قبوله آله‌جق بر فتون و صنایع تطبیقیه مدرسه
متوسطه‌سی وارد . »

ایشته بومدارس متوسطه‌در که تجارتده ، صنایعده ، متنوع
مسالك تطبیقیه ده جهان مدنیتک احتیاجاتی تأمین ایدہ جک فوج فوج
ارباب اختصاص یتشدیر مکده‌در . بزده بونلردن بردانه بیله بوقدر .
بومدارس تطبیقیه ایچون مقتضی درجه تحصیل مکاتب سلطانیه‌نک
صنوف عالیہ‌سندن اول اولان قسمدر ، که بوحالده چوجق‌لرک
اون درتله اون آلتی یاش آراسنده بولنه جق‌لری زمانه مصادفدر .
ایشته بز هرشیدن زیاده بونلردن اعزام ایتمه‌که مجبورز .

کورولیور که حکومتک‌ک‌زیاده مظهر اعتناسی اولمق لازم‌کلن
بر صنف طلبه‌ک‌ک‌زیاده تقیدات ایله محاط اولمق احتیاجنده بولنه جق
بر سنده‌درلر ؛ و هیئت رسمیہ بونلری بریاندن مدرسه‌یه یرلشدیررکن
بریاندن ده او یله بر صورتده اباته ایدہ جک واونلری محلنده بولنه جق
مفتش‌لرک اودرجه متمادی و متوالی مراقبه‌سنه اتباع ایله یه جک‌در که
تحصیل جهتی تأمین اولنورکن دیگر زمینلرده خساره بادی
عوارض ظهوره کله‌سین .

بونک ایچون اتخا‌دی مناسب تدابیر شیمدی‌یه قدر سبق ایدن
تجاربیدن ملهم اولمق لازم‌کلیر . اک‌باشده خاطرہ کلن طلبه‌نک
ممکن مرتبه طویلیجه بر حالده بولونمه‌سیدر . هر برینی دنیانک بر
مملکتنه ، اومملکتک بر بشقه شهرینه ، اوشهرک بر بشقه محیطنه

آتەرق اوج بش مفتشك وسائط نظارتی احما ایدەجك برطرزده
ایشی داغیتمقدنسه مرا کز مدنیەنك برینی واورادهده محدود
ومعین برقاج شهری انتخاب ایدەرك هپسینی بر آرەده بولندرمق ،
چوجقلره اوروپا حیاتی کوستروب آ کلاتمقله برابر قوللرینی ،
باجاقلرینی اوحیات چرخنك قاییشلرینه قایدیرماق صورتیله تحت
محفوظیتده طوتمق ایجاب ایدر ..

بوکون بویاپیله‌مایور ، یاپیلمه‌سنهده امکان یوقدر . هیئت
تفتیشیه آنجق طاقت بشریەنك مساعده‌سی نسبتندە ایفای وظیفه
ایدەبیلیر ، بونسبتندە ایفای وظیفه ایدلایکندن شهبه ویره‌جك
بروقعه یوقدر . چوجقلرك ایچندەده بحق چالیشان ، کویا
اوزرلرندە دائماً برانا بابا کوزی کشاده دینه‌جك صورتندە امین
وسالم خطوه‌لرله ایلریله‌ین پک چوقلرینی طانیرم ؛ لیکن نه هیئت
موجوده تفتیشیه‌نك بوصورتله وظیفه‌سنی ایفا ایلمه‌سنه ، نه‌ده
چوجقلردن برخیلیسەنك بزى مستریح ایدەجك حالده بولونمەسنه
کوکه‌نەرك متیخذ اصولک سقطاتی تعمیر ایتەمک ایجاب ایتمز .
سلامت وامنیت ، مفتشلرك ، چوجقلرك شخصیتلرندن نبعان ایدن
محسناًندە دکل قبول ایدیلن اصولک ماهیتندە مکنوز اولمالیدر .
ایشته اواصولک ماهیتندە موجود بوزوقلق سببیله‌درکه ایدیلەجك
کارک یانندە بوکون - نسبتی نه اولورسه اولسون - تحقق ایتمش
برزیان وار .



روز کار اسرکن

روز کار اسر کن

يکرمی درت ساعتدن بری بی رحم و فاصله بر صولتله دوام
ایدن بومدهش بویرازاردوسنک غلغله مهاجماتی آراسنده کوزلرمی
آچدم و یاتاغمک ایچنده بوزوله رک ، اورادن چیقمامغه ، ممکن
اوله بیلن ساعتلی اولنک هر درلو آفاته قارشی امانگاه اولمق اطمناتی
ویرن صیجاقلقلرنده کچیرمکه عزم ایله ، دیکله دم . روز کارک
وحشی اوغولتیلری ، پنجره لره چارپان ظالم طراقلری واردی .
بوتون کیجه ، رؤیامک آراسنده بونلری دویمش ، وقودوران بر
دکترک چیغین دالغهلری ذروملرنده چالقانیرکن نا کهان غور
بی پایانی آچیلیویرن اوچوروملره دوشهرک یووارلانه یووارلانه
برور برکمی اویقوسی اویومش ایدم .

قلبمده یاتاغمک حظیله سیلینه مهین برحس هراس ، اعصابمده

اودانك صیجاقلغنه رغماً آقان برلرزش خشیت واردی؛ روحك،
 بویوك برآفت بکلهین برقوش قورقوسیله، بوزولشلرینی، کندی
 کندیسنك اوزرنده طوپلانیشلرینی فرق ایدیوردم؛ و، زمان
 زمان، کورولمز، طوتولماز برکله تصادمیله کلوب اوك جههسنه
 چارپدقچه، بوتون بنانك تملرینه قدر عروق وعضلاتی دولاشان
 رعشات آراسنده روزگارک الواح داستانی کوردم.

کوچك کمیلر کوردم که یلکینلری پارچه لاش، ایپلری
 طوتونه جق بریر، صاریله جق برأل آرایورمشجه سنه چیرپینه چیرپینه،
 حموله سنی آدملریله برابر برربرر قاپوب کوتورن دالغهلرک اوستندن
 اوچویوردی. بونلرک ایچنده دیره کلره صاریلان، کوپشته لره
 طوتونان، بازولرینك صوك قوتیله اولومی ایتن و سسلرینك صوك
 حیاتیله روزگارلرک صیحاتنه لغتله جواب ویرن انسانلر واردی؛
 و کویا بونلر ایصلاق باشلرینی بر ضربه تهورله سیلکه رک، بکا،
 یاتاغمه قدر کلن صوغوق صولر پوسکورییورلردی. اوتدهده، تافقك
 بلوطلرله ییغلمش برداغی اتکنده، بر قایانك اوزرینه صاپلانش
 ایری برکولکه واردی. بردست قهار دالغهلرک ایچندن بوجسیم،
 مهیب حیوانی جیقارمش و تا قارنندن اورایه خنچرله یه رک میخلا-
 مشدی. اونك جان چکیشه رک درین درین اولویشلری واردی که
 روزگارک اوغولتیلرینه قاریشه رق، قایالره چارپوب کوپوك شلاله لری
 ایچنده بورولان دالغهلره کومولیوردی. آنسه لرینك اتکلرینه

صاريله رق آغلایان چوجقار، کوماکلرینک ایچنده دونمش قوللرینی
 بلوطلره اوزاته رق یالواران قیزلر، ثابت کوزلرینی دالغهلره دیکه رک
 یومروقلرینی ایصیران بابالر، عجزک جنتی ایچنده اورادن اورایه
 قوشان آدمرواردی؛ و، ناکهان مدهش برچاتیردیله، روزکارک
 صوک برمشته قهری آلتنده هرشی قوپدی؛ چوزولوب داغیلدی،
 وعظیم برولوله ایچنده دالغهلرک کفنلری فریادلرک اوزرینه چکیلوب
 کریلدی .

بو منظره هول و خشیتدن کوزلرمی قوپاره رق دهها زیاده
 کورمه مک، دهها زیاده دوشونمه مک ایسته دم .
 باشمک اوستنده باجالرک کلاهلری چیلغین بررقص ایله دونیور،
 و روزکارک بوتون حدتلری کلوب چارپدجه اونلر دائماً شاطر،
 دائماً رقصان، غجیرتیلرینک ترانه استهزاسی آراسنده دومانلرینی
 صاووریورلردی . بررقص مستانهک اوچوشوب نازنین انخمالرله
 هوالرده قیورانان، یاییلان بیاض توللری شکلنده بودومانلری
 کوریوردم؛ و خیالاً اونلرک بعضاً اوزانوب دونه دونه کیدن،
 بعضاً حمله حمله، قوپوق قوپوق، کویا کسیک موجهلرله برپیکار
 شکلنده فیشقیررکن بردن سیلنوب داغیلیورن، کاه و بیگاه بر مضیق
 محبوسیتدن قورتیلیویرمش کوکرجینلر طیرانیله اوچوشوب بر ثانیه ده
 غائب اولیورن بیاضقلرینی تعقیب ایدیوردم . بوقاصرغه نک ایچنده
 اونلر کیم بیلیر نه کوزلادی؛ کیم بیلیر هوالره نه عجیب، نه نظر فریب

رسملر نقش ایدرک ، شوخ و طناز ، سرمست و پریده دستار ،
اوچوشیوردی ! ..

بردن ، گویا قنادندن اورولش بر قوش سقو طيله ، خیالم یقیق
أولرک سقط چاتیلرینه ، سونوک باجالرینه دوشدی ؛ وهپ او هجمات
عقورانه قارشى أوك کوكس کیمیکلری چاتیردارکن ، خراب محله لرک
جامورلره اگیان اولرینی ، صاللان قوپوق قفسلریله قریق جاملرینه
کاغدیاییشدیرلش پنجره لرینی ، کچه سزدوشمه لرده چورابسز آیاقلری ،
ایچنده کچن سنه دن قالمش کوللری تیردین اوجاقلرک سیاه حزنی ،
اوزرنده دومانلرک شطارت رقصی ، استهزای قهقهه می طیران
ایتمه یین شکسته سر باجالرک ملول آغلایشنی کورددم .

بو چوکوک چاتیلرک آلتنده ایجه باصمه انتاریلری بللرینه
اورمه بر قوشاقله طوپلانمش ، سونوک کوزلرله ، چوقور یاناقلرله ،
ابدی بر خسرانک مهری آلتنده صوصان دوداقلرله اختیار قادینلر ،
کنج قیزلر واردی . بویونلری شیشمش ، قافالری حددن فضله
بویومش چوجوقلر دائما صیزلامق ، آغلامق ایسته یین بر احتیاج
ایله یرلره قاپانمش بیتوب توکنمه یین بر شکایتله تشریح ایدیله مه یین
دردلری ترجمه ایدیورلردی . یرلره سریلش ایجه یاناقلرینک
ایچنده آتشلرله یاتان آچ خسته لر ، نه زمان اوله جک دییه بکله نن
یوک اولمش یاتالاق اختیارلر واردی . کوندوز کونشک سرسری
بر ضیاسی پنجره دن قایارکن ، کیجه کوچک بر لامبه نك ممسک

ضیاسی تیتزرکن دیوارلرینک اوزرندن هیچ برامید وامل تبسمی
تیتزمهین بو اولره شیمدی روزکارک ، بو مدهش ، بو عقور
جانوارک مظلوم روحندن غضوب وقهار جمله لر قویور ، اونلرک
کیکلرینی قیریور ، عضلاتی قوپاریور ، دها زیاده محو ایتک ،
دها زیاده ازوب ییقمق ، صوکره بو انقاض ییغینینک فوق مائمندن
ظفر صیحه لریله صاورولمق ایسته یوردی .

بو منظره دن قاقچق ایستهدم . کویا شیمدی بی یاقه مدن
طوتان وسور وکله یهرک کوتورن بر آل ، اینجیتن فقط درس ویرن
بر آل واردی ؛ برسس : - دها ایسی وار :.. دیدی . اوزمان
بن ، آرتق او آلك اسیری ، یانغین یرلرینه ، مصیبت ویرانه لرینه
دوشدم .

تپه لردن آشدم ، اووه لردن کچدم ؛ بی انتهی یوللرده ، بی
حدود ساحه لرده دولاشدم ، شهرک ، بو محشر سفالتک ، کوکده -
سنه ، صیرتنه ، اوموزینه جابجا بر جانوار پنجه سی یاپیششمش ،
اوراسنی قوروشمش ، اولدیرمشدی ؛ وبو عظیم صحنه خرابینک
ییقلمش دیوارلری ، دوشمش باجالری ، ییغین ییغین طاشلری ،
اویوق طوپراقلری آراسنده بوتون بر جماعتک سرانجام مصیبتی
یاشایور ، فوج فوج بر یأس وحرمان اردوسنک اظلال خیالی
کزینیوردی .

بوراده بیکلرجه عائله نک تاریخی مدفوندی . حیاتده قازانیلمش

يکانه طوپراقله او طوپراغک اوزرينه قورولمش، سنه لرك قطره قطره
تراکم ایدن آمال و خاطر ايله يوغورولمش کاشانه موجوديت شيمدی
بوراده بر آووج کول اولمشدی. وکویا او اظلال خیال، هپسی
کندیسنه عائد کول ییغیننک کنارینه کیلمش، اللرنده برردکنک
توزلری آشورلر؛ یاواش یاواش، هدیج برشیئک بولنه مایه جغندن
امین، فقط توزلر آشیلیرکن خاطرات ده آشیلهرک، اونلره تیز کذر
بر حیات مخیلک التماعری ویرلدکجه بر پارچه تسلیت بولمق ایسته.
یورلردی. بوکوللرک آراسنده عشق وسودا سنه لری، اونلرک
یاننده، ماتم و هجران زمانلری واردی. کلین اوله جق قیزلرک جهازیله
غائب ایدلمش چوجوقلرک خیاللری بوراده یان یاه او یویورلردی.
بوراسی برعائله حیاتنک بوتون اضداددن متشکل کتاب موجودیتدن
یانمش صحیفه لردی! بعضاً پنبه، بعضاً سیاه ایله یازلمش، فقط کرک بختیارلغه،
کرک بدیختلغه نرجهان اولان بوتون الحانیله قیمتدار صحیفه لردی.
وشیمدی، بو اظلال ماتمیده او خرابه لرده دولاشیرکن هپاو
صحیفه لری آرایور، اکیلوب اونلری او قومق ایسته یوردی.

شیمدی نره ده ایدیلر؛ بوجهانک سکان قهر دیده سی یوردسز.
لقلرینی، چیپلاقلقلرینی نره لرده صاقلامشلردی؟...

وروزگار، شیمدی ده آجی بر معنای استهزا ایله پنجره لرمه
چارپیور، پانجورلرکم چنککلرینی غجیرداته رق ظالم برته کمله سؤالی
تکرار ایدی یوردی :- نره لرده؟ نره لرده؟ نره لرده؟... دییوردی.

ياتاغمدن فيرلادم ، قاحق ايستهدم ، حجره اشتغالمه قوشدم ؛
 ني دائما اويالايان ، اوزون سلسله استغراقامي دائما لطفكار
 بشيكنك ايچنده صاللايان پنجره مك يانه كيتدم و او طوره رق باقدم .
 دار برافق . باغچنك ، اوزرنده صوك يپراقلريني محافظه
 چالیشان كل دالليايه پارمقلغندن آشدقندن صوكره ، نظر سوقاغك
 صويولمش آقاسيالرندن آتلايور ؛ آرقاده مناردنك يالكز شرفه سندن
 يوقاريسي كوريلن ايكي بياض كوشك اراسندن اوزانه رق برازدها
 ايلريده بر قاچ بنا كومه سسنگ اوستنده كنيش ، فقط بو كون
 دارغين ، سياه ، ايصلاق سمائي بوليوردي .

بو حاليله ده كوزلدي . هيچ بيقيلمانان بو تماشاينه دالدم .
 قارشیده مانوليانك ايري باشي صاللانيور ، تاياني باشمده آويزه
 عجيب برنجوردانك يشيل آلو ديملرينه بكنزه ين يپراقلريه چيرپنيور ،
 پاولونيادن قوپان صوك يپراقلر ايري برينچه شكلنده كلوب پارمقلغك
 تللريني توقاتلايوردي .

بوتون بومنظره نك اوزرندن روزكار حالا يورولمايان ، حالا بيقيلمانان
 تهورينك صولوقلريني اوفورر كن هرشیده يورويور ، آقه آقه
 كيدييور وهمني ويرن بر سيلان وار كيدي .

بردن تنها سوقاقدن بر كوكله حركتي حس ايتدم و كوزلرمي
 افقدن آيبردم : بو ، قوقلاته باشنده ، تفنكي قايشندن صول او موزينه
 كچيرلمش بر عسكردی . دوردي ، شرقه و غربه باقندي ، يول

آرایوردی ، اوفاق بر ترددن صوکره بردن بولدیغنه حکم ایتدی
و پنجره مک دار افقندن چکیله رک غائب اولدی .

سیلکسندم ، دها ای کورمک ایچون آراندیم . صحیح ، کوردیکم
اومیدی ، عسکر میدی ؟ یوقسه بشقه بر منظره نک بنی بو قیش
روزکاری آراسنده زیارته کلن خیال طائفیمیدی ؟ ...

روزگار ، هپ او ظالم او غولتیسيله ، اطرافنی دوکه دوکه ،
کوکره یوردی .

۱۳۲۹



أشيامك آراسنده



أشيامك آراسنده

أشيامك آراسندهيم ؛ نهايت بكا عائد اولان ، منحصرآ
بندكمك ترسبات سنيى اولارق قاله بيلن نه وارسه اونلرك پريشان ،
فقط پريشانيسنه رغماً عين جملة عصبيةك اليافيله مربوط و مقيد ،
عين معنى حساسيتده متحد و مشترك كومه ليله محاطم .

أو خلقى بوتون بكا متعلق اوله رق بولدقلىرى ، دولابلرك
رافلرندن ، صندوقلرك ديبندن ، أوك كوشه سندن بوجاغندن
أللرينه كچيردكلىرى هپ برر برر كتيرديلر ؛ هنوز پرده لرى
أصيلماش ، خالىسى ياييلماش اودامك ايچنه دولديرديلر ؛
و بونلر شيمدى قارمه قاريشيق ، فقط بر حياتك عين مشيمه دن
چيقمش اولادى كى برى برينه صوقولوب قاريشمقدن محظوظ
و متلذذ ، اويله بويوك بر ييغين تشكيل ايدىيوركه هيچ بر زمان

بو اودايه صيغديريله مایه جق ظن ایدیورم .

بکا دیورلرکه : « کوریورمیسک؟ باق ، حیاتده سکا اصابت ایده بیلن یری بز آلدق ، اونی تماماً استیلا ایتدک ؛ یری بریمزه قاووشه رق ، صیقی صیقی ، یان یانه ، اوست اوسته صیقیشوب ییغیله رق بوراسنی قاپلادق ؛ اوطوره جق ، حتی آياق لرکی باصه جق یر یوق ؛ فقط بز سکا ، یالکز سکا بر پارچه یر ویره بیلیرز . سنی قوللر مزه قوجاغمزه آله بیلیرز ، حتی بوکا محتاجز . قاپنی قاپایه رق سنکله بر قاچ ساعتک بروصال وحسبحال ایچون هیمزک یوره کنده تیره ن برامل ، سکا اوزون سنه لرك کریه لریله تبسه لری ، کیجه لریله کوندوزلری آراسندن کتیرلمش درلو نشاید آلام و سرورک احتیاج ترنمیله دوداقلر مزده اوچان بر اهتزاز وار . بزى براز یاقیندن دیکله مک ، بزمله برابر بر قاچ ساعت بوتون حیاتیکی تکرار یاشامق ، و صوکره یورغون باشکی مشفق کوکسمزه یاصلایه رق نذیلر مزک آراسنده اویومق ایسته مزمیسک ؟ »

هپ بردن ، کیمی محترز و متوحش ، کیمی جسور و مجبر بر ادا ایله ، فقط هپ بر آهنک شفقت ایچنده امتزاج ایدن بر زمزمه نوازشیله بنی دعوت ایتدیلر ؛ رطیب بر کوزله هپسنی بردن در آغوش ایدرک ایفای شکران ایتدم و اوطوردم .

او زمان اوزون بر فاصله توقفدن صوکره نا کهان طریان ایدن بر عصاره حیات ایله کویا بر آغاجک ، طوپراقلرک

دریندکلرینه اینن کوکلری ، هوالره دوغرو یوکسه لن داللی
 عین ثانیه ده عین ارتعاش حساسیتله تیره دی ؛ هپسنگ اوزرندن
 تکرار یاشامغه چیقمقدن مست اولمش بر هوای سرور قایدی ؛
 و شیمدی ینه هپ بردن ، فقط هربری کندینه عائد داستانی
 تقریر ایدرک ، سویله دیلر .

ایچلرنده اوزاقدن کلن ، کیزلنمک ، ممکن مرتبه آز برصراحتله
 صوقولمق ایسته یین ، صانکه یوزلرینی بر نقاب حجاب ایله قاپادقدن
 صوکره میرلدانان ، خفیف بررؤیانک بلوطلری آلتنده سیال الحاتی
 آکدیرر مبهم سسلر ، وبونلرک یاننده ، یاقیندن کلن ، بعضاً خشین
 بر ضربه ایله بر عود تللرندن قویارلمشجه سنه مخرش ، بعضاً تیز بر
 پرددن فریاد ایدن بر کان قدر جانشکاف ، آره صره چالاک برالله
 رقیق شطارتلرینی سرین بر طنبور ، یاخود ، نفسله چالینان اینندار
 بر قانون قدر هوا پرست ، یاخود ، دنواز تغیلر واردی .

بر دقیقه ایچنده بومجموعه اضدادک زهرلردن ، آتش وزلالدن
 مرکب نوشابه سنی ایچدم ، وبر دقیقه ایچنده بوتون حیاتی ، کویا
 بر افسون سحرک شمشکلریله دفعه طوتوشیورمش بر منظره
 انجلاسیله ، کوردم .

اونلرهپسی اطرافنده ایدیلر ، وهپسنده کویا بکادها صوقولمق ،
 بکا برحمله روح ایله آتیلیمق ایسته یین بر حرکت وار کیددی . کویا
 بو ، ذی حیات بر لوحه نك اظلال واشکالیدی که بر سیلان حلول ایله

كلوب بنده انحلال وامتصاص ايديوردی.

قیلوب آتیه مایه رق صاقلانمش قلملر؛ دسته دسته، کومه کومه
هربری بر یردن آلمش، هربری بر بشقه زمانك ساعات تسلیت
جویانه سنی دولدیرمش کتابلر؛ شوراده بوراده، یا سویلوب
اوقشانمش، یا نفرت ایدیلهرك ایکره نیلمش چهره لر؛ بیاض صقالیه
متبسم بر سیما خیالی احیا ایدن اوزرینه اوزون برتسبیح صاریلی
بر متکا؛ ایچنده غائب ایدلمش قیمندار وجودلره عائد، نه زمان
آچیلیرسه کوز یاشاریه ایصلاتیلان مینی مینی ایپك بر بوغچه؛ او
تعداد ایدیلهمه یین، اسم ویریلهمه یین یوزلرجه اوافق تفك، هربری
شفاف بر جهان خاطراتی دفعه ارائه ایدر بر عدسه لطفیه کوزمه
ایلدشدکجه بر افق حیاتمه بر تازه کونش تعلیق ایدن متفرق اشیا؛
دها صوکره طاقم طاقم، بعضاً تصنیف ایدیلهرك ظرفلره قونمش،
بعضاً بر روزکارله صاوورولمشجه سنه داغنیق قالمش مکتوبلر؛ بوتون
شیمدی یکیدن بر جانله تیتړه یین، بلیغ بر لسانله تسکلم ایدن بوخرده
وجودلر، بناسکمک اویله اولادی ایدی که اطرافده طوپلانیورلر،
خی درین بر استغراقك هم ماتمه، هم نشویه بکزه یین باغینلقلریله
اویوشدیریورلردی. بن سنه لرك ضربات روزکاریله اطرافنه ییغیلمش،
بریکه بریکه جسم بر کومه تشکیل ایتش غصون واوراقی آراسنده
قریق، چوکوک بر کوتوک کیدم.

المی اوزاتدم. پارمقلمك تماسنده قاچیرلمق ایسته نمه یین بررؤیایی

سوندير يورمش اولمقدن مجتنب برخفت احتراز واردی. ألمه کچن
شی یووارلاق برلاستیق ایدی که ایشته قرق سنه دن بری بنمله برابر
بوتون دالغهلرک اوزرندن یووارلانمش، بوکون صدمات وقایعه
بنم آرامده شدت ضربه یی تهوین ایتک ایسته یوره شیجه سنه ، آرتق
غائب اولدیغنه حکم ایدیلیر ایکن ، تکرار میدان چیقمش ایدی.
اوبنی درحال چوجقلغمه کوتوردی. مکتبک تنفسخانه سنده
اویسارکن بر آرقداشک آلدن قاپیلهرق ضبط ایدیلن، اولاهمیت
ویرانه یه رک صاقلانان، فقط بر دفعه صاقلاندقن صوکره طراتمک
چوجقلغمه رجوعنه وساطت ایدر بر تکرارک مثابه سنده محافظه
اولنان بوکوچک شی بنی تکرار قرق سنه اوله کوتوردی. کندیمی
اویونک ذوقیه چیلدیرمش ، صیچرایور ، بکا ویرلمه مک ایسته نن
بوشیئه یتیشه بیلیمک ایچون مینی مینی پنجه سیله صالدریور کوردیم.
نهایت اونی قاورامش و آلمشدم. ایکی ألمه طوته رق ، ظفرمک
مسرتیله کوله رک آرقداشمه قارشى موفقیتیمک بوتون کورولتیلریله
طاشیوردیم.

شیمدی بوبی معنی خاطره کنیش صحرالری کافه مناظریله یش
نکاهمه سرن کویا مرتفع بر نقطه حاکمیتیه خیالیه بتون الواح
طفولیتیم کتیریوردی؛ وبو الواحک آراسندن ، هپ قوشان ،
صیچرایان ، کولن بر چوجق کوریوردیم.

صوکره او چوجفی قرق سنه نک آراسندن تعقیب ایتدم، قاچ

كره قوشاركن دوشمش، صيچراركن قايمش، كولركن آغلامشدي؛
وقاچ كره، بويله بر طوب ياقه لاق ايچون آلارينك حمله سويله
صالديرركن پارمقلىرينك آراسندن بر خيالك كولكسى آقوب
سيلنمش ايدى.

اللامك بر آزدها عجول وجسور حر كاتيله دوام ايتدم:
كتاب، كتاب!.. بونه قدر كتابدى، بونلرك اوزرنده نه اوزون
ساعتلر كچيرلمشدي! بونلره، بعضيسنك اوزرنده آغلانهرق، ياخود
كولنهرك، فقط اكثرينك اوزرنده عقيم بر كوشش بلهوسانه
سيرانلرندن صوكره اويونهرق ياشانمش مديد بر حيات، بر حياتك
هيچانلردن، كسلانلردن اورلمش زنجيرى دولاشيقدى.
برر برر، كيمى اھمال وتسويله كچيروب دستله يهرك، كيمينك
اوزرنده كتابچينك تمفاسندن سر رشته بولان خاطراتك قاريشيق
ايزلرينى تعقيب ايدهرك، بعضاً آلدقلىر يرلى، اوقوندقلىر
زمانلرى دوشونهرك، بعضاً اوزاقلرده مدفون بر بقيه تھيجك
حرارتى بولمق ايچون صحيفه لرى آراشديرهرق، وبوتون بومعوج
خطوطك پيچ وتابى آراسنده حياتك آلتى اوستنه كلن، تاريخلرى
برى برينه قاريشان صفحائى دولاشهرق ايلريله يورده.

كويابنده، بونلرى آلوب اوبك اوبك، طاقم طاقم يرلشدير دكجه
كتاب حيايمى اوقويوردم؛ فقط المده بو كتاب، صحيفه لرى قوپوب
داغيلدقدن صوكره صحيفه صره سويله ترتيب ايدلمه يهرك تجليداولنمش

كیدی . مختلف زمانلرده آلمش رسملرینی قاریشدیره رق تماشایا
ایدهن بر آدمه بکیزه یورددم . بونلرک ایچنده پر امید و شباب ، یاخود
غمکین و حزن آور سیالار واردی . بعضاً بئلکمک یاشامق لذتیه
پارلایان ، بعضاً بر عجران بلوطیه سیدسله نن کوزلریله قارشیلایشیورددم .
بردن دوردم : اله کندی کتابلرمدن ، یکریمی بش یاشندن اوله عائد
یازلمش بیچاره شیردن مرکب اینجه بر جلد کچدی .

سقط بر چوجغنی طاشیار بر بابا حسیله بونی المده طوتدم ،
یاواش یاواش یا پراقلرینی چویرمهکمالادم . اکثریت اوزر صحیفه لرک
یالکیز شکله باقه رق ، فقط اونلری بویله سیر ایدرکن محتویاتی
کوزلرمک او کنده در حال التماع ایدهرک ، بعضاً اونوتلمش بر تصویرک
آرقه سنه طاقیه رق ، بر یابانچینک متن سانحاتی او قونورجه سنه قایلوب
کیدهرک ایلریله یورددم . بونلری نه قدر بسیط و طفلانه ، فقط او
چوجقجه ساده لکلرینک ، او قریق دو کوک لسانک آراسنده نه قدر
حرارت و صمیمیتله مملو بولیورددم . او یله سطرلره تصادف ایدیورددم که
کندی کندیسینک بر خاطره خجالتندن قاجینانلره مخصوص بر
احتیاج فرارایله بنی دها ایلریلره ، بر آزاراحت نفس آله بیله جک
واحه لره سوق ایدیورددی . صوکره بونلردن برینه تصادف ایدنجه ،
دوروب دیکله نیور ، و او زمانلره عائد زنده و جوال شبابک خلج جانلرینی
بولیورددم . بونلرک تقرر ایتمه مش اشکالنده ، نصل اولوب ده یازلمغه
جسارت ایدلدیکنه حیرت اولنار کولنجلکلرنده ، بوتون علل

وسقطاته رغماً يالكز بنجه محسوس ، يالكز بنم موجوديتدن
چيقه بيلن بر معيار ذوق اياه آ كلاشيله بيلير كوزللكلري واردى كه،
هپ او سقط چوجغنى طاشيان بابا حسيه بونلري بلكه درين بر
حسن مرحتدن صيزلايان قلميله سودم .

بونلرك آراسندن اوزون سنين مجادلاتك فتورلريني، تعباريني
كوردم ؛ اونلرك نه قدر بوغوشمه لر ، ديديشمه لر آراسنده هپ
فتورلره ، تعباره غلبه چالان ، دوشدكجه قالقان ، بوغازي صيقلقمق
ايستندكجه سسي يوكسه لن بر عزيمك حجت موفقيتي اولديغنه قرار
ويرن بر حكمله بو كوچك اينجه جلدی يو وارلاق لاستيقك ياننه
قويدم . واويله ظن ايتدم كه يكديكرينه بيكانه قالماديلر .

بر آاز يورولمشم . اطرافنده او قدر خاطرات اويانمش ايدى كه
ديواردن ديواره چارپينه چارپينه يوروين بر سرخوش كبیدم . دوردم ،
وايكي اللرميله ديزلرمي قوشاقلايه رق دالغين دالغين باقيندم .

بو ييغيندن ، بوتارمار انقاضدن شيمدى بر ييلغينلق حسن
ايد يوردم . بونلري هپ تصنيف ايتك ، يرلى يرينه قويقمق ، هپسنة
بر كوشه ، بر صره تعيين ايتك ، ونهايت بوتون اودامه بونلره بر
مرتب مجموعه حیات ، بر مؤسس آهنگ اشكال ويرد كدن صوكره
نهايت هپسنة بردن : - ايشته سز يرلر كزده ، بنده شوراده يرمده ،
بر دها آرامزده برخيانت و مفارقتك مسافه لريني قويمايه رق برابر
ياشايه جغز ، ايسترميسكز ؟ .. ديمك لازمدى .

و کویا دیوارلرمك حوصله سنی حساب ایتمك ایسته یین بر نظر
اندیشه ایله باقنیرکن بر کوچك ماصه نك اوستنده ، بر طاقم اوفاق
تفك آراسنده ، نهراتونك ، او پری شگوی و مرثیه نك ، النده
رباییله ، عریان سینه سیله کوچك هیكلنی کورددم .

بو ، وفات ایتمش بر انکلز دوستمك بکا پارسدن کوندرلمش
سه ور معمولاتندن بر یادکاریدی . بیله مم ؛ نصل بر تقیده قالدقم ،
وایلریله یه رك اونى ألمه آلدیم : — یازیق !.. دیدم . بو نفیس اثر
صنعتك صاغ ألنك صوك ایکی پارمغیله صول آیاغنك باش پارمغی ،
صوکره ربانك بوتون یوقاریسیله تللری قیرلمش ایدی .

قلمده ده درحال برشی قیریلوب قویمق آجیسنی ویردی . شیمدی
درین بر کدرله بو بیچاره قیریق نفیسه یی معاینه ایدیور ، اونك
سقطلرینی تعمیر چاره لرینی آرایورددم .

بوکا امکان یوقدی ؛ بو پری شکسته شعرى بویله قیریق پارمقلریله
قویوق رباییله صاقلامق ایجاب ایدیوردی . بر عقدہ المله بوکاقرار
ویردکن صوکره دوشونمکسزین اونى ، او بیچاره سقط شیئی
کوتورددم ؛ یووارلاق لاستیقله اینجه جلدك یاننه قویدم .

واویله ظن ایتدم که بونلرک هپسی درحال کیزلی برارتباط ایله
یکدیگرینه باغلاندیلر .

تصاب شرایین



تصلب شرايين

بو کون مملکتک، مجاری حیات اقتصادی سنده بر طیقانی قلق،
بر کوشکک و ارکه بونی بر تصلب شرايين نو عندن تلقی ایدہ بیلیرز؛
و محققدر که مشکلات معیشتک اک بویوک قسمی بونک اسباب تشفیہ
و تداو یسنی میسر قیلہ بیلہ جک صورتده هنوز تدابیر مناسبہ اتخاذ
ارلونه مامه سندن متولددر . لا اقل بش سندهن بری کوندن کونه
متزاید بر شدتله اعراض و تجلیاتی مشاهده اولونان و تعیین منابعنده
مشکلات بولونمایان بو وضعیت طاقتفرسایه آز چوق مقاومت
ایدہ بیلہ جک قدر تدبیر بولونه مامه سنده سبب ، دائما سطح حینانه
چاره سازلقله اکتفا ایدہ رک علی کو کندن قازییه جق قدر درینلره
اینن بر عملیه جراحیه دن توقی ایتک عادیدر . عادت یا خود
مقتضای فطرت ، هر نه دینیرسه دینسین ، بزده علی آرایوب

بولق ، کوروب آکلامق قابلیتی مع زیاده موجود اولمقله برابر
اجرای حرکت زمانی کلنجه هر وقت موقت بر تعمیر ایله اکتفا
ایدن و اصل یاپیله حق شیئی مناسب بر زمانه تعلیق ایله یین بر تأجیل
مفتونیتی واردر .

بو کون معیشت مشکلاتندن مضطرب اولان مملکت یالکز
استانبول و اونکله همحال اولان اقسام وطن دکلدرد . حیات
اقتصادیه سی قیاس قبول ایتیه جک مقیاسده اسباب کمال ایله مجهز
اولان غالب مملکتلرده بیله ، حیات ، ایچندن بر درلو حقیقه مایان
بر بحران کچیرمکده در ، حتی بعضاً حرب سنه لرینی اولدقجه اداره
مصلحتله آشه بیلمش اولان مملکتلرده متارکه دن صو کره معیشتک
داها زیاده پیدای صعوبت ایله دیکنه حکم اولونمقده در .

فقط بو مشکلات او نوعدندرکه اونک امکان ازاله سی قدرت
بشریه داخلنده بولونمایان مؤثراته متوقفدر . کافه منابع جهانیه
مستولی اولان بر مضایقه نک نتایجی ده عالمشمول اولمق امور
ضروریه دندر . بوتون دنیانک معیشتی زیروز بر ایدن بر حادثه
معظمه آراسنده شیرازه اقتصادی مختل اولمش بر حیات عمومیه ده
استثنا تشکیل ایده رک تأمین موازنه قدرتیاب اولمق هیچ بر مملکت
ایچون میسر اوله ماز . بزده هر کسله ، هر مملکتله برابر بو چرخ
دوارک ایچنده سرسمله تن بر سرعتله دونمکده یز . آنجق بو مؤثرات
عمومیه دن باشقه بزده آیریجه دونن . چرخ ، بوزوق و قیریق بر

چرخ وار که اونک دیشلری آراسنده فضله بر اشکنجهیه محکومز؛
 ایشته بو چرخ که دولاب اداره نک ازلی بر سقطیله معلولدر ،
 بزده حیاتی هر یردن زیاده بر بار مهلك حاله کتیرمکده در .
 هر یرده احساسه طاقت بشریه کفایت اتمهین عوامله قارشی تدابیر
 زجریه استعمالی ممکن اولماه سنه رغماً هیچ اولماز سه اونلرک تهوین
 آلامنه صرف مقدرت اولونور ، فقط امکان تعلق ایدن هر مرضه
 دوغری ده در حال بر دست شفا بخش اوزانیر ، ده شیله جک بر
 چیمان وار سه وقت غائب اتمهین بر استعجال ایله اوراده همان
 بر نیشترک تماس سلامت آوری کلوب تقیحک کسب وخامت
 ایله مه سنه مساعد ایتمز .

ایشته بونک ایچوندر که مثلاً بر کوچک کوپریده اوافق بر
 عارضه اولمش دییه یکدیگرندن سکز اون ساعتک مسافده کائن
 ایکی نقطه دن بری محمولنک چورودیکنی ، دیکری امکانک
 دها زیاده اکسیلیدیکنی کورمکه محکوم اولماز .

شرابین مملکتده نه ایچون طیقانیقلق وار دییه ایراد سؤال
 ایدم جک اولانلرک آله جقلری جوابلرده انسانی شاشیرتان برسقامت
 تسلیمی وار . مزه قیرلمش بر کوپریدن ، دولمش انبارلردن ،
 ماللری استیعاب ایدمه بن ریختیملردن ، بوشانه مایه رق معطل
 بکلهین معونه لردن ، کرادن قاچینه رق کمرکلرده اشیا براقان تاجر-
 لردن بحث ایدرلر ، و بالطبع بو بحث اولونان شیلرک هر برنده

مالك في اصله افرات ايله آرتيران بر سبب مختفیدر ؛ اویله که
 بر محتر صراف آئنده ربحه محکوم دین سندی شکلنده خلقک
 آغزینه کیره جک هر لقمه یوتیله مایه جق بر جسامت آلیر . بر کره
 ذهن بو زنجیرک دولاشیق حلقه لرینه صاریلیرسه کنیدیسی قورتاره .
 مایه رق بونالمق و حقیقه ایچنده بولنیلان وضعیت ایچون چاره
 تدارکی محال اولدیغنه قرار و برمک مجبوریتنده در . لکن اونک
 آراسندن صیریلوب ده حقیقت اشیا به سالم کوزلرله باقیلنجه باشقه
 بر نتیجه چیقار . و نتیجه ده بوتون بو تعداد ایدیلن سقامت لک
 یك قولایقله ممکن تعمیر اولدیغیدر : یتیشیر که اساس مرضی احما
 ایتک ایسته یین بر عزم اولسون .

کوپری تعمیر اولونور ، بوتون بوزولان کوپریلر ایچون بر
 چاره واردر ، اولری تعمیر ایتک . خصوصیه او کوپری بغدادیلری
 دوره دوره چوروین بریری آچلغندن اولن بریره ربط ایدیورسه ،
 در حال نه یاپوب یاپه رق ، پاره یوقسه دیله نه رک ، او کوپری نی همان
 تعمیر ایتک لازمدر . کمرک آنبارلری کفایت ایتیه یورسه آنبار
 استیجار اولنور ، ارضیه رسومی حقنده اویله تدابیر مناسبه اختیار
 و تطبیق ایدیلیر که تجار کمرک ضررینه بر استفاده غیر مشروعه
 فرستنی بوله ماسین . معونه لرده فضاه انتظار ، اجورات نقلیه ده
 حددن فضاه مدعیاته امکان بر اقایان معتدل بر معیار اولنجه
 مملکتک کندینه عا ئدا اولان امراض خصوصیه سی بویوک بر ساحه ده

تداوی ایدلمش، مجاری حیاتی آچیلش، تصلب شرايين تهلكهسی برطرف ایدلمش اولور. مشکلات معیشتك بو قسمی اورته دن قالقنجه يالکیز مؤثرات عمومیه نك اشکنجه سنه تحمل ایتك قالیر. بوکاده بز تورکار اوتهدن بری «ایله کلن دو کون، بایرامدر» دیرز. نه یایه لم، بوینمزی بوکر، بر آز دها قاتلانیرز؛ فقط قاتلانمایه جق اولان، بویون بوکوله یه رك باغیر مق ایجاب ایدن، تداویسی ممکن ایکن تداوی اولونمایان علتدر.

اعاشه انجمنك و مجادله اقتصادیه هیئتك مساعیسنی تقدیر ابله یاد ایتمه مك ممکن دکلدر. فقط منابع مرض تشفییه ایدیلده دجه بو مساعینك سطحه عائد تدابیردن عبارت قالغه و علی الا کثر اقتصادیات عالمترینك نتایج معکوسه ویره جکنه قانع اولدقلری نرخ و زجر قیلندن اصول خارجه حقیقه مامغه محکومیتنی قبول ایتك ضروریدر. نمونه بقالارک احداثده بیله بویوک بر فائده ملحوظ اولماق لازم کلیر، اولسه اولسه بونك فائده عملیه سی دونه نسبة بو کونی بر پارچه تهوین ایتمه انحصار ایلر، حال بوکه مسئله یارینی تهدیددن قورتارمقدر. بو کون پراکنده جیلرک احتکارندن قورتیلان خلق یارین مملکتك مجاری اقتصادیه سنده موجود طبقانیقلق نتیجه سیله طویدانجیلرک مدعیات مفرطه سنه معروض قالیرسه بوکا نمونه بقالترینك موجودیتی ده بر چاره تشکیل ایده من. مسئله حوایجی استابوله اك معتدل شرائط دائره سنده

جلب ايدە بيلمكده ، بويوك ايش ياپان تجاره اشياي مفرط عد
اولونه مایه جق بر نسبتده مال ایتمكده در . بوده آنجق اصل علتی
تداوی ایله قابل حصولدر . مناقله یی تأمین ایتك و مناقله امر
مهمك اطرافنده طویلانان بوتون تفرعاتی اشیا فیأتی تفریط
ایدە مەیه جك قواعدە اتباع ایله مك سایه سنده میسر اوله بیلیر .
قیصه بر تعبیر ایله مجرالر ی طیقانیقلقدن قورتارمق و مملکتی
تصلب شرايينك تهلكه سندن چیقارمق لازمدر .

۱۳۳۵



بر آذ فریاد



تصلب شرايين

بو کون مملکتان مجاری حیات اقتصادی سنده بر طیقانیقلق،
بر کوشکلك وار که بونی بر تصلب شرايين نوغندن تلقی ایدہ بیلیرز؛
و محققدر که مشکلات معیشتک الک بویوک قسمی بونک اسباب تشفیہ
و تداو یسنی میسر قیلہ بیلہ جک صورتده هنوز تدابیر مناسبہ اتخاذ
ارلونه مامہ سندن متولددر . لا اقل بش سندن بری کوندن کونه
متزاید بر شدتله اعراض و تجلیاتی مشاهده اولونان و تعیین منابعده
مشکلات بولونمایان بو وضعیت طاقتفرسایه آز چوق مقاومت
ایدہ بیلہ جک قدر تدبیر بولونه مامہ سنے سبب ، دائما سطحینانه
چاره سازلقله اکتفا ایدہ رک علقی کوکسندن قازییه جق قدر درینلره
اینین بر عملیه جراحیه دن توقی ایتک عادتیدر . عادت یا خود
مقتضای فطرت ، هر نه دینیرسه دینسین ، بزده علقی آرایوب

بولق ، کوروب آکلامق قابلیتی مع زیاده موجود اولمقله برابر
اجرای حرکت زمانی کلهجه هر وقت موقت بر تعمیر ایله اکتفا
ایدن و اصل پایله حق شیئی مناسب بر زمانه تعلیق ایله یین بر تأجیل
مفتونیتی وارد در .

بو کون معیشت مشکلاتندن مضطرب اولان مملکت یالکر
استانبول و اونکله همحال اولان اقسام وطن دکلدر . حیات
اقتصادیه سی قیاس قبول ایتیه جک مقیاسده اسباب کمال ایله مجهز
اولان غالب مملکتلرده بیله ، حیات ، ایچندن بر درلو چیقيله مایان
بر بحران کچیرمکده در ، حتی بعضاً حرب سنه لرینی اولدقجه اداره
مصلحتله آشه بیلمش اولان مملکتلرده متارکه دن صوکره معیشتک
داها زیاده پیدای صعوبت ایله دیکنه حکم اولونمقده در .

فقط بو مشکلات او نوعندرکه اونک امکان ازاله سی قدرت
بشریه داخلنده بولونمایان مؤثراته متوقفدر . کافه منابع جهانیه
مستولی اولان بر مضایقه نک نتایجی ده عالمشمول اولمق امور
ضروریه دندر . بوتون دنیانک معیشتنی زیروز بر ایدن بر حادثه
معظمه آراسنده شیرازه اقتصادی مختل اولمش بر حیات عمومیه ده
استثنا تشکیل ایده رک تأمین موازنه قدرتیاب اولمق هیچ بر مملکت
ایچون میسر اوله ماز . بزده هر کسه ، هر مملکتله برابر بو چرخ
دوارک ایچنده سرسمله تن بر سرعتله دونمکده یز . آنجق بو مؤثرات
عمومیه دن باشقه بزده آریجه دونن . چرخ ، بوزوق و قیریق بر

چرخ وار که اونک دیشلری آراسنده فضله براشکنجهیه محکومز؛
 ایشته بو چرخ که دولاب اداره نک ازلی بر سقطیله معلولدر ،
 بزده حیاتی هر یردن زیاده بر بار مهلك حاله کتیرمکده در .
 هر یرده احساسه طاقت بشریه کفایت ایتمهین عوامله قارشى تدابیر
 زجریه استعمالی ممکن اولمامه سنه رغماً هیچ اولمازسه اونلرک تهوین
 آلامنه صرف مقدرت اولونور ، فقط امکان تعلق ایدن هر مرضه
 دوغری ده در حال بر دست شفا بخش اوزانیر ، ده شیله جک بر
 چیمان وارسه وقت غائب ایتمهین بر استعجال ایله اوراده همان
 بر نیشترک تماس سلامت آوری کلوب تقیحک کسب وخامت
 ایله مه سنه مساعدده ایتمز .

ایشته بونک ایچوندرکه مثلاً بر کوچک کوپریده اوافق بر
 عارضه اولمش دییه یکدیگرندن سکز اون ساعتک مسافده کائن
 ایکی نقطه دن بری محمولنک چورودیکنی ، دیکری اکمکنک
 دها زیاده اکسیلیدیکنی کورمکه محکوم اولماز .

شرابین مملکتده نه ایچون طیقانیقلق وار دییه ایراد سؤال
 ایدم جک اولانلرک آله جقلری جوابلرده انسانی شاشیرتان برسقامت
 تسلیمی وار . مزه قیرلمش بر کوپریدن ، دولمش انبارلردن ،
 ماللری استیعاب ایدمه بن ریختیملردن ، بوشانه مایه رق معطل
 بکلهین معونه لردن ، کرادن قاچینه رق کمرکلرده اشیا براقان تاجر-
 لردن بحث ایدرلر ، وبالطبع بو بحث اولونان شیلرک هر برنده

مالك في اصليسنى افراط ايله آرتيران بر سبب مختفیدر ؛ اویله که
 بر محتکر صراف أئنده ربحه محکوم دین سندی شکلنده خلقت
 آغزینه کیره جک هر لقمه یوتیله مایه جق بر جسامت آیر . بر کره
 ذهن بو زنجیرک دولاشیق حلقه لرینه صاریلیرسه کنديسنی قورتاره .
 مایه رق بونالمق و حقیقه ایچنده بولنیلان وضعیت ایچون چاره
 تدارکی محال اولدیغنه قرار و برمک مجبوریتنددر . لیکن اونک
 آراسندن صیریلوبده حقیقت اشیا یه سالم کوزلرله باقیلنجه باشقه
 بر نتیجه چیقار . و نتیجه ده بوتون بو تعداد ایدیلن سقامتلك
 پك قولایقله ممکن تعمیر اولدیغیدر : یتیشیر که اساس مرضی امحا
 ایتک ایسته یین بر عزم اولسون .

کوپری تعمیر اولونور ، بوتون بوزولان کوپریلر ایچون بر
 چاره واردر ، اونلری تعمیر ایتک . خصوصیه او کوپری بغدادیلری
 دوره دوره چوروین بریری آچلغندن اولن بریره ربط ایدیورسه ،
 در حال نه یاپوب یاپه رق ، پاره یوقسه دیله نه رك ، او کوپری بی همان
 تعمیر ایتک لازمدر . کمرک آنبارلری کفایت ایتیهورسه آنبار
 استیجار اولنور ، ارضیه رسومی حقنده اویله تدابیر مناسبه اختیار
 و تطبیق ایدیلیر که تجار کمرک ضررینه بر استفاده غیر مشروع
 فرمتنی بوله ماسین . معونه لرده فضاه انتظار ، اجورات نقلیه ده
 حددن فضاه مدعیاته امکان بر اقامایان معتدل بر معیار اولنجه
 مملکتک کندينه عا ئدا اولان امراض خصوصیه سی بویوک بر ساحه ده

تداوی ایدلمش ، مجاری حیاتی آچیلدش ، تصلب شرايين تهلكهسى برطرف ایدلمش اولور . مشکلات معیشتك بو قسمی اورته دن قالقنجه يالکیز مؤثرات عمومیه نك اشکنجه سنه تحمل ایتك قالیر . بوکاده بز تورکار اورته دن بری « ایله کلن دو کون ، بایرامدر » دیرز . نه یابه لم ، بوینمزی بوکر ، بر آز دها قاتلانیرز ؛ فقط قاتلانمایه جق اولان ، بویون بوکوله یه رك باغیر مق ایجاب ایدن ، تداویسی ممکن ایکن تداوی اولونمایان علتلردر .

اعاشه انجمنتك و مجادله اقتصادیه هیئتك مساعیسی تقدیر ابله یاد ایتمه مك ممکن دکلدر . فقط منابع مرض تشفی ایدیلده دجه بو مساعینك سطحه عائد تدابیردن عبارت قالغه و علی الا کثر اقتصادیات عالمترینك نتایج معکوسه ویره جکنه قانع اولدقلری نرخ و زجر قیلندن اصول خارجه چیه مامغه محکومیتنی قبول ایتك ضروریدر . نمونه بقالارک احداثده بیله بویوک بر فائده ملحوظ اولماق لازم کلیر ، اولسه اولسه بونك فائده عملیه سی دونه نسبة بو کونی بر پارچه تهوین ایتمه انحصار ایلر ، حال بوکه مسئله یارینی تهدیددن قورتارمقدر . بو کون پرا کنده جیلرک احتکارندن قورتیلان خالق یارین مملکتك مجاری اقتصادیه سنده موجود طیقانیلق نتیجه سیله طویدانجیلرک مدعیات مفرطه سنه معروض قالیرسه بوکا نمونه بقالترینك موجودیتی ده بر چاره تشکیل ایده من . مسئله حوایجی استابوله اك معتدل شرائط دائره سنده

جلب ایدہ بیلیمکده ، بویوک ایش یاپان تجارہ اشیائی مفراط عد
اولونہ مایہ جق بر نسبتده مال ایتکده در . بودہ آنجق اصل علق
تداوی ایلہ قابل حصولدر . مناقلہ یی تأمین ایتک و مناقلہ امر
مہمنک اطرافندہ طویلانان بوتون تفرعاتی اشیای فیأتی تفریط
ایدہ مہیہ جک قواعدہ اتباع ایلہ مک سایہ سندہ میسر اولہ بیلیر .
قیصہ بر تعبیر ایلہ محرارلری طیقانیقلقدن قورتارمق و مملکتی
تصلب شرایینک تہلکہ سندن چیقارمق لازمدر .

۱۳۳۵



بر آفریاد

بر آز فریاد

بك ترجیح ایدردم که بزده دها آز فرق سیاسییه بدل بر آز
دها فضله جه حقایق حیات ایله مشغول بر فکر جمعیت اولسون .
استقبالاً بومملکت وملتہ درلو زرین افاق سعادتک التماعاتی تبشیر
ایدہرک خرابہلری معمورہلرد ، چوللری حدیقہلره ، سفالتلری
رفاہیتلره تبدیل ایدیویرمک خواص سجادانہ سیلہ تکریر مواعید
ایلهین دساتیر ادارهنک یاننده ، کورمک ایستردم که برده دها
محویتکار ، دها تواضعپرور بر تشبث هپ ایلریلره تعلیق آمال
ایلهیه جکنه بوکونک مرضلریله مشغول اولسون .

بز بیرتیق جبهه سنی باشنک اوستنه چکه رک قیویریلوب آیازده
یاتارکن ستره سنک دلیکلرندن ییلدیزلری سیر ایتمکه اکتفا ایدن
بر ساعر طینتندہ یز . استقباله بودرجه ربط امل ایله یدرک حالی بو

درجه اهل اید بیلیمک ایچون بوکا بشقه درلو بروجه تفسیر بولمق
ممکن دکلدر .

نهایت ایشته قیش کلدی، هپ شکایت ایدیورز که قیش وقتندن
اول کلشدر . هر سنه ینه بو هفته لرده قیش کلوبده بزی غافل
اولاینجه شکایت ایتیمکده اتفاق ایلرز که قیش بکلنمه ین برزمانده
حلول ایتمشدر . ایشته کردش ایام بویله دوام ایده لیدن و بزده اونک
بو تجلیاتنه شاهد اوله لیدن بری هر سنه تکرر ایدن بر حیرت!.. اکر
بوساده جه بر حیرتدن عبارت قالسه یدی اولسه اولسه کولونج اولمقله
حکایه خاتمه یرردی، فقط مع التأسف بو حیرتک یاننده برده
حقیقه واردور . حق دینه بیلیر که بو حقیقه نک وقوعنه انظار عفو
وصفحی جلب ایده بیلیمک ایچون بو حیرت ایجاد ایدلمش براویوندر .
یالکز خارجه قارشى دکل کندی اذعانمزه ، کندی وجدانمزه
قارشى اوینالمش براویون . بو او یون سایه سنده دیمک ایستهرز که
اگر قیش بزی بویله ، پوصویه دوشور مشجه سنه ، بردن بره ،
على الغفلة یا قالامه سیدی اونک شدائد صولتنه مقابله ایده جک تدابیر
ووسائطله تجهیز اید دك ؛ نه چاره که غافل اولاندق ، اوحالده مهیا
بولونماش اولمق معذور کوریه بیله جک بر اثر قضا دن عبارتدر .
ایشته بو کون قیشله برابر هر سنه کلن سلسله مصائبی تکرار
ایتمه یه لم ، بو بد بخت خلق اوکا آلیشتیندر . یالکز سفیل و سرگردان ،
چیریل چیپلاق ، غزا الحاننده بیله حالزى تصویر ایدن تعیر

معروفیله آلتی طوپراق اوستی یاپراق ، بر حالده قیشی قارشیلایان
قوافل مهاجرینی دوشونهلم. بز هجرتك بوالواح دلخراشته ده آلیشقینز،
تا نه زمانلردن بری بویله نوبت بنوبت بومملکتك صحنه مقدراتنده
تجلی ایدن هجرت فاجعه لرینه قارشى هپ عجز و یأس ایچنده قیوراندق،
آغلادق . بو کون ینه او یله قیورانوب آغلایوروز. جریده لرده بزه
قدر کلن مهاجر سرانجام سفالتی دیکلرکن یاشارمایان کوز ،
بورقولمایان یورك یوقدر البته ، ققط او قدر . هپ ایچنده کریه
تأثر تیتزمین کوزلرمزی بر خیال مسئوله دیکر، بر عقدۀ اضطراب
ایله دو کومله نن یورکلر مزده اوکا عتاب ایدن بر سسله توجیه ستم
ایلر ، اوندن صوکره ، مسئولی ذهناً تعیین واونك حقنده فتوای
حکمی اعطا ایدنجه، آرتق کندی حسابنه ادای دین ایتمش بر آدم
اطمئنانیله بشقه طرفه کچر ، بشقه شیرله مشغول اولوروز .

حال بوکه اورته ده مسئول واریسه اوبلاشبه ینه بز ، بز
بشقه کیمسه دکلدرد. استیلازده یرلردن فوج فوج اهالی یوردندن
قوپار، بر قاصیرغیه طوتولمش خزان یاپراقلری پریشانیسیله اطرافه
دو کولور ؛ بیکلرجه ، اون بیکلرجه قادین ، چوجق ، اختیار ،
اوسز ، اُکمکسز ، یورغانسز، یالین آیاق ، باشی آچیق طاقم طاقم
چیپلاق اووالره ، ظالم داغله ، امراض ایله دولو باطاقلقلره
یاییلیر. بزه بونلردن بحث ایدرلر. دیرلرکه بویچاره لر ایشته بوشرائط
ایچنده هپ یوق اولغه محکومدرلر. اونلرک باشنك اوستنده مهوور

روز کارلرک قهر حدتی کو پوریور، صیرتلینی بی انصاف یا غم زلرک
 قامچیلری دو کیور، چپلاق آیاقلری دو کش چامورلرک ایچنده
 تماماً دوشمه مک ایچون برامکان موازنه آرایور؛ قارا کلقلر ده آللری
 بو کرلرینه باصه رق آخالک ظالم پنجه سنی توقیفه چالیشه چالیشه ده
 دون بر سعادت یو واسنک سا کنلری ایکن بو کون امین خطوه لرله
 مزاره دو غری کیدن بو بد بخت سورونک نه بر مددکاری، نه بر تسلیت
 آوری وار. بزه بوتون بو لوحه فجاعت تصویر اولونور. ساده
 تصویر اولونماز، بورایه قدر، تا استانبولک ایچنده، عین کتاب
 آلامدن قوپوب کلن صحائف واردر که یانغین یرلرنده، ویرانه
 عرصه لرنده، جامع ایچلرنده، مزار آرالرنده اضطراباتنی ایکله -
 مکده در. بونلری هپ ایشیدیر، هپ دیکله ریز، ایشیدوب دیکلر کن
 آغلارز، فقط یالکنز او قدر.

بز که استقبال ایچون مملکتک انظار خولیا سنه بر کشور آمال
 بنا ایتمکده، تا افقک هنوز غیر مرئی بر نقطه سنده ملته، بر مبنای
 سعادتک مذهب رؤیا لرله اورولمش سقف و دیوارینی کر مکده بر
 یوکسک مهارته صاحبز؛ بز که آرتق مملکتده بر قاریش طوپراغی
 ایشلنمه مش بریر، اعمال کاهلرینک آتش پوسکورن با جالرندن اورمانلر
 یتشدیرمه مش بر نقطه قالمایه جغنه اک مطمئن عیاره لرک تأمیناتی
 ویر مکده بر مستتنا طلاقته مالکنز؛ حال ایچون، حالک حقایق
 فجیه سی ایچون عطالت محضیه محکوم ارباب عجزز.

هېمزده يامق ، ايشله مك ، برشيئه مفيد اولق ايجون بي پايان
برحسن نيت ؛ هله بر حسن نيتك اطرافنده طوپلانيلىرسه بي حد
ونهايه برفصاحت وبلاغت واردر ؛ لكن ، اعتراف ايتمه ليدر كه اك
لازم اولان شيئه ، اصل بوتون ديكر شيلري ائمار ايدم جك اولان
فضيلته قابليت يوق : حركت .

حكومت ياپسين !..

ذهنلرده هپ بو خطاب واردر ؛ و حكومت بر شيئه تشبث
ايدمه نيجه ، ايتمك وسائطنى تدارك عجز مطلقنده قالنججه هيچ اونك
طرفندن ياپيله مايان برايشى وظيفه ايدنمكه مجبوريت حس ايتمه يز .
حال بوكه بو وظيفه حكومتدن زياده ملته ترتيب ايدن بر وظيفه در .
نصل بر مجلس مبعوثان اجتماعندن بحث اولونجه فرقه فرقه طوپلانمق
علمنه واقفسه ق ، نصل انتخاباتك تدوير وتوجيهنده ، مقتضيات حاله
توافق ايدم جك چاره تحريسنده ارباب فكرى بر آرايه كتيرمك
مهارتنه مالكسه ك ، بش اون صاحب حيتك بر غليان تاثر ائناسنده
حال حر كته كله بيله جك مهارتى ده كوستروب بر جمعيت وجوده
كتيرمه ييشلرينى ، بيلنه مز ، نه صورتله تفسير ايتمه ليدر ؟

ال ايرمز ، كوچ يتمز يرلوردن ، آناطولينك سرتاسر يانغين
يرلرينه بكمز مين خرابه لرندن ، بدبخت آيدن ولايتنك ماتمزده
خلقندن بحث ايدم جك قدر اوزاقلره كيتمكسزين ، ايشته شوراده
استانبولك ايجنده بوكون بيكلرجه بيچاره واركه قيشى جامعارك

چیلاق طاشلری اوستنده کچیرمه محکومدرلر . نه وقتدن بری
اونلره منتظر اولان فردا کوزلرک اوکنده کمال دهشتیه ارتسام
ایدوب دوررکن هپ برداثره دن برداثره یه، بوبد بختلرک امدادینه
شتابان اولق امکانی بوله مایان برفریاد عجز کوندرلمکدن بشقه
نه یاپیله بیلدی؟ مادام که دواثر آراسنده برشیئه توسل قدرتی یوقدی،
او قدرتی خلق کندیلکندن ایجاد ایتیلیدی . هپ حکومتک
مسئولیتی فکری آرقه سنده صاقلایمقله کندینه برحجت برائت ویرن
برعطالت حسیله ، قوللرمزی کو کسمزه قاووشدیردق، دنیانک
هیچ برکوشه سنده بر مثانه دها تصادف ممکن اولمایان بومنظره
سفالتک قارشیسنده لاقید بر تماش کار وضعیتنده قالیورز .

ایشته قیش کلدی . ایرکن کلدی ، کچ کلدی ، فقط کلدی؛
ذات الرئه ، ذات الجنب کتیرن قاره یللیله ، کیمکلی دو کدوران،
قانی قوروتان قارلریله برابر کلدی . روز کارلرینک آرقه سنده
اولومک اوراغی ، کنج قیزلری ، کوچک چوجقلری ، ضعیف
آننه لری ، اختیار آدملری بیچن اوراغی ده برابر کلدی . هیچ
بکله مکه صلاحیتدار دکلز که بو کون مهاجرلرله دولو اولان ویرانه لر،
خرابه لر ، جامعلرینه بویله دولو اوله رق قاله جقدر ، قالماسنه
امکان واردر . بزجه یاپیله مامش وظیفه یی ، بونلری بوشالتمق
وظیفه سنی او یاپه جق ، قیش یاپه جقدر . فقط هیهات ! او وظیفه سنی
اوله بر صورتده یاپه جقدر که بزه ترتب ایدن یینه ماتم یاشلرندن
عبارت اوله جقدر .



کندینه مخصوص

کندینه مخصوص

هر کسک بر روشی هر روشک بر کسی وار . بو دیارکده
کندینه مخصوص بر روشی، ساکن و آسوده، سکون و آسود کیسک
ایچنده فریح و فخور بر روشی واردی؛ بزده بو روش لاقید
وسر آزادک کسلیدک، مسعود و بختیار، سبکدل و قناعتکار
کسلیدک. آناطولیده بومقامده هر یکتک بر ایران ایچی و اردر
دیزلر، بزده استانبولک مائی سماسی آلتنده، پارلاق کونشنده
عمر دینیلن جام پر الامی عرقک کندینه مخصوص فلسفه سیله
اوילה بر نوش ایدردک که، بو کون دوشونیورم، هیچده فنادکلدی.
نه دینیرسه دینسین استانبولک تشکیلات اخیره مدینتدن محروم
حیاتنده عصرلردن بری قرنندن قرنه انتقال ایدن تسیب و تکاسل،
رخاوت و اهامال ترسباتندن مترکب بر منظومه عمری واردی که

ویرانه لره متروک مزبله دن نصل زمان ایله فیاض بر طوپراق حاصل
اولورسه ، او یله جه کندی کندینه وجود بولمش ، تعضو ایتمش ،
حالندن منون ، فردایه لاقید ، هر یکر می درت ساعتی آچوب قاپادجه
باشنه بر بسمله نهایتنه بر الحمد قویمقله کتاب نصیبی اتمام ایتدیکنه
قانع ، مستوی و مطرد ایدی .

آرا صره اونک حضور و سکوننه ایراث خلل ایتک ایچون
کلوب قولاغنه زجر و ظلمدن ، استبداد و اعتسافدن ، محبس
و منفادن بحث ایدن فیصیلتیلر اولوردی . قهوه سندن اوزون بر
یودوم چکه رک ، توتونندن کنیش بر نفس صاووره رق ، کوزلرینی
سوزه سوزه اطرافنه باقار ، کیمسه ایشیتمه سین دیمک ایستر ، فقط
حقیقت حالده اصل کندیس ایشیتیمک ایسته مه یه رک صوصاردی .
سکوتنده او یله ایکی صورتله قابل ترجمه بر معنی واردی که حکایه
ایدیلن روایاته فکر آ بر قصیده تأسفمی یوللایور یوقسه دیلنک
اوستنه قضاء دوشمش آجی بر دانه دن قورتللق ایچون یوتقونیورمی
فرق ایدیله مزدی .

بعضاً ده اجدی ، ده ا مهم وسیله لرله اونک راحت اویقوسنه
سؤ قصد ایدرلردی : یمنده بر قیامدن ، ارنبورلرده بر عصیاندن ،
کریدده بر اختلالدن بحث اولونوردی . ذهناً کندی اطرافنه
نچیزلش دائرة فسیحه یی دوشونور ، بحرین و برینی دراغوش ایدن
بوعظیم عرصه نک ایچنده یمنی ، پرشته یی ، کریدی آراد ، نهایت

بواور و باقار ایدی که بونلر يك اوزاق، نه قدر اوزاق اولمق ممکنسه او قدر اوزاق قدر؛ و حکم ایدردی که بو قدر اوزاق اولان بر شیله مشغول اولمق عبثدر. يك لا قید کور و نمه مک و شایان تعییب عد ایدلمه مک ایچون کو کسی کچیرر، کوزلرینی قدرت سماویه دن استمداد ایدن بر افاده ایله قالدیرر، اللارینی اظهار حیرته وعین زمانده افاده عجزه دلالت ایدن بر ادا ایله آچار، بو خطبه سا کته سنه صقیدش دیرلمش معانی ایله کندیسنه ترتب ایدن هر شیئی یامش، بتیرمش اولدیغنه قرار ویره رک یاواشجه یورغانی باشنه چکر و در حال استعاده سکون ایدن اعصابنک تسلیمیت مطلقه سی ایچنده اویوردی.

اونک بو طرز فلسفه سنده، هر روایته رغماً، بوتون بدبینانه تخمینلری آلداته جق بر صباحه قاووشمق ایمانی ده واردی. مکرراً تجربه ایتمش ایدی که کونش قالقنجه ظلمتلر داغیله جق، ومائی سما ایله پارلاق کونشك آلتنده نه یمنک قانلری، نه ارنبودلغک آتشلری، نه کریدک حمالری بر کو چک لکه بیله بر اقامه جقدی. بو مملکتک بر کوشه سندن اسن بر نفخ قدرت او سیسلی داغیتمش، ینه استانبولک فوقنه محلا و منور بر کون تعلیق ایتمش اوله جقدی.

بوکا امین ایدی. استانبول بو امنیتک ایچنده اویور، بو امنیتک ایچنده اویانیر و هر صباح معتاد اولان عمرینه باشلاردی. فقیر ایدی، فقط نه بأس وار؟ برکت ایچنده یوزردی. اونی اینساندیر مق ایسترلردی که مرا کز مدنیه نک شعشعه حیاتنه نسبة او محرومیت

صرفه ایچنده در . درلو مطمئن تصویراتک الایش بلاغتیله بشقه
 مسعود عالمیره عائد الواح سرور و جموری ارئهیه چالیشیرلر
 و بونلری کوسسترکن اوکا بوتون محرومیتلرینی بی رحمانه تعداد
 ایدرلردی . دیکلر و جواب ویرمزدی ، یالکز ایچندن : «نه اولسه
 بکا بکزه من ! » دیردی . کندی رجحانه او قدر امنیت ایچنده
 یشاردی . نه زمان حقیقتک بر تماس غنیفنه مصادف اولسه ، قیصه
 بر ایرکیلیشدن صوکره تکرار داورانیردی ، چونکه اونده
 هر شیئه قناعت حکمتی ویرن بر توکل و تحمل خصلتی واردی .
 وایشته بویله جه کندینه مخصوص بر طرزده ، استانبولک ،
 ینه کندینه خاص تعبیرنجه ، طنغر منغر کیدن بر عمری واردی .
 اک زیاده بو عمر مسعود ، صباحلری و آقشاملری استانبولک
 بعض معین زمینلرنده الواحنی سرردی . کونش دوغمه دن چوق
 اول باشلاردی : بالخاصه فاتح حوالیسنده قارا کلقلرک ایچندن کولکه لر
 چیقاردی . بردن بره شوراده بوراده سوقاقلرک ظلمتی تکائف
 ایتمش ، ناکهانی قیردانمغه ، یورومکه باشلایان وجودلره انقلاب
 ایله مش ظن اولنوردی . مبهم بر صورتده فرق اولنوردی که بونلرک
 سیاه جبهلری و بیاض صاریقلری واردر . بر آراق کیجه نک سینئه
 خفایاسندن فیشقیرمش بر منجمد فواره شکلنده دیکیلن بیاض مناره
 محترز و عجول بر سسک اذانیله جانلانه رق تیتردی . صوکره
 یاوا تچه آچیلان قاپیلر ، اطرافنی او یاندیرمقدن قورقان سسلر ،

کچ قانق اندیشه سیله جامعله شتاب ایدن آياقلا اولوردی .
 چوق کچمزدی ، کیجه بیتشمیدر ، کون باشلامشیدر تعیین
 اولونه مایان بر ساعتده قوم قانی اتکلرندن ، شهزاده و آقسرائ
 جاده لرندن ، کوپرو باشندن بر خلق تلاطمی باشلاردی . قولتقلرینک
 آلتنده کتابلریله چوجقلا ، اللرنده چانطه لریله دکانجیلر ، طاقم طاقم ،
 بعضاً ده اول یتشمکه چالیشان آدیملرله ، اکثریت اوزره بوقیصه
 وقولای حیاتی قازانق ایچون نصل اولسه وقت بولنه جغه قانع
 اولان بر تائی مشوار ایله استانبولک چالیشیلان ، ایشانه نیلن
 منطقه سنه یاییلیدی . بولودره نک سیتی سی دکلدی ، فقط بونکده
 کندینه مخصوص بر فعالیتی واردی . بایزیددن باشلا یه رق ، امین
 اوکنه قدر کلن بو محویت کار صحنه فعالیت استانبولی باشدن باشه
 ناموس کار بر حیات ایله ، قولای وتمیز قازانیلان بر اکمک ایله
 دیورمغه کفایت ایدردی . ومادام که اوراحت هضم ایده بیلیمک
 سعادت قی مقابلنده آزییمکه اکتفا ایده بیلیمک حکمتنه مالکدی ،
 بونکه کندیسنگ بختیار اولدیغنه قناعت ایدردی .

بوخلق سودیکی شیر واردی : ایشنه کوجنه کیدرکن
 یولنک اوستنده اونی برمدت آلیقویان جواذب تصادف ایدردی :
 ثلجینک توتن کوکومی ، بورکچینک شامیه صیجاق بر نفس
 اشتها کترین طبله سی ، باشنک اوستنده بر معمای موازنتله ایلریله یین
 سمیدجی ، حلواسنک یاننده مغرورانه بکله یین پیده جی ... بوخلقی

صباحدن آقشامه قدر دویوران، اوکا دائماً تبدل وتنوعه مساعد
برسلسلهٔ اذواق احضار ایدن دیگر بر خلق واردی : ودویانده
دویورانده ممنون ایدی .

بو ممنونیت حسی اصل آقشام اوستلری فریق اولونوردی .
چارشی قاپانیر ، دوائر داغیلیر ، صوڪ دالغه لرك كچمه سنه انتظاراً
بوتون دكانلرده كونك صوڪ ساعات سعيه تقدم ایدن امارات
بلیرردی . هر كس بك اوغراشمه دن ، بك دیدیشه دن كچن بر
دورهٔ مساعيله حياته عائد وظيفه يي اكمال ايتمش اولمق اطمنانی
ايچنده چيقاردی . اوكون ينمش ايچيلمش ایدی ، یارینده بویله
اوله جقدی ، محقق! هر كسك اونده بکله ين بر صیجاق وتمیزاوداسی ،
کوزل ودولو سفره سی واردی . وبویله جه استانبول خلقنه باقارکن ،
مثلاً اونى كوپرى باشنك بر طرفنه ایلیشه رك تماشا ایدرکن ، حس
اولنوردی که اومسعوددر . بلکه ثروتی یوقدر ، فقط اوندن دها
ایيسنه ، رفاهيته مالکدر . بلکه مدبب اسباب ذوق و صفاسی
یوقدر ، فقط اوندن دها ایيسنه ، آرامش بال وفکره صاحبدر .
دونك عذابيله متأذی دکل ، بوكونك حضوريله مستريح ، یارینك
اندیشه وغصه سندن مجرد... بلکه جبینده ییغینلرله اوستنه طبقه طبقه
درلو مشکوڪ تماسلرك قشری تراکم ايتمش کاغدلر یوقدی ، بلکه
یالکز بر پارلاق چاریك یاخود بر صاری لیرا واردی ؛ فقط او
یلیردی که بو کوچك پاره انسانه بر مسعود کون صاتون آلمق

ایچون حتی فضله در بیله ...

ایشته اونک ایچوندر که کوپری باشنک بر طرفنه ایلدیشه رک
اونی تماشا ایدر کن بوخلقک اوچر بشر کچیشنده ، کیمیسنک
النده بر قوطوشکر ، کیمیسنک مندیله بر اوقه اوزومله بر
طرفندن یشیل صاپلری صاللانان یر دمت تازہ صوغان، کولوشه رک،
قونوشه رق ، کندیلرندن ، دنیادن ، هرکسندن ، خصوصیه
استانبولدن ممنون کچیشنده اوپله بر حال ، اوپله جاذب و مسخر بر
حال واردی که اوکا کندینه مخصوص بر مستثنا کوزلک ویرردی.
بو کوزلک که بشقه یرلرده متلنه تصادف اولنه مازدی، بیله مم، بوکون
اونده حالا کوچک بر بقیه قالمشمیدر ؟



صدای انجیل

صدای انجیل

بو، انسانك اعماق موجودیتنه، کویا کیمکلرینی دله دله،
اویه اویه، قیزغین بر ایکنه ایله یازیلان و آرتق اوراده ابدیاً منقوش
قاله جق اولان مدعش و معظم رؤیالردن بریدی.

رؤیالره مخصوص، مجهولات قارا کلقلرینی یاروب کچن بر علم
ایله، رؤیالره مخصوص، مکانلری و زمانلری آشوب کچن بر سرعتله
بیلیوردم که استانبولدن ادرنه یه اوزانان صحرالردیم؛ و بوتون بو
مسافه یی، صوڤ صفحات آلام و مصائبی یاشایه یاشایه، بر روزگار
دالغه سی شکلنده دولاشیوردم. ویانمش کویلری، خراب تارلالری،
یقیلیمش جامعاری، ده ها صوکرده، جاججا، اولو ییغینلرینی کور-
ییوردم. و بو منظره سقالت اوزرندن قیورانه رق، بر قاصیرغه
دورانیله، اوچیوردم.

بردن دوردوم .

بوراسی بر کلیسا ایدی . اطرافنده یانمش بر کویک انقاضی
سریلن بر تپه‌نک اوستنده ، قاپیس‌نک آچیق قنادلری رزه‌لرینک
اوزرنده غجیردایه‌رق ، الواح سفیله‌سنی یایوب امتداد ایدن بی پایان
صحرا لک منظره و حششته ، صفر عتاب و مؤاخذه‌سنی کوندیریور
کییدی . اونک متروکیتی اطرافنده کیجه گلش انجماد ایتمش ،
روز کارلر او یومش ، حیات طبیعت بر نفس معلقله توقف ایتشدی .
نه بر سس ، نه بر انسان ... یاواشجه ، سس ویرمه‌ین آیاقلرمله ،
سورونمه‌ین وجودمله قایه‌رق قاپیدن کیردم ، واو زمان کوردوم که
حربک مشته قهری اونک سققندن بر پارچه‌سنی ، دیوارندن بر
قسمنی ییقمش ، ده ویرمش ایدی .

آیاقلریمک آلتنده یوزن ، تیره‌ین بر ضیا واردی ؛ یاواش
یاواش ، طاشلرک اوزرندن آقهرق ، سدرلرک آراسندن دولانه‌رق
ایلریله یوردوم ؛ و بن ایلرله دجه اونک دیوارلری آچیلوب کنیشه‌یور ،
سقفی قباروب یو کسلور ، کویا تا قعرندن کلن بر نفسله شیشه‌رک
ابعاد بی‌نهایه ایله بویوردی . خطواتمه دلالت ایدن اوضیا دالغه‌لریله ،
بن بو متروک دنیاک بو عظیم معبدنده ، یالکز بن ، کیج‌لرک
کولکه‌لرندن اعصابمده رعشه‌لر سیلان ایده‌رک ، سرسری بر ظل
موتا سکلنده ، اونک بوشاقلرندن کلن هوالری تنفس ایده ایده
ایلریله یوردوم . نا کهان ، تا اوته‌ده ، اوزاق بر گوشه‌ده ، اوزرینه

دوشن ظلمت لرله اورتولش ، صلیبنک اوزرنده ، اونی کوردم .
 اوراده ، بو یالکز لگنک وحشتی ایچنده علوی بر حیاتله یاشایه رق ،
 ییغلمش سیاهلقلر آرمسند ائیری بر شعشه ایله تنور ایدهرک ،
 اوزون صاحلری دها الیم بر معنای ماتمله دالغهلانه رق ، باشی
 کوکسنه دوغری دها آغیر بر هجران ایله دوشیور ؛ و کریمش
 اللرینک آووچلرندن ، باغلانه رق میخلانمش آیاقلرینک یارالرندن
 بوتون مظالم بشریته فجیع بر قصیده کریه ریز شکننده ، آغیر ،
 یاواش بر سیلان ایله قانلر ، دها سوزشکار بر آهنگ نالشله ، آقوب
 کیدیوردی .

اوکا توجه ایتدم . غیر ارادی بر حرکتله ، غلبه چالنه مایان
 بر انجذابک محکومی اولان خطوه لرله ، یورییوردم . ایلریله دجکه
 اونی دها واضح کورییوردم . مائی کوزلرینک قیانمش کیرییکلرنده ،
 صقالنک سیرک و متموج قیللرنده ، بیاض چهره سنک دونوق
 شفافتنده ، بوتون او سوز کون وجودینک تقریر المناکنده دها
 صراحت کسب ابدن بر افاده واردی که بنی معصیات بشرک بو
 لوحه استغفارندن مترشح مهابت شعره صاره رق چکیوردی .

بردن یالکز لغمک ایچنده بر هوای حیات ، فقط صوغوق
 بر تماس ایله تیتره تن بر حیاتک هواسنی حس ایدهرک ، قلبمده بر
 عقد هراس ایله ، دوردم . کویا بکا چاربه رق کچمش بر روز کار
 واردی ، باشمی چویردم : اونلر کلیورلردی .

فوج فوج ، یکدیگرینه صیقیشوب صوقوله رق ، متلاطم بر
ازدحام ایچنده قایناشان ییغینلرله ، ییقیق دیوارینک شیمدی اونلره
یول ویرمک ایچون شیشن ، کنیشله یین فتحه سندن آقان دالغهلرله
روم ایلینک مقهور مسلمانلری کلیورلردی .

کویا بر آل اوزاندی ، سمایی قاپلایان سیاه پرده لری چکوب
ییرتدی؛ چو کوك چاتینک آراسندن آیک صاری ضیاسی دوکولدی ،
و ، بو یچاره بشریت مظلومه نهرینک اوزرینه زرین باران رحمتی
بوشالتدی .

شیمدی اونلر ، یاواش یاواش ، سسسز ، کورولتیسز ، تلاشسز ،
فقط بری برینه کندله نوب کیرن مزدحم بر کتله حالنده ، آغیر
آغیر ، هر بری بر سفالت و فجاعتک نشانه مخوفی کتیره رک ، هر
بری بر بشقه ظلم و وحشتک قورقونجاقلرینی یوکلله نوب طاشیه رق
ایلریله یورلردی .

بونلردن نه قدر واردی ، یارب ! .. کومه لرله ، یوزلرجه ،
بیکلرجه انسان سیملری ، بی فاصله و بی نهاده بر کذران ایله ،
دیوارک اوهب کیتدکجه کنیشله یین آچیقلغندن کیریورلر ، کیرنلر
ایلریله دیکجه آرقه لرندن ده اوزون دالغهلرله طاقم طاقم بشقه لری ،
یکدیگرینی ولی و وصل ایدن جریانلرله ، بری برینک اوزرینه
ییغیله ییغیله تعاقب ایدیورلردی . و ، اونلر کلدکجه بیته جک ظن
اولنورکن ده چوغالیور ، چوغالدکجه دیوارلر اوزون نفسلرله

کوکسارینی شیشیروب اونلرک هپسینی بردن بر آغوش کرم و مرحمته چکیوردی . بو ، جکرلری صیقان ، قلبی یاقان مهیب بر منظره ایدی . اونک قارشیدسند ، کوزلرمی آیرمه مایه رق ، فقط دهشتدن خطوه خطوه کریله یه رک باقیوردیم . بو حرب وحشینک ذی حیات بر داستان مظالمی شکایتیله اونلر ، هپ سکوت ایدرک ، فقط سکوتلرینک بلاغت مدده شاهی ایچنده مقهوریتلرینک سفالت الواحی کتیره رک ، آغزلری کلیدلنمش ، لیکن روحلرندن یوکسه لن ، سهاره قدر سیاه بر دومان مهابتیله اطرافی قاپلایان بر هوای عتاب شکننده ایشیدلمکسزین دویولان نوحات المله صیزلایه صیزلایه صلیب عیسایه دوغری کیدیورلردی .

اونلرک ایچنده بیکلرجه ، بیکلرجه اولولر واردی که پارچه لاش قفالریله ، قویمش باجاقلریله ، خردوخاش اولمش کوکده لریله بورایه کلیورلردی . صوکره یاره لیلر واردی که صارقان قولاقلرینک ، برونلرینک ، دیشلرینی آچهرق چکه لرینه دوکولن دوداقلرینک ، اویولمش بوبرکلرینک ، قیرلمش بللرینک سفالتلرینی کتیریورلردی . آنالر کورولیوردی که ده شیلیمش قارنلرندن جنینلر فیرلارکن یرتیق پاچاوره لرینک آراسنده جیلز بجاقلرندن قان آقان صبی قیزلرینی طوتمش سوروکله یورلردی . چیلدیرمش ، ایری و مجهول بر نقطه آفته میخالانه رق کویا منجمد کوزلرله کنج اوغللرینی ، معصوم قیزلرینی آرایان بابالر ؛ صوکره آللرینی یوزلرینه قاپایان ،

تلویث ابدلش عریانلقلرینی طاشیمقدن اوتانان، فقط هر شیئه رغماً
 دائماً صاف وبا کر، دائماً معصوم و ملک چو جتلر واردی. بوغازلرده
 ایپلریله بوغولمش اختیارلر، قاوورولمش ائلری کمیکلرینه یاپیشیق
 قادینلر کویا بر بعث بعدالموت نفخیله دیر یلرک سور و کله نیورلردی.
 بو لوحه، او بیکلرجه بیکلرجه وحشتلریله، سفالتلریله نا کهان
 حیات و حرکته کلش بر محشر هول و ماتم ایدی که هپ بر وضع
 شکوا و ستمله صلیب عیسایه، او تمثال رأفت و شفقته دوغری
 کیدیورلر، و :- ایشته بز کلدک. سکا و سنک نامکه وجوده
 کتیریلن لوحه جهادی کتیریورز!.. دیورلردی.

باشمی چویره رک اوکا باقدم؛ و، کوردم که شیمدی اوزون
 قمرال کیرپیکلرده بر اهتزاز وار. دونوق سیپاسنک اوزرندن
 علوی بر تأثرک موجاتی اوچدی؛ اللرینک، آیاقلرینک عظیم بر
 حمله جهدا یله میخلرندن قورتللق ایسته یین براوغراشی محسوس
 ایدی. مائی کوزلرینک نیم کشاده کیرپیکلری آراسندن قایان
 ایصلاق بر نکاهی او قارشیدن کلنره بر سلام مرحمت یوللایور
 کیدی. بغته بوتون نحیف و مضطرب وجودینی بر اختلاج
 دولاشدی؛ و، صوک بر رعشه یله چیویلرندن، باغلرندن
 قورتوله رق بیاض ستاره سنک ایچنده یاواشجه صلیبندن سوزولوب
 قایدی. او زمان اللرندن، آیاقلرندن، حالا بشریتک مقدرات
 سفیله سی ایچون بهای فراغتنی آقیمقده دوام ایدن قانلری

داملا یه رق ، یاواش و آغیر خطولرله اوده ، کلنلره ، او مظلوم
و مقهور کتله یه ایلر یله مک اوزره یورودی .

تایانمدن ، غریب برنور ایلله طوتوشمش ظن ایدیلن ستره سنک
اتکلری بکا سورونه رک کچیوردی . کوزلرینک سماوی فیروزه لرندن
سریع و متوالی قطره لرک دونوق بیاض سیپاسندن دو کولدیکنی
کوردیم ، و دوداقلرینک آراسندن ، آنجق محسوس برسسله ، کویا
برنفس نسیم خفتیله دعایی آ کدیران بر زمزمه ایشیدیر کبی اولدم .
اوزمان تعقیب ایتدم . دییوردی که :

[*] « عزیز و مسعوددر اونلر که شفیق و رحیمدرلر ، چونکه
دنیا یه اونلر صاحب اوله جقلردر . عزیز و مسعوددر اونلر که
آغلارلر ، چونکه تسلیت بوله جقلردر . عزیز و مسعوددر اونلر که
حقانیت عطا و جوع طاشیرلر ، چونکه تطمین ایدیله جکلردر .
عزیز و مسعوددر اونلر که رأفته متصفدرلر ، چونکه اونلر واصل
رحمت اوله جقلردر . عزیز و مسعوددر اونلر که صلح و سلمه سالکدر ،
چونکه اونلر الله قاووشه جقلردر ... »

شیمدی آرتق او کتیبه فجایعه تقرب ایتشدی ، اوزمان اللرنندن
هپ قان قطره لری داملا یه رق کنیش بر حرکتله ، کویا بوتون
بوزمره مظلومینی در آغوش ایتک ایسته یه رک قوللرینی آجدی .
... فقط تام بودقیقه ده بغته معبدی بر طراقه دهشت دولدیردی .

[*] آیات انجیلیه دن .

شیمدی قاپیدن ، دیگر بر آلائی ، النده خونین بر صلیب ایله بر
سردارک آرقه سندن ، یوزلری باروت دومانلریله قارارمش ،
تقنکلرینک ، قلیجلرینک اوستنده برر لجه ایله ، هربری برتحفه
کتیرم رک ، اوته کیلر کلیورلردی .

خندان ومست ، ایلریله دیلر . اوزمان ، اونک ، رفق ملکانه سی
ایچندن نا کهان قوپمش برعتف حرکتله الی ، کنیدیسنه یوروین
سرداری وبوتون آرقه سندن کلنلری کوسلرینه دایانوب رد ایدن
بر معنای استکراه ایله ، اوزاتدیغنی کورددم . اونلر ، دوگهرق
دوردیلر ، و ، او ، هپ یاواش یاواش خطوه لریله مائی کوزلرندن
یاشاریله دوداقلرینک آراسندن آنجق محسوس سسینک زمزمه لریله
ایلریله دی .

شیمدی :

« عزیز ومسعوددر اونلر که ظلمدن مضطربدرلر ، چونکه
سلطنت سماوات اونلر کدر . »

دیوردی ؛ و ، قوللری ، اوبیکلرجه بیکلرجه مقهور آلاینی
در آغوش ایتک و برابر آغلامق ایچون ، بوتون صحرالری ده ،
یانغینلریله ، خرابه لریله برابر احاطه ایده جک کنیش بر حرکتله
آچیلدی .



الصلاة والسلام

الصلاة والسلام

قارا كلق بر ياز كيجه سیدی ؛ کویده ، اویمك شهنشینه ،
روحك ایچنه قورشوندن دوکولمشجه سنه بر آغیرلقله چوکن
دوشونجه لرله ، اوطور بیوردم. اطراف تماماً سیاه ایدی ، و بوتون
نظرمك اوکندن باشلایه رق قارشیمده کوشکلرک چاتیلرینی ،
دیوارلرینی ، اوتهدده جامعك قبه سنی ، مناره سنی صاقلایان سیاه لقلر ،
اوزانه اوزانه ، کومه کومه بری برینك اوستنه ییغیله ییغیله ده
ایلریده دکزلری ، نا اوزاقلرده آنادولینك قیلرینی بر قارا کلق
دنیا ایچنده بوغئور کبیدی .

یا لکنز اک یاقینده تک نوک پنجره لردن قورقاق و ضعیف ضیا
لمحه لری ، یأس و ماتم آراسنده بلیرمکه چالیشان امیدلری آکدیرر
بر ترددله تیتره یئرک قارا کلق کتله لرینی ده لسه ، بکا قدر کلمکه

اوغراشيوردی ؛ تا اوزاقلر دده خائن و ظالم دشمنك ينه تورك
كويلرني ياقان كميلرندن طوپ سسلرى اوغولدايه رق ، صاغير بر
يوواردلانيشله هوا طبقه لرى آراسندن بنى بوليور ، و صانكه ،
روحك ايچنده پاتلايوردى .

كو كسمده طيرناقلرينك دقيقه دن دقيقه يه دها درينلره كچديكى
دويولان بر پنجه ايله كندى كنديمك اوستنده اضطرابدن طوپار-
لانيرجه سنه ، دور ييوردم . بردن قارا كلغك آراسندن مؤذنك
ياتسويى اوقويان سسى يوكسلدى .

بو كيجه اونك ده سسنده بر آغلاییش ، بر صيزلانيش واردى .
اوزاقدن اسلامك اوجاقلرينى سونديرن ، يووالرينى ييقوب دويرن
دشمن طوپلرى اوغولداركن اونك سسنده ده سياه كيجه يي
ييره رق شكايترلرينى يوكسلتن ، مظلوم اسلاميتك اوزرينه تأثرله
متوحه بر نظره قدر چيقه رق الماريني ، دردلرينى ايكله يه ايكله يه
حايقيران بر تظلم اداسى واردى .

هر نغمه سنده برانين ، هر كلمه سنده بر فرياد كيزليدى ؛ وبويله جه ،
قودورمش بر ديو اوغولتيلريه كلن طوپ سسلريله تقابل ايدر كن
مؤذنك اينجه سسى دها مهيب ، دها معظم ، دها مدهش بر ماهيت
آليوردى .

بردن اذان بيتدى ، اطراف بر دقيقه ساكت آغلایان برسكون
ايچنده دو كدى ؛ صوكره ، يكيدين سسك بر دالغسى تيره دى ،

مؤذن يکيدن بو دفعه ، دها يالواريجي ، دها صيزلايجي بر شکايتله ،
دوغريدن دوغري يه بر مدد رسك سينه سنه دو کولمکه باش الايان
بر کدر صميميتيله قارا ککلرک ايچنه نداسني صاليو يردى :

الصلاة والسلام عليك يا رسول الله

نصل بر حادته اولدى ، بيلمه يورم ، بغته مناره دن باشلايه رق
تا قارشى ساحلاره ، آنا وطن قىلرينه قدر بر ضيا دالغەسى
فیشقيردى ، تلاطم ايدە ايدە اوزاندى . کيجەنک قويو پرده لرني
شيشله يور ، قاره ديوارلريني بورغولا يور وبويله اوزايه اوزايه ،
دها ايجريلره ، وطنک قانله ملمع طوپراقلرينه قدر کيدي يوردى .
کوزلرمله اوني تعقيب ايتدم و بردن قيورانهرق اوزايان بر خط
اوزرنده اوبك اوبك ، کومه کومه طوپراقلرک اوستنده ، مختلف
وضعيتلرله اوزانمش ، قيوريلش ، کيمي سينه سنى سمالره آچهرق ،
کيمي باشنى قوللرينک حلقه سنه صوقش يوزى قويون ياتهرق ،
صباحه انتظاراً ، راحت راحت اويويان تورک عسکرلري کورددم .
تکرار قاتى دوکمک ، فقط نه اولورسه اولسون دشمنى ازمک
عزميله ، دوداقلرينک اوستنده ايمانلرينک مطمئن بر لمعه سى
چالقالانه رق ، تورک عسکرلري ، امين و مستريح اويويورلردى .
او زمان جبهه نك بر باشنده بر بياض کولمکه ارتسام ايتدى .
بو کولمکه بر انسان شکلنده ، حتى بر انسان قطعە سنده ايدى ؛
لکن او قدر يوکسک ، او قدر بويوک کورونيوردى که بوتون

مناظرڪ لوحه سـنـه حـاڪـم كـيـدـى . اللـرى بـر وـضـع تـقـدـيـس اـيـلـه
يوقاريدہ يورييوردى . آرقه سـنـدہ يوزلرجه يوزلرجه ، بشقه
كولكه لرك ، آرادہ اوزون بر مسافه احترام براقه رق ، عجول ،
متلاشى تعقيب ايدن ، طائفه سى واردى .

بر نقطه ده ، تام عسكر صفوفندن كچيله جك بر نقطه ده بردن
بر سس ايشيتدم : - كيمدر او ؟ ..

او زمان بياض كولكه ياواشجه ايلريادى . بو بر كولكه -
ميدى ، ياخود متصل بر ضياميدى . اونده اويله بر حال وار
ايدى كه كندى سينه سندن چيقان بر بياض نورله شفاف كيدى ،
كويا قلبكاهنده بر كوش يانان صاف بر بلور وجوددى .

ياواشجه ، ملايمت ورق افاده ايدن بر تقريله ، نوبتچينك
قولاغنه بر كله سويله دى . اوزمان نوبتچينك بردن رعشه يه طوتولان
اللرى تفنكنه وضع سلام ويردى . نفر سرتاپا صاقير صاقير
تيتره ركن بياض كولكه ، آرقه سـنـدہ شرقدن غربه ، جنوبدن
شماله قدر عظيم ديارلرك ، اون درت عصرلق اوزون بردورك
آراسندن كلام اللهى اقطار جهانہ كوتورن طائفه خلفاسنى
سوروكلاهرك جبهه يي كچدى .

وصره اياه عسكر كومهرينك آراسندن كچديكنه شاهد اولدم .
هر كومه يه كلدكجه بر ثانيه دور ييور ، وضيانك ايچنده دها بياض بر ضيا اياه
شعله بار كورونن قوللرينى اوزاتيور ؛ بر عسكر ك باشنى ، ديكرينك

يوزنى اوقشايان ، برينك صيرتتى ، اوتە كىنك كو كىنى صيغاشلايان ،
كىمىسنىك قولنە ، كىمىسنىك اوموزىنە دوقونان بر تىماس نوازشى
اوليوردى . بعضاً ا كيليور ، كويا هويتىك نورلرندىن بواويويان
عسكرىك اوزرىنە كونش چاغلايانلرى بوشالتيوردى . واوقدسيت
وعلويتىك مبارك كلامى اىچون اون دىرت عصر صوكرە حالاقاتى
دوكن بو عسكرىنىك آراسىندىن كچركىن ، بوتون خليفه لرى بومعظم
امام دىنىك آرقەسىندە ، كوزلرى آياقلىرىنىك نورانى ايزلرىنە
مر كوز ، اللرى كو كىسارندە ، ھب اومسافە احترامى محافظە
ايدە ايدە كرى قالمىقدىن قورقان چابق خطوہلرلە ، برى برىنە
صوقولەرق ، طاقم طاقم ، اونى تعقيب ايدىيورلردى .

بويلا ، جىھەبى برباشدىن برباشە قدر كچدىلر ومؤذنىك تضر عكار
سى صوك ندای خطابەسىنى فيرلاتىركىن ، نا كھان ، اوضيا
دالغەسى سىوندى ، بوتون بو منظرە محتشمە سيلندى ؛ تىكرار
كىجەنىك قارا كلكلرى چو كدى . يالكىز قاماشان كوزلرمك
پریشان نظرى تا اورادە ، جىھەدە ايليشدى . اورادە ، اوبياض
ومنور كولكەنىك خط سىرندە نوردىن برايز قالمىشى كويا متفسدى ،
ذى حيات برايشىلدايشلە كويا ياشايوردى ، بياض ومنور كولكەنىك
بياض ومنور بردومانى شىكلندە جىھەبى برباشدىن برباشە تنوير
ايدەرك اونك اوستىندە دولانە دولانە دالغەلانىيوردى . دقت

ایتم . بوبریازیدی ، برلوحه غرا که اوراده ، معلقده کونشدن
مخلوق برشریت حالنده دوریوردی . بونی اوقودم :

انا فتحنا لك فتحاً مبيناً

یازیلیوردی .

۱۳۳۸



سیالہٴ حیات

میهاله حیات

ایپولیت ته ن دیر که : « هر هیئت اجتماعیته نك اورام موروثه سی
واردر . الدن کلن ، یالکیز جریحه یی کوس-ترمک ، بونک عضو
اساسی یه عائد اولدیغنه حکم ویردکن صوکره جابجا بردوای
موقت قیلندن برر یاقی یایش-درمقندن عبارتدر ؛ بعضلرینک
توصیه ایتدکلری عملیات جسیمه جراحیه یه تشبث ایتک خسته یی
دها زیاده دوچار ضعف ایتمکدن بشقه بر نتیجه ویرمز . »
هیچ شبهه یوق که حییات اجتماعیته سنده بویله اورام قاضمه
موروثه ایله اک زیاده دوچار ضعف و ناتوانی اولان و عمر مدید
مریضانه سنده حتی یاره لرینک اوزرینه برر دوای موقت قیلندن
یا قیلر بیلله لزوم کورولمه یی هیأت بشریه یه بز پک بلیغ ، و نه قدر
حائر بلاغت ایسه او قدر فجاعت انکیز بر نمونه تشکیل ایدرز .

مدھش برداء الخناز یرک تخریبات مہلکہ سیلہ سراپا جریحہ
 آلود بر وجودکہ چرکابہ لڑک تعفّنات وخیمہ سنہ بولانمش ،
 چامورلڑک لڑق سیاہیلہ سفالتی صیوانمش ایدی . بوکون بوجسم
 مریض چارہ جو وشفاکار بردست طالعلہ ییقاددی ، اونک فجاعت
 علیلانہ سنی کتم وستر ایدن چامورلردن تطہیر ایدلدی ، فقط
 بوصورتلہ سترہ لوثیاتندن صیریلوب حیقان وجودک طلاق
 عریانسی پیش نکاہ تأثرہ سراپا جریحہ لڑلہ مستور برلوحہ الیمہ
 سر ییور .

بونلرہ بر لڑق اغفالکارک تسلیت موقتہ سنی بخش ایدہرک
 کچمک وار ، یاخود بووجودک قانہ برسیالہ نوحیات زرق ایدہرک
 اونی یکیدن احیا ایتک وار . بوایکی طریقک آراسندہ تردد ممکن
 دکل . بوقانک نصل قوی برقابلیت شفائیہ مالک اولدیغنه ،
 درلو عنعنات بدیختانہ تاریخنیک یانغینلردن قالمش برر برہدن ،
 متعفن فقط یالکیز جلدہ عائد برر برہدن بشتہ بر مرضی اولمادیغنه
 امین اولان فکر طیب بر دقیقہ تردد ایتہرک ، بوقشری
 قوروتوب دوشورہ جک برتلقیح زرنخہ مراجعت ایلر .
 بزده ، شو حالت اجتماعیہ وشرائط حیایہدہ ، ملتہ اسالہ
 ایدیلہ جک مایع شفا بخش نہدر ؟

هرکس متفقد رکہ بوآنحق ایش اولہ بیلیر .
 دنیانک اک زیادہ خزائن ثروت طبیعیہ سیلہ مملو بر مملکتدہ ،

اڪ زياده اعمار و تمدينه ، تزئين و تمييه مستعد بر ساحة مساعده سنده ،
 وقتيله هر بر گوشه سنده بر سلطنت كاهك شعشعه دارات و احتشاماتي
 تاريخه محائف طنطنه و دبده قيد ايله مش اولان بر ميدان وسيع
 فعاليتده ، دنيانك اڪ فقير بر ملتى ، اڪ عاطل بر عضوى قيبانندن ،
 حيات محروميتك يأس كرانه بوروندر ك . المزى قولمى
 قيلدا تمدن اوشه ندر ك ، كوزمى قلد يروب سسمزى چيقار مقدر
 چكينه رك ، لطف تصادفله احتياج جو عمره و يريله جك طعمه
 نا كهظوره انتظاراً ، دور ييورز .

سبب ؟

چونكه ايش يوق ! فقط مملكت سراپا ايش . مملكتده نه وار كه
 اولاد ينك قابليات ذكا و عرفانه ، بازوى غيرت و قوتنه مفتقر
 اولماسين ؟ نه رار وار كه حيات و قوتله مملو امواج فيضى ، بيهوده
 كجن بر عمر تباه حزن مؤليله ، سور و كله يه سور و كله يه ، يمين
 ويسارينه باقان نكاه مغمومندن ، خالى چوللره ، متعفن بطاقلقره
 كويا دموع تأثر رتليف اساله ايده ايده عمان فنانك آغوش بي پايان
 تسليتنه آتيلوب كيديور . اورمانلر وار كه دنيانك اهمم كراسته
 تجارتنه مالك اولان مملكتلرينه رشك آور اوله جق بر مبذوليت
 ثروته مالك ايكن و يرانه لرى اورته جك تحت حواله لرى قومشو
 ديارلردن تدار كه مجبوريت كور يايور . وقت وقت داغلر هفته لرحه
 سورن يانغينلرله مهيب بر آشكده ماتم تشكيل ايدر كن شديد

برقيشده قوجه برپايتخت نزله سني ايصيته جق اودون بوله مايور .
هردرلو استعداد تراييسي ، مساعدهٔ اقليميسي تجليات مسعودهٔ
طبيعتيله اثبات ايدهرک دنيا نك برباغزار فرخنده سماسي اولمقله
زبانزد برمملکتده سبزه وميوه يي خارجدن جلب ايدهرک ، ياغي
اوني اجانبدين ديکنه جک ، چوجققره اچيرمک اچون ابي برسوت ،
خسته لره ويرمک اچون تازه بر يهورطه تدارکنده مشكلاته
اوغرايه جق بر حال ضرورتده يز .

بومملکتده ياپيله جق ايشلرک فهرس حزن آوريني ، ايشته
بويله اک بويوک شملردن باشلايه رق اک کوچک ذره لره قدر ،
بي نهايه برسلسلهٔ تعداد ايله تمديد ايتمک ممکندر . فقط بونه ياس
آور ، نه جانخراش بر کتاب الام تشکيل ايدر . بومقاله نك افادهٔ
روحنه شو برقاق مثالك ناطقهٔ بلاغتي کافيدر .

صوکره ، بريانده بويله ييغين ييغين ، داغلره وادي لره صيغمايه جق
قدر کتله کتله ايش ، وبوايشلرک سينهٔ مدفوناتنده بي حدوحساب
برخزينهٔ سيم وزر اوپورکن ، برده بومملکتک خلقنه باقيلسه ،
خالقک عطالت مجبوره سنه ، وبونک نتيجه سياله ، فقر و ضرورتنه
دقت ايداسه بولوحه نك تقرير جکر دريله صيرلامامق ممکن دکلدر .
ولاياتده اويله کويلر ، اويله قصبه لر واردرکه خالق کويا
يالکيز ايام تعطيليه دن متشکل سنه لرک تسلسل يکنسقيسي آراسنده
اسنه يه اسنه يه ، کرينه کرينه مؤبد براويقونک رؤ يالرنده يشار .

قرق پارہ یہ قدر اوجوز صاتیلان برروزہ مساعیلہ برعطالت صرفہ
 آراسندہ طبع قناعتکار ورخاوتپروری اویلہ شایان اہمال برفرق
 بولورکہ فطرتنہ عائد بر تمایلہ تبعاً بوایکی طرز اصرار ایامدن
 ایکنجیسنی ترجیحده تردد کوسترمز . نہایلہ یاشار ؟ اونک ایچون
 یاشامق اولہ مک دیمکدر . فلسفہ سنده بو درجہ محویتکار اولان
 قناعتی ، وسیلہٴ اطمینان بولمقده کوچلک چکمز . چارداغک آلتی
 سرین ، چشمہ نک صوبی براق ، کونش لطفکار ، هوا منع ومنومدر .
 استانبولک ایچ وکنار محلاتنہ صوقولان بر فکر تدقیق اوکنده
 ارتسام ایدہ جک لوحہٴ حیات بشقہ درلو دکدر : صاللانان
 قفسلرینک آلتندہ ، قنبورلاشان قبورغہ لرینک ایچندہ درین بر
 ماتمک حزن سیاہنی او یوتان اولر واردرکہ صماخ دقت قاپیلرینہ
 یاپیشسده بو کوکسک الام دروتنی دیکلہ مک ایستہ سہ ایچندہ بر
 حیاتک نبض ونفسنی ایشیتمکده مشکلات چکر . برباشدن برباشہ
 اویویان محلہ لک قارا کلک سوقاقلری واردرکہ یکانہ اثر حیاتی بر
 یقیق دیواردن آتلایان بر کدی ، بر قاپینک اشیکنی کیرمکلہ
 مشغول بر کوپکدر . بلکہ کوشہ دہ بر عطار ، اوتہ دہ بر مناو ،
 کیم بیلیر نہ زمان کلہ جک مشتری یہ انتظاراً ، کیجہ لک انتاریسیلہ ،
 ایشلہ مہ ترلک لریلہ چیقمش قومشو افندیلرلہ دکانک بر طرفنہ ،
 یاخود ، بر صندوق ایچندہ بویوتیلان طفلانک کنار سایہ سنہ چکیلہ رک
 طقوز طاش اوینامقلہ مشغولدر .

بوسوقاقلردن کچن بر اجنیینک ، اکر شاعر دکلسه ، اکر
 بو حیات سکینهٴ حضورک ، بوظواهر نائمهٴ سعادتک آلتنده مختفی
 حقیقی آرایه جق قدر نافذ النظر سه ، ذهنتده تولد ایدہ جک اسئلہ یی
 کشف ایتک پک آساندر .

بواجنبی مثلاً یا لوندره دن ، یا پارسدن کلشدر : اوراده بر
 جاده بر محشر ، سوراق بر دارالتجاره ، برأو ، همان دائماً ، بر
 کوچک صناعتکاهدر ؛ بوتون خلق دورمغه امکان بر اقامیان بر
 حمای فعالیت ایچنده پویاندر . بر کوچک دکان پنجره سی اوکا مجلد
 بر پدر ، دیکشجی بر والدہ ، حکاک بر چوجق کوسترر ؛ برأوک
 قاپیسی اوکا چوجق او یونجاقاری یاپان بر دول ایله یاپمه چیچک
 اعمال ایدن بر کنج قیزدن متشکل بر کوشهٴ مساعی یی مکشوف
 طوتار . صوکره سوقاقلردن سریع و متلاشی کچن خلقت ایشلرینی ،
 کوجلرینی تخمین ایتکده صاحب ممارسه در . بیلیر که بونلر یا
 تجاردر ، یا اصنافدر ، یا عملدر ، یا خود ، بر سر بست شعبهٴ صنعتہ
 منتسبدر . والحاصل مملکتک بوتون حیاتی ایش دینلر او چرخ
 دوارک دندانی آراسنده قاینار ، دورماز ، دوز ، یووارلانیر ،
 بعضاً ازبایر و قیریلیر ، فقط برازیلوب قیریلانک یاننده اون دانه
 قوشوب یاشایان وارددر . و مملکتدن ، بو چرخ دوار سعیدن ،
 اطرافه یرفوارهٴ شرارات فیض و عمران فیشقیرر ، افاقدہ کھکشان
 سعادتک انعکاسات تا بندہ سی ارتسام ایدر . بومناظر محتشمهٴ

سعیہ ، بوتجلیات مدبدبہٴ فعالیتہ آیشمش بر اجنبینک انطباعات روحیہ سندہ نہدرین بر بہت وحیرت انتقاش ایتہ لیدر .

سزی یاقہ کزدن طوتسہ ، کوپری باشنہ کوتورسہ وہمان بوتون شہرک مدوجذر حیاتی بلع ایدن بومرکز غلیانک خلقنی کوسترہ رک دیسہ کہ : — بوتون مملکتک اوخوا بیدہ سوقاقلرینی ، اوسا کت اولرینی ، اودرین رؤیای سکون وحضورینی دویوران ، بساہین خلق ایشته بوخلقدرد ؛ بویلہ اولق لازم کلیر ... رجایدہرم ، بونلر نہ یاپار ؟ ..

*
* *

ظن ایتم کہ بر اجنبینک قوہٴ منطقی ، بوخلقک شو عطالتدن تمامیہ معصومیتہ قناعت ایدہ بیلسین . فقط حقیقتی بر اجنبینک منطقیلہ دکل ؛ ملتنی سون ، وطنی ایچون صیزلایان ، اونک بوتون سرانجام غریب مصائبنی آ کلا یوب حس ایدہ رک اسباب بدبختیسنک روح نالندہ سنی دویان بر تورک منطق المدار وتجربہ کاریلہ تفحص ایدرسہک کوریرز کہ خلق تماماً معصومدر . یکانہ متہم اونک قصیدہٴ اجتماعیہ سیدر ، مقدرات تاریخہ سیدر . و دیورز کہ آرتق بودورہٴ مسکنت و عطالت بیتدی . ایشته بونی اثبات زمانندہ یز :

ینہ ایپولیت تہن ، بشقہ بر وسیلہ ایلہ ، دیورکہ :

« بر مملکتک قانون اساسیسی بر وجود ذی حیاتیہ متعلق بر مادہٴ عضو یہ قبیلندندر ؛ اویالکیز کنیدیسنہ خاصدر ، دیگر بری

اونی جسمانیتنہ تمثیل ایدہ من ، اونک یالکز ظواہری استتساح
اولنہ بیلیر . مؤسسات وتشکیلاتک ، قوانین وامتیازاتک ، حقوق
ونظاماتک ، والحاصل دساتیر رسمیهنک آلتندہ افکار ، عادات ،
طینت خلق ، شرائط صنوف ، اونلرک وضعیات متقابلہ سی ،
احتساسات خصوصیه سی ، والحاصل ظاہراً مرئی دالزلہ یاپراقلرک
آلتندہ غیر مرئی درین کوکلرک پیچ و تاب خطوطی وارددر . اغاجی
ادامہ وتغذیہ ایدن اونلرددر . اغاجی کوکلرندن محروم براقہرق
دیگر سہ کز دوچار اضمحلال اولور . وایلاک صدمہٴ روز کارده
بیقیلیر . »

زده قانون اساسی عصرلردن بری دوام ایدن بر موجودیت
بدبختانہنک حجت استخلاصیدر . عصرلرلہ عمق روح ملتدہ مخفی
بردرد احتیاج شکلندہ اویویان ، صوک دورہ مضائبده ہر سہنہ
سالنامہنک بر دیباچہٴ مفسوخی وظیفہ سنی کورن بوحجت پروعد
استقبال نہ بر اثر تقلید واستنساخ ، ندہ بر عضو مضاف ومستعاردر .
زادہ وجدان ملت ، خلاصہٴ تاریخ وطندر ؛ بواویلہ براغاچدرکہ
ساقنہ عادات وافکار متخالفہ اتکا ایدوب برلشہ بیلیر ، زیر سایہٴ
الیافنہ صنوف واقوام متضادہ کلوب دیکلنہ بیلیر ، واونک کوکلری
تا اعماق موجودیت مملکتدہ آلتی عصرلق دموع ہجران وخسران ایلہ
بسلمش ، بویومشدر . اونی یقہ جق صدمہٴ روز کار او قدرقوی
اولمالیدرکہ اولاً اونی دکل طوپراغنی یقہ بیلسین . بواغاجہ ، اوت ،

بویا درین کوکلرہ مالک اولان بواغاجک حیاتنه یالکز برقوت لازمدر : صو ...

بوصوی ویرہجک اولان آل بونسلمک الیدر ، تاکہ اونک ساقی متکای ملت ، زیر برک وباری برکوشه سایه دار سلامت وسعادت اوله بیاسین .

فکر مجہ بودوردنک البویوک احتیاجی مملکتہ ایش تدارکیدر .
تعبیر یا کاش : یاپیلہجق وظینہ ، موجود اولان ایشلرہ ومنتظر اولان ایشجیلرہ برامکان مواصلہ بولمق ، یعنی ایشلرلہ ایشجیلرک بولوشمہ سنہ خدمت ایدہجک خط وصلی ایشجیلرہ تدارک ایلہمک نقطہ سنہ منحصردر . بوخط وصل سرمایہ در .

اوسرمایہ کہ شیمدی یہ قدر طرق مستقیمہ تعقیب ایدہرک کلہ مزدی . ناموسکار اللرہ دوشہ جکندن قورقہرق ابواب مملکتی دق ایدہمز ، خفی ایزلر تعقیب ایدہرک ، پنجرہ آراقلرنندن قایہرق صوقولوردی ، وبونک ایچون مفید اولہ جغنہ مضر ، شفافبخش اولہ جغنہ سم آلود اولوردی . بوکون اوسرمایہ اطرافدن حدود مملکتہ کلش بکایور ، بوتون تصورات مستقبلہ یی برحلقہ زرین شکلندہ قوشاتہرق بر اشارتہ منتظر ...

کفایت ایدرکہ بواشارت یاپیلسین ویاپیلیرکن تجارب مکرردنک ارشادات ونصائحندن استفادہ ایدیہرک بومسافرہ برامنیت ومنفعت مشروعہ تخصیصی مقابلندہ اونندن دہ مملکت ایچون بلاوندم دکل

سلامت و خدمت طلب ايدلسين .

ايشته اوزمان لوحه عطالت و مسكنتيله تقرير الم ايلهين
بوكونك ساحه سفاقي بر عصاي سحر ك تماس حيات اورينه
تصادف ايتمشجه سنه سيلكينوب قالقار ، اوت ، ايشته آنجق اوزمان
خسته ذيريلير .

بوكون حال عطالت ورخاوتة محكوم ظن ايديلن بوخلاق
چاليشمق قابليتندن اصلا محروم دكلدر ، حتى پك از برفائديه
مقابل خرينه قواي جسمانيتندن پك چوق بر سرمايه صرفنه او قدر
ايشه يقدر كه او بلكه يالكر اصول سعيه عدم وقوف ايله اتهام
ايديله بيلير . اوكا بروسيله فعاليت بخش ايدلسه ، سرمايه قوتى
اسراف و اتلاف ايتكه مانع اوله جق و سائطاه تجهيز اولونسه ،
خصوصيله ، چوق چاليشه رق آچ قالمغه رضا كوستره كوستره
دوچار فتور اوله جفنه معتدل بر صرف كوششه بدل صرفه بر معيشت
بوله بيلك امكانى ويرلسه بو عنصر ، بوتورك عنصر نجيبى ، دنيانك
اك مطيع و شجيع عسكرى اولمغه نصل قادرسه دنيانك اك عفيف
و مستقيم ، اك ناموس پرور و فضيلتكار ايشجيسى اولمغده عينيلا
قادر در .

يالكر اعتراف ايتمليدركه اونك جوهر طبعنده مندج قور
كولانمشدر . اوندن استحصال شرارات ايد بيلمك ايچون بر از
اوزرينه اوفورمك ، كولاريني دوكمك ، آتشي ميدانه چيقارمق

لازمدر ؛ اوزمان اوندن صاف بر آلو چیقہ بیلیر . ایشته ملتک
مشعلہٴ نجات وهدایتی بوغنصرک آتش رمادپوش فعالیتندن
چیقاریلہ بیلہ جک اولان آلودر .

بر نفخہٴ شفا ساز ایله انجلا ایدہ بیلہ جک اولان بوشعلہٴ حیات
مملکتک مہای سحاب آلود یاسنی نہ روحپرور بر تاب سعادتله
موجہ دار ابتسام ایلردی ! بشریت ایچون سراپا رفاه واقبالدن ،
سعد و سروردن مرکب بر حیات مخیلہ نک قصائد مسعودہ سنی
دوشونمکله مشغول اولان حکیم انسانیت پرست پرودون مملکتی
کوچک تمیز باغچہ لرینک اورتہ سندنہ شاد و خرم ، خندان و تابندہ
اولرله مستور و بواولری سعی و فعالیتک آسودکی وزندگی سیلہ بر
آشیان سعادت حالہ کترین عائلہ لرله مسکون کورمک ایستہ ،
وبونک ایچون طبع جوان مردیسنندن دوغان بر شعرک نظریات
خیالیہ سنہ قاپیلہ رق حیاتده هیچ بر زمان امکان تطبیق بولہ مایہ جق
برقانون معاشرت دوشونوردی .

مملکتہ عائد وظیفہٴ استقبالدن بحث ایدر کن بر قصیدہٴ شاعرانہ
یا یمامق امنیتیلہ ادعا اولنہ بیلیر کہ او حکیم شاعرک خیالی تزیین ایدن
صحنہٴ حیات بو طوپر اقدہ و بوغنصرلہ پک قولای تحقق ایدہ بیلیر .
بورادہ بکر و صاف بر طوپر اغک خزائن مدفونہ سیلہ محویت پرور ،
قناغتنکار برغنصرک شباب حیاتی وار . بورادہ ساحہٴ واسع ، زمین
رقابت ہربازوی غیرتہ مساعد . عین میدان مجاہدہ دہ جولان

ایتمک ایچون افراد یکدیگر نی چیکنه مکہ ، عین معرکہ معیشتہ اوغراشمق ایچون بری برینک قولنی قیرمغه محتاج دکل ، هر کس چالیشه بیلیر ، هر کس کچنه بیلیر .

برمملکتک سیماى مریضانه سنی دفعه دیکشدرمک ، اونی زنده وتوانا برمعناى صحتک امواج تابشیه پارلاقمق البته برسنه نک ، اون سنه نک محصول اقدامی اوله ماز ؛ فقط برشیئی بترمک ایچون اولا باشلامق لازمدر . استقبالک سعادت ورفاهیتنه ، مملکتک یاریندن اعتباراً ابتدا ایده جک اولان آتی نجات وفلاحنه عائد اولان بو وظیفه ، و دیگر بر نقطه نظر دن ، بو کونک آسایش اجتماعی ایچون ده بر لازمه اداره حکومتدر .

ترخیص ایدیلن عسکرلر ، عودت ایدن منفیلر ، حیس خانه لردن بوشانان مجرملر ، یارین نظامنامه مخصوصنه تطبیقاً حقلرنده برمعامله تطبیق ایدیه جک سرسریلر ، سوقاقلری دولدران دیلنجیلر ، بوتون ضابطه نک اندیشه سنه سببیت ویرن بوش کزنلر ، والحاصل کافه دربدران مملکت وسائل سعیه منتظر درلر . هله بونلردن اول ، دها یوکسک بر نقطه نظر دن دوشونیه جک بر صنف ممتاز وار : تنسیق ایدیلان دوا ثردن چیقاریلان مأمورلر ، بوشالتیلان قلملردن اورته یه چیه جق کنجلر ، یارین مکتبلردن فوج فوج آقه جق زمره شبان . بونلر نه اوله جق ؟

مکتبلرله یک مشغول الفکر ز ، هنوز تماماً اجرا آته تشبث

ایتمہ مکله برابر اک بویوک مشاغل فکریه دن برنی مکاتب تشکیل
ایتمکده در . و سعادت حیاته تقید ایدن بر ملت ایچون بو فصل
اشتغال اقدام وظائفدر . لکن تأسیس مکاتبدن مقصد شعبات
مختلفهٴ فعالیت ایچون وسائط احضاری دیمکدر ، اوندن اول تأمین
ایدیله جک مقصوده او شعبات مختلفهٴ فعالیت برمدار سعی قویمقدر .
مکاتب موجوده دن کرک استانبولده کرک ولایاتده بولنان
اعداد یلرک هر سنه علی العاده بر تحصیل ایله چیقاره جققلری طلبه
بر عدد مهم تشکیل ایدر . بونلر حیاتده بر حصهٴ فعالیت ایستیه -
جکدر ، ولعقب تحصیل لزوم کورمه یں بر قسم اکثری عروق
متنوعهٴ ملکته امتصاص ایده بیلیمک ایچون منافذ مناسب
آرایه جققلر .

بونلردن سوکره مکاتب عالیہ طلبه سی وار : بزه محتاج اولان
مأمورلری ، معلملری بونلردن آله جغز . دیگرلری ، بوتون
اوحولهٴ عرفانیله کلوب بزدن ایش ایسته یلری نه یاپه جغز ؟
محققدر که یک قریب بر زمانده بو مکاتب عالیہ مأذونینی احتیاجاتی
تجاوز ایده جک ، بر بوله مایان ، ایش تدارک ایده مه یں قسم متباقیسنکده
سرمایهٴ معنویسی بر گوشه ده توتونجیلکه ، یاخود بر ترزینک یاننده
قالفله مساعدده ایتمه یه جک . شو حالده اون ای مأمور یتشدیرمک
ایچون طقسان بدبخت ، صف اجتماعیسندن سقوط ایتمش معلولین
معارف یتشدیرمش اوله جغز .

بو برطرفدن مكاتبك درس جدولارینه ، دیگر طرفدن ینه
بومقاله نك اساس موضوعنه ماسدر . برنجی نقطهٴ تماسنی ترك
ایده رك ایکنجیسنه حصر مطالعه ایتك لازم کلیرسه ینه عین
نتیجه یه واصل اولیورز که عمله ایچون نصل وسائل سعیه احتیاج
وارسه متعلمین ایچون ده ینه اوقدر شدتله وسائل فعالیت احداثه
لزوم واردر .

بو وسیله ایله دو قنور کوستاولو بونك بر صحیفه سی خاطره
کلیور . دیور که :

« احتیاجات ایله اواحتیاجاتی تطمین وسائلی آراسنده موجود
تناسب معیار سعادتدر . بویکی اس نسبت مساوی ایسه ، اونلر
نه قدر كوچك اولورسه اولسون ، انسان مطمئن ومطیبدر .
وسائل تطمین احتیاجك عدم کفایتندن متولد بر فقدان تناسب
نتیجه سیله انسان ینه تأسیس سعادت ایده بیلر ، اکر احتیاجاتی
اوو وسائل نسبتنه تنزیل ایدرسه . مشكله نك بو طریق حلنی شریون
من القديم کشف وتطبیق ایتدکلی ایچوندر که بز اونلری دائماً
معیشت مقدره لری حقنده قانع وممنون کوریرز ، لکن غربده ،
غربك حیات جدیده سنده احتیاجات بر مقیاس عظیمده توسع
وتزاید ایلامش ایکن بونرك وسائل تطمین عین سرعتله ترقی
ایلامه مشدر . بونك نتیجه سیله تناسبك وجهیننده بویوك بر عدم
مساوات وار ، وواصل مرتبهٴ تمدن ومعارف اولان انسانلردن

اکثری طالع مقدرلرینی تلغین ایله مکده در . «
 دو ققور کوستا اولوبون قناعت فلسفه سنه مبتنی اولان سعادت
 شرقیوندن بحث ایدرکن البت شرق تجددکاری دوشونمہ یور .
 شرق تجددکار اصل بو کون مکاتبده احضار اولویور . اگر
 بو عناصر جدیدہ نک مقیاس سعادت حیاتی احتیاجات ایله وسائل
 آراسنده برعدم تناسبہ ابتداء ایدہ جک اولورسه اولاً کندیلمرینک،
 صوکرہ مملکتک سعادتہ ، نجاتہ خدمتہ مکلف اولان بو - بان
 وطن ندبو نداو وظیفہ یی ایفا ایدہ مہ یورک طالع مقدرلرینی تقدیس
 ایدہ جک معرفتمندان دکل ، افلاس جهد وغیرتیری تلغین
 ایدہ جک بد بختان اولہ جقلردر .

بونک یکانہ چارہ سی ، تکرار ایدہ لم ، ایشدر ، وایشدن بشقہ
 برشی دکلدر ..!

۱۳۲۴





ایکی عنصر



ایکی عنصر

کویده اقامت ایدن برعجبمك شو حكايه سنه پك بويوك براهمیت
ویردم . دیدی که :

— اون درت سنه اولدی . اون درت سنه دیرکن برعصرلق
زماندن بحث ایدیورم ظنندهیم . اوزمانله بوزمان آراسنده اوپله
اوزون برمسافه ، اوپله درین برفرق وارکه بومسافه و فرقی یالکیز
اون درت سنه لك برمدتك حصوله کتیرمك ایچون کفایت ایتمش
اوله سنه احتمال ویرپله من . حیاته عائد هرشیده برطبیعییت ، من القدیم
تأسس ایتمش برمعقولیت و مضبوطیت واردی . از جمله پاره ده ...
بانچه مده برارنبود چالیشیردی ، اباته واعاشه سی بکا عائد اولمق
اوزره آیده یدی مجیدیه آلیوردی ، یوز قرق غروش ، شیمدی
بررنجبرك آنجق برکونده لکنه کفایت ایده بیله جك برشی ...

باغچوان آنجق کندی وظیفه سیله مشغول اوله بیله جک قدر وقت
 بولیوردی ، حال بوکه بنده تزیین واعمار هوسی اؤک خارجه ده ،
 سوقاغه ده طاشمش ایدی . بوتون اطرافه اغاجلر دیکدیرمشدم ،
 غالبا یوزقدر واردی ... بونلری هیچ اولماز سه هفته ده برصولامق
 لازمدی ، و بوايش ایچون خارجدن آدم تدارک ایتمکدن بشقه ده
 چاره یوقدی . بو خدمت ایچون برتورک بولمق اصلا قابل اولمادی ،
 دائما دقت ایدردم ، و کندی کندیمه : « نه ای ! بوشده قالمش
 برتورک یوق ! » دیردم . برکون قارشیده ، قومشو دیوارینک
 کولکه برطرفنده برکنج آدمک کرینه رک او یقودن اویان دیغنه دقت
 ایتدم . سسلندم ، یاری قاقه رق مخمور کوزلرله بکا باقدی : - ایش
 ایسترمیسک ؟ دیدم . بردن هوسله نهرک : - البته ایستهرم ! دیدی .
 المله اشارت اندهرک : - کل ! دیدم . صالنه صالنه کلکه باشلادی ؛
 بر آراق دونوب آرقه سنه ، دمین اویودیغی یره حسرتله و غالبا
 اویقوسندن هنوز اتمام اولونه مامش برقیه قالمش اولماسین قورقوسیه
 باقدی . مهیت یانمه کلنجه صوردم : - بو کونا کمک پاره ک چیقیدی ؟ ..
 باشیله : خایر ! دیدی . دوام ایتدم : - اویله ایسه سکا برکوندلک
 وار . شوقوغه لر آلیرسک ، حوض بوراده ؛ اورادن دولدیرر ،
 سوقاقدده شواغاجلره برر قوغه صو ویررسک . یوز قدر اغاج وار ،
 یوز قوغه صو ایدر ... دیکله دی ، دیکله دی ، باشی قاشیدی ،
 قوغه لر قاپدی ، حوضه سکیرتدی ، دولدیروب چیقاردی . بو ،

کنج ، دینج برتورک دلیقانلیسییدی ، قوغه لر آنده کویا بوش
 دینه جک برخفته سالانیوردی . کلدی ، کلدی ، تایامه قدر
 کلدی ، قوغه لری آیاقلریمک آلتنه قویدی . یوزیمه باقهرق بلافتور
 برچیرپیده : — صولارم اما ، دیدی ، قوغه باشنه برغروش
 ویررسک . — اما یاپدکها ! دیدم ؛ یوز قوغه صوویررسهک یوز
 غروش ایدر ، اک قبادای رنجبر کونده لکنه اون بش غروش
 ویررلر . شیمدی ایکندی اولدی ، ایکی ساعتک ایش ایچون یوز
 غروش نصل ایسترسک ؟

— ایشکه کلیرسه !.. دیدی . وقوغه لری اوراده براقدرق
 ینه صالنه صالنه دیوارک دینه یونلدی . او کونک اکمکنی هوالرده
 دوغوب دوشه جک بر نعمت تصادفدن بکله مک نیتیه تکرار اوتلرک
 اوستته اوزاندی ، و کرینه رک یکدن اویرمغه باشلادی . اون
 درت سنه اولدی . بووقعه ذی حیات و ذی بلاغت برلوحه شکنده
 دماغمک ایچنده یاشاور . و دییه بیلیرم که اون درت سنه ایچنده
 باغیمده برتورک ایشجیسنه خدمت قبول ایتدیرماک فرصتی
 بولامادم . بوسنه ...

مجبمک سوزینی کسدم : — بوسنه بولایکیز غالبا ؟
 کولدی : — خایر ، بوسنه ، مع التأسف تورک هر وقتدن
 زیاده چالیشمغه مجبوریت موقعنده ایکن بالعکس هر وقتدن زیاده
 استغنا کار . بوکا مقابل فوج فوج روس ملتجیلری وار . کون

کچمز که بونلردن اوچی بشی قاپی به قدر کله سینلر ، او کړندکلی
 تګ توك کله لردن بری صرف ایدرک : — ایش ، ایش ، ایش
 وار ؟ دیمه سینار . قرار کا هده کنیدی لرینه ییه جګ شی ، بارینه جق
 یر ویردکلی حالده بونلرینه اورادن قورتاره بیلدکلی کونلری
 پاره قازامق وقازانیله جق پاره ایله کنیدی لرینه براز دها ذوق ولدت
 امکانی حصوله دتیرمک اوزره کوی او ، او دولاشیرلر ، قاپی
 قاپی ایش آرارلر ، وقاچ غروشه بیلیرمیسکز ؟ ..

حکایه نګ بوندن آساغیسنه دقت ایتمه دم . اصل محتاج تأمل
 اولان نقطه بواکی عنصرک آراسنده موجود اولان فرق ایدی .
 حال بوکه ، حقیقتده ، بواکی عنصر منشأ و اعتیاد ، فطرت و معیشت
 اعتباریله یکدیگر بدن بودرجه حائز فرق اولماق لازم کلیردی .
 اگر تورک فارسینسه فعالیت و جوالیتیله مشهر شمال و عرب
 انموذ جلرندن بری قوز ایدی ده اونکله مقایسه ایدلسهیدی همان
 فرقک طبیعتنه حکم اولونوردی ؛ فقط بو حکایه ده مقایسه آز
 چوق شرائط متشابهه آلتنده بولونان ایکی نمونه بشرک آراسنده
 یاییایوردی ، و نورولیوردی که آرا ده عظیم برفرق وار .

بوفرقت کیمک لهنه اولدیغنک ایضاحی البته ایجاب ایتمز ،
 چیقارنله حق اولان نتیجه ایه غایت بسیطدر . تورک کرک مقتضیات
 عرقیه سندن ، کک اعتیادات محیطیه سندن متولد بررخاوتله امکان
 معیشتنی تعادفدن انتظار ایتمکله مألوفدر ، و تصادف علی الا کثر

سعی قدر تأدیاتنده التزام صحت و سخاوت ایتهدیکندن بالطبع
تورك احتیاجاتی و حیاتدن اسباب استلذاذی حداقله ایندیرمش ،
کندیسنه توکل و قناعتدن مرکب بر فلسفه یا یشدر که بوفلسفه اونی
دائما محرومیت و سفالته قاتلامق صورتیه نفسنک تمایلاتندن فراغته
سوق ایتمشدر . اونی حیات فردیه سنده تخریب ایدن بونقیصه
عین فلسفه ده افرادک تجمعی حالنده حیات اجتماعییه انتقال ایدنجه
مملکت و مملکتک اضمحلال و انحلالنه قدر ایلرله مک و نتایج و خیمه
تولید ایلهمک اضر و ریدر .

ا کر تورك و تورکلك يالکزر کندی حیاتنده اطرافک رقابتندن،
عناصر سائرهنک هجوم و تجاوزندن موجودیتنی مصون طوته جق
بر سورچین ایلهمحاط یا شاسه بونقیصه سنک سیئاتی ایچنده یو وارلانونب
کیدر . لکن حیات حاضره مملکتلری و ملیتلری بوله آیری آیری
یا شامق امکانندن تجرید ایلهدیکندن هر کس محافظه موجودیتنی
اطراف ایلهم جدال قوتی بخش ایده بیلهمک عین مکملیتده اسلحه
ایلهم تجهیزدن بکله مک مجبوریتنده در . و وقتا که بر قومده عمومیت
اوزره محتاج تداوی بر معلولیت واردر، اونی تشفییه ایتمک، رسیده
صحت اولدقدن صوکرده اوکا تنیه قواسنه خادم و سائلی بخش
ایلهمک وظیفه سی اونک اوزرنده حق ولایت و وصایتی اولان
طرفه عائددر .

بوکون تورکک آراسنه نه اولورسه اولسون بردها آیریلهمایه جق

صورتده قاریشمش اولان ینه بوطوپراغک مالی عناصردن بشقه چار اقطار عالمدن گلش ، هپ بوراده اکمک قازانمق اوزره عنزم ایتمش چشید چشید قومیتلر وار . بونلرک کافه سنده ایش حیاتک محور اساسیدر ؛ تورک بونلرک قارشیسنده دیوازلک دینه اوزانوب کرینه کرینه او یویایه ماز . او یومقده اصرار ایدرسه اونی او موزلرندن طوتوب صارصمق ، « او یومق دکل ایشله مک زمانیدر ! » دیمک لازمدر . ساده دیمکله ده اولماز ، محبمک حکایه سنده موضوع بحث اولان روسلرک مثالیه اکتفا ایدنجه بیله کورولیورکه بو کون استانبول ، یارین بوتون وطن بشقه نودن ، بشقه اصولله استیلا تهلیکه سنه معروضدر . النده سلاحله کلن دشمنه قارشى نصل تورک نفرلری آلوب براردوی مدافعه حالنده سوق واداره اولونیورسه بوبشقه درلو سلاحلرله کلن ساکن فقط قوی رقیبلره قارشى ده تورک قوللری آلوب عینیله عسکرلک قیلندن برخدمت مجبوره ایله ، برایش اردوسی حالنه قونمالیدر .

بونصل یاپیله بیلیر ؟ ..

بوسؤالک قارشیسنده ، بومملکتده برشی یاپیله مایه جغنه قرار ویردرک بشقه درلو دوشونلری هپ اسرار و خفایای امورده عدم وقوفله اتهام ایدن ، و : « سزده بزلر قدر حقایقی کوره بیله جک نقطه لرده بولونسه کزه هیچ بویه خیالاته قاپیلمازدیکز ! » معناسیله کولومسه یین سیالری تصور ایدیورم . اوت ، وهله او یله در ،

بوکون قوجه برکتله یی همان یرندن قالدیره رق ، اویقوسندن
 اویاندیره رق حال فعالیتیه قویویو یرمک یکر می درت ساعت ایچنده
 قابل حصول برامل دکلدیر ، بو برخیال خامدر . آنجق ، هر عقدہ
 معمانک چوز یله بیله جک بر سر رشته سی اولق ده طبیعیدر ، بومسئله ده ده
 ایشی منتهایه دوغری سوق ایدن ایپک اوجنی بولق لازمدر .
 یکر می درت ساعتده اولماسه بیله یکر می درت سنه ده اولسون
 بلکه چوزمک ، هیچ اولمازسه ، چوزمکه یاقلا شمع ممکندر .
 ملتیرک لوحه ساعاتی اوقدر کنیشدر که اونلرک مقدراتنده ابره نک
 مسافاتی اوزون سنه لرله اشارت ایتک و صبورانه بکله یهرک یالکیز
 ایشله مه سنه دقت ایلهمک ایجاب ایدر .



مکاتب سلطانیہ



مکاتب سلطانیہ

اوراق حوادثہ او قودق ، معارف نظارتی مکاتب سلطانیہ دہ
مدت تحصیلہ یی اون ایکیدن اون بر سنہ یہ تنزیل ایتمش ، یعنی تعبیر
آخرله چو جقلر مزك حیات فعالہ یہ کیرملری امکاتی استحصا
ایده بیللمه لری ایچون بر سنه لك بر ضمه بولونمش ، عادتاً اونلری
برر یاش دها بویونمش . نظارت ایچون بوقراری اتخاذه اسباب
موجبه اوله رق نظر اعتباره آلمان اساسات موجبه نه اولورسه
اولسون بزجه ، افکار عامه جه دوشونیه جك جهت بونك حیات
تطبیقیه وجه تعلقیدر . خلقك موجودیت ملكیه و ملیه شدت
ارتباطی اولان دها شہادت آور حوادثله مشغول بولوندیغی برصیره دہ
جریده لرك محویتكار بر طرفنه ایلدشهرك انتشار ایدن بوخبر ، بلا
شہہ ، دوغریدن دوغری یہ علاقہ دار اولان چو جق صاحب لرندن

بشقہ سنک او قدر دقتنی جلب ایدہ مہ مشدر . حقیقت حالہ بوقرار کدہ
حیات ملکیہ و ملیہ دہ بویوک بر تأثیری اولہ جقدر ؛ خصوصاً
قرار ، مہیتندن تولد ایدن نتایج متفرعہ یہ کورہ شرائط موافقہ
ایلہ محاط اولورسہ...

مکاتب عمومیہ دہ درس لک ترتیبیاتی ایچون راہبر اولان نظریہ۔
لردن اک اول اجرای تأثیر ایدہ جک بری وارد رکہ اودہ بوتون
مملکت اولادینہ سیاناً نہ تعلیم ایتک ، بالآخرہ سلوک ایدہ جکلری
طریق حیات ، ایچندہ قالہ جکلری محیط نہ اولورسہ اولسون عمومہ
بردن مطلقاً نہ او کر تمک لازم کله جکنک تعیینیدر . بونی تعین
ایدر کن علمک بر قسم محدود و معینہ نہ دہ بولونورسہ بولونسون ،
نہ اولورسہ اولسون ہر انسان ایچون مطلقاً بیلنوب او کرہ نلش اولق
ایجاب ایدن بر امتیاز مخصوص ویرلش اولیور . او درجہ بی اک
یوکسک طبقہ یہ منسوب بر زنکین چوجغندن طلب ایدہ جککیز
کی صایانہ آبانش بر چفتجیدن ، سوراق سوپورن بر تنظیفات
عملہ سندن دہ ایستہ یہ جکسکیز . اولادینہ عموماً وسیاناً بو درجہ
تحصیلی بخش ایدن بختیار مملکت لک یانندہ تحصیل مجبوری بی
اساس اولق اوزرہ قانونہ قویوب دہ امکان تطبیقی استقبالی ظہورات
مساعده سنہ تطبیق ایدہ رک متوکلاً بکلہ یں مملکت لردہ یوق دکلدر .
لکن فعلاً امکان تطبیقی بولونسون بولونماسین اودورہ مجبوری بی
تعقب ایدہ جک درجات تحصیلی لا ثقیلہ و بر نسبت معقولہ دائرہ سندنہ

توزین ایدہ بیلیمک ایچون اونی حکماً موجود تلقی ایلہ مک ضرور یدر۔
 بناءً علیہ فلان یاشدن اعتباراً فلان یاشہ قدر تحصیل ابتدائی بہ
 حصر اولونمشدر وبوسنین تحصیل هر کس ایچون مجبوری التعقیدر
 دیہ بر قانون یاپیلیر . حکمی تماماً ایفا اولنور، اولونماز، بوصکرہ
 دوشونیلہ جک بر مسئلہ در. نته کیم بزده ده بوجہت صکرہ دوشونولمکہ
 تعلیقاً اولا قانون یاپیلمشدر وبونک ایچون حدود سن ده تعیین
 ایدلمشدر .

بودوره تحصیلہ عائد اولان درس لر اولیلہ بر صورتلہ ترتیب
 ایدلمشدر کہ اونک منتہاسنہ واصل اولان هر چوجق اولا انسانلغہ
 مماس مزیاتک اک بسیط واک مفید سرمایہ اولیسنہ مالکدر ، و ،
 ارتق حیاتک مادی اولان اقسام احتیاجاتی کافل آلات وادوات
 ابتدائیہ ایلہ مجهزدر . اوقور یازار ، بر آز حساب یاپار ، شورادن
 بورادن معلومات عمومیه یه مالکدر ، والحاصل تام معناسیہ جاہل
 اولمق ذلندن قورتارلمشدر . هر مملکت بودورہ یه عائد درس ترتیباتی
 کند ی مرتبہ مدنیہ وفکر یه سنہ کورہ تنظیم ایلر . یالکز بونی
 تنظیم ایدر کن دقت اولونہ جق نقطہ بونکہ درجات آتیہ آراسندہ
 خط وصلک درز کون اولماسیدر ، اوینہ کہ تحصیل ابتدائینک منتہاسنہ
 واصل اولان بر چوجق ایچون ایلک مرحلہ نصل طبیعتیلہ ختامہ
 ایرمش ایسہ اوندن صکرہ کیاری تعقیب ایدہ جک اولانلر ده بو برنجی

باصه ماقدن یوقاری طیرمانیر کن نه فضله ، خصوصیه ، نه ده اکسیک
برشی بر اقامش اولسونلر .

معارفده پک چوق مترقی اولان بعض شمال مملکتلرنده تحصیل
ابتدائینک دوره مجبوره سندن صکردهده چو جملری بر اقایدرق بر
ویا ایکی سنه ایام مخصوصده رشديه مکتبلرینه دوام ایله مقید
بولوندر مق اصولی واردر که ، بو ، بالطبع ، بزجه موضوع بحث
اوله ماز . بزده تحصیل ابتدائی بی تعقیب ایدن دوره صنوف اعدادیه بی
تشکیل ایدر ، و ، اصل حیاتی تحصیل علوم و فنونه متوقف اسباب
ایله ، فقط بالنسبه خفیف بر سرمایه ایله ، تهیه ایدر جک اولانلرک
اکثریتی بو دوره بی کچیرمش اولانلر ترکیب ایدر .

بناءً علیه بو دوره یه تخصیص اولونه جق سنه لرده اولاد مملکته
ممکن اولدینی قدر حیاتک فعلیاتنه ، مادیاتنه عائد و خادم اولان
معلوماتی و یرمک ایجاب ایدر . بوا ایله بر مرحله در که اورایه و اصل
اولان هر چو جق آرتق کتابلری قاپایه بیلیر ، حیاته کیرر ، بر فکر
آدمی دکل ساده جه برایش آدمی اوله جقسه ، آرتق درجه کافیه ده
مستحضر در . بونک اچو در که بوراده یه واصل اولوتجه بردن
مکتبلرده بر بوشلق حاصل اولور . کویا قطار اصل یو جیلری مص
ایدن ، شهره اک قریب ، حیات مصالحله اک مماس ، بر موقوفده در .
اوندن صکرده ، ده اریاده ، تفرج ، تنزه ، زینت و ثروت موقفلری
کایر . اوچنچی دوره بوصف ممتازی حامل باشلار . بونلریا ایکنجی

دوره نك مکتسباتنه کافی کورونمه ين بر عمر سورمك ، بر معيشت يايماق سوداسيله اوچنجي مرتبه نك صوكنه قدر دوام فکرنده اولانلردن ياخود نظر آمالي داها يوكسكلره عطف ايده رك علمك مناطق عاليه سنه چيقيمق ايسته ينلردن متر كيدر .

ايسته بزده مكاتب سلطانيه ، چوجقلى بواوچنجي مرتبه نك صوكنه قدر كوتورن مؤسساتدر كه اوچ دوره نك اوچني ده احتوا ايدر ؛ يعنى چوجنى الفبادن آلير دارالفنون درجات تحصيلنك أشيكنه قدر كوتورور . صوك سنه لرده بومسافه چوجقلى اون ايكي سنه ده قطع ايتديريليردي . شو حالده بر چوجق آلتي ياشنده مکتبه كيرمش فرض ايدلسه والكموافق احوال دائره سنده تحصيلنى تعقيب موفق اولسه اون سكز ياشنده دارالفنون ايچون مهيا بولونمش اوليوردي . او ياشده باشلايوب هر سنه موفق اوله رق ترفيع صنف ايتك نادراآتجلى ايده بيله جك مظهر يتلردن اولديغندن عموميت اعتباريله اون سكز دكل يكرمى ياشي تحصيل ساطاينك حد منتهاسى اولمق اوزره قبول ايتك دها دوغريدر . هر حالده صوك قرار اوزرينه شاين قيد اولان شودر كه معارف نظارتي اولاد مملكتك دوره سلطانيه يي كچيره جك اولانلرينه بر سنه لك بر فضله عمر اتخاف ايديور . بوجمله يي بالالترام بوشكلده يازييورم ، وء دوره سلطانيه يي كچيره جك اولانلرينه دييورم . حقيقت حالده اويله مى ؟ بو بر سنه لك تصرف ياللكز او دوره نك شا كردانه

مخصوص بر امتیاز شکننده ایسه دینه بیلیر که قرارک لطفی آنجق دارالفنونه انتساب ایدہ جک اولانلری بر سَنه تعجیل ایتمکدن عبارتدر. حتی دها ایلری کیدیلہ رک دینه بیلیر که ا کردرس ترتیباتنده شا کردانه یوکلہ دیلن حمولہ نک فضلہ سی آتیلما مش، حشویات بر طرف ایدیلہ رک سرمایہ عرفانک جوهری محافظہ اولونہ مامش ایسه، بو حقیقت حالده، دارالفنونه فضلہ طلبہ بولمق ایچون بر خدعه دن، بر صنیعه دن عبارتدر؛ عادتاً دارالفنون لهنه مکاتب سلطانیه دن بر سَنه قیرپیلما مشدر. بو مملکت وضعیتمده بولونان بر یرده حیات فعاله یه، حیات فعالیتک هر شعبه سَنه ممکن مرتبه سریع واسطه لره وقیصه یوللردن جهاز یتشدیرمک تحت مجبوریتده اولدیغندن ولو بوشکلده اولسه بیلہ معارف نظارتنک قرارینی مصیب بولما مق ممکن دکلدر. هله دارالفنون و متعلقاتنه طلبه بولمقده، بالخاصه حرب سنه لرینک تخریباتندن صکره، نه درجه مشکلات چکیلدیکسنه واقف اولانلرجه بو قرارک اصابتی پک عیادر. آنجق قرارک فائده سی دها کنیش بر دائره یه شامل اوله بیلیمک ایچون پک زیاده شایان تمئیدر که بو بر سنه لک تصرف یالکیز دورہ سلطانیه یه دکل - صنوف ابتدائیہ ایچون بلکه امکان تطبیق بولونہ ماز - فقط اعدادیه یه ده اجرای تأثیر ایتسین؛ یعنی درس ترتیباتنده اوله اختصارلر، اوله تصرفلر وجوده کتیریلہ بیلسین که هر سنه نک حوصله استیعابنه، یو کسان بر سنه نک سرمایہ تحصیلی، پارچه پارچه صیقیشدیریلہ بیلسین. بوفکری شکل

آخرده افاده ایتک لازمسه دینه بیلیر که مکاتب سلطانیه اون ایکی سنه دن اون بر سنه یه ایندیریلیر کن ثروت مکتسبات هیج برزیا نه اوغراما-ین. مکاتب سلطانیه نك الحاله هده مرعی درسارنده زواند وحشویاتی طی ایدهرک بوشلقاره دها مفید و حیات عملیه ایچون دها موافق شیلرک صیقیشدیرلمه سندن عبارت اولان بواصولک تطبیقی او درجه مشکل اولماسه کر کدر. حتی برازمشکلپسندانه دوشونولنجه ادعا ایدیه بیلیر که بواصول لائق اولان اعتنا ایله مظهر تقید اولسه اون بر سنه نك ایچنه صیغدیریلان سرمایهدن فضله معلومات مفیده قویه بیلیمک، وبویله جه علی الخصوص هر وقتدن زیاده عناصر رقیبه آراسنده بر عرصه مبارزه تشکیل ایدهرک اولان مملکت ایچون دهامؤثر آلات و ادوات ایله مسلح مجادلر یتشدیرمک پک ممکندر. معارف نظارتنک موضوع بحث اولان قرارندن تفرع ایدیه بیله جک نیجه مسائل مهمه وار که ولو بویله بر زمانده اولسون محتاج مناقشه در، لکن بونلره بر کوچک مقاله نك دار دائره سنده ساده جه تماس ایچون بیله فرجه بولونه ماز.

۱۳۳۷





ياشلىرىك حقى

هر بشقه نועدن اولان تقدیرده در حال بوراده یوزده شو قدر نسبتنده توقف ایتک لزومنی درک ایدن براهتزاز ایله نقطه قرارى اشارت ایده بیلسین .

سامعیندن برى — مملکتک همان بوتون عمرینى تدریس ایله کچیرمش معروف بر سیاسى که حیات علمده صوگ مرحله دیمک اولان دارالفنون کرسیلرندن برینى اشغال ایتمکده در — اولایاواش ، فقط کیتدکجه یوکسه لن بر سسله شو ملاحظاتی سرد ایتدی که همان عیناً نقل ایدیورم :

— حیاتده بردن زیاده طرفک مناسباتى تدویر و توجیه ایده جک اولان عهد و علائقده حقوق و وظائف متقابلاً یورور . عاقدین مساعدات متقابله زمینى اوزرنده یورومکه موافقت ایتدکجه متناظراً تقرب ایدن بر خطایله پیدای مواصله ایده من ، بناءً علیه اثر مشترک وجوده کله من . یاشلیلرک کنجلره قارشى وظائفندن بحث اولونورکن حقوقندن ده بحث اولونمق امر ضروریدر . نصل بر پدر چوجقلرینه قارشى بر طاقم سلسله وظائفه مقید ایسه چوجقلرده اوکا بر چوق قیود ایله مربوطدر ، و بونلردن وارسته قالمق تمایلاتنده تعند ایتک نسبتنده کندیلرینه تعلق ایدن وظائفک کسب رخاوت ایته سنه سببیت ویررلر .

مدرس نطقنک موضوعنى ترسیم ایدرجه سنه بونظریه نی بویله جه ایراد ایتدکن صوکره علاوه ایتدی :

— بجه ياشليرك كنجاردن طلب ايتمكده غير قابل ارتياب
 بر قطعيتله حائز حق اولدقلرى بروظيفه وارددر: اونلر طرفندن،
 ولو صوري، ولو جعلی اولسون، حرمت آثاری ارائه سی ...
 بر کلن نسل بر کیدن نسلدن دهامترقی، دهامنور اوله بیلیر،
 حیاتک پیمه دن، ایچمه دن، اوطوروب قالمه دن، کینوب قوشامه دن
 باشلا یه رق یوکسه یوکسه اک مرتفع شوا هقه قدر چیقان مختلف
 صفحاتنده نسللری یکدیگرندن آیران فروق و فواصل وجوده
 کله بیلیر؛ فقط بونلرک هیچ بری، یعنی اختلاف رؤیت، بر
 طرفک مسن دیگر طرفک کنج اولماسنه مانع تشکیل ایده من.
 اوندن دولاییدرکه اوزرنده برابر یورونن زمینلرده آتیه حق
 خطوطلرک فرققلری نه اولورسه اولسون آرایه سنه لرک کتیرمش اولدقلری
 مسافه یی خیالاً، رسماً اولسون چیزن بر خط لازمدر. بو هر
 زمان هر یرده بویه ایدی، حالاده بویه در، و نه زمان دهام زیاده
 بویه اولمشسه او زمان انسالک مناسبات متقابله سی دهام فضله بر
 صحت و سلامتله جریان ایتشددر. تجدد، داها اولکیلری، دهام
 اسکیلری استحقار دیمک دکلدر. شرق بو خصوصده اک یوکسک
 مرتبه یی ارائه ایدردی، مع التأسف بو کون بوقاعده نک اک کوزل
 مثاللری غریبه آرامغه مجبور اوله جق درجه ده عنعناتدن آیرلمش
 اولیورز. بونک اک آجی بر مثالنی خاطر اتمک آراسنده بولویورم.
 مسئله یی پک تنویر ایده جک بر حکایه اولدیغندن لطفاً دیکلر سکر.

غرب مملكتلرنده ، بالخاصه ، غرب نام عموميسيله ياد ايديلن ديار عرفانك شمال جهتلرنده سياحت ايدنلر بيليرلر كه چو جقلرك ، كنجلرك على الاطلاق ياشليلره ، مع زياده اختيارلره هر وسيله ايله تظاهرايدن بر حرمتلري ، بر رعيتلري واردلر . سزه غلبه لقمده ير كوسترلر ، ازدحاملرده يول آچارلر ، قيرلرده سلام ويرلر ، خدمتكزه قوشارلر ؛ الحاصل سزه مفيد اولمق ايچون ، ياخود ، سزك خوشكزه كيتمك ايچون عادتاً بر وسيله قولالارلر . بو بزدهده بوبله ايدى ، اونك ايچون كنجلرك ياشليلره نه يولده جميله كارلقلري اوله بيله جكنه پك تازه خاطرات ايله بزلر واققز . ايشته بو كون اورالرده ينه بويله در ، بزده ... بزدهده دائماً بويله در ، ديه مه ديكمه چوق متأسفم . باقىكز نه دن ؟ ..

حرب عمومينك ظهورى احتمالاتيه مملو كونلردن برنده سالچبورغ شهرينك خارجنده بلديه باغچه سنده ايدم . آغاچلرك آلتنده ، بر سدير ك اوستنده ديكه نيوردم . باغچه تماماً تنها ايدى ، يالكز اوتنده ، تا ايجريلرده ايزجيلردن مركب بر كنج آلاي قوناق ويرمشلردى . غالباً بوراده ايجه قاله جقلردى كه متادياً قوناق ويردكارى نقطه دن شهره ايصال ايدن طريق اوزرنده بونلردن بررايكيشر ، اوچربشر كشيدن متشكل طاقملري كيدوب كليورلر ، شونى بونى تدارك ايدنيورلردى . تصادف نى كذرگاهلرنده بر نقطه ده بولندير مشدى ، هپ اوكدن كچيورلردى ؛ كولوب شاقه .

لا شەرق ، قوشوب اوينايرق ... بلكە بويلە ، طاقم طاقم ، اللى
 كنج كچدى ؛ و بولردن هيچ برى اولمادى كە ، او كمدن كچر كن ،
 بو بياض صقاللى ، دوزكون قياقتلى آدمە ، باشندە كپيسى وارسە
 اونى چيقاروب قولنك بوتون امتدادنجه آشاغى يە اينديرەرك ،
 ياخود باشى آچىقسە اوزون صارى صاحارندە زرین بر تموج
 حصوله كىرن شەيد و ممدود بر سىلكىنتىلە اكيلەرك سلام
 وىرمەش اولسون . بو سلام بياض صقالە ، قىليغمە ، قياقتە ،
 الحاصل بو ظواهر ك دلالت ايتەسى لازم كلن محترميته اوده نمك
 ايستەن بر دين ايدى .

بر چوق امثال آراسندە بو كونك شو خاطرەسى بىندە پك
 درن : انز براقش ايدى . وقتا كە استانبول : عودت ايتدم ؛
 پايتخت سفر برلكك هرج و مرجى ايچندە ايدى . بو ميانده دارالفنون
 افنديلىرى دە خدمت وطنيه لىنى ايفايە دعوت اولونمش ، حتى
 دارالفنون بناسى بياشغال آلتە آلمش ايدى . عادتا مملكتى
 طائمايه جق بر حالده بولدم . ايلك ايشلارمدن برى معنوى يوردمە
 بر زيارت اولدى ، مديريتك نرەدە بارينديغنه دائر معلومات
 آلدقن صوكرە بويوك بنادن اورايە متوجهاً دار بر يولدن كچمك
 اوزرە ايدم ، يولك اوستندە بش آلتى دارالفنون افنديسندن
 مركب بر زمرة كوردم كە هپ عسكر قياقتندە ايدىلر . باشلىرى
 چويرن و بكا باقان اولدى ، فقط سلام وىرن اولمادى ، بلكە

عینی چاتینک آلتندە سنەلرجه برابر بولوندقلری بو اختیار مدرسی
 بر کره جک اولسون کورمه مشلر و بو کون اونى طانیه مامشلردی؛
 لکن بیاض صقالی ، و منتظم قیافتنی کورمشلردی . هر حالده
 بو آدم مسن بر افندی ، اوکا سلام دکلسه بیله یول ویرمه لیدی ،
 یول ویرنده اولمادی . نهایت ، برازطوتقون ، برازده بلکه دها
 صریح بر معنای استخفافه تصادف قورقوسیله چکینکن ، بکله دم؛
 نه دن صوکره ایچلرندن بری ، آرقه سی دونوک وایکی الی آرقه سنه
 باغلانمش بری ، باشی چویرمه یه رک ، یالکیز بر آدیم ایلریله یوب
 بکا کریدن کچمک ایچون آنجق کافی بر یول تصدق ایدرک دیک
 بر سسله : - کچ ، افندی ، کچ !.. دیدی .

مدرس حکایه سنی بوراده بیتردکن صوکره سس چیقاران
 اولمادی . بردن صوغوق بر هوا اسمش کییدی ، دالغین کوزلرله
 هر کس بر طرفه باقدی . بو حکایه یه بوتون شمول معناسنی
 ویرمکدن تماشاییدن بر حسله بحثی براقق لزومنده ضمنی و طبیعی
 بر اتفاق حاصل اولدی .



مصاحبه صنعتی

هفته سنك او چ بش كوندن ايكيشر ددرر ساعتی ايشه حصر
ایتمكه متباقیدنه تنزه و تفرجده ، شوراده بوراده تجمعده محل
صرف آرایه بیلیدی .

هر محله نك ، سرین کولکه لرینه کایشی کوزل اسکمله لر آتیه جق
بر چنار آلتی ، دیواری دینده نارکله لر قوروله بیه جک بر مسجدی ،
بر سبیل کناری ، یاخوده ، قیشین بوغولی جاملری آلتنده صیجاق
هواسنه التجا اولونان بر کوچك قهوه سی واردی . چوجق لره
ازاد ویرلدکن صکره محله مکتبنك خواجه سی قاپسك او کنه
صندالیه سی آتار ، امام افندی جماعته ایکندی نمازینی قیلدیردقدن
صکره آبدست تازوله مك ایچون قوللرینی صیغایه رق آقشام اذانه
انتظاراً برقاج ساعتی دیکله مکه و سویله مکه حصر ایدر ؛ بربرده ،
مناوده ، محلیجینك ، توتونچینك دکانده قلمندن جیتمش کتبه ،
چارشیده دکاتی قیامش اصناف اوه دومه دن اول طاقم طاقم
طوپلانیردی . بوبله جه ، بختیار بر عمرک آنجق صفای خاطرله
دولدیر بیه بیه جک ساعتلریده صنعت مصاحبه تاسوقاقدن باشلاردی .
تره نك گوشه سنده چاوتنی صاتان اوزومجیدن قارشیده سینک لری
قوغالایان قداثجی یه بر لطیفه اوچار ، اوتوده اک لطیف بر اداسیله
شیشه سی تا باشنه قدر یوککله تهرک بر قطره سی صیچرا تمقسرین
دواجقه یوقاری یه قلدیردینی بارداغنی دولایان شیراجینك پر نشوه
سی : حیات ویریور ! دیرکن بریده موسمه مناسب صاتیله جق

يكي برئي دوشونن حلواجينك بر شاقه سي قارشيلاشير ، و ايسته
تا قالديرملردن يوكسه ، يوكسه اينجه ان بر رسوخ و ممارسه ايله ،
طبقاتي آشدقجه مرتبه مرتبه يوكسه ان بر نزاھت و ظرافتله هر صنف
خلطه بر كوروشمك ، سويلشمك قابليتي تفيض ايدردى . هاله
كبار صنفك مجالساتي ، همان بوسنفك هر ممالك ، هر سن ازبائنده ،
برضيافت فكريه ايدى .

آز چوق اسكيش ، اوزاقلانمش ويازيق كه بردها عودتي
اميد ايديله ميه جاك قدر نسيانه قاريشمش زمانلره ارجاع فكر
ايد بيلن نسلار بو طرزده جمعيات كبارانه يي بك ايني تخطر ايدرلر .
استابول قوناقلري ، بوغاز ايچي ياليلري ، چامليجه كوشكلري ،
صكره برازدها وضع فقط علم و ذكا منطقه لرينه ده قريپ ،
دها ماس اوله رق مدرسه لر ، كتبخانه لر ، درگاهلر ارباب فطانت
ودرايتك ، ظريف ، كزیده ، مضمون پرداز ، فقره كو ، نكته سنج ،
رموز آشنا احباب ذكاوت و فراستك تجمعگاهلريدي . باشده
سرای همان اوله رق باب عالينك ، باب مشيختك معيار و مقياسنه
رياست ايتدكلري بر قانون معاشرت و مصاحبت واردى كه بوتون
طبقات خلق اينجه سوزجكلرله بر زلال ذكادن مستفيض ايدردى .
اوزمانك لسان مصاحبه سنده حكمفرما اولان تربيه مستثنايه
واقف اوله جق قدر يوكسك مناطق جمعيتيه مجاورتده بولونمش
روملردن ، ارمني لردن ، اجني لردن بيله بر چوق ياشيليره تصادف

اولونئورکه ضیاعه اوغراتیلش بر اثر صنعتیه تاهفخوان اولان
فنائس اشنالره مخصوص برکوکس کچیریشیله: - آه؛ افندم، اونه
کوزل زماندی! نه کوزل قونوش-وردلردی! نه حیران حیران
دیکلردک!.. دیرلر.

بو مصاحبه لرك ایکی خاصه متمایزه سی واردی: لسانيک تحت
وسفوتی، موضوع لرك، كرك هواثیاته، كرك جدیاته عائد اولسون،
مشخیتی. و بوتون بو اوصاف مصاحبه یه رفاقت ایدن ارکان وادابك،
خلاصه، مراسم معاشرتك زینتی. بلاشبهه ادعا اولونه بیلورکه
بر چوق زمینلرده مشاهدده اولونان انحطاط قیلندن مصاحبه
صنعتندهده برتر دینك بحر انلرینی کچیرمکده یز.

بو، وهله، عکسنی فرض ایتدیره بیله جك بر ادعایه بکزر.
مثلا بوتون لسانلری تقید ایدن بر اداره تضیقندن صکره ماته
سربستی کلام بخش ایدلش ایکن، کرسیلر قورولش، خطاییلر
یتشمش، مطبوعات طاقم طاقم ارباب قلمك هر درلوسا ساحتنه سربست
صحیفه لر آچش، دارالفنونده علنی درس لره فوج فوج سامعین
دولش، حتی دارالبدایع صحنه سی کزیده بر لسان مکالمه یه هر کجه
اولاشیله جق بر نقطه ارتقا تعیین ایتش ایکن، هله منتسبین عرفانك
عددی ماخی ایله قیاس قبول ایتمه یه جك بر راده یه واران بوصوک
بطنده، بو ادعانك همان بطلاننه حکم ایدیله بیایر. یاسایلردن صادر
اولونجه بوکا کنه جله که قارشى اختیارلنك بر عزو کیندارانه سیدر

بیله دینسه بیلیر . فقط ظن ایدیورم که هیچ اوילה دکل . بوتون
 کچمش زمانلره عائد، تا مکتب چوجقلغندن باشلایه رق کنجاسکمه،
 بالاخره، دهها آغیر باشلیاق زمانلر مه متعلق خاطرات ایله بو کونک
 مشاهداتی مقایسه ایدیورم ؛ ویک بیطرف بر حاکم عادل صنعتنده
 قاله بیلدیکمه امنیتله قرار ویریورم که بو کونک نسلی مصاحبه صنعتنه
 هیچ واقف دکل ؛ مگر که بو صنعت حقنده تلقی طرزی دیکشمش اوله .
 بو تر دی، البته فقدان عرفاندن، یا خود، مکتساب و معلوماتجه
 انسال سابقهیه نسبة بو کونک کنجاسکدنک ده پست بر موقعده
 بولونمهندن متولد دکل . بالعکس ! نسل حاضرک ثروت فکریه ده
 کچمش قرنلره هر حالده حائز تفوق اولدیغنه، حتی یالکزر فکرأ
 دکل، لسانآده اسباب رجحانه مالکیت دعواسنده بولونه بیله جکمه
 قائلم . بو حادثه بی اهل و تسبیبه حمل ایتک اکتفا اولونه بیله جک
 بر صورت حلدیر . بوسوک کونلرمک بر خاطر هندن بحث ایدیم .
 بوغاز ایچندن عودت ایدیوردم، تصادف بنی کچیریله جک
 اوزون ساعتلرده نسبة کنجاردن متشکل بر زمردنک مصاحباتنه
 ضروری بر سامع یایمشدی . اونلرجه طائلماش اولوق، دیکله مکدن
 بشقه چاره اولمایان بو مصاحبه ده بنی سویله مک مجبور اولمقسزین
 خارجدن ایشیتیمک موقعنده طوتیوزدی، و، بو موقع آاز چوق
 قابل تحمل ایدی . خصوصیه بالضروره دیکله بن بو مصاحبه ده بر
 وسیله تدقیق بولش اولیوردم . مأموریندن یا خود طلبه دن، هر

حالده منور و منتخب بر صنفدن اولدقارینه حکم ایتماک ممکن
اولمایان بو ذوات پک ائی کینمشلردی ؛ فقط پک فنا اوطور -
یورلردی . بری برلرینه سیغاره ویریشلرندن کبریت طوتوشلرینه
قدر وضعلردن ، محاورهیه رفاقت ایلهین ، کلهلرک جملهلری تنقیط
وتفسیر ایدن اشارتلردن باشلایهرق کوزلرک باقیشلرینه ، وجهلرک
اشمئزارلرینه قدر بوتون تفرعات صراحة چرکیندی . بلکه پک
بی تکلف دوستلاراسنده پک حریم بر یرده تجویز اولانه بیاهجک
لاابالیکلرله بو کزیده کنجیلر بو عالی محله ، عمومک گوزی
اوکنده ، سوقاق چوجوقاری کیدی . بوراده اسکیدن باب مشیحتک ،
باب عالینک سوقاقلره قدر اجرای تاثیرایدن تربیه سنه مقابل یوقاری
طبقه لره قدر صیچرایان سوقاق چاموری کورولیوردی . موضوع
مکالمه نه ایدی ؟ بونی تعیین ایتماک ممکن دکل ، هرشیدن بحث
ایتدیله ، فقط ایکی ساعت ایچنده ، بلاشهره سنه لرحه تحصیل کورمش ،
کتاب او قومش ، مصاحبات علمیه و ادبیه دیکله مش اولان بو
یینلردن نه معرفته ، نه صنعته دائر بر کله چیقما دی ؛ حتی
نه بر اینجه فقره آکلاتان ، نه منتظم بر فکر سرد ایدن اولما دی ،
اوکون ، البته صنعت مصاحبه ده تردی حاضرک اک بد بحث
بر مثالنه شاهد اولمش ایدم . بو هر وقت ؛ هر یرده ، هر
صنفده ، نسلک هر شعبه سنده ، البته ، بویله دکل ؛ فقط نه دینیرسه
دینسین ، نه قدر نیکیینانه فرضیات ایله تعدیل اسفه چالیشلیرسه

چالیشاسین ، هر حاله بو کون دون قدر مصاحبه صنعتیه عطف
دقت ایتمه یور.

خاطراتمی طویلا یه رق بر خلاصه یانجه او مصاحبه لری خیالاً
شویاه کوریورم : بر یالینک ریخته ناظر ، اوکنده دکزک
مائلیکاری پارلایان بر اوذا سنده یز . خفیف بر روزکار بیاض خاصه
برده لری اصرار ایتمه یز جمله جملرله یاواش یاواش شیشیررکن عین
کنجیلر ، بوغاز ایچندن دونوشده بکا او بد بخت مثالی کوسترن
کنجیلر ، اوراده ، فقط مثلاً یکر می سنه ، اوتوز سنه اول ،
ینه بو یاشده ، کوروشیورلر . ینه لا ابالیانه ، فقط غایت موزون
و اعتناکار اولمغه متقید اوضاع ایله . . . سیغاره ویررکن
مساعده ایسته یز ، کبریت طوتارکن بلکه واقع اولان برقصوردن
طلب عفو ایدن بر ادالری وار . کوزلرنده مخاطبی دائماً استمزاجه
لزوم کورن بر اندیشه نك جوالیتی ، دوداقلرنده احتمال ناخوش
کورونه بیله جاك کله لرك دیکنلرنی تورپوله یز بر تبسمك کولکه سی ،
وجهلرنده حتی مناقشه ایدیلن مخاطبلره قارشى اینجتمکدن محترز
بر تقیدك افاده سی . . . موضوعلرده تبدل و تحول وار ؛ فقط برندن
دیگرینه کچیلیرکن مکالمه نك خطاوه لری سورجه یور ، مجلا بر
دوشه مه اوستنده یورونورجه سنه قایله رق کچیلیور ، یاخود ،
پرنده لرده بر مهارت پرواز وار ، سوز دوشه جاك ظن اولونورکن
بر قوش خفتیاه بر طرفه قونیلیویریور . افکارده سوزولوب کیدن

بر خرام لایف وار که سزی صالایور. عادتاً بر سماعیخانه ده لطیف
 بر آهنگ ایچنده اعتلایه بکزه یین بر دورانده شیشوب قاباران فقط
 یکدیگرینه سورونوب انخالی بوزولمایان تنوره لرله مولویله
 مخصوص بر ظرافت طیران آراسنده فکر لر، جمله لر دونیور،
 اورادن اورایه کچور، شیمدی چارپیشه جق، شیمدی بر قضا
 اوله جق، شیمدی بر غلظتله بوتون بو آهنگ بوزوله جق ظن
 ایدیلیرکن، باقیورسکیز. خفیف بر مصادمه احتمالی کان مهارتله
 آتلاتیلمش، فکر لک بری بر طرفه، دیگر ی اوتله طرفه، ایکی کلبک
 جنبشیه کچمشلر. بعضاً شورادن بر نکته، اوتهدن بر جناس،
 آره صره پک جدی بر بحثه اوفاق بر قهقهه قاریشدیران بر فقره...
 وبویاه ساعتلر کچور، هر دقیقه سینه بر نوعدن بر ذوق اصابت
 ایده ایده نصل کچدیکنه دقت اولونمقسزین اوزون ساعتلر کچور؛
 صکره هر کس، حیاتندن، کونندن، دوست دوستندن، حتی
 دشمن دشمنندن ممنون، مطیب آریلیور.

حال بوکه اوکون او بر قایق رفیق بوغازایچی دوئمه سندن صکره
 یکدیگرندن آریلیرکن هیچ بری هیچ برشیدن ممنون قالامشدی؛
 و، اعتراف ایده دم، بنده، اولنلرک بلا اختیار ساعتلرجه سامعی
 اولان بنده، اولنلردن ممنون قالامدم.

کلیات آثار - تمثیل لایتنر

عشاقی زاده خالد ضیا بک آثار مختلفه سندن بر طاقنک تنقیحیه متباقیسنی
بر شکل قطعیده تلفیقہ ابتدار ایله مشدر . بو صورتله تشکل ایدن سلسله دن
انتشار ایدنلر :

مائی و سیاه	بویوک حکایه	سکزنجی بیک
بر شعر خیال	کوچک حکایه لر	اوچنجی بیک
بر حکایه سودا	کوچک حکایه لر	ایکینجی بیک
عشق ممنوع	بویوک حکایه	بشمنجی بیک
کنارده قالمش	مقالات مختلفه	
فروزان	اثر تماشا	ایکینجی بیک
کابوس	اثر تماشا	ایکینجی بیک

دردست احضار :

فاره	اثر تماشا
نمیده	بویوک حکایه
اسکی شیلر	آثار ادبیه
اونی بکارکن	کوچک حکایه لر
قیریق حیاتلر	بویوک حکایه
اختیار دوست	مقالات لهویه

محررک ادبیات جدیده کتبخانه سنده انتشار ایدن :

بر یازک تاریخی { کوچک حکایه لر ایکینجی بیک } موجودلری قالمامشدر .
صواغون دمت { کوچک حکایه لر ایکینجی بیک }

نام آثار یله دیگر کتابلری ده احوال مساعد اولدجه کلیات آثار سلسله سنده
یکیدن طبع اولنه جقدر .

DATE DUE

To renew
call 292-3900

MAIN STACKS

